



INSTITUTIONES  
THEOLOGICÆ  
MORALIS

AB

ILLUSTRI ADMODUM REVERENDO DOMINO

ANDREA POHL

IN TOTO ROSSIACO IMPERIO PRÆSBYTERORUM SÆ-  
CULARIUM CONGREGATIONIS MISSIONIS VISITATORE

CONSCRIPTÆ

ET

Ad usum, atque commodum Ecclesiastico-  
rum Virorum

TYPIS IMPRESSÆ

*Sp. Regdinus Siennicki C. S. M.*

---

TOMUS II.

---

*Comparavit. Per: fl. 10.*

---

VILNÆ IN LITVANIA

Ad Domum Congr. Miss. Montis SS. Salvatoris  
Anno 1810.

137. Priem. C. VIII. 13



# E L E N C H U S

*Eorum, quæ in hoc opere continentur.*

## TRACTATUS DE SACRAMENTIS IN GENERE;

### CAPUT I. De Natura & Ministro Sacramentorum.

#### ARTICULUS I. De Natura Sacramentorum

- Quæres 1. Quid sit Sacramentum? - - - 1  
Q. 2. Quibus Sacramenta perficiuntur? - - - 2  
Q. 3. Quid sit Materia & forma Sacramenti? - - - 2  
Q. 4. Quomodo in Sacramentis materia, & forma sibi debeant coexistere, seu quæ debeat esse utriusq: simultas, atque unio? - - - 3  
Q. 5. Utrum mutatio formæ, ac materiæ obsit validitati Sacramenti? - - - 4  
Q. 6. Quot modis in formam mutatio invehiri possit? 5  
Q. 7. Utrum peccet qui materiam, aut formam Sacramenti immutat? - - - 7  
Q. 8. Utrum in conficiendis Sacramentis liceat uti materia, aut forma dubia? - - - 8  
Q. 9. An liceat supra eandem materiam repetere formam Sacramenti? - - - 9

#### ARTICULUS 2. De Ministro Sacramentorum.

- Quæres 1. Quid sit Minister Sacramentorum? - - - 9  
Q. 2. Utrum ad valorem Sacramenti requiratur in Ministro fides & Sanctitas? - - - 10  
Q. 3. Utrum peccet Minister improbus Sacramenta conficiendo? - - - 10  
Q. 4. Quid facto opus sit ei, qui reus est peccati mortalis, & interim urget necessitas administrandi Sacramenta? - - - 11  
Q. 5. Utrum liceat a malo Ministro Sacramenta recipere 12  
Q. 6. In Ministro Sacramenta conficiente requiriturne intentio? - - - 14  
Q. 7. Qualis ergo requiritur in Ministro intentio, ut valide conficiat Sacramenta? - - - 15  
Q. 8. An valeant Sacramenta sub conditione collata? 17

Q. 9. Utrum liceat Sacramentis, dum conficiuntur, conditiones apponere?	17
Q. 10. An tenetur Minister ritus ab Ecclesia in conficiendis, atque administrandis Sacramentis præscriptos observare?	18
Q. 11. An aliquando licet Sacramentum simulare?	19
CAPUT 2. De præviis ad Sacramenta recipienda dispositionibus, & eorum effectibus	
ARTICULUS 1. De præviis ad Sacramenta recipienda dispositionibus.	
Q. 1. Ut valide recipiantur Sacramenta, requiritur ne in recipiente intentio?	20
Q. 2. Ad fructuose Sacramenta percipienda, quæ requiruntur dispositiones?	21
Q. 3. Quid facto opus sit illi, qui sine prævijs gratiæ, ac pietatis dispositionibus Sacramenta suscepit?	22
Q. 4. Non recte dispositis, ac peccatoribus licetne Sacramenta ministrare?	23
ARTICULUS 2. De effectibus Sacramentorum	25
Quæres 1. Qui sunt effectus Sacramentorum?	25
Q. 2. Quæ Sacramenta imprimunt characterem?	25
Q. 3. Qualem gratiam Sacramenta producant?	26

## TRACTATUS DE SACRAMENTIS BAPTISMI ET CONFIRMATIONIS

### CAPUT 1. De Sacramento Baptismi

#### ARTICULUS 1. De institutione, materia, ac Forma Baptismi, ejusque Ministro. Pag:

Quæres 1. Quid sit Baptismus?	27
Q. 2. Quæ est Baptismi materia?	28
Q. 3. Quæ sit materia Baptismi proxima?	29
Q. 4. Quæ sit Baptismi Forma?	30

#### ARTICULUS 2. De Ministro Baptismi

Quæres 1. Sacramenti Baptismi, quis est Minister?	32
Q. 2. Dum in casu necessitatis Baptismus conferri debet, quis ordo inter Ministros servandus est?	33
Q. 3. Utrum unus a pluribus baptisari, & plures unum baptisare possint?	34
Q. 4. An liceat extra Ecclesiam baptisare?	35
Q. 5. Quid de Patrini statuendum, ac tenendum sit?	36
Q. 6. Quantum attinet Baptismi administrationem, quæ Parochus præstare, & adimplere debet?	37
Q. 7. Qui sunt Baptisandi?	38



Q. 8. Quid de Monstris sentiendum sit?	ibide
Q. 9. Amentes & furiosi possuntne baptisari	39
Q. 10. Quid de liberis infidelium tenendum sit?	40
Q. 11. Quæ requiruntur, ut adultus digne & cum fructu Baptismi Sacramentum recipiat?	41
ARTICULUS 3. De proprietatibus, & effectibus Baptismi	
Quæres 1. Quæ sunt præcipuæ Baptismi proprietates?	ibide
Q. 2. Quibus, & quomodo Baptismus est ad salutem necessarius?	42
Q. 3. Utrum Baptismus iterari possit?	ibide
Q. 4. Quid facto opus sit, quando circa Baptismum dubium occurrit?	43
Q. 5. Qui sunt effectus Baptismi?	45
CAPUT 2. De Sacramento Confirmationis	Page
Quæres Quid sit Confirmatio?	45
ARTICULUS 1. De Materia, Forma, ac Ministro Confirmationis.	
Quæres 1. Quæ est Materia Sacramenti Confirmationis?	ibide
Q. 2. Quæ est Forma Confirmationis?	46
Q. 3. Quis sit Minister Confirmationis?	ibide
Q. 4. Quibus Sacramentum Confirmationis conferri possit?	47
Q. 5. Quæ requiruntur dispositiones ad digne & fructuose recipiendum Confirmationis Sacramentum?	48
ARTICULUS 2. De proprietatibus & effectibus Sacramenti Confirmationis.	
Quæres 1. Qui sunt effectus Sacramenti Confirmationis	49
Q. 2. Quæ sunt Confirmationis proprietates?	ibide
Q. 3. Quæ in conficiendo Sacramento Confirmationis adhiberi solent cæremoniæ?	50

## TRACTATUS DE SACRAMENTO EUCHARISTIÆ, ET MISSÆ SACRIFICIO.

### CAPUT 1. De Sacramento Eucharistiæ.

Quæres 1. Quid sit Eucharistia?	51
ARTICULUS 1. De Materia ac Forma Eucharistiæ.	
Quæres 1. Quæ sit Materia Eucharistiæ?	52
Q. 2. Utrum valeat consecratio sive, in azymo, sive in fermentato pane?	53
Q. 3. Quæ sit Materia Calicis consecrandi?	54
Q. 4. Vino consecrando debetne aqua misceri?	54
Q. 5. Utrum utriusq; speciei, panis scilicet & vini consecratio necessaria sit?	55

- ~~~~~
- Q. 6. An & quomodo Materia consecranda, consecranti  
præsens esse debeat? - - - - 56
- Q. 7. Materia consecranda, debetne per intentionem  
Consecrantis determinari? - - - - 57
- Q. 8. Quid agendum sit Sacerdoti, qui de hostiarum con-  
secratione dubitat? - - - - 58
- Q. 9. Quid sentiendum de vini guttis, quæ Calici à re-  
liquo continuo divisæ adhærent? - - - - 53
- Q. 10. Quæ sit Forma Eucharistiæ consecrandæ - 53
- ARTICULUS 2. De Ministro & usu Sacramenti Eucha-  
ristiæ.

- Quæres 1. Quis sit Eucharistiæ consecrandæ Minister? 59
- Q. 2. Quis sit Minister Eucharistiæ distribuendæ? - 60
- Q. 3. An quis sibi ipsi Eucharistiam ministrare possit 60
- Q. 4. Utrum ad Eucharistiam distribuendam requiratur a-  
liqua jurisdictio ac potestas? - - - - 61
- Q. 5. Quæ in administranda Eucharistia advertenda sunt 61
- Q. 6. Quando tenetur Parochus Eucharistiam ministrare? 63
- Q. 7. Quibus danda est Eucharistia? - - - - ibid:
- Q. 8. Quibus deneganda est Eucharistia? - - - - 66
- Q. 9. An & quibus Eucharistiæ receptio sit necessaria? ibid:
- Q. 10. Quæ circa receptionem Sacri Viatici annotanda  
sunt? - - - - 67
- Q. 11. Utrum extet aliqua lex Ecclesiæ præcipiens Eu-  
charistiæ sumptionem? - - - - 68
- Q. 12. An frequens esse debeat Eucharistiæ receptio? ibid:
- Q. 13. Circa Eucharistiæ usum, quæ esse possunt Regu-  
læ? - - - - 69
- Q. 14. An Communio sub utraq: specie sit ad salutem  
omnino necessaria? - - - - ibid:

CAPUT 2. De Effectibus Eucharistiæ, & dispositionibus  
ad eam digne suscipiendam necessariis . . .

ARTICULUS 1. De Effectibus SSmæ Eucharistiæ?

- Quæres 1. Qui sunt præcipui Eucharistiæ Effectus? 70
- Q. 2. Utrum Eucharistia peccata deleat? - - - - 72
- Q. 3. An & quomodo Eucharistia delet venialia peccata 73
- Q. 4. Utrum Eucharistia pœnam etiam temporalem pec-  
catis debitam remittat? - - - - ibid:
- Q. 5. Sumpta an non solum sumentibus, sed et alijs pro-  
desse possit? - - - - 74

ARTICULUS 2. De dispositionibus ad Sacram Eucha-  
ristiam digne recipiendam requisitis?

- Quæres 1. Quæ prærequiruntur dispositiones ad digne &  
fructuose Sacram Eucharistiam recipiendam? - 74

Q. 2.



- ~~~~~
- Q. 2. Quo jure ad Sacram Communionem Jejunium requiritur? - - - - - ibid:
- Q. 3. Quando jejunium ad Eucharistiæ sumptionem requisitum solvitur? - - - - - 75
- Q. 4. Solviturne jejunium, si in stomachum traiciatur res quæpiam, vel non comestibilis, ut ossiculum, Papyrus, vel comestibilis quidem, at non traiciatur per os sed per nares, ut Tabacum, aqua Ungarica? - 76
- Q. 5. An in hoc jejunij ad Eucharistiæ sumptionem prærequisiti, præcepto, dari possit parvitas materiæ? 77
- Q. 6. An & quæ causæ excusant a lege jejunij ad sumptionem Eucharistiæ requisiti? - - - - - ibid:
- Q. 7. Quid facientum sit si sumpta ablutione superstites Hostiæ particulas advertat Sacerdos? - - - 78
- Q. 8. Quæ præterea excusant a lege jejunij, ad sumptionem Eucharistiæ prærequisiti? - - - 80
- Q. 9. An infirmo non jejuino pluries Viaticum dare liceat? 81
- Q. 10. An ne æger sine Viatico decedat, licitum sit Sacerdoti non jejuo, Missam celebrare? - - - ibid:
- Q. 11. An & qualis requiritur Corporis munditia, ad Sacram Eucharistiam recipiendam? - - - ibid:
- Q. 12. Quæ sunt ex parte Animæ dispositiones, ad dignam Eucharistiæ receptionem, requisitæ? - - - 82
- Q. 13. Quando censetur deesse copia Confessarij? - 83
- Q. 14. Quæ sunt illæ graves causæ, propter quas, cum deest copia Confessarij, non præmissa Sacramentali Confessione, celebrare quis possit? - - - 84
- Q. 15. Quid faciendum est, si delata ad moribundum Eucharistia, is in Confessione fateatur se crimen quodpiam continuo tacuisse, unde iterandæ sunt multorum Annorum Confessiones? - - - 85
- Q. 16. An qui inter confitendum, alicujus mortalis peccati inculpate oblitus est, ac ipsius postea recordatus fuerit, ante Communionem illud confiteri debeat? - - - - - 86
- Q. 17. An qui propter Confessarij defectum prætermissa Confessione, urgente necessitate, Missam celebravit, aut Communionem accepit, confiteri quam primum debeat? - - - - - 87
- Q. 18. Hæc Confessio quam primum facienda, quo tempore fieri debet? - - - - - 88
- Q. 19. Qui peccati mortalis reus, indigne Sacram recipit Eucharistiam, quale comittit peccatum? - - - ibid:
- Q. 20. Præter immunitatem a peccato mortali, quæ præterea Animæ dispositiones, ad dignam, & fructuo-



CAPUT 3. De Misa Sacrificio.

ARTICULUS 1. De natura, & existentia Sacrificij novae legis.

- Quaeres 1. Utrum in Ecclesia Christi, detur aliquod Sacrificium? - - - - - 90
- Q. 2. In quo consistat natura atq: Substantia Sacrificij Misa? - - - - - 91
- Q. 3. An & quando Sacerdos, Misa Sacrificium celebrare teneatur? - - - - - ibid:
- Q. 4. An qui quotidie Missam celebrare tenetur, si vg: propter febrim, aut aliam Infirmittatem per decem dies Sacra omisit, suplere teneatur? - - - - - 93
- Q. 5. An Misa, quae certis diebus affixae sunt, variari possint, vg: an eas feria 2da celebrare licet, quae feria 3tia celebrandae sunt? - - - - - 95
- Q. 6. An pluries, in die celebrare licet? - - - - - 96
- Q. 7. An possit Sacerdos pro Misa Stipendium accipere? - - - - - ibid:
- Q. 8. Quis Sacerdos Stipendium pro Misa accipere possit? - - - - - 97
- Q. 9. An qui minora stipendia, sive ab uno, sive a multis accepit, pro pluribus Missis celebrandis, licite possit, ea in unum sufficiens coadunare, & per unius Sacrificij, oblationem eis satisfacere? - - - - - 98
- Q. 10. An qui majus ex dantis liberalitate accipit Stipendium, possit hujus parte retenta, Missas quas suscipit, alteri Sacerdoti committere, huic concedendo partem alteram Stipendij, quae secundum leges loci sufficiat? - - - - - 99
- Q. 11. An liceat Sacerdoti anticipate celebrare Missas pro ijs, qui deinceps Stipendia dabunt? - - - - - 100
- Q. 12. An quae, & quando fieri debeat Misa applicatio ut haec cuiuspiam specialiter prosit? - - - - - 101
- Q. 13. Qua hora, Misa Sacrificium celebrandum sit? ibid:
- Q. 14. Quid per Meridiem intelligatur? - - - - - 102
- Q. 15. Quo in loco Misa Sacrificium celebrare liceat? ibid:
- Q. 16. An in omni loco consecrato, sive benedicto Missam celebrare liceat? - - - - - 103
- Q. 17. Ad Sacrificandum estne Altare necessarium? - - - - - 105
- Q. 18. Quot Mappis tegi debet Altare? - - - - - 106
- Q. 19. Quod Misa Sacrificium celebrandum, quale lumen est necessarium? - - - - - 108

ARTICULUS 2. De ipso Misa Sacrificij ritu.

Quaeres 1. Utrum Rubricae, quae ritus, in Misa Sacrificie



- elo celebrando præscribunt, stricte obligent? 108
- Q. 2. In quibus locis, in quibus gravis materia censeri debeat? 109
- Q. 3. Utrum orationes & Psalmi pro præparatione ad Missam in Missali positi, rigorose præcipiantur? 110
- Q. 4. Qualis debeat esse Calix, ad celebrandum Missæ Sacrificium necessarius? 111
- Q. 5. Quæ de purificatorio, corporali ac palla tenenda, & servanda sunt? 112
- Q. 5. Vestes sacræ suntne ad Sacrificium Missæ celebrandum necessariae? 113
- Q. 6. An Sacerdos celebrans, Ministrum, qui sibi serviat, habere debeat? 114
- Q. 7. An Sacerdoti celebranti, Missale sit necessarium? 115
- Q. 8. An quæ secreto recitari jubent Rubricæ, submitta voce dicenda sunt? ibid.
- Q. 9. Utrum Sacerdos inceptam Missam relinquere, aut saltem interrompere possit? 116
- Q. 10. Qui præterea in celebratione Missæ Sacrificij occurrere possunt casus & qui defectus, & quomodo iis consulendum sit? 117

## TRACTATUS DE SACRAMENTO PÆNITENTIÆ

CAPUT 1. De natura, vi, & effectibus pænitentiae.

ARTICULUS 1. De natura pænitentiae.

- Quæres 1. Quid sit pænitentia? 122
- Q. 2. Quæ sit materia Sacramenti pænitentiae? 123
- Q. 3. Quæ sit forma hujus Sacramenti? 124
- Q. 4. Quis ritus in perficiendo pænitentiae Sacramento observari debeat? 125
- Q. 5. An absolutio Sacramentalis conditionate dari possit? 126
- Q. 6. Utrum, ut de novo alicui atq: iterum detur Sacramentalis absolutio, opus est, ut de novo proxima & remota ponatur pænitentiae materia? 127

ARTICULUS 2. De vi & effectibus Sacramenti pænitentiae?

- Quæres 1. An sit aliquod gravissimum peccatum quod per Sacramentum pænitentiae remitti nequeat? 128
- Q. 2. Utrum in Sacramento pænitentiae non solum peccata delentur, sed etiam pæna illis debita remittitur? 128
- Q. 3. Utrum bonorum operum merita, per mortale peccatum



catum mortificata, per subsequentem deinceps pœnitentiam reviviscant? 129

Q. 4. Qui sunt præterea effectus, fructusq; Sacramenti pœnitentiæ? 130

CAPUT 2. De partibus Sacramenti pœnitentiæ

Quæres 1. Quot, & quæ sunt partes Sacramenti pœnitentiæ? 131

ARTICULUS 1. De Contritione

Quæres 1. Quid sit contritio? 131

Q. 2. Qualis ergo debet esse istiusmodi contritio? 132

Q. 3. Quæ præterea requiruntur, ut contritio vera, atq; sufficiens sit? 134

Q. 4. Utrum contritio sit ad salutem peccatori necessaria? 135

Q. 5. Postquam lapsus est homo in aliquod mortale peccatum an illico actum contritionis elicere debet? 135

Q. 6. Quotuplex est contritio? 136

Q. 7. Utrum contritio perfecta semper justificet? 136

Q. 8. In Sacramento pœnitentiæ quæ ergo sufficit contritio? 136

Q. 9. Qualis esse debet istiusmodi attritio ut in Sacramento pœnitentiæ ad justificationem peccatoris sufficiat? 137

Q. 10. Actus contritionis quando a pœnitente elici debet? 139

Q. 11. Utrum ad venialium etiam peccatorum in Sacramento pœnitentiæ obtinendam remissionem, contritio omnino necessaria sit? 140

Q. 12. Quid faciendum est ei, qui sine sufficienti contritione peccata sua confessus est? 140

Q. 13. Quibus signis dignoscere possit Confessarius pœnitentis sui contritionem? 141

Q. 13. Quibus medijs uti debeat Confessarius ut in suo pœnitente veram excitet contritionem? 142

ARTICULUS 2. De Confessione.

Quæres 1. Quid sit Confessio? 142

Q. 2. Hæc peccatorum Confessio estne præcepta? 142

Q. 3. Qui, & quando Divino præcepto ad faciendam Confessionem obligantur? 143

Q. 4. Sed utrum post admissum mortale peccatum, Jure Divino statim homo teneatur confiteri? 144

Q. 5. Quæ excusant ab annua facienda Confessione? 144

Q. 6. Qualis esse debet Confessio, ut ipsa legitima ac salutaris sit? 145

Q. 7.



- ~~~~~
- Q. 7. An graviter peccet pœnitens, qui in Confessione mentitur? - 146
- Q. 8. Utrum graviter peccet, qui in Confessione generali miscet peccata iam confessa, cum nondum confessis? - 147
- Q. 9. An qui scienter peccatum aliquod grave in Confessione reticuit, Confessiones omnes postea iterare teneatur? - 148
- Q. 10. Quid faciendum pœnitenti, qui advertit Sacerdotem tempore suæ Confessionis dormire? - 148
- Q. 11. An Confessio frequens esse debet? - 148
- Q. 12. Quid faciendum sit pœnitenti, ut integram peragat suam Confessionem? - 149
- Q. 13. Quotuplex hæc est Confessionis integritas? 150
- Q. 14. Quæ requiruntur ad formalem Confessionis integritatem? - 150
- Q. 15. Quæ præterea exprimenda sunt in Confessione, ut ipsa sit formaliter integra? - 153
- Q. 16. Utrum scrupulosi teneantur dubia etiam peccata confiteri? - 153
- Q. 17. Quæ excusant a Confessionis integritate? - 154
- Q. 18. Quæ non excusant ab integritate Confessionis? 157
- Q. 19. An etiam liceat in Confessione alterius pro-  
palare crimen, ut pœnitens gravitatem sui peccati declarare possit? - 158
- Q. 20. Utrum absolvi possit moribundus, qui vel nullatenus, vel integre non confitetur? - 159
- Q. 21. Utrum Confessio voce fieri debeat? - 161
- Q. 22. An absenti etiam per litteras Confessio fieri possit? - 161

#### ARTICULUS 3. De Satisfactione.

- Quæres 1. Quid sit satisfactio? - 162
- Q. 2. Quid ad satisfactionem requiritur? - 162
- Q. 3. Utrum Sacerdos pœnitenti suo, quem absolvit, satisfactionem, Sacramentalem imponere tenetur? 163
- Q. 4. Qualem pœnitentiam Confessarius assignare debeat? - 165
- Q. 5. Quæ opera pro pœnitentia imponi possunt? 166
- Q. 6. Utrum pœnitens impositam sibi pœnitentiam acceptare debeat? - 168
- Q. 7. Quando pœnitens impositam sibi pœnitentiam adimplere debet? - 169
- Q. 8. Utrum pœnitens impositam sibi a Confessario pœnitentiam mutare possit? - 169

Q. 9. Quando pœnitens impositam pœnitentiam adimplere debet? 171

CAPUT 3. De Ministro Sacramenti pœnitentiæ, ipsiusque obligationibus.

ARTICULUS 1. De Ministro Sacri pœnitentiæ.

Quæres 1. Quis est Minister Sacramenti pœnitentiæ? 171

Q. 2. Quotuplex est Jurisdictio? 172

Q. 3. Quomodo Jurisdictio acquiritur? 173

Q. 4. Quot modis jurisdictio delegata acquiritur? 174

Q. 5. Quinam indigent Episcopi approbatione, ut fidelium Confessiones audire & valide absolvere possint? 175

Q. 6. Qui non indigent Episcopi approbatione ad audiendas fidelium Confessiones? 177

Q. 7. Quæ annotanda, atque advertenda sunt, circa istam ab Episcopis dari solitam approbationem 178

Q. 8. Qui Monialium Confessiones excipere potest? 179

Q. 9. Quid sit Casuum reservatio? 179

Q. 10. Quænam requiruntur, ut peccatum quodpiam censeatur esse reservatum? 180

Q. 11. Utrum peccata dubia censeantur esse reservata? 181

Q. 12. Quæ præterea circa reservationem casuum sciri debeant? 181

Q. 13. Qui possunt a reservatis absolvere? 182

Q. 14. Utrum a communi Confessario absolvi possit, qui hic & nunc absolvi indiget, quia ei gravis incumbit celebrandi, aut communicandi necessitas, & peccato reservato onustus, non habet Confessarium pro reservatis approbatum? 184

Q. 15. Quomodo se gerere debet Communis Confessarius, qui quempiam a reservatis peccatis incante absolvit? 184

Q. 16. Quotuplicis sunt generis casus reservati? 185

Q. 17. Quæ circa Casus Papæ reservatos scitu digna, ac notatu necessaria sint? 188

Q. 18. Qui sunt Casus Episcopo reservati? 190

Q. 19. In articulo mortis utrum omnis cessat reservatio? 190

ARTICULUS 2. De obligationibus Confessariorum.

Quæres 1. Quæ sunt obligationes Confessariorum? 192

Q. 2. Quæ faciendæ sunt Confessario, ut accuratam, & exactam a pœnitente eliciat Confessionem? 192

Q. 3. An, & quando Confessarius suo pœnitenti absolutionem dare debeat? 193

Q. 4. Quibus differenda est absolutio, propter ignorantiam rerum quæ scitu omnino necessariae sunt? 194

Q. 5.



- ~~~~~
- Q. 5. Quibus præterea propter ignorantiam negari debet, absolutio? - 196
- Q. 6. An, & quando Confessarius tenetur monere pœnitentem suum, qui ex ignorantia facit aliquid illiciti? - 196
- Q. 7. Existentibus in proxima peccati mortalis occasione, potestne dari absolutio? - 198
- Q. 8. An etiam ijs deneganda sit absolutio, qui alijs præbent peccandi occasionem? - 200
- Q. 9. Quid de inhabituatis censendum sit? - 200
- Q. 10. Utrum inhabituatis absolutio neganda sit? - 201
- Q. 11. An & quibus propter relapsum deneganda sit absolutio? - 201
- Q. 12. Quibus præterea denegari debet absolutio? 202
- Q. 13. Quando adigendus est pœnitens ad iterandas præteritas confessiones? - 202
- Q. 14. An semper & statim Confessarius debeat injungere suo pœnitenti Confessionem generalem, cum ei indicat esse necessariam? - 203
- Q. 15. Ad quid tenetur Confessarius propter aliquem defectum in Confessione admissum? - 204
- ARTICULUS 3. De Sigillo Confessionis.
- Quæres 1. Quid Sigillum Confessionis? - 205
- Q. 2. Quæ Sigillo Confessionis subiacent? - 205
- Q. 3. An Confessionis Sigillum etiam erga mortuos obliget? - 206
- Q. 4. Ex quali Confessione oritur obligatio Sigilli? 206
- Q. 5. Præter Confessarium, an etiam alij ad Confessionis Sigillum teneantur? - 207
- Q. 6. Qui præterea Sigillo Confessionis obligantur? 208
- Q. 7. An Confessarius de auditis in Confessione cum suo pœnitente loqui possit? - 208
- Q. 8. An etiam ipse pœnitens teneatur Sigillo Confessionis? - 209
- Q. 9. Quotupliciter violatur Confessionis Sigillum? 209
- Q. 10. Quid respondere debeat Confessarius cum interrogatur, an ipsius pœnitens tale crimen commiserit, an ipsi absolutionem dederit? - 210
- Q. 11. An Confessarius possit uti scientia in Confessione parta, ad avertendum grave sui, vel alterius damnum? - 210
- Q. 12. An saltem occulte possit Sacerdos uti notitia in Confessione acquisita? - 211
- Q. 13. Utrum Confessarius exigere potest à pœnitente ut sibi peccati complices revelentur? - 213

# TRACTATUS DE SACRAMENTO ORDINIS ET EXTREMÆ UNCTIONIS.

## CAPUT 1. De Sacramento Ordinis.

Quæres 1. Quid sit Sacramentum Ordinis? . . . 214

ARTICULUS 1. De Materia, Forma, Ministro, subjecto  
& effectu Sacramenti Ordinis.

Q. 1. Quæ est materia ac forma Sacramenti Ordinis? 215

Q. 2. Quis est Sacramenti Ordinis Minister? . . . 215

Q. 3. An a quolibet Episcopo liceat Ordines percipere? . . . 215

Q. 3. Quos & ubi Episcopus Ordinare potest? . . . 216

Q. 5. Quid sint Litteræ dimissoriæ, & a quibus concedi possint? . . . 216

Q. 6. Quas pœnas jus constituit adversus eos, qui vel alienos subditos ordinant sine licentia proprii eorum Episcopi, vel ab alieno ordinantur? . . . 217

Q. 7. Quæ requiruntur ad Ordines rite suscipiendos? 217

Q. 8. Qui sunt effectus Sacramenti Ordinis? . . . 219

ARTICULUS 2. De variis Ordinis speciebus.

Quæres 1. Quot & quotuplices sunt Ordines? . . . 219

Q. 2. Utrum Episcopatus sit verus Ordo, Sacramentumq; a Præbyteratu distinctum? . . . 219

Q. 3. Quæ sit materia, & forma Episcopatus? . . . 220

Q. 4. Quis sit Episcopalis Ordinis Minister? . . . 220

Q. 5. Quis in Episcopum consecrari potest? . . . 220

Q. 6. Præbyteratus, & Diaconatus suntne vera Sacramenta? . . . 221

Q. 7. Quid de Subdiaconatu sentiendum sit? . . . 221

Q. 8. Quæ requiruntur ad Minores Ordines suscipiendos? 221

## CAPUT 2. De Sacramento Extremæ Uctionis.

ARTICULUS 1. De Materia ac forma Extremæ Uctionis.

Quæres 1. Quid sit Extrema Uctio? . . . 222

Q. 2. Quæ sit materia Sacramenti Extremæ Uctionis? 222

Q. 3. Debetne istud Oleum esse benedictum? . . . 223

Q. 4. Quæ sit materia proxima Extremæ Uctionis? 223

Q. 5. Quæ sit forma Sacramenti Extremæ Uctionis? 224

ARTICULUS 2. de Ministro, Subiecto & effectibus Sacramenti Extremæ Uctionis.

Q. 1. Quis sit Minister Sacramenti Extremæ Uctionis? 225

Q. 2. Quibus administranda est Extrema Uctio? . . . 225

Q. 3. Infantibus, amentibus, estne dandum Sacramentum Extremæ Uctionis? . . . 227



- Q. 4. Qui sunt effectus Sacramenti Extremæ Uctionis? 227  
 Q. 5. Quænam peccata per Sacramentum Extremæ Uctionis delentur? - - - 228  
 Q. 6. Quis est secundus Extremæ Uctionis effectus? 228  
 Q. 7. Qui sunt reliqui Extremæ Uctionis effectus? 229  
 Q. 8. An & quomodo Sacramentum Extremæ Uctionis sit ad salutem necessarium? - - 229  
 Q. 9. Quæ requiruntur dispositiones, ut digne & fructuose Extrema Unctio percipiatur? - 229

## TRACTATUS DE SACRAMENTO MATRIMONII.

CAPUT I. De Matrimonij natura, institutione, causisque ipsius.

ARTICULUS I. De natura, essentia Matrimonij, illiusque institutione.

- Quæres I. Quid sit Matrimonium? - 230  
 Q. 2. Utrum Matrimonium sit vere Sacramentum à Christo Domino institutum? - 231  
 Q. 3. Matrimonia inter Infideles, seu non baptisatos contracta, suntne valida? - ibid:  
 Q. 4. Quid de Matrimonijs Fidelium cum Infidelibus, aut Catholicorum cum Hæreticis contractis sentiendum sit? - 232  
 Q. 5. Utrum Matrimonia valeant per Procuratorem inita? - 233  
 Q. 6. Quæ sit materia ac forma Sacramenti Matrimonij? - ibid:  
 Q. 7. Ad validitatem Matrimonij, estne omnino necessarius Conjugum consensus? - 234  
 Q. 8. Qualis debeat esse consensus ad Matrimonium requisitus? - ibid:  
 Q. 9. Ad quid tenetur qui fecte solum consentit? 235  
 Q. 10. An possit verus consistere consensus cum scientia juris, & errore facti? exg: Petrus duxit in uxorem Mæviam quam ex errore credebat esse sibi affinem in eo gradu in quo sciebat se illam ducere non posse? - ibid:  
 Q. 11. Utrum valeat Matrimonium sub conditione contractum? - ibid:  
 Q. 12. An peccent qui sub conditione Matrimonium contrahunt? - 237

Q. 13.

Q. 13. An & quomodo renovari debeat Matrimonialis consensus? - - - - - ibid:

Q. 14. Utrum ad valide contrahendum Matrimonium à filiis, filiabusque necessarie requiratur consensus illorum Parentum? - - - - - 239

ARTICULUS 2. De causis Sacramenti Matrimonij.

Quæres 1. Quæ, & quot sunt Sacramenti Matrimonij causæ? - - - - - 240

Q. 2. Utrum Sacerdos sit reipsa Minister Sacramenti Matrimonij? - - - - - ibid:

Q. 3. Desponsandi suntne etiam causa Matrimonij? - - - - - ibid:

Q. 4. Quid & quotuplicia sunt sponsalia? - - - - - 241

Q. 5. In qua ætate sponsalia contrahi possint? - - - - - 243

Q. 6. An valeant sponsalia contracta inter Personas habentes impedimentum aut dirimens, aut impediens futurum Matrimonium? - - - - - 244

Q. 7. Quot modis sponsalia contrahi possunt, & utrum quoquomodo inita valeant? - - - - - ibid:

Q. 8. An sponsalibus addi possit, ut qui à sponsalibus resilit vel aliquid amittat, vel aliquid solvat? - - - - - 246

Q. 9. Utrum sponsi suos sibi defectus mutuo aperire teneantur? - - - - - 247

Q. 10. Quos effectus Sponsalia pariunt? - - - - - 248

Q. 11. Quid præterea Sponsalia efficiunt? - - - - - 250

Q. 12. An & quæ fornicatio dissolvit Sponsalia? - - - - - 250

Q. 13. Utriusque partis consensu, possuntne dissolvi Sponsalia? - - - - - 252

Q. 14. Quibus de causis potest una pars altera etiam invita, à Sponsalibus resilire? - - - - - 252

Q. 15. Utrum extra propositos casus, contra Sponsalia reclamare liceat? - - - - - 255

Q. 16. An Sponsalia dissolvantur per moram, vel discessionem alterius partis? - - - - - 255

Q. 17. An Sponsalia per Religionis ingressum, aut Ordinis susceptionem dissolvantur? - - - - - 257

Q. 18. An Sponsalia priora solvantur per posteriora? - - - - - 258

Q. 19. Utrum subsequens Matrimonium actu contractum priora Sponsalia pro semper dissolvat? - - - - - 260

Q. 20. Quæ sunt aliæ dissolvendi Sponsalia causæ? - - - - - 260

Q. 21. Qua auctoritate contracta Sponsalia dissolvenda sint? - - - - - 261

ARTICULUS 3. De Bannorum promulgatione.

Quæres 1. Quid sit Bannorum promulgatio? - - - - - 261

Q. 2. Quo tempore Banna promulgari debeant? - - - - - 262

Q. 3. Ubi & à quo facienda sit Bannorum promulgatio? - - - - - 263

Q. 4.



Q: 4. Quæ circa Bannorum promulgationem Parochus observare tenetur? - - - 264

Q. 5. Ex factis denuntiationib: ad quæ fideles obligant: 265

Q. 6. Quid faciendum est Parocho, cum ei aliquod denuntiatur impedimentum? - - - 266

Q. 7. Quis in Bannorum promulgat: dispensare potest? 266

Q. 8. Quid de Matrimonij secretis, quæ conscientiae dicuntur intelligendum sit? - - - 267

CAPUT 2. De effectibus Sacramenti Matrimonij, illiusque proprietatibus.

ARTICULUS 1. De effectibus Sacramenti Matrimonij.

Quæres 1. Qui sunt effectus Sacramenti Matrimonij? 268

Q. 2. Hæc gratia Sacramentalis quid efficit? - 269

Q. 3. Quid præterea præstat Matrimonij Sacramentum 269

ARTICULUS 2. De proprietatibus Matrimonij.

Quæres 1. Quot sunt proprietates Matrimonij - 270

Q. 2. Utrum reipsa Infidelium Matrim: dissolvi possunt? 270

Q. 3. Quando infidelis conversus novum inire potest Matrimonium? - - - 271

Q. 4. Utrum Judæo ad Catholicam fidem converso, ut declinet ambages ab uxore sibi suscitandas, possit ei scribere libellum repudij? - - - 273

Q. 5. Matrimonium an etiam dirimitur per Religiosam professionem? - - - 274

Q. 6. Utrum post Matrimonij consummationem liceat Conjugibus Religionem, profiteri? - - - 275

Q. 7. An per adulterium Matrimonium dissolvatur? 276

CAPUT 3. De Impedimentis Matrimonij.

ARTICULUS 1. De Impedimentis erroris, conditionis, voti, vis, ordinis & ligaminis.

Quæres 1. quotuplex error in contrahendo Matrimonio contingere potest? - - - 277

Q. 2. Quisnam error dirimit Matrimonium? - - 278

Q. 3. Quando Condicio dirimit Matrimonium? - 279

Q. 4. Quale votum dirimit Matrimonium? - 280

Q. 5. Quis ordo Matrimonium dirimit? - 281

Q. 6. Quid & quotuplex sit vis, metus? - 281

Q. 7. Quæ censentur metum gravem incutere? 283

Q. 8. Quid de metu reverentialem sentiendum sit? 283

Q. 9. Matrimonium ex gravi metu invalidum per quid revalidatur? - - - 285

Q. 10. Quid est impedimentum ligaminis? - 285

ARTICULUS 2. De impedimentis cognationis, affinitatis, atque publicæ honestatis.

Quæres 1. Quotuplex cognatio? - - - 288

Q. 2. Quæ in consanguinitate attendenda sunt? - 288

Q. 3. Quæ consanguineor: Matrim: irrita & inval: sunt? 293



- ~~~~~
- Q. 4. Quid sit cognatio spiritualis? - - - 294  
 Q. 5. Quid sit cognatio legalis? - - - 297  
 Q. 6. Cognationis spiritualis, & legalis impedimentum est-  
 ne dispensabile? - - - 298  
 Q. 7. Quid sit affinitas? - - - 298  
 Q. 8. Ut sciatur quo in gradu sit affinitas, quæ adverten-  
 da sunt? - - - 300  
 Q. 9. Quos effectus parit affinitas, Matrimonio jam contra-  
 cto superveniens, ut si Filius peccet cum Sorore,  
 aut Nepte uxoris suæ? - - - 301  
 Q. 10. Quo jure affinitas dirimit Matrimonium? 301  
 Q. 11. Quid sit impedimentum publicæ honestatis? 303  
 Q. 12. Qualia debent esse sponsalia, ut ex illis impedi-  
 mentum publicæ honestatis oriatur? - - 303  
 Q. 13. Unde præterea oritur imped: publicæ honestatis? 305  
 ARTICULUS 3. De reliquis Matrimonium dirimentibus  
 impedimentis.

- Quæres I. Quid sit impedimentum criminis? 307  
 Q. 2. Quando occurrit impedimentum ex disparitate cultus  
 proveniens? - - - 312  
 Q. 3. Utrum amantes Matrimonium contrahere possint? 313  
 Q. 4. Quid sit clandestinitas Matrimonij? - 313  
 Q. 5. Quis sit iste Parochus cujus præsentia exigitur ad  
 Matrimonij celebrationem? - - - 314  
 Q. 6. Quæ requiruntur, ut domicilium, aut quasi domicilium  
 ad contrahendum Matrimon: sufficiens habeatur? 316  
 Q. 7. Utrum valeat Matrimonium coram proprio Parocho  
 celebratum, si ille non fuerit Sacerdos, sed simplex  
 Clericus? - - - 317  
 Q. 8. Quot, & quales requiruntur testes ad valide cele-  
 brandum Matrimonium? - - - 318  
 Q. 9. Qualis testium & Parochi requiritur præsentia? 318  
 Q. 10. An non aliquando valeat Matrimonium clandesti-  
 ne contractum? - - - 318  
 Q. 11. An etiam Hæretici in contrahendis Matrimonis  
 formam, & modum à Concilio Tridentino præscri-  
 ptum servare teneantur? - - - 320  
 Q. 12. Quid sit impotentiae impedimentum? 320  
 Q. 13. Quæ impotentia dirimit Matrimonium? 321  
 Q. 14. Quid agendum est, quando dubium est, utrum impo-  
 tentia, quæ Matrimon: præcelserrat, perpetua sit? 322  
 Q. 15. Si impotentia oriatur ex maleficio quid tunc agen-  
 dum est? - - - 323  
 Q. 16. Quid de impuberum, & hermaphroditorum Matr-  
 monio sentiendum est? - - - 324  
 Q. 17. Unde oritur impedimentum Raptus? - 325  
 Q. 18. Qualis raptus inducit impedimentum Matrimonium  
 diri-



dirimens?

326

Q. 19. Impedimentum raptus estne dispensabile? 327

ARTICULUS 4. De impedimentis Matrimonium impedi-  
entibus.

Quæres 1. Quid & quæ sunt impedimenta Matrimonium  
impedientia? 328

Q. 2. Quid per Ecclesiæ vetitum intelligitur? 328

Q. 3. Quæ feriæ Matrimonii celebrationem impediunt? 328

Q. 4. Qua ratione Sponsalia Matrimonium impediunt? 329

Q. 5. Quale votum impedit Matrimon: contrahendum? 329

CAPUT 4. De impedimentorum Matrimonii, dispensatio-  
nibus, illiusque renovatione.

ARTICULUS 1. De impedimentorum Matrimonii dispen-  
sationibus.

Quæres 1. Quis potest dispensare in impedimentis Matri-  
monium impediuntibus? 330

Q. 2. In impedimentis Matrimonium dirimentibus, quis  
dispensare potest? 331

Q. 3. Ubi dispensatio Papalis obtineri debet? 333

Q. 4. Quæ observanda sunt ut bona, & legitima obtineat-  
ur dispensatio, & illa non sit subreptitia, aut ob-  
reptitia? 334

Q. 5. Quæ præterea circa unumquodque impedimentum  
in particulari exprimenda sunt? 335

Q. 6. Quæ sunt causæ propter quas Romanus Pontifex  
dispensare solet in consanguinitate, & affinitate? 337

Q. 7. Quid ergo requiritur ut valida sit dispensatio? 339

Q. 8. Quomodo scribendum sit Romam pro obtinenda di-  
spensatione? 339

Q. 9. Quomodo concessa dispensatio executioni mandari  
debeat? 341

Q. 10. Quomodo intelligendæ sunt clausulæ, quæ in di-  
spensationibus ponuntur? 344

Q. 11. His omnibus clausulis expensis, & verificatis, quid  
tandem restat Confelsario ad agendum? 349

ARTICULUS 2. De Matrimonii revalidatione.

Quæres 1. Quid facto opus sit, cum detegitur Matrimo-  
nium contractum nullum ac irritum esse? 350

Q. 2. Qua ratione pars invaliditatis Matrimonii ignara,  
de hoc præmoneri possit? 351

TRACTATUS DE INDULGENTIIS, BENEFI-  
CIIS, ET SIMONIA.

CAPUT 1. De Indulgentiis.

ARTICULUS 1. De Indulgentiarum natura, divisione atque  
illarum effectu.

Quæres 1. Quid sit Indulgentia? 353

- Q. 2. Quotuplex est Indulgentia? - ibid:  
 Q. 3. Qui sunt Indulgentiarum effectus? - 355  
 Q. 4. Utrum Indulgentiæ eximunt à consuetis pæniten-  
 tiæ operibus? - ibid:  
 Q. 5. Quis indulgentiæ concedere potest? - 356  
 Q. 6. Quæ requiruntur, ut valeat concessa indulgentia? ibid  
 Q. 7. Quando cessant indulgentiæ? - 357  
 Q. 8. Quibus conceduntur indulgentiæ. - 358  
 ARTICULUS 2. De iis, quæ ad indulgentiarum consecu-  
 tionem requiruntur.

- Quæres 1. Quæ requiruntur, ut quis concessam indul-  
 gentiam consequatur? - 358  
 Q. 2. Qualia debent esse istiusmodi ad consequendam in-  
 dulgentiam præscripta opera? - 361  
 Q. 3. Quæ necessaria sunt, ut indulgentiæ defunctis prosint? ibid:  
 Q. 4. Quando incipiunt, & quando desinunt indulgentiæ  
 certis diebus affixæ? - 362  
 Q. 5. Quæ circa indulgentiarum usum, & illarum abu-  
 sum scienda & annotanda sunt? - ibid:  
 Q. 6. Quæ sunt indulgentiæ omnibus Fidelibus concessæ? 363  
 CAPUT 2. De Beneficiis Ecclesiasticis.

ARTICULUS 1. De natura, divisione Beneficiorum Eccle-  
 siasticorum, deq: ad illa possidenda requisitis Dotibus.

- Quæres 1. Quid sit Beneficium Ecclesiast: & quotuplex? 364  
 Q. 2. Ad Beneficia Ecclesiastica possidenda, quæ requi-  
 runtur dotes, ac qualitates? - 366

ARTICULUS 2. De variis acquirendi Beneficia modis.

- Quæres 1. Quot modis Beneficia Ecclesiast: acquiruntur? 368  
 Q. 2. Quid sit præsentatio? - ibid:  
 Q. 3. Quomodo acquiritur jus Patronatus? - 370  
 Q. 4. Quæ sunt jura, & onera Patronorum? - 371  
 Q. 5. An semper digniores ad Beneficia Ecclesiastica præ-  
 sentari, & eligi debeant? - ibid:  
 Q. 6. Sed quid, si quis Beneficium Simplex conferat sim-  
 pliciter digno, prætermisso digniore? - 373  
 Q. 7. Utrum ad restitutionem teneatur, qui indignos ad Bene-  
 ficia promovent, vel dignos præferunt dignioribus? 374  
 Q. 8. Quid sit electio ad Beneficium? - ibid:  
 Q. 9. Quid sit Resignatio, & permutatio Beneficii? 375  
 Q. 10. Quæ præterea circa Resignationem Beneficiorum ob-  
 servanda sunt? - 375

- Q. 11. Quomodo permutatio Beneficiorum fieri debeat? 377

ARTICULUS 3. De vacatione Beneficiorum.

- Quæres 1. Quotupliciter Beneficium vacare censetur? 378  
 Q. 2. Quando Beneficium vacare censetur? - 379  
 Q. 3. Quid sit, & utrum licitus sit regressus? ibid:  
 CAPUT 3. De Simonia.



## ARTICULUS 1. De natura, & multipl: Simonia: divisione:

- Quæres 1. Quid sit Simonia? - - - 380  
 Q. 2. Quotuplex est Simonia? - - - 382  
 Q. 3. Quot modis Simonia confidentialis committitur? 384  
 Q. 4. Simonia quale est peccatum? - - - 385  
 Q. 5. Utrum committitur Simonia: peccatum, si ematur aut vendatur res temporalis, spirituali annexa? 387  
 Q. 6. Quale datum temporale pro spirituali oblatum, efficit Simoniam? - - - 388  
 Q. 7. Estne Simoniacus, qui precibus sibi, pro aliquo alio porrectis permotus, Beneficium ei confert? 389  
 Q. 8. Quando munus, datumque temporale occasione rei spiritualis alteri exhibitum, a Simonia immune censeri potest? - - - 390

## ARTICULUS 2. In quibus Simonia committitur, & quæ sint Simoniacorum pænæ.

- Quæres 1. In quibus præcipue Simonia committi solet? 392  
 Q. 2. Quando in administratione Sacramentorum committitur Simonia? - - - ibid:  
 Q. 3. Quot modis in collatione, & exercitio sacrorum Ordinum Simonia committitur? - - - 393  
 Q. 4. Quando committitur Simonia in Beneficiis? 397  
 Q. 5. Quot modis in Resignatione Beneficiorum Simonia committitur? - - - 398  
 Q. 6. Quando in Relig: ingressu committitur Simonia? ibid:  
 Q. 7. Quæ sunt pænæ contra Simoniacos constitutæ? 399  
 Q. 8. Quales pænas incurrunt, qui Simoniam committunt in collatione Ordinum, & Religionis ingressu? 400  
 Q. 9. Quæ pænæ constitutæ sunt contra Simoniam in Beneficiis committentes? - - - 401  
 Q. 10. Utrum Simonia privet etiam aliis Beneficiis rite obtentis, atque incapacem reddat ad alia in futurum obtinenda? - - - 403  
 Q. 11. Quæ pænæ Simonia: confidentialis? - - - 404  
 Q. 12. Utrum Simonia: acceptum & acquisitum restituendum sit? - - - 405  
 Q. 13. Utrum ad restituendum & ad acquisita dimittenda teneantur, qui solum in iis mentalem commiserunt simoniam, id est: qui temporale pro spirituali acceperunt, aut Spirituale pro temporali dederunt, sed sine ullo explicito, aut implicito pacto? 407  
 Q. 14. Quis pænas contra Simoniacos latas tollere, & in iis dispensare possit? - - - 408

## TRACTATUS DE CENSURIS

### CAPUT 1. De Censuris in genere.

#### ARTICULUS 1. De natura, causisque Censurarum.

Quæ-



Quæres 1. Quid sit Censura & quotuplex?	411
Q. 2. Quis potest ferre Censuras?	414
Q. 3. An quis possit ferre Censuram extra proprium territorium, in quo Jurisdictionem habet?	415
Q. 4. Quæ requiruntur ad ferendam & incurrendam Censuram?	416
Q. 5. Censuris qui ligari possunt?	418
Q. 6. An extranei, qui in alieno territorio delinquant, ibidem statutas incurrant Censuras?	419
Q. 7. An qui mandant, aut consulunt crimen, subiaceant censuræ contra criminis executores latae?	420
Q. 8. An idem homo possit pluribus Censuris ligari?	421
Q. 9. Qua forma ferri debeat Censura?	422
ARTICULUS 1. De iis, quæ ab incurrenda Censura excusant, à quo & quomodo ab iis absolutio obtineri possit	
Quæres 1. Quæ ab incurrenda Censura excusare possunt?	422
Q. 2. Qualis ignorantia excusat ab incurrenda Censura?	422
Q. 3. An qui agit quidpiam dubitando an non ei annexa sit Censura, eam reipsa incurrat?	424
Q. 4. An metus excusat à Censura?	425
Q. 5. Utrum impotentia, faciendi id, quod præcipitur sub Censura, ab ea excusat?	425
Q. 6. Quis à Censuris absolvere possit?	426
Q. 7. Episcopi possuntne absolvere à Censuris Papæ reservatis?	427
Q. 8. A Censuris Episcopo reservatis quis absolvi potest?	429
Q. 9. A quo absolvi possit filius, qui in sua Diœcesi degens Censuram incurrerat, & alibi perveniens, sua Confitetur peccata?	430
Q. 10. Cum quis pluribus ligatus est Censuris, potestne ab una absolvi remanente altera?	430
Q. 11. An Absolutio à Censuris dari possit extra pœnitentiæ Sacramentum?	431
Q. 12. Qua forma danda est absolutio à Censuris?	431
CAPUT 2. De Censuris in Specie.	
ARTICULUS 1. De Excommunicatione ejusque effectibus.	
Quæres 1. Quid sit & quotuplex excommunicatio?	432
Q. 2. Contra quos Excommunicatio ferri potest?	434
Q. 3. Qui sunt effectus excommunicationis majoris?	434
Q. 4. Quid & quotuplicia sunt illa suffragia, quibus excommunicatio privat?	434
Q. 5. Quibusnam suffragiis privat excommunicatio?	435
Q. 6. An & quomodo Sacramentis priventur Excom?	436
Q. 7. An Excommunicati Sacram: administr: possint?	437
Q. 8. Quæ præterea Excommunicatis prohibita & interdicta sunt?	438
Q. 10. Quid faciendum, si Excommunicatus vitandus divinis offi-	



officijs interesse velit?	- - -	439
Q. 11. Quibus præterea Excommunicatus privatur?	- - -	439
Q. 12. Quam inhabilitatem contrahunt Excommunicati?	- - -	441
Q. 13. An excommunicatio privet etiam iurisdictione Ecclesiastica?	- - -	442
Q. 14. Utrum civili etiam cum fidelibus communicatione priventur Excommunicati?	- - -	443
Q. 15. Qualem Excommunicationem incurrunt Clericorum percussores?	- - -	445
Q. 16. Quinam ab hac Excommunicatione eximuntur?	- - -	446
Q. 17. Ad quem pertinet hujus Excommun: absolutio?	- - -	447
Q. 18. Utrum Clericorum percussores vitandi sunt?	- - -	448
Q. 19. Quid sit Excommun minor, & qui ipsius effectus?	- - -	449
Q. 20. Quomodo se gerere debet qui dubitat num aliquam Excommunicationem incurrerat?	- - -	449

## ARTICULUS 2. De Suspensione, & interdicto.

Quæres 1. Quid & quotuplex sit suspensio?	- - -	450
Q. 2. Qui sunt effectus suspensionis?	- - -	450
Q. 3. Quid efficit suspensio à Beneficio?	- - -	452
Q. 4. Quid efficit suspensio à Jurisdictione?	- - -	453
Q. 5. Utrum actus per suspensum exerciti validi sint?	- - -	453
Q. 6. Quas pœnas incurrunt, qui Excommun: violant?	- - -	454
Q. 7. Quæ sunt præcipuæ suspensiones in Jure communi statutæ?	- - -	455
Q. 8. Quibus modis tollitur suspensio?	- - -	456
Q. 9. Quid sit & quotuplex Interdictum?	- - -	457
Q. 10. Quid sit personale Interdictum tum generale, tum particulare?	- - -	459
Q. 11. Quos Interdictum comprehendere solet?	- - -	459
Q. 12. Qui sunt effectus interdicti?	- - -	460
Q. 13. Quibus in casibus Interdictum contrahitur?	- - -	462
Q. 14. Cui obnoxii sunt pœnæ, qui Interdictum violant?	- - -	463
Q. 15. A quo Interdictum tolli potest?	- - -	464
Q. 16. Quid sit celsatio à Divinis?	- - -	464
Q. 17. Quando violatur, & polluitur Ecclesia, ut propterea in ea divina officia celsare debeant?	- - -	465
Q. 18. Quomodo fieri debet Eccl: pollutæ reconciliatio?	- - -	467
Q. 19. Quid sit Depositio, Degradatio?	- - -	ibid:

## TRACTATUS DE IRREGULARITATIBUS

### CAPUT 1. De Irregularitatibus in genere.

#### ARTICULUS 1. De natura, divisione, & effectibus Irregularitatis.

Q. 1. Quid sit Irregularitas?	- - -	468
Q. 2. Quotuplex præterea irregularitas?	- - -	469
Q. 3. Quis Irregularitates statuere potest?	- - -	470
Q. 4. Quos effectus parit Irregularitas?	- - -	471

ARTI.



~~~~~

ARTICULUS 2. De iis, quæ ab incurrenda irregularitate excusant.

- Quæres 1. Quæ excusant ab incurrenda irregularitate? 473  
Q. 2. An in dubio incurratur irregularitas? - 474  
Q. 3. Quando celsat irregularitas & quis ab ea dispensare potest? - - - - 476  
Q. 4. Quibus præterea modis irregularitas tollitur? 478

CAPUT 2. De irregularitatibus in Specie.

ARTICULUS 1. De irregularitatibus ex defectu natalium, Animi, corporis, ætatis atque libertatis.

- Quæres 1. Qui sunt irregulares ex defectu natalium? 479  
Q. 2. Qui vero pro legitimis reputantur, relative ad Ordines, & Beneficia recipienda? - - 480  
Q. 3. Quot modis tollitur irregularitas ex defectu natalium proveniens? - - - 481  
Q. 4. Qui Animi defectus irregularitatem pariunt? 482  
Q. 5. Qualis Scientiæ defectus irregulari parere potest? 483  
Q. 6. Qui sunt irregulari ex defectu fidei confirmatæ? 484  
Q. 7. Quales corporis defectus irregularitatem inducunt? ibid:  
Q. 8. Cuius est judicare an ordinandi ex defectu corporis irregulares sint? - - - 485  
Q. 9. Qui sunt irregulares ex defectu ætatis - 486  
Q. 10. Qui sunt irregulares ex defectu libertatis? 487

ARTICULUS 2. De irregularitatibus ex defectu famæ, lenitatis, et ex bigamia provenientiibus.

- Quæres 1. Quid & quotuplex est infamia? - 488  
Q. 2. Utrum ex infamia oriatur irregularitas? ibid:  
Q. 3. Quid sit irregularitas ex Bigamia proveniens? 489  
Q. 4. Qui ergo ex Bigamia irregulares sunt? - 490  
Q. 5. Unde & quando contrahitur irregularitas ex defectu lenitatis? - - - ibid:  
Q. 6. Utrum irregulares sint, qui occidunt, vel mutilant hominem ad propriam defensionem? - 492  
Q. 7. Qui præterea irregulari sunt ex defectu lenitatis? ibid:

ARTICULUS 3. De irregularitatibus ex homicidio, & aliis delictis provenientiibus.

- Quæres 1. Utrum ex homicidio oriatur irregularitas? 495  
Q. 2. Ex quali homicidio oritur irregularitas? 496  
Q. 3. Quid sentiend: est de iis, qui homic: cooperantur? 498  
Q. 4. Quinam ex homicidio casuali irregulares fiunt? 499  
Q. 5. Utrum etiam ex mutilatione contrahat: irregul: 501  
Q. 6. Quis & quando ex iteratione Baptismi irregularitatem contrahit? - - - ibid:  
Q. 7. Qui sunt irregulares ex susceptione, aut malo usu Ordinum? - - - 503  
Q. 8. Utrum ex delicto hæresis incurratur irregularitas? 504
- ~~~~~





# TRACTATUS

DE

## SACRAMENTIS IN GENERE.

Sacramenti nomen à Sacro derivatur, quia ad rem sacram, ordinem, ac relationem habet. Varie autem in Sacra Scriptura sumitur, tum pro re latente & secreta, ut Tobiae Cap: 12. *Sacramentum Regis abscondere bonum est:* tum pro mystico rei occultae signo, quemadmodum Apocalipsis Cap: 17- inquit Angelus ad Joannem: *Dicam tibi sacramentum mulieris*, hoc est rem secretam, quae per mulierem designatur, & sic hic etiam nomen Sacramenti sumitur, scilicet pro signo rei latentis, & occultae.

## CAPUT PRIMUM

*De natura, & ministro Sacramentorum.*

### ARTICULUS I<sup>mus</sup>

*De natura Sacramentorum.*

*Quæres amo? Quid sit Sacramentum?*

*Resp:* Sacramentum generice sumptum, prout respicit Sacramenta novæ & antiquæ legis, est signum sensibile gratiæ sanctificantis, permanenter à Deo institutum, quia & Sacramenta antiquæ legis præter sui speciem, aliud quidpiam denotabant exg. circumcisio corporis, spiritualem cordis præcisionem, passionum refrenationem significabat, & eo neque ex divina institutione duratura erant, quousque subsisteret lex Moysis, atque primario à Deo

T. II. M.

A

insti-



instituta sunt, ut gratiam sanctificantem in suscipiente quoquomodo parerent.

Sacramentum vero specificè consideratum, prout concernit Sacramenta novæ legis, est *signum sensibile à Christo permanentè institutum, ad significandam, & producendam in homine gratiam sanctificantem.*

Septem autem sunt à Christo Sacramenta instituta, videlicet Baptismus, Confirmatio, Eucharistia, Pænitentia, Extrema unctio, Ordo, & Matrimonium. Permanentè vero sunt instituta, hoc est lege stabili, & immutabili, unde perseverantia sunt usque ad finem sæculi, omniaque, præter exteriorem ritum, qui signi rationem habet, gratiam Spiritus Sancti & significant, & eam homini conferunt, atque in anima ipsius, vi, ac efficacia à Christo sibi indita produciunt.

*Quæres 2do: Quibus Sacramenta perficiuntur?*

*Resp:* Sacramenta essentialiter tribus perficiuntur, videlicet rebus, tanquam materia, verbis, tanquam forma, & persona Ministri conficientis Sacramentum, cum intentione faciendi quod facit Ecclesia, quorum si aliquid deest, non perficitur Sacramentum. Ita Concil: Flor: in Decreto de Sacramentis. Unde quodlibet novæ legis Sacramentum suam habet formam & materiam, atque Ministrum ad illud conficiendum à Christo deputatum, ut constat ex Concilio Trident: quod, suam cuique Sacramento assignat materiam & formam, atque Ministrum.

*Quæres 3tio: Quid sit materia, & forma Sacramenti?*

*Resp:* Materia est res, quæ ad conficiendum Sacramentum usurpatur vg. aqua ad baptismum, panis, & vinum ad Eucharistiam. In nonnullis tamen Sacramentis loco rei sensibilis, actus hominis sunt materia eorum, sic in Confirmatione, & Ordine impositio manuum, in Pænitentia Confessio, Contritio exterius significata, & satisfactio. Materia autem Sacramenti duplex est, videlicet proxima, & remota. Materia *remota* est ipsa res quæ ad conficiendum Sacramentum adhibetur vg. aqua in Baptismo, oleum infirmorum in Extrema unctione. Materia *proxima* est usus, & applicatio ipsius rei ad conficiendum Sacramentum usurpari solitæ: vg. ablutio, quæ in Baptismate aqua fieri solet, unctio quæ in Extrema unctione oleo peragitur.

Forma Sacramenti sunt verba, quæ ex Christi institutione ad conficiendum Sacramentum adhibentur, vg.



In Baptismo. *Ego te Baptiso*, in Pœnitentia: *Ego te absolvo*.

*Quæres 4to: Quomodo in Sacramentis materia, & forma sibi debeant coexistere, seu quæ debeat esse utriusque simultas, atque unio?*

*Resp:* Requiritur, & sufficit simultas, & unio moralis. Unde ad valorem Sacramenti necesse est, ut materia & forma simul moraliter ponantur, & secum invicem uniantur. Quia in composito morali, sufficit partium unio moralis. Porro Sacramentum est compositum morale, quod materia & forma tanquam partibus constat. Ergo sufficit ut illæ moraliter secum uniantur, & consocientur. Unde si quis peracta ablutione, statim proferat verba: *Ego te baptiso* valet Sacramentum. Equidem forma ista: *Ego baptiso te* & aliæ similes tempus præsens indicant, sed sua est hujus temporis latitudo, ita ut moraliter dicatur, nunc actu fieri quod immediate antea factum est, vel immediate post, fiet. Quapropter etiam nihil ad substantiam Sacramenti refert, an forma præcedat, an materia, postulat tamen uterque ordo, & analogia, ut materiam sequatur forma, quia forma materiam de se indifferenter ad rationem Sacramenti determinat.

Verum hæc simultas moralis materiæ & formæ in aliis Sacramentis strictius sumenda est, in aliis latius, quia formæ Baptismi, Confirmationis, Ordinis, Extremæ unctionis, longe breviori intervallo à materia dividi possunt, quam formæ seu Pœnitentiæ, seu Matrimonii. In baptismo enim si quis infantem abluerit, & post unum *Pater & Ave* dicat *baptiso te* mentiri censebitur, quia verbum *baptiso* rem præsentem, aut quasi præsentem exigit, ut verificetur. Aliud est de Pœnitentia, ac Matrimonio, quorum formæ à materia plus sejungi possunt. Ceterum etsi in his Sacramentis physica materiæ, & formæ simultas non est de necessitate Sacramenti; est tamen de ministerii congruitate, tum ut servantur præscripta Ritualium, tum ut occurratur scrupulis, & consulatur cœtitudini Sacramentorum. Potest enim facile fieri, ut quæ brevis judicatur distantia, ac interruptio, sit reipsa longior.

Ab his excipitur Sacramentum Eucharistiæ in quo materiæ & formæ simultas physica requiritur, quia nomina *Hoc, Hic*, quæ consecrationis formam ingrediuntur, verificari non possunt, nisi materia sit physice præ-



*Quæres 5to: Utrum mutatio formæ, ac materiæ obstat validitati Sacramenti?*

*Resp.* Materia Sacramenti mutari potest vel *substantialiter*, cum ex communi hominum iudicio non censetur eadem esse, cum ea, quam Christus instituit, sive spectando, speciem physicam, sive speciem moralem, idest secundum communem usum considerando; vel *accidentaliter*, cum etsi in nonnullis discrepat ab ea, quam Christus instituit, ejusdem tamen manet cum illa rationis. Pari ratione forma Sacramenti mutatur *substantialiter*, cum non idem remanet verborum sensus, quæ Christus ad conficiendum Sacramentum præscripsit, vel *accidentaliter* tantum, cum idem remanet verborum sensus, licetsi parum ipsa immutentur.

Itaque mutatio substantialis materiæ aut formæ, obest validitati Sacramenti, illudque perimit, non vero mutatio accidentalis. Quia mutatio substantialis sive materiæ, sive formæ, ipsam materiam ac formam tollit, quæ sunt partes Sacramenti essentielles, & sine quibus Sacramentum subsistere nequit: mutatio vero accidentalis materiæ, aut formæ, quoniam materiam ac formam relinquit integras, integrum etiam manet Sacramentum. Attamen aliquando mutatio materiæ, aut formæ videri potest accidentalis, quæ spectata Christi institutione reipsa substantialis est. Sic licet idem videatur esse, baptizare in nomine Ss. Trinitatis, ac baptizare in nomine Patris & Filii, & Spiritus Sancti, haud tamen valet baptisma priori modo collatum, quia Christus pro baptismi forma instituit, expressam, & distinctam trium personarum Ssmæ Trinitatis invocationem. Hinc etiam colligendum est *amō*: Eum qui glacie ad baptizandum uteretur, aut triticea malsa cruda ad Eucharistiam conficiendam, invalide utrumque Sacramentum conficere, quia etsi glacies ab aqua, malsa cruda, à cocta, quæ panis est, non differant specie physica, differant tamen specie morali, & secundum communem hominum sensum, hæc autem species moralis potissimum attenditur in Sacramentis quæ entia moralia sunt. *2do*. Non stare Sacramentum si materia ejus, eo usque alteretur ac immutetur, ut desinat moraliter id esse, quod ante fuit. Sic qui consecrando vino tantum immiscet aquæ, ut jam usuale vinum reputari nequeat, subvertit materiam Consecrationis, quæ in vero ac usuale vino perfici debet.

*Quæ-*



*Quæres 6to: Quot modis in formam mutatio invehiri possit?*

*Resp:* Sex modis in forma mutatio contingere potest, unde isti duo prodierunt versus:

*Nihil formæ demas, nihil addes, nihil variabis,  
Transmutare cave, corrumpere verba, morari.*

Itaque forma immutatur 1<sup>mo</sup>: verbi alicujus subtractione, eaque subtractio Sacramentum perimit, si sensum formæ subvertit, non perimit Sacramentum si idem formæ maneat sensus. Unde si quis in baptismo demat vocem *Baptiso te* non stabit Baptismus, sicut nec Pœnitentia si dicat solum *absolvo* & amittat *te*: quia Baptismus, & absolutio ordinantur ad certam personam, nisi ergo hæc exprimat, ruit Sacramentum. Si vero in Baptismo dematur solum vox *ego*: vel in Eucharistiæ consecratione particula *enim*: nihil decedet utrique Sacramento, quia tunc formæ sensus subsistet.

2<sup>do</sup>: Mutatur forma additione extraneæ vocis unius, aut alterius, & tunc quoque valet, aut deficit Sacramentum, prout additio hæc sensum formæ immutat, aut eum non transvertit. Unde non conficiet Baptismus si quis dicat: *Baptiso te in nomine Dei increati, & Filii creati*, aut etiam: *Baptiso te in nomine Patris maioris, & Filii minoris*, quia sic immutatur sensus formæ, tolliturque æqualites divinarum Personarum, quæ naturali formæ sensu exprimitur, & designatur. Pariter nullum erit baptisma, si quis dixerit: *Baptiso te in nomine Patris, & B. Mariæ, & Filii, & Spiritus Sancti*: quia sic conferri censeretur Baptismus, æque in nomine Mariæ, ac in nomine Patris, & Filii, quod formæ baptismali & ipsius institutioni adversatur. Non subvertitur autem Sacramentum si quidpiam formæ addatur, quod sensum ipsius non destruit, vg. si quis dicat: *Ego te baptiso in nomine Patris omnipotentis, & Filii ejus unigeniti, & Spiritus Paracleti*: item: si quis Eucharistiam his consecret verbis: *Hoc est corpus meum, pro humano genere crucifixum*, secus si hæc forma aliquis utatur: *Hoc est corpus meum æereum, cæleste*, quia voces *æereum, cæleste*, immutant sensum formæ, & hanc vocem *corpus*, à propria & vera significatione, ad alienum, & sinistram detorquent sensum: maxime si adjungantur formæ tamquam determinativa ipsius, ita ut ex primaria loquentis intentione, præcedentia verba, persub-



subsequentia restringantur. Quamquam enim certum sit, nullo prorsus interiori errore violari posse veritatem Sacramenti, quod legitimo ritu perficitur, constat tamen non perfici Sacramentum à Ministro, qui errorem, vel alienum, ac perversum ritum inducere vult, cum ex hac prava illius intentione sensus formæ determinatur ad sensum, sensui illius naturali, & totius Ecclesiæ, contrarium. Hinc Zacharias Papa consultus de Sacerdote, qui latinæ sermonis nescius, infringens linguam dicebat: *Baptiso te in nomine Patria, & Filia, & Spiritu Sancta.* respondit: *Si ille qui baptisavit, non errorem introducens, aut hæresim, sed pro sola ignorantia romanæ locutionis, sic dixerit, non possumus consentire, ut denuo baptisentur.* Quod si etiam Minister erret circa significationem vocis, ac termini Sacramentalis, vg. si falso existimet voculam *hic*, in consecratione Calicis esse adverbium locale, cum sit indicativum ac demonstrativum, nihil hinc deperit Sacramento, quia Minister cum supponatur veram habere intentionem faciendi id, quod instituit Christus, vult etiam per verba formæ significare id, quod Christus significari voluit, etiamsi illud male concipiat.

3tio: Mutatur forma, per variationem vocum. Si ergo voces varientur tantum, quo ad idioma, stabit Sacramentum, unde valet Baptisma, seu latine, seu polonice, aut germanice proferatur epis forma. Stabit etiam Sacramentum, si pro voce adhiberi solita, vox synonyma usurpetur. Unde si quis pro *absolvo te*, dicat: *Remitto tibi peccata tua*, vel pro vocibus: *Hoc est corpus meum*, dicat: *Istud est corpus meum*, Sacramentum perficitur. Denique sive cum Latinis absoluta verba usurpentur in forma Pœnitentiæ. *Absolvo te*: sive cum Græcis depræcativa, *Absolvatur*: Sacramentum non periclitabitur, quia utrobique idem est, quoad substantiam verborum, sensus. At vero si variatio vocum sensum formæ immutet, tunc tollitur ratio Sacramenti. Hinc si quis in Pœnitentiâ dicat *Abluo te à peccatis*, aut in Baptismo *Mundo te à originali culpa*. Sacramentum non conficitur, quia hac verborum variatione sensus nativus formarum immutatur. Forma siquidem Pœnitentiæ consveta. *Absolvo te à peccatis* denotat juridice remitti peccata, quod non fit à peccatis abluendo, ac proinde verba illa *Abluo te à peccatis* istud non significant. Forma etiam baptismi consveta. *Baptiso te* lotionem, ablutionem, proprie dictam denotat, unde aqua fieri debet. Mundari vero quis à sordibus potest, quin



quin aqua lavetur. Ergo illa verba *Mundo te ab originali culpa* alium plane habent sensum quam illa. *Baptiso te*: quoniam igitur per talem vocum variationem, formæ sensus immutatur, Sacramentum non subsistit.

4to: Mutatur forma transpositione verborum, quæ eum sensum aufert, Sacramentum etiam tollit, alias Sacramentum in sua ratione subsistit. Unde valet Baptismus sub hac forma collatus: *In nomine Patris, & Filii, & Spiritus sancti, ego te baptiso*. Valet & hæc Eucharistiæ consecratio: *Hoc est meum Corpus, Hic est sanguinis mei calix*. Non valet vero ista consecrationis forma: *Meum est hoc corpus*, quia prima dicendi ratio servat sensum formæ à Christo institutæ, secunda illum corrumpit, qui enim dicit: *Meum est hoc corpus*, illud non efficit, sed indicat corpus, quod jam esse supponitur, Christi esse, & ad eum pertinere, qui vero dicit: *Hoc est corpus meum*, illud efficit, & indicat id quod manibus tenet, & nondum est corpus Christi, illico fieri corpus Christi.

5to: Mutatur forma per corruptionem terminorum, & illorum inversionem, quæ si tanta sit, ut verborum sensum destruat, ruit Sacramentum, ut si quis dicat: *Baptiso te in nomine Matris* (loco Patris) *& Filii, & Spiritus Sancti*. Si autem corruptio & inversio vocum, non noceat eorum usuali significationi, & error nonnisi sit in terminatione pronuntiationis, non deficiet Sacramentum ut patet in Baptismo collato: *In nomine Patria, & Filia, & Spiritua sancta*.

6to: Mutari tandem potest formæ sensus, per interruptionem, qua tollitur moralis continuïtas sermonis, & interruptitur intentio Ministri. Unde si quis post prolata hæc verba: *Ego te baptiso in nomine Patris*, ad aliud se convertat, & tandiu perduret, ut posteriora verba cum prioribus moraliter non connectantur, Sacramentum efficietur tanto incertius, quanto fuerit prolixior mora, secus si baptisans tussitando, silentium aliis imperando, formam interrumpat.

Quæres 7mo: *Utrum peccet qui materiam, aut formam Sacramenti immutat?*

Resp: Qui materiam, aut formam cujuslibet Sacramenti substantialiter immutat, mortaliter peccat. Quia & gravem Sacramento injuriam irrogat, & grave suscipienti infert damnum, cum per hoc nullum reddat Sacramentum, illudque irritum faciat.

Sed etiam mortaliter peccat, qui materiam, aut formam



nam Sacramenti immutat accidentaliter solum, si mutatio hæc sit notabilis, præcepto Ecclesiæ, consuetudini, ac præscriptis ejus graviter contraria. Unde graviter peccat Græcus qui consecrat in Azymo pane, Latinus qui in fermentato, aut qui lingua vulgari Eucharistiam conficeret. Quodsi mutatio accidentalis, levis & modica sit, atque in iis contingat, quæ non sunt graviter ab Ecclesia præscripta, ac præcepta, erit solum peccatum veniale.

*Quæres 8vo: Utrum in conficiendis Sacramentis liceat uti materia, aut forma dubia?*

*Resp:* Si quis extra necessitatem conficiet aliquod Sacramentum in materia aut cum forma dubia, peccat mortaliter: quia sine gravi causa periculo nullitatis Sacramentum exponit, unde & Sacramentum profanat, & suscipientem damnificat. Quare extra gravem necessitatem tenetur Minister Sacramentorum, in iis conferendis semper adhibere materiam ac formam, certam, & indubitam, alias peccat mortaliter, quia exponit Sacramentum periculo nullitatis, profanationis. Hinc Innocentius primus sequentem damnavit propositionem: *Non est illicitum in Sacramentis conferendis sequi opinionem probabilem de valore Sacramenti, relicta tutiore.* In necessitate autem extrema licet administrare Sacramenta, quæ sunt de necessitate salutis in materia etiam dubia, ac probabili tantum, dum certa haberi nequit, semper tamen eam adhibendo quæ probabilior, & tutior haberi potest. Nam in extrema necessitate, succurrendum est proximo omni meliori modo, qui occurrere potest, medium autem dubium, ac probabile solum melius est quam nullum. Ergo illud adhibendum est. Neque tunc quidquam peccatur contra Sacramentum, quia cum Christus Sacramenta instituerit propter homines, magis providere debemus saluti hominis, ejusque securitati, quam integritati Sacramenti. Porro hoc locum habet dumtaxat in Sacramentis, quæ sunt ad salutem necessaria, necessitate medii, qualia sunt Baptismus, & Pœnitentia, respectu siquidem eorum tantum potest occurrere extrema hominis necessitas. Unde dum periclitatur infans etiam maxime dubia materia ad eum baptisandum arripienda est, dum moribundus dubia tantum pœnitentiæ ostendit signa, absolvi debet. Sed præter Baptismi & Pœnitentiæ Sacramenta, alia, in materia, aut forma dubia, ac incerta conficere, illicitum ac graviter peccaminosum est, quia respectu illorum extrema necessitas occurrere nequit, cum non sint ad salutem necessaria necessitate medii.

*Quæ-*



*Quæres gno: An liceat supra eandem materiam repetere formam Sacramenti?*

*Resp:* Non licet, nisi dubium sit rationabile de validitate jam semel prolatae formæ, vel utrum prolata fuerit prudens occurrat suspicio. Quia alias frustra, & sine ratione altera adhiberetur forma, cum irreverentia Sacramenti. Quodsi tale dubium adsit, debet forma iterari sub conditione, ne Sacramentum maneat irritum. Dubium autem imprudens, quale else solet in scrupulosis, non sufficit ad repetendam formam, sed contemnendum est. Mortale autem est, formam Sacramenti supra eandem materiam sine rationabili necessitate repetere, quia inutiliter iterato profertur, atque sic Sacramento gravis irreverentia irrogatur.

## ARTICULUS 2dus

### *De Ministro Sacramentorum.*

*Quæres amo: Quis sit Minister Sacramentorum?*

*Resp:* Minister Sacramenti is est, qui Sacramentum efficit, baptizat, Eucharistiam consecrat, in Pœnitentia constituentem peccata sua absolvit. Porro solus homo ratione utens est Minister Sacramentorum. Quia Sacramenta conficiuntur actione humana, agere vero humano modo solus ratione utens homo potest. Ergo solus homo ratione utens est Sacramentorum Minister. Certe Christus solis hominibus dedit potestatem baptisandi, peccata dimittendi, atque in sui memoriam faciendi Corpus, & sanguinem suum consecrandi. Soli itaque homines ratione utentes conficere possunt Sacramenta, & illorum sunt Ministri. Non tamen quilibet homo cujuslibet Sacramenti Minister else potest, quia Laici præter Baptismum, alia Sacramenta conficere nequeunt. Sed duplex est Sacramentorum Minister: ordinarius scilicet & extraordinarius. *Ordinarius* est ille, qui ex officio Sacramenta conficit, & dicitur minister sollemnitatis. *Extraordinarius* seu necessitatis, qui in defectu ministri ordinarii, exigente necessitate Sacramenta conficit. Prior Sacramenta conficit, quia ad id specialiter consecratus, & ab Ecclesia deputatus est, posterior autem nonnisi in defectu & absentia prioris Sacramenta conficit, aut administrat, veluti cum obstetrice absente Sacerdote infantem baptizat. Ministri autem



tem Sacramentorum ordinarii vel sunt *expositi* vg. actum Eucharistiam distribuunt, in Confesionali sedent, Confessiones excoipiendo, vel sunt nonnisi parati, qui si rogentur, statim Sacramenta petentibus conferrent.

*Quæres 2do: Utrum ad valorem Sacramenti requiratur in Ministro fides & sanctitas?*

*Resp:* Ad valorem Sacramenti, neque vera fides, neque pura sanctitas in Ministro requiritur. Unde hæresi infecti, improbitate corrupti Ministri, valide conficiunt Sacramenta, dummodo ritu à Christo instituto illa perficiant. Quia Christus est principalis effector Sacramentorum, Minister vero nonnisi instrumentum, quo ipse ad ea conficienda utitur, prævæ itaque Ministri affectiones, ac cordis perversitates, valori Sacramenti obesse non debent. Certe Sacramentorum valor consistit in ritu externo à Christo præscripto, hic si à legitimo Ministro quisquis ille fuerit, ponatur, semper valet Sacramentum. Valor itaque Sacramentorum non dependet neque à fide, neque à pietate Ministri. Unde non solum Hæreticus, sed & Judæus, Paganus valide possunt baptizare. Sacerdos hæresi infectus valide Eucharistiam potest consecrare, in extrema necessitate, moribundum videlicet absolvere.

*Quæres 3tio: Utrum peccet Minister improbus Sacramenta conficiendo?*

*Resp: amo:* Qui in statu peccati mortalis, ex officio Sacramenta conficit, vel illa administrat, peccat mortaliter. Quia qui conficit, aut administrat Sacramenta, induit personam Christi, fit cum eo unum totale agens, ac demum merita ejus dispensat, res sacratissimas tractat, mysteria ineffabilis perficit. Graviter autem peccat, qui peccati mortalis reus, & diaboli mancipium existens, hæc & tanta præstare, & efficere audet. Peccat ergo mortaliter, qui peccati mortalis reus, ex officio Sacramenta conficit aut administrat. Certe S. Paulus Epist: ad Titum Cap: 1. dispensatores mysteriorum Dei admonet, ut sine crimine sint. Unde Rituale Romanum inquit: *Impure & indigne Sacramenta ministrantes, in æternæ mortis reatum incurrunt*, quare statim præscribit: *Sacerdos ergo si fuerit peccati mortalis sibi conscius, ad Sacramentorum administrationem non audeat accedere, nisi prius corde pœniteat. Sed si habeat copiam Confessarii, & temporis, loquique ratio ferat, convenit confiteri.*

*2do:* Qui etiam non ex officio, sed ex necessitate in statu peccati mortalis Sacramenta administrat, aut ea conficit,



ficat, peccat mortaliter. Quia semper, ubique & à quolibet sancta sancte tractanda sunt. Sacramenta autem, à quocunque sive ex officio, sive ex necessitate conficiantur, administrentur, sacratissima sunt, sancte ergo tractanda sunt, scelerare, & impietate ea conficientis, ac ministrantis pollui, & coquinari non debent. Certe si ad Sacerdotes antiquæ legis dictum est Levit: Cap: 22. *Omnis qui accesserit de stirpe vestra, ad ea quæ consecrata sunt, in quæ est immunditia, peribit coram Domino.* Quanto ergo; ut inquit Paulus Epist: ad Hebr: Cap: 10. deteriora meretur supplicia, qui Filium Dei conculeverit, & sanguinem testamenti pollutum duxerit, quod faciunt illi, qui indigne, peccati mortalia rei, sanctissima Sacramentorum tractant mysteria.

Hinc Sacerdos etiam simplex, nullo officio ad administranda Sacramenta obstrictus, qui peccati mortalis reus, licet in casu necessitatis, baptisat, Confessiones excipit, Eucharistiam administrat, pro numero Sacramentorum, peccata multiplicat mortalia. Magis tamen & gravius peccat, qui hæc ex officio, & munere facit vg. Parochus, Vicarius, Capellanus. Sed & Laicus exg. obstetrix quæ ingruente necessitate infantem baptisat, graviter peccat, si id in peccato mortali faciat.

Sed præter Sacramenta, eorum administrationem, aut confectionem, sunt & alia sacra officia, ac munia, quæ si in peccato mortali exerceantur, peccatum mortale inducunt, veluti 1. si quis cum sacra Eucharistia processionem peragat, populo benedicat, eam tangat, in Choro Divinis Laudibus præsit. 2. si Diaconus, Subdiaconus in peccato mortali officia sua exerceant, quia sacrum officium indigne pertractant. Unde S. Thomas in 4. dist: 24. art: 3. quæst: 5. inquit: *Quicumque cum peccato mortali aliquod sacrum officium pertractat, non est dubium, quin indigne illud faciat, unde patet, quod mortaliter peccet.* Aliud est de Clericis minoribus, quia eorum munia non tam sacra reputantur, unde etiam hodie à Laicis sæpe exercentur. Veri simile tamen est, & Clericus qui minores ordines, & Sacerdotes, qui Sacramentalia vg. benedictiones, aquæ, cinerum, imaginum, in statu peccati mortalis exercent, peccare venialiter, quia aliquatenus sua profanant munera.

Quæres 4to: *Quid facto opus sit ei, qui reus est peccati mortalis & interim urget necessitas administrandi Sacramenta?*

Resp: Rituale Romanum, jussu Pauli 5ti editum, id docet



docet & præscribit, scilicet, si habeat copiam Confessarii & temporis, locique ratio permittat, debet prius confiteri, antequam ad administranda Sacramenta accedat, quodsi urgeat necessitas & copia Confessarii desit, aut etiam ratio temporis non permittat ut prius confiteatur, saltem debet prius actum contritionis elicere, & corde pænitere. Hæc facere si pertermiserit, peccat mortaliter. Excusari tamen potest à peccato, ob repentinam & inopinatam necessitatem ita urgentem, ut non relinquat spatium elicendæ contritionis, ut si sit periculum nequis moriatur sine baptismo, vel sine absolutione, dum Sacerdos occuparetur in elicendo actu contritionis, quare cavendum est Sacerdoti in hoc perplexitatis statu constituto, ne dum contritionem in se accendere conatur, infanti perisilitanti, aut etiam adulto moribundo desit. Circa hunc tamen necessitatis casum duo notanda sunt. 1. immunem à peccato non fore illum qui necessitatem hanc prævidere potuit, ut prævidere possunt, & debent qui in amplis Pareciis Nosocomiis, aut exercitiis ministrant. 2. extra casus seu pueruli animam agentis, seu hominis ex alto decidentis, qui transeuntem Sacerdotem mire perturbant, rarum esse, ut quis ad elicendum contritionis actum impotens sit.

*Quæres 5to: Utrum liceat à malo Ministro Sacramenta recipere?*

*Resp:* Hæc quæstio movetur de Ministro, quem certo moraliter constat esse in malo statu, quia in consuetudine gravis peccati, vel in proxima illius occasione versatur, ut si Parochus, aut alius quispiam Sacerdos ebriatus, vel impudicitia deserviat, alioqui enim Minister debet præsumi bonus, quia charitas non cogitat malum. Unde ut ab alicujus Sacerdotis ministerio quis abstineat, non sufficit, communiter loquendo, ut sciat recenter ab eo grave commissum fuisse peccatum, adhuc enim præsumi potest, maxime si ad administranda Sacramenta sponte præsto sit, id quod sui muneris erat, fecisse, ut Deo reconciliaretur.

Jam vero qui Sacramenta postulant, vel sunt in extrema necessitate, ut si petatur Baptismus pro infante morituro, vel in necessitate non extrema quidem, sed aut gravi, ut cum urget annuæ Confessionis præceptum, aut levi, ut cum quis vult Eucharistiam sumere intuitu cujusdam festi solemnisi, indulgentiaque plenaria.

Itaque 2mo graviter ille peccat, qui petit Sacramenta à Ministro, qui illa conficiendi potestatem non habet, quia



quia tunc nullitati exponitur Sacramentum, ac proinde Sacrilegium immane perpetratur: ut si quis ab alieno Sacerdote, non à proprio Parocho exigat Matrimonii benedictionem, vel Confessionis auditionem, absolutionemque ab eo, qui ad Confessiones audiendas non est approbatus. Pariter nefas est exquirere Sacramenta à malo Ministro, sive exposito, sive parato, vel etiam à proprio Parocho, quoties ea cum eodam fructu à bono recipi possunt. Quia charitas exigit ne cuiquam gratis præbeatur occasio peccati. Hinc è duobus Ministris, quorum alterius sanctitas, legitime dubia est, ille præferri debet, de quo nihil est dubii.

2do: In casu extremæ necessitatis licitum est recipere Baptismum à malo Ministro, etiamsi ille foret excommunicatus, denuntiatus, quia in tali casu ob penuriam legitimi Ministri, etiam ab Hæretico, Judæo, vel Pagano baptismum petere licitum est. Neque etiam dubium est, quin à Ministro hæresi infecto, & præciso recipi possit Pœnitentia & Eucharistia in periculo mortis, quia Pœnitentia & sacrum viaticum graviter ad salutem sunt necessaria iis, qui ex hac vita transaturi sunt. Imo urget tunc Divina lex ea recipiendi, cum ex parte recipientis inculpate recipi potest.

3tio: Etiamsi extrema desit, modo tamen sufficiens adsit necessitas, licet à malo Ministro Sacramenta petere, quia tunc non petitur nisi id, quod alter licite & sine peccato facere potest, & cuius petendi iusta adest causa, atque sufficiens necessitas. Hæc vero necessitas aliquando gravior, aliquando minus gravis esse debet. Namque cæteris paribus minor requiritur causa, ut à proprio Parocho petantur Sacramenta, quam ut ab extraneo Sacerdote, minor ut ab extraneo Sacerdote, ad Sacramenta ministranda exposito, quam ut à parato tantum postulentur. In hac enim, & aliis id genus materiis, eo quisque securus declinat à peccato, quo plus juris habet ad petendum id, quod petit, & minus alium peccato exponit. Porro multo plus quisque juris habet ut sibi Sacramenta ministrentur à proprio Parocho, quam ab alieno Sacerdote. Minus quoque obijcitur peccato, qui expositus est ad ministranda Sacramenta, quam qui ad ea conficienda nonnisi paratus est.

Ceterum licet necessitas, quæ hic à peccato excusare potest, non consistit in indivisibili, haud tamen sufficit quævis, etiam levis, & modica, sed ea requiritur, quæ



quæ injuriam Deo per peccaminosam Sacramenti administrationem à malo Ministro illatam utcumque compenset. Quare ob spirituales fructus qui differri potest, fas non est etiam à proprio Paracho, qui improbus est Sacramenta exigere. Aliud est si ex eorum dilatione immineat periculum lapsus in aliquod grave peccatum, si gravis momenti indulgentiam v.g. Jubilæum, quod difficile reddit, lucrari aliter nequeat, aut si diu in peccato mortali permanere debeat nisi malo confiteatur Ministro.

*Quæres 6to: In ministro Sacramenta conficiente requiritur intentio?*

*Resp:* Certum & indubitatum est in Ministro Sacramenta conficiente omnino intentionem requiri, quia Concilium Florentinum docet Sacramentum quodvis tribus constare: materia, videlicet, forma & Ministro cum intentione faciendi id quod facit Ecclesia, quorum si aliquid desit, non statit Sacramentum. Et Concilium Tridentinum Sess. 7. Can. 11. hoc expresse definiivit his verbis: *Si quis dixerit in Ministris dum Sacramenta conficiunt, & conferunt non requiri intentionem saltem faciendi quod facit Ecclesia, anathema sit.* Porro intentio est actus voluntatis deliberatus quidpiam facere sibi proponentis, ac constituentis. Sed multiplex est intentio. Et quidem 1. alia est explicita, alia implicita. *Explicita*, qua quis expresse, & explicitè aliquid indendit, ut si Sacerdos baptisans, spirituales infantis generationem in se & expresse intendat, ac velit. *Implicita*, qua quis aliquid non in se, sed in alio indendit, ut cum quis infantem baptisat, licet de characterē, qui per baptismum imprimitur non cogitat, eo ipso tamen eum imprimere infanti intendit, quia ipsum vult baptisare. 2. alia est absoluta, alia Conditionata. *Absoluta*, est quando quis simpliciter & sine ulla limitatione aliquid vult. *Conditionata*, qua quis vult quidpiam, sed sub certa conditione. Hæc autem est vel de præterito, vel de præsentī, vel de futuro. 3. intentio est actualis, virtualis, habitualis. & interpretativa. *Actualis* est præsens & deliberata rei efficiendæ volitio. *Virtualis* est rei efficiendæ propositum, non actu, sed virtute prioris volitionis permanens & continuatum, quod nec revocatum, nec interruptum fuerit. Ut si quis Altare accesserit animo Missam celebrandi & Eucharistiam consecrandi, & in decursu mente distracta consecrationis verba protulit. *Habitualis* est intentio actu habita, non quidem retractata, sed tam longo tempore interrupta, ut nullo modo perseverare censetur.



seatur. *Interpretativa* est ea voluntatis dispositio; ex qua quis hoc vel illud ultro vellet facere, si attendisset faciendum esse. Igitur actuale baptisandi intentionem habet, qui actu sibi proponit, ac statuit hunc infantem baptizare. Virtuale, qui actu voluit baptizare, sed in ipso baptismationis actu mentem habuit ad alia conversam. Habitualement, qui ante aliquot dies proposuerat, sibi hunc infantem baptizare, & hodie non renovata intentione baptizat. Interpretativam, qui ratus se ablueri non nisi infantis simulacrum, aquam in verum effudit infantem, quem si sciret verum esse infantem, serio baptizare voluisset.

*Quæres 7mo: Qualis ergo requiritur in Ministro intentio. ut valide conficiat Sacramenta?*

*Resp: amo: Ut Minister valide conficiat Sacramenta, necessaria est intentio faciendi id, quod facit vera Christi Ecclesia, quæcunque illa sit. Quare conficiens Sacramentum, exg. baptisans, debet velle & intendere talem ritum peragere, prout à Christianis peragitur, & qui pro sacro ab ipsis habetur. Idcirco ad validitatem Sacramenti non est necesse ut Minister intendat verum conficere Sacramentum, aut illum ritum peragere, ut vere & in se sacrum, neque etiam opus est, ut intendat facere quod facit Ecclesia Catholica, Romana, sed sufficit quod velit facere, quod facit vera Christi Ecclesia quæcunque, & ubicunque illam esse putet, ac intendat perficere ritum prout à Christianis peragitur, & ab ipsis pro sacro reputatur, quidquid ipse de eo interius sentiat. Quia ex Conciliis, Florentino, & Tridentino, ad validitatem Sacramenti sufficit, & necesse est, ut Minister conficiens Sacramentum velit, & intendat facere id, quod facit Ecclesia, huic vero intentioni generali, privatus, ac particularis error Ministri obesse nequit, quod videlicet ipse arbitretur Ecclesiam, aut Lutheranam, aut Calvinianam esse veram Christi Ecclesiam, dummodo generatim velit facere id, quod vera Christi facit Ecclesia, neque etiam nocet quod Judæus, aut Paganus, vel etiam Athæus, aut aliquis sine ulla existens Religione, apud se iudicet, Baptismi ritum esse vanum, ac prorsus inutilem, dummodo velit ritum illum perficere prout à Christianis peragitur, & qui ab ipsis ut sacer habetur, atque ut talis ab ipsis practicatur. Unde ex perpetua Ecclesiæ Catholicæ fide, valent Sacramenta ab Hæreticis collata, Baptismus à Judæo etiam & Pagano confectus, quod non esset si privatus*



vatus, & particularis Ministrantis & Sacramenta conficiens error, validitati eorum obelset.

Necesse tamen est, ut hæc intentio sit vera, seria, ac sincera, si enim Minister conficiens Sacramenta interius velit, nonnisi ritum Sacramentalem deridere, fingere, ac simulare, licetsi exterius illum serio & non jocose illum perficiat, non stabit Sacramentum. Qui enim solum habet irridendi, jocandi, fallendi, ac Sacramentum simulandi intentionem, non potest vere interius intendere id facere, quod facit vera Christi Ecclesia, sine quo Sacramenta stare, ac valere non possunt.

2do: Hæc autem intentio interna, vera, ac sincera non debet omnino esse actualis, sed sufficit virtualis, & hæc saltem necessario prærequiritur. Quia in conficiendis Sacramentis semper habere intentionem actualem, non est in potestate Ministri, cum præter voluntatem hominis, cum maxime vult ad ea attendere quæ facit, ad alia mens ipsius sæpe avocetur, sufficere ergo debet virtualis. Certe ut valide conficiantur Sacramenta, non sufficit intentio neque habitualis, neque interpretativa, quia intentio habitualis, aliquando fuit, sed dum conficitur Sacramentum nullatenus subsistit, interpretativa quoque elset, si rem faciendam Minister cognovisset, sed reipsa non est, unde neutra in actionem qua Sacramentum conficitur influit, actualis autem intentio non omnino requiritur, quia haberi semper nequit. Igitur sufficit intentio virtualis. Verum tamen modis omnibus curandum est Ministro, ut Sacramentum conficiendo habeat intentionem actualem, tum propter majorem Sacramenti certitudinem, tum propter ipsius reverentiam. Quare qui in conficiendis Sacramentis voluntarie distrahuntur, non mediocri peccati rei sunt. Sed hic præcipue animadvertendum est, vix fieri posse, ut actualem conficiendi Sacramentum intentionem non habeat, qui deliberate ad illud conficiendum accedit, & qui sciens quid faciendum sit, libereque illud facere volens, actualem non habeat faciendi voluntatem, cum à nullo ad faciendum cogatur, aut impellatur. Certe intentio actualis aliquid faciendi, aliud non est, quam actualis illud faciendi voluntas. Qui ergo scienter & deliberate vult, aliquid facere, actualem illud faciendi habet intentionem. Neque enim ut actualis habeatur intentio, necesse est, ut actu quodam explicito concipiatur vg: *Volo celebrare, volo baptizare*, & præterea supra istiusmodi actum sese reflestat, attentionemque suam convertat, sed satis est, quod

Mini-



Minister ad baptisandum, aut celebrandum deliberate se accingat, sponte, libere, sciens, & volens baptiset. confectus, tunc enim licetsi inter baptisandum & celebrandum distrahatur, actu non attendat, neque supra id, quod perficit, sese reflectat, actu tamen vult baptisare, consecrare, ac proinde actuale baptisandi, consecrandi, habet intentionem.

*Quæres 8vo: An valeant Sacramenta sub conditione collata?*

*Resp: amo:* Valet Sacramentum collatum sub conditione de præterito, aut de præsentī, si impleta sit conditio. Quia si conditio appositā, vel de facto jam extiterit, vel actu modo existat, tunc Sacramentum absolute confici censetur, & appositā conditio, quasi non adjecta reputatur. Hinc valent Baptismus, & Pœnitentia sub his formulis collata: *Si non es baptisatus, ego te baptiso. Si vivis, ego te absolvo*, posito videlicet quod infans baptisatus non fuerit, & pœnitens vivat. Si vero conditio appositā de præterito, vel de præsentī, non verificatur, nec subsistat, ruit Sacramentum, quia Minister non intendebat conficere Sacramentum, nisi sub appositā conditione, hæc igitur si non subsistat, Minister non vult Sacramentum conficere. Ergo tunc nullum est Sacramentum. Quodsi resciri conditio nequeat, utrum extiterit, aut extet, debet Sacramentum sub tali conditione collatum, iterari.

*2do:* Sub conditione de futuro libero, collatum Sacramentum non valet. Quia intentio Ministri illud conficientis, per appositā de futuro conditionem suspenditur, & qui sub conditione de futuro contingenti conficit Sacramentum, hic & nunc illud perficere non intendit, nisi impleta conditione. Jam vero sine intentione Ministri collatum Sacramentum nullum est. Igitur si aliquod Sacramentum sub conditione de futuro libero conferatur, nullum est. Aliud est si apponatur conditio de futuro necessario eventuro exg. *baptiso te, absolvo te, si cras sol oriatur*, quia tunc jam illa conditio censetur esse præsens, & verificata, & jam in præsentī verum est, quod necessario futurum est. Unde inquit S. Thomas Doctor in 4. distinct. 29. art. 3. *talīa futura jam sunt præsentia in suis causis.*

*Quæres 9no: Utrum liceat Sacramentis, dum conficiuntur, conditiones apponere?*

*Resp:* Sacramentis conficiendis nunquam licet apponere



nere conditiones de futuro, quia tunc nullum, ac irritum est Sacramentum, ipsumque graviter profanatur. Pariter conditionem de præsenti, vel præterito, sine necessitate non licet apponere, quia Sacramento irreverentia irrogatur, & est quædam nugatio, atque Ecclesiæ praxi adversatur. Necessitate autem exigente, ut si dubium sit prudens de validitate collati Sacramenti, illud iterando, licet conditionem apponere. Unde licet sub hac forma infantem in via proiecitur baptizare: *Si non es baptisatus, ego te baptizo*: aut hominem moribundum alicubi repertum, his absolvere verbis: *Si es dispositus vel si es capax, ego te absolvo*. Non sunt tamen etiam sub conditione iteranda Sacramenta, nisi post diligens examen, & quando prudens occurrit dubium. Dum vero necessitate exigente, Sacramentum sub conditione conficitur, non omnino necesse est, ut conditio verbis exprimat, nisi dum propter occurrens dubium Baptisma repetitur, quia tunc Ritualis Romani præscriptum observari debet.

*Quæres 20mo: An tenetur Minister ritus ab Ecclesia in conficiendis, atque administrandis Sacramentis præscriptos, observare?*

*Resp:* Ritus, qui in Sacramentorum administratione usurpari solent, triplicis sunt generis, essentielles, integrantes, & accidentales. *Essentiales*, qui sine Sacramenti interitu omitti nequeunt, unde illis omisus irritum est Sacramentum, quales sunt quæ spectant materiam, formamque Sacramenti. *Integrantes*, qui licet ad Sacramenti substantiam non spectant, ad ipsius tamen significationem, & intelligentiam multum conferunt, unde graviter ab Ecclesia præceptæ sunt v.g. mixtio aquæ vino in Sacramento Eucharistiæ. *Accidentales*, qui nec ad substantiam Sacramenti omnino sunt necessarij, nec ad illius intelligentiam, significationemque multum conferunt, & non nisi Sacramentorum administrationem adornant.

Itaque mortaliter peccat, qui essentielles, aut integrantes ritus in conficiendis, vel administrandis Sacramentis prætermittit. Quia essentielles ritus prætermittendo nullitati exponit Sacramentum, & integrantes negligendo in re multum sacra, grave Ecclesiæ præscriptum transgreditur. Hinc graviter peccat, qui extra Missæ sacrificium Eucharistiam conficeret.

Qui vero accidentales nonnisi ritus in conficiendis & administrandis Sacramentis, sine eorum contemptu, prætermittit, peccat tantummodo venialiter, quia istiusmo-



di ritus cum nonnisi ad ornatum, & majorem solemnita-  
tem pertineant, non sunt adeo graviter, ac severe ab Ec-  
clesia præscripti, ut mortaliter peccet, qui eos præter-  
miserit. Qui autem istiusmodi ritus ex contemptu, &  
parvipensione omittit, gravis peccati reus est, quia ut do-  
cet S. Bernardus, contemptus convertit in crimen gravis  
rebellionis, nævum satis levem simplicis transgressionis.  
In his autem contemptui æquiparatur gravis incuria, seu  
in addiscendis, seu in exercendis sacris ritibus.

*Quæres xxmo, An aliquando liceat Sacramentum si-  
mulare?*

*Respi.* Nunquam licet Sacramenta simulare, quia qui  
Sacramentum simulat, gravem Christo irrogat irreveren-  
tiam, illi pessime illudit, verbis ac rebus ab ipso institu-  
tis abutitur, unde in re gravissima facto ipso mentitur ac  
proinde graviter peccat. Hinc Innocentius primus, se-  
quentem damnavit propositionem: *Urgens metus, & gra-  
vis, justa est causa Sacramentorum administrationem si-  
mulare.* Hinc graviter peccat, qui Missæ celebrationem  
simulat, aut hostiam non consecratam cuiquam etiam sci-  
enti, & consentienti pro Communione porrigit, quia gra-  
vi peccato aliud vitare nefas est.

## CAPUT SECUNDUM

*De præviis ad Sacramenta recipiendâ dispositioni-  
bus, & eorum effectibus.*

Quemadmodum solus homo potest Sacramenta con-  
ficere, ita etiam soli homini viventi administrari possunt.  
Et quoniam non omnis homo quodlibet Sacramentum con-  
ficere potest, ij tantum ea perficere valent, qui ad ea  
perficienda potestatem habent, pariter non omnes omnia  
Sacramenta recipere possunt, sed illa tantum percipere va-  
lent, quorum capaces sunt. Unde omnis quidam vivens  
homo baptisari potest, nemo tamen nisi baptisatus cete-  
ra percipere valet Sacramenta, quare Baptismus Sacramen-  
torum janua merito appellatur.



## ARTICULUS Ius

## De præviis ad Sacramenta recipienda dispositionibus

*Quæres amo. Ut valide recipiantur Sacramenta, requiritur in recipiente intentio?*

*Resp:* In parvulis & perpetuo amentibus, nulla requiritur intentio ut valide recipiant Sacramenta Baptismi, Confirmationis, atque etiam Eucharistiæ, quia cum careant usu rationis, nullius actus humani, qualis certe intentio est, capaces esse possunt, unde ex perpetua Ecclesiæ praxi, parvuli baptisuntur, & antiquitus ipsis statim post Baptisma Sacramenta Confirmationis, ac Eucharistiæ conferebantur. Pariter etiam perpetuo amentes, *in fide Ecclesiæ*, ut inquit S. Thomas quæst. 68. art. 13. baptisuntur, quia parvulis qui usu rationis carent, æquiparantur.

Certum quoque est, ut valide recipiatur Sacramentum Eucharistiæ, etiam in adultis nullam requiri intentionem ad interiorum consensum, quia cum Sacramentum hoc habeat esse permanens, neque in usu positum sit, sicut cætera Sacramenta, quæ tunc solum subsistunt, cum perficiuntur, ubicunque reponitur, subsistit, & est verum Sacramentum, licetsi nullum, nisi in rite dispositis, & digne recipientibus, fructum pariat.

Sed ad alia præter Eucharistiam recipienda Sacramenta, in adultis requiritur aliqualis intentio, & interior voluntatis consensus. Unde adultus, qui vel omnino reluctans baptisatur, ordinatur, cæteraque recipit Sacramenta, seu mere negative erga illa se habet, invalide illa recipit. Quia ut docet Concilium Trident: Sess: 6. Cap: 7. Justificatio, sanctificatio, sive illius auctio in adultis non perficitur, nisi *per voluntariam susceptionem gratiæ & donorum* cælestium, atque id ex Christi institutione, qui noluit ut per Sacramenta, quæ ad sanctitatem, justitiamque conferendam, aut augendam instituit, in adulto sine ipsius consensu valerent, justitiam, sanctitatemque illi conferrent, vel in ipso augerent, nisi ipso volente, & consentiente, atque cooperante. Si ergo adultus aut reluctans sit, aut mere negative se habet, valide Sacramenta non recipit, nec proinde ullum gratiæ fructum in eo pariunt. Hinc Innocentius 3<sup>us</sup> Cap: 3. de Baptismo sic inquit:

*Ille*



*Ille qui nunquam consentit, sed penitus contradicit, nec rem, nec characterem suscipit Sacramenti.*

Certe per Baptisma & Ordinis Sacramenta, graves imponuntur obligationes. Porro obligatio gravis invito, & reluctanti imponi nec debet, nec potest. Ergo talibus collata Sacramenta, nulla, & irrita sunt.

Verum ad recipienda valide Sacramenta non requiritur intentio actualis, neque virtualis, sed sufficit habitualis, seu intentio prius habita, & non retractata. Unde ex præscripto Ritualis Romani baptisari debent moribundi, etiam sensibus & ratione destituti, si antea desiderium Baptismi exhibuerint, illudque expetierint. Ab hoc tamen excipitur Sacramentum Pænitentiae, & Matrimonii, quia Sacramenti Pænitentiae materia sunt actus pænitentis, qui in præsentī fieri debent, dum hoc Sacramentum perficitur olim habiti non sufficiunt, & Matrimonii contractus validus esse nequit, nisi contrahentium consensus præsens sit, actu aut virtute perseverans.

*Quæres 2do. Ad fructuose Sacramenta percipienda, quæ requiruntur dispositiones?*

*Resp:* Sacramenta alia dicuntur mortuorum, alia vivorum. Sacramenta mortuorum sunt ea, quæ peccatorem spiritualiter mortuum, sanctificant, justificant, & gratia vivificant. Sacramenta vivorum illa sunt, quæ justis, ac proinde gratia sanctificante vivificatis conferuntur. Vivorum Sacramenta sunt Confirmatio, Ordo, Matrimonium, Extrema unctio, maxime vero sacratissima Eucharistia. Mortuorum duo: Baptismus & Pænitentia. Itaque *amo.* ut Sacramenta vivorum cum fructu recipiantur requiritur immunitas à peccato mortali, ac proinde status gratiæ sanctificantis est omnino necessarius. Hinc mortalis sacrilegii reus est, qui ad hæc Sacramenta in statu peccati mortalis accedit, illaque recipit. Quare qui ad prædicta Sacramenta accedere vult, & se peccati mortalis reum esse sentit, confiteri prius debet, quantumcunque sibi contritus esse videatur, quia contritio, quæ peccata delet, rarissima est, ut enim habet Catechismus Concilii Tridentini: *Quis ignorat illam*, contritionem scilicet, qua peccata delentur, adeo vehementem, acrem, intensam esse oportere, ut doloris acerbitas, cum scelerum magnitudine æquari, conferrique possit. Et quoniam, ut ibidem dicitur, pauci admodum ad hunc gradum perveniunt. Igitur certiora, & tutiora præferendo, tutius est ut Sacramentalis confessio præmittatur, antequam aliquod ex prænominatis Sacramentis



tis recipiatur. Certe per Sacramentum Pœnitentiæ, & certius, & facilius peccata delentur, justificatio, & gratia sanctificans acquiritur, quam per contritionem, quæ perfecta esse debet ut peccata deleat, quam habere & perardum ac difficillimum est, & rarissimum. Quare Catechismus Romanus sic inquit: *Cum Sacramenta administramus, aut percipimus, toties confessio prætermittenda non est.* Verum quidem est, quod Sacerdos qui peccato mortali onustum se esse sentit, quando Confessarii copiam non habet, neque ratio temporis ac loci permittit confiteri, possit elicitio contritionis actu, dum gravis urget necessitas, Missam celebrare, aut aliud Sacramentum conficere, sed hoc ad alios non est trahendum, non enim potest talis occurrere necessitas, quæ aliquem adigat ad Sacramenta suscipiendâ, non præmissa Sacramentali Confessione, dum se peccati mortalis reum esse sentit.

2do. Jam vero ad Sacramenta mortuorum fructuose recipiendâ, non requiritur quidem status gratiæ, quia illa statum gratiæ conferunt, & efficiunt, hominem iustificant, & sanctificant, sed in adultis requiruntur præviæ fidei, ac pietatis dispositiones, quibus homo aptus efficiatur ad suscipiendam gratiam sanctitatis, ac alia Cælestia dona virtutesque, quæ eidem annectuntur. Hinc qui sine præviis dispositionibus Sacramenta suscipiunt, quamquam valide illa suscipiant, nullam tamen fructum gratiæ ex iis percipiunt. Sacramenta siquidem adinstar causarum naturalium, ubi obicem inveniunt nihil operantur. Qui vero sine præviis ac necessariis dispositionibus ad Sacramenta accedit *exg.* in statu peccati mortalis Ordinem, Conformationem suscipit, obicem ponunt. Nihil ergo gratiæ in iis Sacramenta operantur, ac prorsus infructuosa ipsis sunt. Jam vero Sacramentum Pœnitentiæ si recipiatur sine præviis fidei & pietatis dispositionibus, non solum infructuosum est, sed & irritum, ac nullum, quia actus pœnitentis maxime contritio, Sacramento Pœnitentiæ essentialis est, quæ sine fide, & pietatis sensu haberi nequit.

*Quæres 3tio. Quid facto opus sit illi, qui sine præviis gratiæ, ac pietatis dispositionibus Sacramenta susce-*

*Resp.* Qui sine præviis gratiæ ac pietatis dispositionibus Sacramenta suscepit *exg.* in statu peccati mortalis Eucharistiam sumpsit, Matrimonium contraxit, Ordinatus est, aut etiam adultus sine pœnitentiæ sensu, actualem ad præterita crimina gerens affectum, baptisatus est. Is sincere



cero cordis dolore, ac Sacramentali confessione, commissum sacrilegium, ac cætera sua crimina abstergere, & ablueri debet, atque tunc Sacramenta, quæ iterari nequeunt, veluti Baptismus, Confirmatio, & Ordo, reviviscunt, atque effectus gratiæ producunt, quos obstante obice, & mala hominis dispositione producere non poterant. Item dicendum est de Sacramento Matrimonii atque Extreme unctionis, quæ quis in statu peccati mortalis, & sine debitis dispositionibus suscepit, hæc inquam etiam Sacramenta per Pænitentiam reviviscere, atque effectus gratiæ, sublato obice, producere, probabilissimum est, quia etiam Matrimonium hic & nunc vivente comperta iterari nequit, & Conjuges summopere indigent specialibus hujus Sacramenti gratiis, quibus infeliciter privati sunt indigne illud suscipiendo. Extrema etiam unctio, & raro datur, & gratiæ ipsi annexæ moribundo summopere necessariae sunt. Igitur pie de Divina bonitate ac misericordia præsumendum est, & hæc quoque Sacramenta reviviscere, atque per seriam pænitentiam sublato obice, effectus suos producere.

Quod vero attinet cætera Sacramenta, videlicet Eucharistiæ, ac Pænientiæ, hæc cum frequenter iterari possint, non est necesse ut reviviscant, sed sacrilegæ Communiones, sincera pænitentia, ac integra Confessione compensari possunt.

*Quæres 4to. Non recte dispositis, ac peccatoribus, licetne Sacramenta ministrare?*

*Resp:* Peccatorum alii sunt *publici*, quorum impietas ita nota est omnibus, aut fere omnibus, ut nulla tergiversatione celari possit; alii *occulti*, quorum crimen multos latet, atque pluribus ignotum est. Peccator etiam sive occultus, sive publicus, Sacramenta petit vel publice, scilicet coram frequenti populi cætu, vel occulte ac privatim, ut cum solus à solo Ministro Sacramentum exigit.

Igitur *amo.* Peccatori notorio, ac publico, etiamsi publice petat, Sacramenta negari debent. Id constat ex præscripto Ritualis Romani, quod de Sacramento Eucharistiæ hæc habet: *Argendi sunt publice indigni, quales sunt excommunicati, interdicti, manifestique infames, ut meretrices, concubinarij, fornicatores, & alij id genus publici peccatores, nisi de eorum pænitentia, & emendatione constet, & publico scandalo prius satisfecerint.* Et hoc statutum est conformiter ad Christi edictum Math: Cap: 7. datum Apostolis: *Nolite dare sanctum canibus, neque mittatis margar-*



*garitas vestras ante porcos.* Ubi per canes, quibus sanctum dare prohibet Christus, unanimi SS. Patrum consensu, publici peccatores intelliguntur. Unde S. Chrysostomus Homil: 83. in Math: Sacramentorum dispensatores, sic graviter compellet: *Non vobis imminet ultio, si quemquam illius improbitatis conscium, hujus mensæ participem faciatis. Sive quis Dux militiæ sit, sive Præfectus, sive Princeps diademate coronatus, indigne ne accedat, prohibe, non de ignotis, sed de notis hæc disputo.* Et quamquam hæc dicta, & statuta sint de Eucharistiæ Sacramento, ne istud sanctum canibus detur, sed idem dicendum ac intelligendum est de aliis quoque Sacramentis, quia & ipsa sancta sunt, & cælestes margaritæ, quæ ante porcos projici non debent.

Cavendum tamen summo opere est, ne pro notorio habeatur, quod vel paucis cognitum est, vel incertis rumoribus innititur vel sola vulgi credulitate innititur. Neque etiam ut publicum peccatorem in hoc vico habeat Sacerdos, qui tantum notorius est in alio, præsertim si fama criminis ipsius non facile eo sit perventura. Arceri autem à Sacramento maxime debent, publici Concubinarii, Adulteri, notorii fornicatores, meretrices. Neque Sacerdos deferat Eucharistiam ad infirmum, si notorie adulter necdum pellicem suam à domo ejecerat. Et ubi sentit Parochus fieri posse, ut ad Sacramenta accedat quis suspectæ famæ, æquum est, ut eum conveniat, & privatim moneat, quatenus mali rumoris, & scandalii causas resacet.

Pœnitentiæ tamen Sacramentum, quibusvis peccatoribus, eam postulantibus, denegari non debet, quoniam maxime pro peccatoribus hoc Sacramentum à Christo institutum est.

2do. Occulto autem peccatori, si Sacramenta publice petat, negari non debent, & id Christi exemplo comprobatur, qui Judam à sacra mensa non repulit, sed ei, sicut & cæteris Apostolis sacratum panem porrexit, atque ex hac Christi actione universa didicit Ecclesie, occultos peccatores, publice petentes, a Sacramentis non esse arcendos. Si vero occulte petierint, aut nonnisi coram iis petierint, quibus certo de illorum crimine constat, Sacramenta negari possunt, & debent. Quare sic in Romano Rituali præscriptum Sacerdoti reperimus: *Occultos peccatores, si occulte petant, & non eos emendatos agnoverit, repellat, non autem si publice petant, & sine scandalo ipsos præterire nequeat.* Nulli vero præbetur



betur scandalum, si occulto peccatori & occulte petenti, aut nonnisi coram iis, qui certo ipsius norunt crimen, Sacramentum denegetur; imo si tunc Sacramentum ipsi daretur, adstantes id ægre ferrent, videntes Sacramentum ab improbo profanari. Quod si tamen Sacerdos crimen ex Confessione didicerit, atque ei ea via innotuerit, Titium exg. esse publice scandalosum, non poterit illi Sacramenta denegare, quàmvis solus sit cum solo, quia quæ per Confessionem noscuntur, & hac via sciuntur, pro ignotis haberi debent.

## A R T I C U L U S 2dus

### *De effectibus Sacramentorum.*

*Quæres 1mo: Qui sunt effectus Sacramentorum?*

*Resp:* Effectus Sacramentorum sunt gratia & character. Omnia siquidem, indigne ea suscipientibus gratiam producent, nonnulla vero, videlicet, Baptismus, Confirmatio, & Ordo, præter gratiam, etiam characterem imprimunt. Est autem gratia vel actualis, vel habitualis: *Actualis* est donum supernaturale, quod transeuntè à Deo homini confertur, qualis est sancta cogitatio in intellectu, vel pia motio in voluntate excitata, qua homo ad bonum movetur, à malo retrahitur: *Habitualis* est donum supernaturale à Deo homini infusum, animæ ipsius inhærens, & in ea permanens. Hæc gratia, justificans dicitur, & si quidem hominem ex peccatore faciat justum, illumque sanctificet, vocatur *gratia prima*, si vero iustitiam ejus ac sanctitatem augeat, vocatur *gratia secunda*. Prima datur peccatoribus, qua justificantur, secunda justis conceditur, qua redduntur justiores, & magis sanctificantur. Character vero Sacramentalis, est signum indelebile animæ impressum, quo unus ab aliis secernitur, nimirum baptisatus à non baptisato, sacro Ordine initiatus à simplici Christiano, sacro Chrismate in Confirmatione unctus, ab eo qui non est hoc Sacramenti sigillo insignitus.

*Quæres 2do. Quæ Sacramenta imprimunt characterem?*

*Resp:* Ex perpetua Ecclesiæ fide, quæ in Conciliis Florentino, & Tridentino stabilita fuit, tria Sacramenta characterem imprimunt. Baptismus, Confirmatio, & Ordo.



do. Unde hæc Sacramenta iterari nequeunt, quia indelebilem imprimunt characterem.

*Quæres 3tio. Qualem gratiam Sacramenta producant?*

*Resp:* Sacramenta mortuorum primario, & per se producant gratiam primam, quia primario à Christo instituta sunt, ad justificandos, & sanctificandos peccatores. Secundario tamen & per accidens, pariunt gratiam secundam, quia non raro contingit ut pœnitens perfecte contritus, aut nonnisi venialia habens peccata, ac proinde justus, ad confessionem accedat, ac tunc Sacramentum Pœnitentiæ non primam, sed secundam in eo producit gratiam.

Unumquodque autem Sacramentum, specialem, & sibi propriam producit gratiam, aliam proinde Baptismus, aliam Ordo, aliam Matrimonium, atque aliam Extrema unctio, simul tribuit jus ad gratias actuales, quæ necessariæ sunt, ut & finis Sacramenti obtineatur, & obligationes ex eo promanantes adimpleantur. Hinc Baptismus præter specialem sanctificationis gratiam, quæ regenerationis dicitur, tribuit baptisato jus ad gratias actuales, quæ ipsi necessariæ sunt ut Christiane vivat. Ordo præter gratiam consecrationis, tribuit ordinato jus ad actuales gratias, quæ necessariæ sunt ad sacras functiones rite peragendas, Matrimonium tribuit jus ad gratias, quibus opportune onera Matrimonii perferantur, obligationesque Conjugii adimpleantur.

Non tamen æqualem in omnibus suscipientibus gratiam producant Sacramenta, sed majorem in magis dispositis, minorem in minus dispositis, unde quisque Sacramentalem gratiam recipit, secundum propriam dispositionem, quare accedentibus ad Sacramenta, summopere fatagendum est, ut quam maxime dispositi ad ea accedant, quo enim melius erunt dispositi, eo uberiores gratias consequantur.



# TRACTATUS

DE

## SACRAMENTIS BAPTISMI ET CONFIRMATIONIS.

Moris olim in universa Ecclesia erat, ut hæc duo Sacramenta Baptismus scilicet & Confirmatio, simul unum post aliud daretur, conveniens igitur est, ut continuo etiam tractu explanentur.

### CAPUT PRIMUM

#### *De Sacramento Baptismi.*

Baptismus proprie lotionem, ablationem, significat, & dicitur Sacramentum regenerationis, renovationis, quæ fit per aquam in verbo vitæ, scilicet per verba à Christo præscripta, quæ vitam spiritualem conferunt.

### ARTICULUS Ius

#### *De institutione, materia, ac forma Baptismi, ejusque Ministro.*

*Quæres amo: Quid sit Baptismus?*

*Resp:* Baptismus est Sacramentum ad spiritualem hominis regenerationem à Christo institutum, per corporis ablationem, sub certa verborum forma conferendum. Est itaque baptismus à Christo institutus, quando nimirum post suam Resurrectionem mittens Apostolos in universum Mundum dixit eis Math: Cap: 28. *Euntes docete omnes gentes, baptisantes eos in nomine Patris, & Filii, & Spiritus sancti*, tunc enim & præceptum omnes gentes baptisandi Apostolis dedit, & formam qua id fieri deberet præscripsit. Ad spiritualem vero hominis regenerationem est institutus Baptismus, quia ut docet S. Chrysostomus. Catech: I. ad illuminatos: *Baptismus non solum delicta purgat,*



gat, sed ita id præstat, ac si denuo generati essemus. Unde & Christus Joan: Cap: 3. dixerat Nicodemo: *Oportet vos nasci denuo.* Confertur autem per ablutionem aquæ, sub certa verborum forma, quæ Christus ipse præscripsit.

Triplex autem est baptismus: fluminis, flaminis, & sanguinis. *Fluminis* qui datur per aquæ naturalis ablutionem. *Flaminis*, est ardens baptismi recipiendi desiderium. *Sanguinis*, est pro Christo sanguinis effusio, dum necdum baptisatus pro Christo martyrium patitur.

*Quæres 2do: Quæ est Baptismi materia?*

*Resp:* Materia remota Baptismi, eaque omnino necessaria, sola est aqua naturalis, quia eam Christus ad Baptisandum destinavit, illaque à temporibus Apostolorum ad baptismum semper adhibuit Ecclesia. Omnis igitur aqua, quæ communi hominum usu, est & vocatur aqua, sive illa sit maris, sive fluvii, paludis, sive putei, aut fontis, est materia baptismi. Neque etiam refert an limpida sit, an turbida, calida, an frigida, dulcis, an falsa. Pariter aqua ex nive, grandine, aut glacie resoluta, ad baptisandum apta, atque idonea est. Nix autem grando, glacies, pruina, si non fuerint prius resoluta, ad baptismum adhiberi nequeunt, quia sicut per se non lavant, nisi resolvantur, ita etiam ad baptismum adhiberi nequeunt, nisi saltem autumnis tempore inter baptisandum per manus calorem resolvantur, si enim nonnisi facta applicatione, ac prolata forma, fluere inciperet, non stabit baptismus, quia tunc Minister non vere ablueret. Quodsi aqua alienæ rei admisceatur in tanta quantitate, ut compositum inde resultans, magis sit aliud exg. lutum, quam aqua, tunc ad baptisandum adhiberi nequit, secus si aqua adeo prævaleat, ut vere adhuc aqua dici possit.

Non valet itaque baptismus collatus in vino, lacte, cerevisia, ptisanna, succo ex pomis, pyris, expresso, quia hæc morali hominum iudicio non reputantur pro aqua naturali, & usuali. In dubio an liquor aliquis sit aqua naturalis, eo uti extra necessitatem non licet, hæc vero si instet, non modo licet, sed & necesse est saltem sub conditione, quia instante necessitate, licet etiam maxime dubiam adhibere materiam, quia longe minus malum est, quod Sacramentum nullum reddatur, quam quod homo periculo æternæ damnationis exponetur.

Porro aqua, quæ baptismi materia est, etiamsi baptismus privatim & in casu necessitatis Domi conferatur, quantum fieri potest benedicta sit, quia id Sacramento



convenientius est. Si vero baptismus solemniter ubicunque, sive in Ecclesia, sive alibi administretur, ex præscripto Ritualis Romani, adhiberi debet aqua currenti anno sive Sabbatho Sancto sive in Vigilia Pentecosten benedicta, & lacro chrismate permixta.

*Quæres 2tio: Quæ sit materia Baptismi proxima?*

*Resp:* Materia baptismi proxima est ablutio, sive hæc fiat per immersionem baptisandi in aqua, sive per infusionem, aut aspersionem aquæ supra baptisandum, quia his tribus modis ablutio hominis fieri potest, unde etiam his tribus modis baptismus in Ecclesia Christi conferri solitus fuit, & modo sic conferri potest. Verum quocunque modo baptismus conferatur, ut ipæ validus sit, tanta copia aquæ baptisandus perfundi debet, ut vere lotus & ablutus esse censeatur, unde si nonnisi una, alterave gutta aquæ perfundatur, non stabit baptismus, quia tunc homo madefactus equidem dici poterit, sed lotus, ablutus dici non potest. Ut autem baptismus validus sit, necesse est, ut homo vere lotus, atque ablutus sit, quare aqua successive decurrente perfundi debet. Curandum autem est ut aqua pellem baptisandi tangat, quare si infans capillatus sit, aut caput sordidum fuerit, sordes lavandæ prius & crines discriminari debent, ut aqua carnem baptisandi tangat, & abluat. Quodsi infans secundinis adhuc obvolutus, aqua perfundatur, baptismus repetendus est.

Præcipua autem pars corporis baptisandi, quale est caput, abluī debet. An vero sufficiat ablutio alterius notabilis partis, vg. manus, pedis, brachii, dubium est, unde graviter peccaret, qui extra necessitatem, non caput baptisandi ablueret, sed etiam quamcunque partem, quia recederet à communi Ecclesiæ praxi, & periculo nullitatis Sacramentum exponeret. In necessitate autem maxime dum difficilis est partus, quæcunque, aperto Mulieris utero, infantis pars apparuerit, aut quocunque modo attingi possit, sive tubo immisa aqua, sive manu copiose madefacta, baptisari infans debet. Sed si deinceps infans plene ex utero Matris egressus fuerit, id fieri debet quod Rituale Romanum faciendum præscribit, videlicet: *Si infans, ex utero Matris, caput emisit, & periculum mortis immineat, baptisetur in capite, nec postea si vivus evaserit, erit iterum baptisandus. At si aliud membrum emisit quod vitalem indicet motum, in illo si periculum impendeat, baptisetur, & tunc si natus vixerit, erit sub conditione baptisandus.* Imo etiamsi secundina solum, quibus



bus involutus est infans, apparuerint, & periculum mortis immineat, in iis etiam quoquomodo fieri poterit, baptisandus est infans, quia satius est dubia tentare ad salvandum infantem remedia, quam nulla.

Valeat vero baptismus sive infans applicetur aquæ, sive aqua infanti, unde si infans aquæ à tecto defluenti supponatur & forma à supponente proferatur, valebit baptismus, quia vere abluit corpus, sive qui ipsi applicat aquam, illudque ea perfundit, sive qui ipsum applicat aquæ. Quod si nec aquæ ad corpus baptisandi accessio, neque corporis baptisandique applicatio fiat ab ipso baptisante, non stabit baptismus, quia tunc non verificabitur forma baptismi, quia qui neque infantem applicat aquæ, neque aquam infanti, nullo modo censeri potest eum abluere. Hinc qui nivem, glaciem, in capite infantis poneret, & hæc naturali calore resolverentur, atque sic aqua sine ulla baptisantis actione flueret, non stabit baptismus. Pariter si supra hominem in fluvio stantem aqua à Ministro non immitatur, aut si quis infantem in puteum proiciat, vel dum in illud casu prolabitur, formam baptismi proferat, non valebit baptismus, quia in his casibus baptisans baptisandum non abluit, forma proinde baptismi non verificatur, ac proinde nullus est baptismus. Aliud est si quis infantem cum funiculo in puteum, aut in fluvium demittat, & mergendo formam baptismi proferat, tunc valet baptismus, quia immersione infans vere abluitur.

Ad valorem tamen Baptismi non est omnino necessaria trina sive immersio, sive aquæ infusio, sed sufficit unica, quia unica immersione, aut infusione, vera fit baptisandi ablutio. Verum in praxi Minister tenetur sequi praxim Ecclesiæ, & servare præscriptum Ritualis Romani, atque curare ut singulæ aquæ infusiones, singillatim respondeant invocationi trium personarum SSmæ Trinitatis.

*Quæres 4to: Quæ sit Baptismi forma?*

*Resp:* Baptismi forma hæc est. *Ego te baptizo in nomine Patris, & Filii, & Spiritus sancti.* Quare ad valorem baptismi requiritur 1. distincta trium Personarum SSmæ Trinitatis invocatio, unde si vel una in forma baptismi omittatur Divina persona, non stabit Baptismus. Pariter non valet baptismus collatus in nomine SSmæ Trinitatis, in nomine Dei unius & trini, vel universim in nomine trium Personarum SSmæ Trinitatis, quia non est distincta invocatio Patris, & Filii, & Spiritus Sancti, quod ex Christi institutione fieri omnino debet. 2. hæc etiam verba *Baptizo te:* aut alia æqui.



æquivalentia, exg. *abluo te*: in forma baptismi necessario exprimi debent, quia in forma baptismi debent exprimi & actio Ministri baptisantis, & persona baptisanda, hoc autem fit per verba *baptiso te*, vel *abluo te*, sine his autem nec actio Ministri baptisantis, neque baptisandi persona denotaretur, ac proinde non valeret baptisma, quare Alexander 8. damnavit hanc propositionem: *Valuit aliquando baptismus, sub hac forma collatus. In nomine Patris & Filii, & Spiritus Sancti prætermisiss illis, Ego: te baptiso.* Non est tamen necessarium, ut pronomen, *Ego* exprimatur, quia illud verbum *baptiso*, implicite continet. Neque etiam ad validitatem baptismi requiritur, ut nomen exg. Petri, Pauli, baptizando imponendum proferatur, quia particula indicativa, *te*, dum dicitur *baptiso te*, sufficienter personam baptisandam denotat. 3. melius quoque censent, qui particulam, *in*, ad validitatem baptismi exigunt, quia dubius & incertus erit baptismus, hac forma collatus. *Baptiso te nomine Patris, & Filii, & Spiritus Sancti*, quia videtur sensus formæ usitate, esse immutatus, verba siquidem hæc *baptiso te nomine Patris*, insinuant Ministrum baptizare vice Patris, non virtute Patris, quemadmodum consveta baptismi forma sonat. 4to. vocula quoque *nomine*, ad substantiam baptismi omnino necessaria est, unde non valebit baptismus, si quis baptisaverit vel sub ista forma: *Baptiso te in Patre, & Filio, & Spiritu Sancto*, vel etiam sub hac: *Baptiso in nominibus Patris, & Filii, & Spiritus Sancti*, quia in utroque casu, sensus consvetae baptisandi formæ immutatur. Dubia etiam erit ista forma: *Baptiso te in nomine Patris, in nomine Filii, in nomine Spiritus Sancti*, quia Divinitatem inter Personas dividere videtur, unde gravissimum errorem insinuare reputatur.

Hinc sequitur, consvetam baptisandi formam accuratissime observandam esse, nihil ei detrahendo, nihil addendo, nihil immutando valebit attamen Baptismus, si consveta formæ terminis, substituantur alii termini vere æquivalentes, unde si quis pluraliter loqui asvetus dicat: *Baptisamus*, aut etiam causa honoris dicat: *Baptiso vos. Baptiso vestram celsitudinem*: valebit Sacramentum. Item si dicatur: *Baptiso Petrum*, aut *Petrus baptisatur à me in nomine Patris &c.* valebit baptismus. Quin & tunc perficietur Sacramentum, etsi persona baptisanda, non sit ejusdem nominis, aut sæxus, quia quisquis baptisat, directe,



recte, & primo intendit baptizare personam præsentem, quam ex errore putat esse Petrum, aut Paulum.

Caute tamen hic notandum est, facile fieri posse, ut termini habeantur quasi æquivalentes consuetæ formæ, qui eidem reipsa non æquivalent, unde non valet baptismus *in nomine Dei unius & trini*: licetsi hæ voces idem esse videantur, cum vocibus *Baptiso te in nomine Patris &c.* Neque valet baptismus, si conferatur *in nomine Genitoris, Geniti, & ab utroque procedentis*, quia licet materialiter idem significant, sed non formaliter. Indubitatum quoque est, formam baptismi, qua Græci utuntur, licet à nostra latina discrepare videatur, eandem cum nostra esse, ac proinde legitimam esse, ac omnino valere, quia & perantiqua est, & nihil illi deest, quæ ex Christi institutione ad formam baptismi necessarium est.

## ARTICULUS 2dus

### *De Ministro Baptismi.*

*Quæres 1mo: Sacramenti Baptismi, quis est Minister?*

*Resp: 1mo:* Omnis homo vivens, sive vir, sive mulier, fidelis aut infidelis, in casu necessitatis valide, ac licite baptizare potest. Et id constat ex continua praxi, sensu, & doctrina Ecclesiæ Catholicæ in Conciliis Florentino, & Tridentino confirmata. Certe nunquam Ecclesia rebaptizare permisit, à quocunque, modo rite, baptismum. Nemo tamen seipsum baptizare potest. Namque sicuti nemo seipsum carnaliter generare, ita etiam nemo seipsum spiritualiter regenerare potest. Pater quoque propriam prolem baptizare prohibetur, nisi in casu necessitatis, quia excideret à jure petendi debitum conjugale.

*2do:* Ordinarius autem Baptismi Minister, est Episcopus, & Sacerdos, sed Sacerdos cum subordinatione & dependentia ab Episcopo, quia Christus Apostolis principaliter demandavit & docendi, & baptisandi munus Math: Cap: 28. *Euntes docete omnes gentes, baptisantes eos.* Unde antiquitus soli Episcopi baptisabant, & ex commissione Episcoporum, atque de illorum licentia, Sacerdotes. Quare ut extra casum necessitatis licite etiam Sacerdos baptiset, sive privatim sive solemniter, requiritur delegatio, commissio, ac species quædam jurisdictionis spiritualis.



lis. Et ideo graviter peccat sacerdos, qui extra necessitatis casum, sine jurisdictione, & absque commissione baptizat sive solemniter, sive privatim, quia etiamsi vi consecrationis suæ, solemniter quoque baptizare possit, id tamen iis, quibus hoc non est commissum, & qui nullam in populum spirituales jurisdictionem habent, gravibus de causis prohibitum est, ne scilicet pax & ordo turbetur. Idem dicendum est de Parocho, qui alterius Parochiæ infantem, absque proprii Pastoris licentia, baptizare præsumpserit, est enim istud quoque temeraria, & gravis alienæ jurisdictionis invasio.

2tio: Diaconus quoque est solemnns etiam baptismi Minister, sed extraordinarius, quia ex suo Ordine id habet, ut ad solemniter baptisandum deputari possit. Verum, quia non pssim, sed in casibus tantummodo extraordinariis, ad id destinari valet, ideo nonnisi extraordinarius est solemnns baptismi Minister. Sacerdos itaque est solemnns baptismi Minister ordinarius, Diaconus nonnisi extraordinarius, ideoque & sine delegatione, ac deputatione ab Episcopo, aut Parocho facienda, solemniter baptizare nequit, & non debet ad id pssim deputari, sed nonnisi in casibus extraordinariis. Igitur: cum hodie non desit Sacerdotum copia, peccat Parochus, qui Diacono concedit facultatem, solemniter extra casum necessitatis baptisandi. Ad id autem non requiritur quidem necessitas extrema, sed tamen vera & ponderosa, non levis & futilis. Censetur autem sufficiens ad id necessitas, cum ægrotat Parochus, nec alter suppetit Sacerdos, qui vices illius supplere possit. Item cum Parochus, si ad baptisandum longe pergat, maxime die festivo, officii sui munia prætermittere cogetur. In his ergo casibus, Parochus Diaconum deputare potest, ut solemniter baptiset.

Peccat etiam graviter Diaconus, qui extra casum necessitatis, nec ab Episcopo, vel Parocho jussus, solemniter Baptismum confert, quia alienum munus usurpat, quia etiam de causa, ex communi Theologorum sententia, irregularitatem incurrit.

*Quæres 2do: Dum in casu necessitatis Baptismus conferri debet, quis ordo inter Ministros servandus est?*

*Resp:* Dum in casu necessitatis baptismus conferendus est, & plures sunt, qui baptizare possint, iste servandus est ordo, ut primo baptiset Parochus, si adsit, secundo Sacerdos, tertio Diaconus, quarto Subdiaconus, quinto Clerici inferiores, sexto Vir, septimo Famina, octavo

T. II. M. Fide.



Fidelis. Sed obstetrix ritum baptismi bene edocta, anteponenda est imperito Viro, atque infideli, quin & Parocho ipso propter decentiam status, si videlicet infans necdum plene in lucem editus baptisandus sit. His autem seclusis, utrum allatus ordo stricte servandus sit, adeo: ut ipsius inversio peccatum mortale inducat, inter Theologos controvertitur. Certum est graviter peccare Clericum, aut etiam Subdiaconum, si præsente Diacono, & Diaconum, si præsente Sacerdote baptiset, quia tunc Clericus, seu Subdiaconus, Diacono, & Diaconus Sacerdoti, ipsiusque Ordini, gravem infert injuriam, manus ipsius sibi usurpando. Si vero homo Laicus, vel obstetrix præsente Subdiacono baptisaret, dubium hic erit mortale peccatum, quia invertitur ordo, qui postulat ut longe dignior cæteris præferatur.

*Quæres 3tio: Utrum unus à pluribus baptisari, & plures unum baptisare possint?*

*Resp:* In casu urgentis necessitatis, potest unus, plures simul baptisare, quia hoc non est contrarium institutioni Christi, & reipsa initio Ecclesiæ, cum multa centena eodem die baptisabantur, plures simul ab eodem Ministro baptisati sunt. Forma etiam baptismi, cum in plurali effertur: *Ego vos baptizo*: substantialiter non immutatur. Id tamen extra casum urgentis necessitatis, fieri non debet, quia à præscripta, & usitata Ecclesiæ praxi recedere non licet.

Unus etiam, ac idem à pluribus baptisari non debet, quia hoc est contrarium & institutioni Christi, & praxi Ecclesiæ. Sed si id fiat, & plures unum baptisent, quæritur, an istiusmodi baptismus validus sit. Porro tripliciter fieri potest, ut plures ad unum baptisandum concurrant. 1mo: Si unus vg. mutus, aquam supra baptisandum fundat, alter, quia mancus, formam pronuntiet. 2do: Si duo materiam simul & formam applicent, sed ita: ut à se invicem in baptizando dependere velint, tamquam causæ partiales, dicendo. *Nos baptisamus. 3tio: Si uterque seorsim materiam & formam applicet, quasi ageret solus, ab alio dependere nolens, ut si duo Parochi, de eodem baptizando infante litigantes, eundem baptisare properent, & tunc vel ambo eodem instanti formam absolvunt, vel alter altero prius. In primo itaque casu, nullum est baptismum, quia tunc forma non verificatur, qui enim illam profert, aqua infantem non perfundit, illum non abluit, ac proinde falsum est quod dicit: *Ego te baptizo*. In secundo*



Secundo quoque casu, invalidum est baptisma, quia in eo conferendo, non servatur Christi institutio, qui unum, & totalem voluit esse Baptismi Ministrum, non plures, neque parciales, quare quemadmodum unus est Christus, ita unus esse debet vices ipsius gerens, Baptismi Minister, plures ergo, atque partialiter si conficere præsument Baptismi Sacramentum, nihil conficiunt. In tertio denique casu, valet Baptismus, vel enim alter altero prius absolvit formam, & ille Sacramentum conficit, posterior formam profereus nihil efficit, & non nisi sacrilege & in irritum tentat Sacramentum, vel etiam ambo simul absolvant formam, & tunc etiam valet Baptismus, quia quilibet eorum seorsive, & independentè ab alio, totaliter, & non partialiter agit, ac proinde nihil ad rationem Sacramenti deest, scilicet: neque materia, neque forma, neque Minister, neque persona, cui Sacramentum confertur, nihilque contrariam institutioni Christi reperitur. Licet ergo graviter peccent, quia eidem personæ bis materiam, ac formam Sacramenti applicant, Sacramentum tamen perficitur. Neque tunc duplex erit Baptismus, quia licet si duplex materia, ac forma, duo sint Ministri, sed una persona, cui materia & forma applicatur, & in qua Sacramentum perficitur. Magna quoque est discrepantia, inter duos baptisantes in secundo, & tertio casu, quia in secundo casu agunt ut causæ parciales, atque effectum baptismi inter se dividunt, quia unus dependentè ab altero agit, quod Christi institutioni adversatur, tunc enim Christus, qui principalis effector est Sacramentorum, quasi dividitur, in hoc autem tertio casu, quilibet est totalis Sacramenti causa, cum quilibet seorsim, & independentè ab altero agat.

*Quæres 4to: An liceat extra Ecclesiam baptizare?*

*Resp:* Quando nulla urget necessitas, vetitum est; extra Ecclesiam baptizare. Concilium Viennense sub Clemente 5to: statuit, *ne quis de cætero in aulis, vel cameris, aut aliis privatis domibus, sed duntaxat in Ecclesiis, in quibus sunt ad hoc fontes specialiter deputati, aliquos, nisi Regum, vel principum liberi exstiterint, aut talis necessitas emergerit, propter quam nequeat ad Ecclesiam accessus haberi, audeat baptizare.* Id quoque in Rituali Romano præscribitur, ubi sic habetur: *Licet urgente necessitate, ubique baptizare nihil impediat: tamen proprius Baptismi administrandi locus est, Ecclesia, in qua sit fons Baptismalis. Itaque necessitate excepta, in privatis locis,*



*nemo baptisari debet, nisi forte sint Regum, aut magnorum Principum filii, id ipsis deponentibus. Sed quoniam Principum nomine intelligi debeant, ambigitur, qua de re in Synodo Diœcesana Vilmensi, sub Episcopo Brzostowski anno 1717. celebrata, hæc leguntur: Innovamus omnium anteriorum Constitutionum rigorem, stricte prohibendo... ne infantes in œdibus privatis baptiscentur..... Licet vero infirmitas Infantum attendenda sit, nec debilis ætas, mortis utriusque periculo obijcienda, advertendum tamen, ne eadem infirmitas obtendatur, quando de facto non est. Item licet prolibus Magnorum Principum, pro quilibus Regni Nostri Senatores accipiuntur, aliquod in hoc genere indulgeri soleat, non statim tamen hic Principum titulus, ad quosvis notabiliores, absque scitu nostro est extendendus, nisi forte ad proprios Ecclesiæ juce Fundatores, & Collatores.*

In necessitatis autem casu, quemadmodum in Rituali Romano præmonitum habemus, ubique baptisare licet, hæc autem necessitas occurrit, non solum ex ratione in firmæ valetudinis infantis, sed etiam ut habemus in Synodo Vilmensi sub Episcopo Zienkiewicz, anno 1744. celebrata, quando magnum hyemale præmit frigus, aut multum distat Ecclesiæ, ad quam ad baptisandum Infantem pergendum sit.

Extra prædictos casus, qui in privata Domo baptisat, graviter peccat, nisi habita expressa Episcopi licentia, ac permissione. Dum vero extra Ecclesiam à Sacerdote Baptismus administratur, cum solitis Cæremoniis perfici debet, nisi vita infantis periclitetur, quia ritus Baptismi, quos Ecclesiæ præscripsit, tanti momenti sunt, ut nonnisi in casu impotentiae, prætermitti debeant. Communis itaque usus, & ubique recepta praxis invaluit, ut quando in casu necessitatis confertur Baptismus, sine solitis id fiat Cæremoniis, non tamen sine aqua baptismali à Baptisterio accepta. Omisæ vero tunc Cæremoniæ, suppleri deinceps debent, quemadmodum in Rituali Romano præscriptum est.

*Quæres 5to: Quid de Patrinis statuendum, ac tenendum sit?*

*Resp. amo: Ex perpetua Ecclesiæ praxi, vim legis habente, quæ ab Apostolica emanat traditione, in solemnium Baptismi administratione, sub mortali adhiberi debent Patrimi, sive una Mulier, aut Vir, sive duo, ut nunc moris est, Mulier scilicet & Vir. Concilium vero Tridentinum Sess. 24. Cap. 2. præscripsit, ac mandavit, ut non plures*



plures ad officium Patrinorum admittantur, quam duo, Vir & Mulier. Et id etiam demandat Rituale Romanum, hoc adjecto, ut pro Patrinis simul non admittantur duo Viri, aut duæ Mulieres, neque baptisandi Pater aut Mater. Sive autem infans baptisetur, sive adultus, Patrini adhiberi debent, quia ipsi adhibentur non propter corporalem baptisandi imbecillitatem, sed propter spirituales, quæ etiam in Adultis recens ad fidem conversis, non mediocris reperitur.

In privata autem baptismi collatione, Patrini non omnino prærequiruntur, quia id nullibi præceptum, aut præscriptum est, & in Cæremoniis supplementatione, quæ urgente necessitate prætermisæ sunt, possunt, & debent adhiberi.

2do: Sed non omnes promiscue ad officium Patrinorum admitti debent, verum illi solum assumi, & admitti ad id debent, qui Patrinorum officia & nosse possunt, & adimplere valent. Unde ab hoc munere arcendi sunt. *1mo*: Infideles, Hæretici, moribus infames, nullius religionis. 2do: Stupidi et ignari, qui doctrinam Christianam ignorant, ejus præcipua Capita nesciunt, Symbolum Apostolorum, Orationem Dominicam, Salutationem Angelicam, atque Decalogum, ac Ecclesiæ præcepta non callent. 3tio: Tandem illi omnes Patrini esse nequeunt, qui propter rationis, scientiæ, atque ætatis imbecillitatem, alios instruere, eorumque curam gerere nequeunt.

3tio: Plura autem sunt, & gravia Patrinorum officia, scilicet debent Patrini. *1mo*: Eos, quos de sacro fonte suscipiunt, diligere tamquam filios, Filiasque suas spirituales. 2do: Pro iis suppliciter Deum præcari. 3tio: Sedulo invigilare ut christiane à suis Parentibus instruantur, eorumque, si moriuntur, vel huic officio desint, vices hoc in puncto supplere tenentur. 4to: Curare, ut suo tempore, Sacramento Confirmationis initientur, ac omni via efficere, ut id, quod in Baptismo sponderunt, plene exequantur.

*Quæres. 6to. Quantum attinet Baptismi administrationem, quæ Parochus præstare, & adimplere debet?*

*Resp*: Hæc præcipue: *1mo*. docebit populum, ut in Patrinorum delectu, pietatis potius, quam alterius cujusque commodi, sive emolumenti, habeat rationem, ita: ut ij præ ceteris eligantur, qui liberorum animæ magis consulere, quam qui inopiæ subvenire possit. 2do. cavebit ne baptisandis imponantur nomina Ethnicorum. Quin, & ea-

vendum



vendum, ne affectentur nomina Sanctorum veteris Testamenti, præsertim, ubi frequens est cum Hæreticis conversatio, & proxima vicinitas, qui, quia novæ legis Sanctos dedignantur, ad Abraham, veteresque Patriarchas recurrunt. 3to. docebit Patrinos, quam cognationem contrahant cum baptizando, ejusque Parentibus, ne ignorantia postea se excusent. 4to. monebit quoque Matres, ac Nutrices, & alijs quibuscunque graviter inculcabit, ne cum infantulis arte completum illorum annum, in eodem lecto decumbant, propter periculum suffocationis, unde semper hoc, etiam secluso malo effectui, gravem habere videtur noxam, in iis præsertim, qui inquiete dormientes, quoquo versum se movent. Sed tamen talis cubatio, culpa carere potest, si v.g. lectus sit latus, & infans implacabilis, & mulier in somno suum retinere soleat situm, & locum, quod per raram est, ac proinde semper id prohibendum est. 5to. tandem juxta præscriptum Ritualis Romani, debet Parochus, in libro Baptisatorum, diligenter describere nomina baptisati, ejusque Parentum, atque Patrino- rum. Item, quo anno, annique mense, ac die natus, & quo, baptisatus fuerit, denique utrum ex legitimo, an ex illegitimo Matrimonio progenitus sit.

*Quæres 2mo. Qui sunt baptisandi?*

*Resp:* Omnis vivens homo baptisari potest, ac proinde non solum Adulti, sed & Infantes baptisari possunt, ac debent. Neque baptismus Infantum diu differendus est, propter periculum tenellæ ætatis, & quia inopinatis casibus ex hac vita plurimi rapiuntur. Verum parvuli in sinu materno penitus delitescentes, ac prorsus absconditi, baptisari nequeunt, quod expresse in Rituali Romano cautum est, his verbis: *Nemo in utero Matris clausus baptisari debet*, quia qui totus in utero matris latet, aqua nulla in parte abluï potest, nisi autem Infans aqua abluatur, baptisma valere nequit. Neque tamen licet Matrem statim morituram secare, & aperire, ut extractus infans baptisetur, quia non sunt facienda mala, ut eveniant bona. Postquam vero gravida mulier mortua fuerit, secari caute, & aperiri debet, ut proles baptisetur, nisi certo constet, hanc jam extinctam esse.

*Quæres 3vo. Quid de Monstris sentiendum est?*

*Resp:* amo. Monstra, quæ sunt Mulierum partus, si certo humanam speciem excludunt, baptisari non debent, si humanam speciem, certo præferunt, baptisari debent, si tandem dubium sit, an humanam speciem retineant, res



est bene ponderanda, atque examinanda, iudicium vero præsertim ex capite sumendum est, quod rationis, & sensuum sedes æstinatur. Si igitur caput humanum est, vel humano propius, baptisari illud oportet, licet membra fuerint ferina, si autem ferinum fuerit oaput, cetera vero membra humana, tunc si ex viri & feminæ congressu prodierit, baptisandum est conditionate, propter dubium an sit homo, sin vero prodierit ex femina & bruto, non poterit baptisari, quia non est conceptum ex semine virili.

2do. Monstra, quæ ex homine & fera prodierunt, & in præcipua sui parte, humanam præferant speciem, iis sub conditione Baptisma est conferendum, quia satius est, decem Baptismi incapaces baptisare conditionaliter, quam unum capacem à Baptismo excludere. Licetsi vero omnino, vel fere omnino inauditum sit, quod ex congressu hominis & feræ natus sit homo, id tamen non est prorsus impossibile.

Quodsi Monstrum, undecunque natum sit, postquam creverit, Baptismo omnino repugnet, examinandum est, utrum hæc repugnantia à libera procedat voluntate, an non à dæmone proveniat. Si 1mum: negandum est Baptisma, quia nolenti dari non potest. Si 2dum: dari debet, quia malitia dæmonis obstare non debet, ne cuiuspiam de remedio, ad salutem necessario provideatur.

Si gemelli sibi adinvicem adnati sunt, seorsum uterque, absolute baptisendus est, quia non unus, sed duo sunt homines. Si etiam monstrum, duo capita, & duo pectora gerat, duplici absolute donandum est baptisate: licetsi reliqua membra simplicia fuerint. Sed si duo quidem capita habuerit, sed unum tantum pectus, in uno capite semel baptisandum est absolute, in altero rursum, sub conditione: *Si non es baptisatus, ego te baptiso*: quia in priori casu, ubi præcipua hominis membra duplicantur, duo reputantur homines, ubi vero, veluti in secundo casu, non duplicantur, dubium est, an unus, an plures sint homines. Quare si urgeat periculum, in primo casu dicendum est simpliciter: *Ego vos baptiso*: in secundo addendum est, *in quantum capaces estis*.

Quæres gno. Amentes, & furiosi possuntne baptisari?

Resp: Amentium, ac furiosorum alii sunt à natiuitate tales, nulla habentes lucida intervalla, & de talibus quantum ad baptismi susceptionem, videtur, idem esse iudicium, ac de pueris, qui baptisantur, licetsi usu rationis



nis careant. Alii vero sunt amentes, ac furiosi, qui ex sana mente, quam habebant prius, in amentiam, seu furorem inciderunt, & tales judicandi sunt, secundam voluntatem, quam habuerunt, dum sanæ mentis existerent, & ideo, si tunc apparuit in eis voluntas suscipiendi baptismum, debet eis conferri, in furia etiam, aut amentia constitutis, etiamsi actu contradicant, si vero nulla voluntas suscipiendi baptismum in eis apparuit, dum sanæ mentis essent, non sunt baptisandi. Quidam vero sunt, qui etsi à nativitate fuerint furiosi, aut amentes, habent tamen aliqua lucida intervalla, unde, si tunc baptisari voluerint, baptisari possunt, etiam in amentia constituti, & debet eis tunc Sacramentum conferri, si periculum timeatur: alioqui, melius est, ut tempus expectetur, in quo sint sanæ mentis, ad hoc, quod devotius suscipiant Sacramentum. Si autem tempore lucidi intervalli, non appareat in eis voluntas suscipiendi baptismum, baptisari non debent in amentia, vel furia constituti. Quidam vero sunt, qui etsi non omnino sanæ mentis existant, in tantum tamen ratione valent, quod possint de sua salute cogitare, & intelligere Sacramenti virtutem, ac de talibus idem sit judicium, sicut de his, qui sanæ mentis existunt, qui baptisantur cum volunt, sed inviti baptisari non debent. Tota hæc doctrina est S. Thomæ Doctor: quæst: 68. art: 12.

*Quæres xmo. Quid de liberis Infidelium tenendum sit?*

*Resp:* Hæc certa sunt: xmo. infidelium liberos, qui olim fidem Christianam professi sunt, sed ab ea defecerunt, posse etiam invitis Parentibus baptisari, quia per suam apostasiam non desinunt subiacere Ecclesiæ. 2do. si liberis Infidelium rationis usum habeant, & baptismum sponte petant, non obstante Parentum contradictione, possunt baptisari, quia in iis, quæ salutem æternam consequendam spectant, sui sunt juris. In dubio: an puer, qui baptismum expetit, rationis usum assecutus sit, judicandum est in favorem illius; si septennium compleverit, baptisandus est, imo etiamsi septennium non compleverit, & periculum imminet aut mortis; aut ne postea baptisari non possit, baptisandus est. 3tio. si alterutrer Parentum, sive Pater, sive Mater, alio reluctante infantem ad baptismum offerat, baptisandum esse, quia id & infanti, & religioni favorabilius est. Imo: si mortuo Patre, infantem Avus ad Baptismum offerat, potest baptisari, licet si Mater ipsius contradicat. Quia mortuo Patre, in Avum cura nepotum devolvitur. Et ita Gregorius 13. statuerat. 4to. infantea qui



qui jure, sive injuria à parentibus infidelibus avulsi, tam procul ab ipsis distant, ut jam eorum curæ subiacere non possint, baptisari quoque possunt, quia paterna jura, quæ jam à Parentibus exerceri non valent, ad eos transierant, qui actu illorum curam gerunt, iis ergo uti possunt in bonum infantibus maxime salutare. 5to. tandem infantes infidelium de quorum vita moraliter desperatur, sine consensu Parentum baptisari possunt, quia tunc sio consulitur salutem infantum, ut Parentes non offendant, quare instanti periculo mortis non solum in seipsis, sed & invitis Parentibus infans baptisari poterit. Curandum tamen, ut id sine contumelia eorum fiat. Quodsi infans invitis, aut in seipsis Parentibus infidelibus baptisatus supervixerit, & adolescat, abstrahendus est à Parentibus, ut in fide Christiana erudiat. Extra hos casus infidelium infantes, invitis Parentibus baptisare non expedit, quamvis nonnulli non ignobiles Theologi probabiliter teneant, licitum esse Sacerdoti, quoscunque infidelium Infantes, omnino in seipsis eorum Parentibus baptisare, quia timor futuræ, dum ad annos discretionis pervenerint, perversionis, qui hic moram injicere potest, utcumque compensatur probabili spe mortis, ante adeptum usum rationis, ac ante subsecutam subversionem, cum experientia constat ex natis infantibus antequam usum rationis consequantur, longe plures mori, quam supervivere, tamen, quia communi praxi adversatur, non facile est sequendum.

*Quæres 2mo. Quæ requiruntur, ut adultus digne, & cum fructu Baptismi Sacramentum recipiat?*

*Resp:* In adulto ad digne & fructuose recipiendum Baptisma, præter intentionem requiruntur, fides, dolor de commissis antea peccatis, spes veniæ, inchoatus Dei amor, atque propositum servandi Christi legem, atque fugiendi præteritæ vitæ peccata, sincere illa detestando. Non tamen præmittenda est Baptismo, Confessio, quia necdum baptisatus, Sacramentalis absolutionis incapax est. Quare adulti antequam ad Baptismum admittantur, non solum diligenter instruendi sunt, sed etiam in pietate exercendi.

## ARTICULUS 3tius

*De proprietatibus, & effectibus Baptismi.*

*Quæres 1mo. Quæ sunt præcipuæ Baptismi proprietates?*

*Resp:*



*Resp:* Præcipuæ Baptismi proprietates sunt: unitas, & necessitas. *Unitas*, quod nimirum semel tantum conferri debeat, & iterari non possit, unde dixerat Apostolus Epist. ad Ephes: Cap: 4to. *Unus Dominus, una Fides, unum Baptisma.* *Necessitas* vero, quia juxta Christi oraculum Joan: Cap: 3. *Nisi quis renatus fuerit ex aqua & Spiritu Sancto, non potest introire in regnum Dei.* Unde sequitur, Baptismum esse necessarium necessitate medii, quia eo, etiam inculpabiliter omisso, salus obtineri non potest, quare Infantes quæquam sine ulla sua culpa non baptisati, dum sic moriuntur, regnum cælorum non consequuntur. Verum baptismus potest esse ad salutem necessarius vel in re, ut scilicet actu & reipsa suscipiatur, vel in voto, seu desiderio, cum nimirum, quia actu & reipsa suscipi non potest, ipsius ardens habetur desiderium. Potest etiam Baptismus esse ad salutem necessarius, vel pro omni casu, cum nihil est, quod vices ipsius supplere possit, vel non pro omni casu, cum aliquid est, quod vices ipsius supplere potest.

*Quæres 2do. Quibus, & quomodo baptismus est ad salutem necessarius?*

*Resp:* Baptismus in re parvulis omnibus est ad salutem necessarius, necessitate medii, quia sine eo, etiam si inculpabiliter prætermittatur, salvari nequeunt. Adultis etiam est pariter necessitate medii ad salutem necessarius, sed in re vel in voto. Quare in iis Baptismus aquæ-supplet ardens illius desiderium. Cum itaque Adultus reipsa, aqua baptisari nequit, si habeat ardens Baptismi desiderium, & perfectam de peccatis suis concipiat contritionem, salvari potest, quia juxta Concilium Tridentinum: contritio charitate perfecta inflammata, in omni casu hominem justificat, & Deo reconciliat. Martyrium quoque tum in Adultis, tum etiam in Infantibus Baptismi vices supplet, unde per Martyrium æque, ac per Baptismum aquæ, & infantes & adulti sanctificantur, ac salvantur, quare semper Ecclesia quoscunque Martyres sive baptisatos, sive non baptisatos, veluti Sanctos coluit, ac venerata est.

*Quæres 3tio. Utrum Baptismus iterari possit?*

*Resp:* Baptismus semel tantum eidem homini valide conferri potest, & iterari nequit, quia indelebilem imprimat characterem. Unde Concilium Tridentinum Sess: 7: Can: 11. decrevit: *Si quis dixerit verum & rite collatum Baptismum, iterandum esse illi, qui apud infideles fidem Chri-*



*si negaverit, cum ad pœnitentiam convertitur, anathema sit, quare gravissimi peccati rei sunt, qui propter temporale emolumentum, bis, aut ter etiam baptisantur.*

*Quæres 4to: Quid facto opus sit, quando circa Baptismum dubium occurrit?*

*Resp:* Circa Baptismum occurrere potest dubium vel *negativum*, cum nulla sunt indicia, ex quibus colligi possit, quempiam fuisse baptisatum, vel *positivum*, cum paria in utramque partem militant argumenta, & hoc dubium vel *juris* est, si æque dubitetur, valeatne Baptismus tali modo collatus, an non. aliud *facti*, si incertum sit, an huic collatum fuerit Baptisma, vel non.

*Igitur 1mo:* in dubio negativo, cum plane nescitur an infans, vel adultus baptisatus fuerit, Baptisma est conferendum, ratio siquidem ipsa dictat, providendam esse æternæ salutis hominum, omni meliori modo, quo fieri potest, sine injuria Sacramenti. Porro nulla injuria Baptismi Sacramento irrogatur, dum, quia plane nescitur utrum collatus fuerit, sub conditione confertur.

*2do:* In positivo etiam sive *juris*, sive *facti* dubio, baptisandi sunt sub conditione, tam adulti, quam infantes. Quia regula universalis est ista: *In dubio tutior pars est eligenda*, quæ maxime in hoc casu locum habet, propter summam Baptismi necessitatem. Hinc baptisandi sunt infantes expositi, etiam si ante aliquot menses nati sint, & schedulam testem sui Baptismi ferant, quia neque ætas aliquot mensium dubium tollit, cum quispiam infidelis post annum etiam, prolem suam exponere potest, & ad crimen suum occultandum diu, sæpe parvulorum Baptisma differat, neque etiam *Schedula* ab incertæ fidei homine exarata, haberi potest pro teste certissimo, & indubitata fidei, qui moralem certitudinem collati Baptismatis parere possit. Aliud est, si certa habeatur notitia personæ, à qua *Schedula* exarata fuit, & quæ plenam mereatur fidem, aut etiam aliunde desumatur indubitatum indicium collati Baptismi.

Baptisari quoque debent infantes ab Obstetricibus baptisati, dum vel convincuntur nulliter baptisasse, quia aliquid ad Baptisma omnino necessarium prætermiserunt, immutarunt, vel interrogatæ de modo, quo Baptismum contulerunt, firme, constanter, & uniformiter non respondent, tunc enim propter illarum vacillationem, & relationis variationem, infans sub conditione iterum baptisandus est,

Verum



Verum gravis est inter Theologos controversia, utrum semper & indiscriminatim, à quacunque obstetrice baptisatus infans, sub conditione iterum baptisari debeat, Alii quidem infantem ab obstetrice pia, bene instructa, & quæ in baptizando plene sui compos fuerit, baptisatum, sine gravi peccato iterum baptisari non posse, existimant. Alii, quantum ad Baptismum nulli fæminæ credendum esse putant, quia experientia compertum est, ex Obstetricibus non paucas repertas fuisse, quæ diu pro timoratis, & prudentibus habitæ sunt, cum tamen neutram laudem mererentur, & quæ bona etiam fide crediderunt se ritum Baptismi conferendi callere, eumque hio & nunc à se rite collatum fuisse, iurejurando affirmabant, tandem aliquando confessæ sunt, se hoc vel illud permutasse, aut præteruisse, sine quo Baptisma stare non potest, denique cum sæpe Obstetrices ob rugitus & periculum matris, atque etiam prolis, ita perturbentur, ut vix sui compotes sint, & sic, non semel etiam hausto aliquoties Cremato baptisent, non verentur tamen mendaciter dictitare, se animo fuisse præsentis, ac pacati, omniaque in baptizando, rite perfecisse, ac propterea à quacunque obstetrice baptisatum, iterum sub conditione baptisandum esse. Verum hæc utraque opinio temperanda est atque statuendum. 1mo: Baptisatum ab Obstetrice non esse iterum baptisandum, nisi prius diligenter examinentur omnia, quæ ad rite conferendum pertinent Baptismum, utrum videlicet omnia ex ordine, servata atque perfecta sint, quare, qui sine prævio examine, re minime attenta, inconsiderate & præpropere, infantem jam ab Obstetrice baptisatum, cum nullum occurrat de valore Baptismi dubium, iterum, etsi sub conditione baptisant, peccant, nisi forte periculum mortis adeo urgeat, ut desit tempus rem examinandi, ac trutinandi. 2do: Infantem à quacunque Obstetrice baptitatum, semper sub conditione baptisandum esse, quoties desunt testes fide digni, qui nihil ad Baptismum necessarij, ab ipsa omisum fuisse, confirmant. Quia si in alia quavis, longe inferioris momenti materia testis unus, testis est nullus, non est quod in re præsentis, quæ maximi est momenti, testificatio unius Mulieris plenam fidem faciat. Et hæc decisio magis locum habet, quando Obstetrix, non est exploratæ probitatis, aptitudinis, & scientiæ, præterea timida, perturbari facilis, huic muneri non assueta, inebriari solita. Neque tamen ei, qui post viginti annos rescire incipit, se infantem domi baptisatum ab Obstetrice fuisse, satagendum

erit



erit; ut denuo sub conditione baptisetur, quia Adulti, qui se ab Obstetricibus baptisatos esse detegunt, debent supponere Baptisma suum, à Parocho diligenter examinatum fuisse, qui proinde vel illud validum reperierat, vel si dubium esse cognoverat, illud sub conditione repetiit.

*Quæres 5to: Qui sunt effectus Baptismi-*

*Resp:* Baptismi effectus sunt 1mo: characterem in Anima baptisati indelebilem imprimit. 2do: Tollit omne peccatum, non solum originale, sed et actualia quæcunque, ac proinde confert gratiam, qua homo interius sanctificatur. 3tio: Tandem omnem pœnam peccatis debitam remittit.

## CAPUT SECUNDUM

### *De Sacramento Confirmationis.*

*Quæres: Quid sit Confirmatio?*

*Resp:* Confirmatio est Sacramentum, à Christo Domino institutum, quo baptisatis datur gratia, & robur Spiritus Sancti, ad fidem Christi firmiter tenendam, & constanter profitendam.

## ARTICULUS I<sup>us</sup>

### *De materia, forma, ac Ministro Confirmationis.*

*Quæres 1mo: Quæ est materia Sacramenti Confirmationis?*

*Resp:* Sacramenti Confirmationis materia essentialis & adæquata, est manuum impositio, & chrismatis unctio. Quia semper in Ecclesia Catholica, hoc Sacramentum per manuum impositionem, & chrismatis inunctionem conferebatur.

Impositio autem manuum est illa, quæ statim à principio Confirmationis fit, dum Episcopus extensis versus confirmandos manibus, orat Spiritum Sanctum super eos invocando, & in Pontificali præscriptam recitat orationem: *Omnipotens sempiterne Deus*, quæ chrismatis unctionem præcedit. Huic ergo orationi omnes confirmandi præ-

sentes



sentes esse debent, & nemo chrismatis unctione donari debet, nisi huic manuum impositioni, atque orationi præsens adfuerit, quare qui Episcopo Confirmanti assistunt, satagere debent, ut cum hæc prima oratio ab ipso recitanda est, cui manuum impositio, seu versus confirmandos extensio annexa est, jam animo, & corpore præsentes sint, quotquot illico chrismate inungendi sunt, ceteri vero extra Ecclesiam, aut Capellam foribus ocellis maneant, donec finita ab initio usque ad finem priori caeremonia, de novo à principio in ipsorum gratiam inchoetur. Ex quo manifeste consequitur, quodsi aliqui chrismate ungantur, qui priori orationi præsentes non fuerint, hæc super ipsos ab Episcopo recitetur, quia ex usu, & præcepto Ecclesiæ, quod in Sacramentorum administratione incaute omisum est, caute suppleri debet.

Unctio vero ut rite, secundum Christi institutionem, & Ecclesiæ præscriptum fiat, debet esse cum Chrismate, ab Episcopo benedicto, atque in fronte confirmandi, ad formam crucis, cum verbis in Pontificali præscriptis. Chrisma autem confici debet, ex oleo olivarum, cui balsamum adjungi debet.

*Quæres 2do: Quæ est forma Confirmationis?*

*Resp:* Forma Sacramenti Confirmationis est oratio, quæ præcedit unctionem, & quæ in Pontificali præscripta, incipit: *Omnipotens sempiterne Deus:* qua Spiritus sanctus supra confirmandos invocatur, & cui manuum impositio, siue extensio annexa, atque etiam verba, quæ Chrismatis unctionem comitantur: *Signo te signo crucis, & confirmo te chrismate salutis, in nomine Patris, & Filii, & Spiritus sancti.*

*Quæres 3tio: Quis sit Minister Confirmationis?*

*Resp:* Sacramenti Confirmationis Minister ordinarius est Episcopus, extraordinarius vero est Sacerdos, qui proinde ex delegatione, & facta sibi permissione, Sacramentum Confirmationis conficere potest, unde hodie etiam Præbyteri ritus Græci, valide & licite Sacramentum Confirmationis conficiunt, quia id eis ab Ecclesiâ permissum, atque concessum est, quod constat ex Synodo Zamoysoiæna anno 1720. celebrata, à sede Apostolica confirmata, in qua hæc leguntur. *Sacramentum Confirmationis à Christo Domino institutum, quod Parochi in Ecclesia Orientali extraordinario jure, & delegata ab Episcopo facultate, ex Apostolicæ sedis dispensatione, statim post Baptismum administrare solent, in genere visibilium signaculorum, sa-*



*prosanctum est.* Hæc autem concessio, atque delegatio, ut simplex Sacerdos possit Sacramentum Confirmationis administrare, ex usu & praxi hodie ab universali Ecclesia acceptata, nonnisi à Romano Pontifice concedi potest, atque adeo est necessaria, ut sine illa simplex Sacerdos, si Sacramentum Confirmationis conficeret, nihil efficiet, & Sacramentum nullum erit. Quare cum in Synodo Zamoysciana Parochis ritus Græci, severe injunctum sit; ne audeant infantes ritus Latini, quos sive necessitate cogente, sive proprio Parocho permittente, baptisaverint, Confirmationis Sacramentum conferre, manifeste consequitur, ritus Latini infantes à Præsbyteris ritus Græci confirmatos, nulliter hoc Sacramentum recepisse, quia ad illud conferendum, nullam facultatem, concessionemque habuerunt, ac proinde ab ipsis confirmatos, iterum confirmandos esse, sic enim in prædicta Synodo titulo de Baptismo, statutum est: *Si acciderit, ut ritus nostri Presbyter, Infantem Latini ritus, vel necessitate impellente, vel proprio Parocho permittente, baptisaverit, præcipit S. Synodus, ut ipsi Sacramentum Confirmationis non conferat, sed lecto Evangelio, à reliquis sacris cæremoniis absteineat,* quæ nimirum jam ad Sacramentum Confirmationis ordinantur. Cum itaque Sacramentum Confirmationis, à simplici Præsbytero, sine delegatione, & concessa ad id ipsi facultate, collatum, nullum sit, & Præsbyteri ritus Græci, ad confirmandos infantes ritus Latini, nullam habeant delegationem, neque concessam sibi ad id facultatem, imo severe id ipsis prohibitum sit. Nullum est ergo, ab ipsis, Latini ritus infantibus, collatum Confirmationis Sacramentum. Unde etiam; cum Clemens 8. & Benedictus 14. prohibuissent Præsbyteris Italo-Græcis, ne baptisatos à se Chrismate consignent, deinceps ab eodem Benedicto 14. Constitutione quæ incipit: *Etsi Pastoralis.* constitutum est: *ut si Episcopus Latinus, ex dispensatione Apostolica, Græcum aliquem ordinaverit, qui à Præsbytero Græco in Italia, vel adjacentibus Insulis fuerit baptisatus, nec constet illum ab aliquo Episcopo, sive Latino, sive Græco, Chrismate in fronte fuisse consignatum, debet nimirum illum antea absolute confirmare, sub conditione autem, si verisimiliter dubium esse possit, an ab Episcopo Græco fuerit baptisatus.*

*Quæres 4to: Quibus Sacramentum Confirmationis conferri possit?*

*Resp: Sacramentum Confirmationis solis baptisatis,*  
con-



conferri potest, quia cum Baptismus janua sit omnium Sacramentorum, nondum baptisati, Confirmationis capaces non sunt. Posset autem absolute hoc Sacramentum conferri etiam infantibus, qui necdum usum rationis assecuti sunt, quia constat per duodecim sæcula, eos in utraque Ecclesia Latina scilicet, & Græca confirmari consuevisse, & hodie adhuc apud Græcos, infantes statim ac baptisati fuerint confirmantur. Attamen in Ecclesia Latina, hoc Sacramentum usque ad annos discretionis differtur, ut videlicet confirmandi, melius hoc Sacramentum intelligentes, & fructuosius illud percipiant. Ex ordinaria autem regula, conferendum est hoc Sacramentum, post completum vitæ septennium, sed in aliquo extraordinario casu, urgente causa, non vetatur, quin possit etiam ante eam ætatem, ministrari. Justam vero adesse causam constat, si facilis non sit, ad illos postea confinandos, Episcopi adventus.

Potest etiam Confirmationis Sacramentum ministrari, sive perpetuo amentibus, quia infantibus æquiparantur, sive iis qui aliquando lucida habuerunt intervalla, modo dum sanæ mentis essent, aliquam hujus Sacramenti recipiendi habuerint intentionem, quæ præsumi debet, ubi nulla in contrarium in eis apparuit voluntas, & illud aliquo modo ipsis notum erat, nisi forte statim post grave aliquod commissum scelus, in amentiam inciderint, tunc enim non reputantur esse in statu gratiæ, qui, ad digne hoc Sacramentum recipiendum, prærequiruntur.

*Quæres 5to: Quæ requiruntur dispositiones ad digne, & fructuose recipiendum Confirmationis Sacramentum?*

*Resp:* Sequentes prærequiruntur dispositiones 1. status gratiæ, ideoque præmittenda est confessio ab iis, qui mortalis peccati rei sunt. 2. cum ex hodierna Ecclesiæ praxi, ad annos discretionis hoc Sacramentum differatur, ut plenior ex eo fructus percipiatur, necesse; ut præter statum gratiæ, in confirmandis excitetur prompta, & devota erga hoc Sacramentum animi affectio, unde habere debent explicitam mysteriorum fidei, ac obligationum, quas in Baptismo contraxerunt, notitiam, & cognitionem. Quæ enim pro ipsis infantibus sponponderunt in Baptismo Patrum, hæc ipsi jam adulti, sponte in Confirmatione amplecti debent, & mediante Spiritus Sancti gratia exequi, polliceri debent. 3. debent ora sua in ferventes orationes aperire, ut in se Spiritum Sanctum attrahant, nam & ipsis Apostolis ante illapsam Spiritum Sanctum jussit Christus, ut post suam Ascensionem, e cænaculo non egrederentur,



ac caelestibus vacarent, donec virtute ex alto induerentur.

## ARTICULUS 2dus

*De proprietatibus & effectibus Sacramenti Confirmationis.*

*Quæres 1mo: Qui sunt effectus Sacramenti Confirmationis?*

*Resp:* Effectus Sacramenti Confirmationis sunt 1. gratia, quam producit, estque gratia specialis, atque huic Sacramento propria, corroborans scilicet, ac perficiens in fide, ad illam constanter tenendam, intrepide confitendam, & Sancte in bonis operibus exercendam, atque; ut hæc omnia facilius, ac promptius exequantur, cum multæ gratiæ necessariæ sint, ad illas obtinendas, atque asequendas, jus tribuit confirmato. 2. characterem indelebilem animæ imprimit, quare iterari nequit.

*Quæres 2do: Quæ sunt Confirmationis proprietates?*

*Resp:* Est quidem Confirmationis proprietas, quod ipsa iterari nequeat, sed hic maxime spectatur ejus necessitas. Et quidem; Sacramentum Confirmationis non est ad salutem necessarium, necessitate mediæ: quia si inculpabiliter omittatur, & ipsa minime recepta quis moriatur, uti re ipsa longe plures sine ea moriuntur, salvari potest. Quilibet tamen, tenetur eam recipere, cum illam recipiendi opportunitatem habet, & id Christus præcepit, cum hoc Sacramentum instituerit, tamquam medium ordinarium, atque efficacissimum, quo homo in fide per Baptismum recepta, perficiatur, atque contra carnis, mundi, ac diaboli tentationes roboretur. Unde ex unanimi doctrina SS. Patrum oportet, ac necesse est, ut baptisati sacro Chrismate perungantur, quare Sacramentum Confirmationis, etsi non sit ad salutem necessarium necessitate mediæ, est tamen necessarium, necessitate præcepti, quia graviter à Christo & ab Ecclesia est præcepta. Hinc S. Petrus Damiani Serm: 1. de Dedicat: Eccles: sic inquit: *Decretales pagine, & SS. Patrum instituta decernunt, non esse differendam post Baptismum Sacramenti hujus virtutem, ne nos inermes inveniat, fraudulentus ille tentator. Peccant igitur graviter, qui cum habeant opportunitatem fuscipiendi Confirmationis Sacramentum, quia illud prope, vel etiam in eodem ubi commorantur loco, administrat Epi-*

*¶ II. M.* D seq.



scopus, nec unum quidem passum decurrunt, ut illud ab eo recipiant.

*Quæres 3tio: Quæ in conficiendo Sacramento Confirmationis adhiberi solent cæremoniæ?*

*Resp:* In conficiendo Sacramento Confirmationis variæ adhiberi solent cæremoniæ, antiquitate venerandæ, significatione sacræ, quæ in Pontificali describuntur. Patrini quoque quemadmodum in Baptismo, hic etiam adhibentur, sed unum dumtaxat, pro uno quoque masculino, Patrinum, & unam, pro singulis fæminis Matrinam, adhibere oportet. Confirmationis autem Patrinus ac Matrina distincti esse debent, à Patrinis Baptismi, nisi necessitas aliud postulet, ipsique jam confirmati esse debent, alias Patrinorum officium in Confirmatione, exercere non possunt. Patrini, qui in Confirmatione adhibentur, æque ac in Baptismo, spiritualement contrahunt cognationem, sed ex dispositione Concilii Tridentini Sess: 24. Cap: 2. de reform: non nisi cum confirmato, ejusque Patre, & Matre, modo tamen ipsi Patrini sint confirmati, quia alioqui nec vere Patrini esse valent. Si autem unus tantum, ut alicubi fit, pro omnibus maribus admittatur Patrinus, aut una pro omnibus fæminis Matrina, ii cum omnibus confirmatorum Patribus, ac Matribus, atque cum ipsis confirmatis, spiritualement contrahunt cognationem.



# TRACTATUS

DE

## SACRAMENTO EUCHARISTIÆ, & MISSÆ SACRIFICIO.

Eucharistia Sacramentum est, & Sacrificium. Sacramentum quidem, quia gratiam digne fuscipientibus confert. Sacrificium vero, quia Corpus & sanguis Christi, vere Deo pro nobis offertur.

### CAPUT PRIMUM

#### *De Sacramento Eucharistiæ.*

*Quæres. Quid sit Eucharistia?*

*Resp:* Eucharistia, est Sacramentum corporis, & sanguinis Christi, sub speciebus panis & vini, ad spiritualem fideliū alimoniam, à Christo institutum. Est igitur in Eucharistia vere & realiter, præsens Corpus & Sanguis Christi, sub Speciebus panis & vini absconditum, & delitescens. Tandiu ergo in Eucharistia post panis & vini consecrationem, manet præsens Corpus & sanguis Christi, quamdiu integræ manent species panis & vini, quod si corrumpantur, statim Corpus, & sanguis Christi desinit præsens esse. Quale autem temporis intervallum necessarium sit, ut species Eucharistiæ corrumpantur, incertum est. Rituale Romanum, titulo de Sacramento Eucharistiæ monet, ut Sanctissimæ Eucharistiæ particulæ frequenter renouentur. Communis fert praxis, ut post duas Hebdomadas renouentur, veteribus, scilicet à Sacerdote intra Missæ celebrationem consumptis, novæ particulæ consecrentur. In stomacho autem, à sumente Eucharistiam, minor particula, qualis, pro communione Laicis datur, sexagesima horæ parte, seu uno minuto censetur corrumpi, major vero, qualis à Sacerdotibus sumitur, una cum vini speciebus, in semiquadrante alteratur. Quia vero hoc fallere potest, ca-



vendum est, ne Laici ante horæ quadrantem, & Sacerdos, qui Eucharistiam receperunt, ante mediæ horæ tempus ad vomitum se provocent. Nec nimium erit horæ totius spatium iis, qui vel desidem habent stomachum, vel ex pituita, seniove languentem. Præscribit quoque Rituale Romanum, ut moneantur communicantes, quatenus sumpto Sacramento, non statim expuant, ne scilicet Sacramenti species de ore decendant. A sputis igitur ejiciendis, aliquo tempore abstinendum est, maxime quando dubium est, an aliqua hostiæ particula, gingivis, aut palato adhæreat, & si reipsa adhæreat, nec ope linguæ possit, exsolvi, exsorbendum est aliquid aquæ, ut facilius in stomachum traiciatur. Si sputum exigat importuna necessitas, paulo post communionem, erit id emittendum vel in linteum, vel saltem in locum mundum.

## ARTICULUS imus

### *De materia, ac forma Eucharistiæ.*

*Quæres 2mo: Quæ sit materia Eucharistiæ?*

*Resp:* Quoniam Christus corpus suum in Eucharistia per modum Cibi, sanguinem vero, per modum potus, nobis dare voluerit, necessum est, ut alia sit materia ex qua corpus, & alia ex qua Sanguis illius conficiatur. Igitur materia ex qua conficitur Corpus Christi, est solus panis triticeus. Unde non conficeretur corpus Christi, si quis consecraret panem ex milio, lentibus, fabis, ex spelta, hordeo, aut siligine, avena, confecto. Quamvis enim, nonnulla ex his granis, tritici similitudinem habeant, atque aliquando triticum, in siliginem vertatur, hæc tamen omnia grana, reipsa à tritico differunt, & panis ex illis confectus, cum non sit vere panis triticeus, apta ad consecrandum corpus Christi, nequit esse materia. Quapropter, etiamsi die festo plebs non sit Missam auditura, aut æger sine viatico decelsurus, non licet ad Eucharistiam consecrandam, uti materia, aut certo inepta, aut etiam dubia. Namque in conficiendis Sacramentis, materia dubia non licet uti nisi in extrema necessitate. Porro non est extrema necessitas, ut populus die festo Missam audiat, aut æger viaticum sumat, ergo tunc etiam, alio, præter triticeum, pane, ad consecrandam Eucharistiam non licet uti.

Debet autem panis iste triticeus. i. esse purus & incor-



corruptus, quare Rubrica Missalis Romani, titulo de Defectibus sic habet: *Si panis non sit triticeus, vel si triticeus admixtus sit granis alterius generis, in tanta quantitate, ut non maneat panis triticeus, vel sit alloqui corruptus, non conficitur Sacramentum.* Secus si grani alterius admixtio, adeo modica sit quantitatis, ut panis inde confectus, morali hominum existimatione triticeus reputetur. Exigit tamen summa, quæ tanto Sacramento debetur reverentia, ut ex solo, eoque puriori tritico, panis Eucharisticus conficiatur. 2. debet esse ex aqua naturali, & triticea farina compactus, & igne coctus, quia is solum est usualis, & proprie dictus panis. Unde si loco aquæ adhibeatur lac, mel, butyrum, aliquæ id genus liquores, exurget placenta, sed non erit panis verus, nec proinde valida consecratio. Pariter si adhibeatur massa cruda, irrita erit consecratio, quia moraliter differt à pane, nec pro tali apud homines habetur.

Nihil tamen ad valorem consecrationis refert, an consecrandus panis hujus vel illius sit figuræ. Formæ tamen rotundæ adhiberi debet, eique ob Ecclesiæ præscriptum, adhærendum est.

*Quæres 2do: Utrum valeat consecratio sive, in azy-mo, sive in fermentato pane?*

*Resp:* Veler, quia & Latini in azy-mo, & Græci in fermentato pane valide Eucharistiam consecrant. Verum quilibet Ecclesiæ suæ consuetudinem sequi stricte obligatur, & id in Concilio Florentino statutum est: *Sacerdotes in altari ipsum corpus Domini conficere debere, unumquemque scilicet: juxta suæ Ecclesiæ consuetudinem.* Græcus igitur in fermentato, Latinus in azy-mo, Eucharistiam conficere debet, alias graviter peccaret, quia grave Ecclesiæ præscriptum, in re gravi transgrederetur, siquidem in puncto tam notabili ritum Ecclesiæ suæ immutare gravis materia est, ideo severe ab Ecclesia prohibitum. Et hoc verum est, etiamsi Græcus inter Latinos, & Latinus inter Græcos existat, neque ibi sui ritus inveniat Ecclesias. Quilibet enim, ubique, & semper in consecranda Eucharistia, Ecclesiæ suæ ritum servare, & sequi tenetur. Quod etiam à Romanis Pontificibus Pio 5. & Benedicto 14. declaratum fuit. Quare, etiamsi populus die festo Missæ sacrificio carere debeat, aut infirmus, sine viatico ex hac vita decederet non licebit, neque Græco Sacerdoti in azy-mo, neque Latino in fermentato celebrare. Quia bonum commune Ecclesiarum postulat, ut præscripti ritus observentur,

&



& aliunde neque infirmus ad suscipiendum viaticum, neque populus ad audiendum die festo sacrum obligatur, nisi cum Sacrum celebrari potest, servatis Ecclesiæ ritibus.

*Quæres 3tio: Quæ sit materia Calicis consecrandi?*

*Resp:* Materia necessaria Calicis consecrandi est vinum ex vite. Quare lucus, qui ex pomis, pyris, cerasis, malogranatis exprimitur non est materia ad consecrandum Calicem apta, quia etsi aliquam similitudinem vini habeant, non tamen ejus substantiam. Debet autem vinum esse. 1. usuale, quod per modum potus sumitur. Unde vinum in uvis maturis, adhuc delitescens, aut in pane contentum, ac quasi à pane exhaustum, non est materia calicis, quia non habet rationem vini usualis. 2. debet esse purum. Valide tamen consecratur mustum, seu vinum recens ex uvis maturis expressum, quia verum vinum est, id tamen nonnisi in necessitate fieri debet, quia impurum est, propter admixtas fæces. 3. incorruptum, quare acetum vinosum consecrari nequit, quia ex vini corruptione efficitur. Attamen vinum acescens, quod aliquid acetosi contraxit, sed suam necdum amisit substantiam, valide quamvis illicite consecratur, quia est contra reverentiam Sacramenti. Unde Rubrica. Missalis Romani titulo de defectu vini sic habet: *Si vinum sit factum penitus acetum, vel penitus putridum, vel de uvis acerbis, seu non maturis expressum, non conficitur Sacramentum. Si vinum cœperit acescere, vel corrumpi, vel fuerit aliquantulum acre, vel mustum de uvis tunc expressum, conficitur Sacramentum, sed conficiens graviter peccat.* Nihil autem refert ad validam calicis consecrationem, an vinum sit hujus vel illius regionis, saporis, aut coloris. Quia quamvis varia vina exg. Gallicum, Hispanicum, Hungaricum, penes speciem differre supponantur, horum tamen quodlibet est verum vinum de vite, ejusque essentiam participat.

Vinum autem gelu constrictum, & non resolutum est materia incerta, & consecratio ipsius dubia, unde si in hyeme congeletur, debet prius calore resolvi antequam consecratur. Quod si vinum post consecrationem gelu constringatur, consecrationem suam per hoc non amittit, & ideo præcipit Missale Romanum, ut species congelatæ liquefiant, & à Ministro deinceps sumantur ut consecratæ.

*Quæres 4to: Vino consecrando debetne aqua misceri?*

*Resp:* Ex præcepto Ecclesiæ, & antiquissimo usu, vino consecrando aqua admisceri debet, id tamen non

est



est de necessitate Sacramenti, valetque consecratio, calicis, etiamsi vino aqua non fuerit admixta, unde Missale Romanum, aquam vetat vino admisceri, si jam peracta fuerit vini consecratio. Graviter tamen peccat Sacerdos qui aquam vino consecrando non admiscet.

Porro aqua vino consecrando immiscenda, ut inquit Eugenius 4. in concilio Florentino, *modicissima* esse debet, unde sufficit una gutta sensibilis, & Sacerdos advertere debet, ut major sit quantitas vini, quam aquæ, quia materia Calicis est solum vinum usuale. At tale non esset, si vinum aquæ non prædominaretur, tunc enim res illa mixta, non esset potius vinum, quam aqua.

Hæc autem mixtio aquæ vino consecrando fieri debet. 1. tempore Missæ & in sacro Calice, quia alioqui non esset cæremonia sacra. 2. ante oblationem Calicis, si tunc omisa fuerit, fieri debet ante illius consecrationem, post consecrationem jam fieri non debet, sic enim disponit Missale tit. de Defectibus: *Si celebrans ante consecrationem calicis advertat, non fuisse appositam aquam, statim ponat eam, si id advertat post consecrationem calicis, nullo modo apponat, quia non est de necessitate Sacramenti.*

*Quæres 5to: Utrum utriusque speciei, panis scilicet & vini consecratio necessaria sit?*

*Resp. amo:* Una species sine altera exg. panis sine vino valide consecratur. Christus namque in ultima Cæna prius panem consecravat, corpus suum effecit, illudque ad manducandum Discipulis porrexit, deinde vinum in sanguinem transmutavit, illudque ad bibendum dedit, & reipsa etiam Sacerdos celebrans prius hostiam consecrat, illamque adorandam populo proponit, deinceps super Calicem formam pronuntiat. Unius ergo speciei consecratio, ab alterius speciei consecratione independens est, & in se absoluta. Valide ergo una species vg. panis, consecrari potest, sine alterius speciei consecratione.

*2do:* Sed ex Christi institutione utriusque simul speciei panis & vini consecratio fieri debet. Enimvero ex Concilio Trident: Sess: 22. Cap: I. Christus cum dixerat: *Hoc facite in meam commemorationem*, id ab Apostolis, eorumque in Sacerdotio successoribus, fieri præcepit, quod ipse fecerat. Ipse autem in utraque specie consecravat. Ex Christi ergo institutione utraque simul species consecrari debet. Gravissime itaque peccaret Sacerdos, si unam tantum speciem vg. panis consecraret. Unde Missale Romanum præscribit, ut si Sacerdos loco vini, aquam in Calicem



licem posuisset, illamque sumpsit, iterum vinum ponat, offerat, consecret, & sumat, ut scilicet utriusque speciei sit consecratio.

*Quæres 6to: An & quomodo materia consecranda, Consecranti præsens esse debeat?*

*Resp: amo:* Materia consecranda duplici modo Consecranti præsens esse potest, physice, vel moraliter. *Physice* est præsens, cum ita est præsens, ut manibus, aut saltem oculis attingi potest. *Moraliter* quando licet actu non cadat sub sensus Consecrantis, in eo tamen est loco, ubi à Consecrante demonstrari possit & percipi, si non in se, saltem in aliquo, vel ipsi conjuncto, vel ad eam continendam ordinato, quemadmodum ostensa crumena, ostendi censetur argentum quod in ea continetur.

*2do:* Ut valida sit consecratio, materia consecranda, consecranti præsens esse debet, quia id exigit veritas formarum sive panis, sive calicis, istæ enim particulæ, hoc: hic, demonstrativæ sunt, nihil autem demonstrari potest, nisi præsens sit demonstranti.

*3tio:* Non requiritur autem, præsentia physica. Consecrari enim valide possunt formulæ, quæ vel sub aliorum cumulo latitant, vel in Pixide includuntur, & illæ tamen, cum nec videri, nec tangi possint physice, præsentem non sunt. Unde sufficit præsentia moralis, quia hæc sufficit, ut verificentur formulæ illæ: *Hoc est corpus meum. Hic est calix sanguinis mei.* Porro ut materia consecranda moraliter sit consecranti præsens, ex communi sensu hæc requiruntur. 1. ut consecrans sciat materiam ad consecrandum appositam ibi esse. 2. ut materia illa, sensu aliquo percipi possit, non tamen necesse est, ut in se videatur à Sacerdote, vel tangatur, sed sufficit ut in eo loco sit, in quo à Consecrante possit sensu aliquo percipi, sive in se, sive in alio, ut in suo toto, vel proximo continente, vel vase ad illam continendam destinato. Unde valet consecratio vini in Calice cooperto, tum hostiarum in pixide clausurarum, aut quæ corporali involutæ sunt, quamvis enim inoneant Rubricæ, ut pixis ante consecrationem operiatur, verum apertio hæc non est necessaria necessitate Sacramenti. 3. ut sit propinqua, qualis debet esse res, quæ velut in usum humanum assumenda, demonstrari possit pronomine *hoc, hic:* alioqui non esset præsens more humano. Unde Missale Romanum tit: de Defectibus ait: *Requiratur ut materia consecranda, in actu consecrationis sit coram Sacerdote, & valde illi propinqua.* Hinc non potest vali-



de consecrari materia, licet vicina, si sit à tergo, vel sub mappa, aut post aliquod corpus opacum, quod non habet rationem thecæ, seu vasis, illam proxime continentis. Nam tunc non est moraliter præsens consecranti, neque ullo sensu demonstrabilis. Unde etiam si hostiæ non sint in ipso altari, sed alicubi prope illud, vg. si in credentia ex oblivione sint relictæ, probabiliter non consecrantur, quamvis Sacerdos ante habuerit intentionem eas consecrandi, quia præsumi non debet Sacerdos voluisse intentionem suam extendere ad eas, contra praxim & præscriptum Ecclesiæ consecrandas, in eo loco, in quo non possunt sine gravi culpa consecrari. Pariter si hostiæ positæ quidem sint in altari, sed alicubi extra corporale, ad latus videlicet, dubia erit consecratio, & maxime pendet ab intentione Sacerdotis, quia cum positæ extra Corporale hostiæ non debeant consecrari, neque id fieri possit sine peccato, non videtur Sacerdos intendere illas hostias consecrare, quæ extra corporale positæ sunt.

*Quæres 7mo: Materia consecranda, debetne per intentionem Consecrantis determinari?*

*Resp:* Debet determinari, quia voces *hoc, hic*, ex se certi quid, & fixi designant, certum autem & fixum esse nequit, quod indeterminatum est. Hinc non consecrat Sacerdos, qui ex decem hostiis præsentibus, vult solum novem consecrare non designando, quam excludere velit. Ceterum hic sufficit determinatio virtualis quam habet 1. qui ab initio consecrare voluit formulam, quæ sibi deinceps inter consecrandum è memoria exciderat. 2. qui licet actu de hac vel illa formula non cogitaverit, id tamen omne consecrare voluit, quod rite sibi ad consecrandum oblatum, est præsens. Quapropter qui duas manu tenet hostias, ratus se unam tantum tenere, aut qui sex oblatas sibi credit formulas, cum oblatae fuerint plures, cunctas valide consecrat, quia error iste speculativus non obest intentioni practicæ id omne consecrandi, quod rite ad consecrandum oblatum est. Unde præscribit Rubrica Missalis: *Quilibet Sacerdos semper intentionem habere debet consecrandi eas omnes formulas, quas ante se ad consecrandum positas habet.*

Quodsi formulis jam consecratis, miscerentur non consecratae, possent illæ consecrari, & ad hoc satis foret, ut velit Sacerdos totum consecrare, quod nondum consecratum est. Cavendum tamen est ne consecratis non consecratae misceantur, unde improbanda est praxis, eorum qui



qui superstitibus in pixide, quam purificare negligunt, particulis, hostias non consecratas admiscent.

*Quæres 8vo: Quid agendum sit Sacerdoti, qui de hostiarum consecratione dubitat?*

*Resp:* Sacerdos qui de hostiarum consecratione rationabiliter incertus, & dubius est, debet eas post sanguinis sumptionem consumere, vel etiam in alio sacro, dum Hostiam absolute consecrat, simul intendat illas consecrare sub conditione si non sint consecratæ. Quod si dubium sit de valore consecrationis alterutrius materiæ pro Sacrificio constitutæ, debent iterum verba consecrationis super illam materiam proferri sub conditione, & si dubium sit de valore materiæ, quia præsumitur vinum esse acetum, vel aqua vino plurima mixta, debet aliam certam materiam consecrare, ne Sacrificium imperfectum relinquat, & post communionem sumere materiam dubiam, quæ fuit consecrata.

*Quæres 9no: Quid sentiendum sit de vini guttis quæ Calici à reliquo continuo divise adhærent?*

*Resp:* Eæ vini guttæ quæ casu extra oram calicis fluxerunt, non consecrantur, quia id non intendit Sacerdos, nec sine gravi piaculo intendere potest. Quæ vero interiori Calicis cuppæ adhærent, dubium est utrum consecrantur. Unde 1mo: curare debet Sacerdos, ut quidquid in Calice à continuo vini divisum est, ante consecrationem abstergat. 2do: Intendi potest à Sacerdote consecratio omnis guttæ, quæ ante communionem reliquo continuo accessura est. Cum autem tunc dubium maneat, an vere consecratæ sint, cavendum est Sacerdoti, ne eas post consecrationem abstergat, sed eas cum aliis speciebus indubie consecratis sumere debet.

*Quæres 10mo: Quæ sit forma Eucharistiæ consecrandæ?*

*Resp:* Forma consecrandi panis Eucharistici; sunt solæ istæ voces: *Hoc est corpus meum.* Verba autem: *Hic est sanguis meus*, aut etiam *hic est calix sanguinis mei*, formam calicis adæquatam constituunt. Reliqua omnia in Canone Missæ præscripta, quamquam proferri debeant, non sunt tamen de necessitate Sacramenti. Nulla autem esset consecratio, si loco pronomini *hoc*, diceretur *illud*, quia rem præsentem non denotaret. Pariter si loco *Corpus meum*, aut *Sanguis meus* diceretur: *Hoc est Corpus Christi. Hic est Sanguis Jesu*, quia verba consecrationis in persona Christi proferenda sunt, ani-



no ea efficiendi, quæ ipse effecit. Porro si dicatur: *Hoc est Corpus Christi. Hic est sanguis Christi*, jam Sacerdos in propria persona loqueretur, non in persona Christi, quare tunc invalida foret consecratio. Neque loco *Corpus*, dici potest *Caro*, quia sensus formæ immutaretur. Plus enim significat *Corpus*, quam *Caro*. Corpus enim est totum constans, non solum carne, sed & ossibus, nervis, & aliis. Caro vero est nonnisi pars hujus totius.

Pronuntiandæ vero sunt formæ consecrationis distincte, reverenter, continua serie, & modo naturali, ut sit in sermone humano. Unde merito redarguendi sunt, qui cum tanto nisu, trepidatione, & halitu reddunt voces, ut & verba duplicare videantur, & nonnunquam in adstantibus risum excitent.

Vix autem prudenter dubitari potest an omisa sint consecrationis verba, quia procul dubio hæc omitti non solent. Si quis tamen esset animi huc & illuc facile peregrinantis, ut ei eveniebat, qui à *Memento vivorum* ad *Memento mortuorum* facile avolabat, videndum est an rationabiliter dubitet, sive totam formam à se prætermisam fuisse, sive in forma quidquam essentielle omisum esse, aut nonnisi aliquid accidentale præterisse, & tunc sequendum est id, quod Rubrica Missalis præscribit, videlicet: *Si celebrans non recordetur se dixisse ea, quæ in consecratione communiter dicuntur, non debet propterea turbari. Si tamen certo ei constet se omisisse aliquid eorum, quæ sunt de necessitate Sacramenti, id est formam consecrationis, seu partem, resumat ipsam formam, & cetera prosequatur per ordinem. Si vero valde probabiliter dubitet, se aliquid essentielle omisisse, iteret formam saltem sub tacita conditione. Si autem non sunt de necessitate Sacramenti, non resumat, sed procedat ulterius*

## ARTICULUS 2dus

### *De Ministro & usu Sacramenti Eucharistiæ.*

*Quæres 1mo: Quis sit Eucharistiæ consecrandæ Minister?*

*Resp:* Ex Christi institutione soli Episcopi, ac Præbyteri habent Eucharistiæ consecrandæ potestatem, quia solis Apostolis Christus, post Eucharistiæ consecrationem dixerat: *hoc facite in meam commemorationem*, quibus ver-

his



bis Christus Apostolos, ut docet Concilium Trident: Sess. 22. Sacerdotes ordinavit, illis atque eorum in Sacerdotio Successoribus, quales sunt Episcopi, ac reliqui Præsbyteri, & præceptum & potestatem dedit Eucharistiam consecrandi. Soli ergo Episcopi, & Sacerdotes Eucharistiam consecrandi potestatem habent.

*Quæres 2do. Quis sit Minister Eucharistiae distribuendæ?*

*Resp.* Eucharistiæ distribuendæ jure divino soli Episcopi & Præsbyteri sunt ordinarii Ministri. Quibus enim concessa est potestas Eucharistiam consecrandi, his etiam eodem jure data est potestas illam fidelibus distribuendi. Porro solis Episcopis, ac Presbyteris data est à Christo potestas Eucharistiam consecrandi. Ergo illis etiam jure divino ordinaria competit facultas eam distribuendi.

Diaconi vero sunt etiam ex jure divino Eucharistiæ distribuendæ Ministri, sed extraordinarii. Quia ex sua institutione, atque ordinatione id habent, quod possint Eucharistiam distribuere. Verum id facere non possunt sine commissione, atque accepta facultate sive ab Episcopo, sive etiam à Parocho. Unde Diaconus Eucharistiam ministrare nequit, nisi vel absente Sacerdote, vel eo præsentem sed id permittente, semper tamen cum id postulat necessitas. Sed extra casum necessitatis, juxta modernam praxim, nonnisi de licentia Episcopi Eucharistiam Diaconi distribuere poterunt. Potest ergo, & debet Diaconus absente, vel impotente Præsbytero ad infirmum Viaticum deferre, etiam ad Præsbyterum periculose decumbentem, & tunc vel ipsi Pixidem offerat, ut ipse propria manu Eucharistiamumat, vel sua manu eam illi porrigat. Dum autem Diaconus Eucharistiam ministrat, super Superpelliceum Stolum transversam habere debet.

*Quæres 3tio: An quis sibi ipsi Eucharistiam ministrare possit?*

*Resp:* Reipsa Sacerdos Missam celebrans seipsum communicat, cumque hoc nonnulli Hæretici redarguerent, eos Concilium Tridentinum damnavit Sess: 13. Cano: 10. *Si quis dixerit non licere Sacerdoti celebranti seipsum communicare, anathema sit.* Verum extra Missam, si Sacerdos Eucharistiam sumere velit, more Laicorum communicare debet, ab alio Sacerdote Eucharistiam recipiens. Quodsi defuerit Sacerdos, licetsi præsens fuerit Diaconus, in casu periculosæ infirmitatis, potest Sacerdos seipsum extra Missam communicare, Eucharistiam per modum



dum viatici sumendo. Pariter & Diaconus in casu gravis infirmitatis, cum deest Sacerdos se ipsum communicare potest. Quia si Sacerdos, & Diaconus possunt alios communicare, in casu gravis necessitatis poterunt & seipsos communicare, nimirum per modum Viatici Eucharistiam sumendo, neque ulla lex exstat quæ id in prædictis circumstantiis prohibeat.

*Quæres 4to: Utrum ad Eucharistiam distribuendam requiratur aliqua jurisdictio, ac potestas?*

*Resp:* Pastorum proprium est, oves suas pascere, quod sit non solum verbi divini prædicatione, sed magis adhuc Sacramentorum administratione, qui ergo Pastores non sunt, cum nulla in populum potiantur jurisdictione Sacramenta conficere, & Eucharistiam administrare nequeunt, unde ut simplex Sacerdos, sive Sæcularis, sive Regularis licite Eucharistiam distribuat, necesse est, ut ad id ab eo habeat facultatem, qui spiritali prædictus est jurisdictione. Sufficit autem facultas generalis, & interpretativa, qua pollent ii omnes, qui ad Sacramenta in Ecclesia peragenda ab illius Rectore admittuntur. Regulares quoque omnes vi Bullarum à Julio 2. Paulo 2. & Paulo 3. Romanis Pontificibus emanatarum, possunt in suis Ecclesiis, quibuscumque Fidelibus Eucharistiam distribuere, præterquam ipsa Dominica Resurrectionis Domini, in qua id eis facere prohibitum est. Præcipuum autem Pastoralis ministerii jus, ac onus est, Viatici ad ægrotos deferendi cura, quod proinde nemo sine Parochi licentia, aggredi debet, quare excommunicationem incurrerent Religiosi, si Viaticum sine Parochi facultate administrarent, nisi forte ille abesset, & necessitas urgeret. Convenientissimum quoque est, ut Infantes primam communionem in propria Parochia, de manu sui Pastoris accipiant, ut sic à teneris annis & Pastorem suum nosse, & ab eo cognosci possint.

*Quæres 5to: Quæ in administranda Eucharistia advertenda sunt?*

*Resp:* Sequentia advertenda sunt. *amo:* Ut ita caute Eucharistiam distribuat, ne aliqua hostia, sive ejus particula in terram prolabatur, quod si hoc contigerit, sequendum est id, quod Missale Romanum de defectibus præscribit his verbis: *Si hostia consecrata, vel aliqua ejus particula delabatur in terram, reverenter accipiat, & locus ubi cecidit mundetur, & aliquantulum abradatur, & pulvis, seu abrasio hujusmodi in sacrarium mittatur. Si ceciderit*



rit in mappam, seu in aliquod linteum, mappa, vel linteum hujusmodi diligenter lavetur, & lotio ipsa in sacrarium mittatur. Quodsi hostia consecrata in sinum mulieris deciderit, tunc vel illam in corporale expansum emitat, vel eam ope purificatorii mundi manu sua extrahat, & si digitis sacrum tetigit, illos abluat, & lotio in piscinam proiciatur. Si etiam dum Monialibus distribuitur communicatio, Hostia sacra cadat intra Clausuram, præcipiendum est alicui Moniali, ut hostiam reverenter cum patena elevet, si aliter fieri nequeat, etiam manu eam apprehendendo, & Sacerdoti ipsam porrigat.

2do: Dum infirmis Viaticum ministratur, ne sacra Hostia evomatur, modico vino, aut aliquo liquore juvanda est ejus traectio in stomachum. Quodsi evomatur, tunc vel satis effluxit temporis, ut alterata sacra species censeretur debeat, ac proinde jam desiisse Corpus Christi esse præsens conjiciatur, vel non. In utroque casu sedulo colligendum est, quidquid ejectum fuerit. Sed in priori casu, quando, vel jam non apparent species sacræ, vel prudenter judicantur jam corruptæ esse, vomitus in ignem mitti, & comburi debet. In posteriori autem casu, vel hostia sacra reverenter sumatur, nisi nausea fiat, vel caute separetur, & in aliquo loco sacro reponatur, donec corrumpatur, & postea in sacrarium proiciatur. Neque enim citra grande sacrilegium, hostia sacra, quamdiu est integra, comburi potest. Caute proinde à Sacra communione arcendi sunt, de quibus ob frequentem tulsim, vel vomitus periculum, prudens occurrit timor ne sacram, hostiam eiiciant.

Si contigerit Sacerdoti post sumptas sacras species, & in stomachum jam traectas, illas evomere, sive ad Altare, sive postquam ab eo recesserat, non est opus, ut novas species consecret, &umat, imo summe id incompetens esset, quia & Sacrificium jam plene consumptum ac completum est, & iterum vomitus periculo se exponeret.

3tio: Ufu invaluit, ut post meridiem Eucharistia benevalentibus non distribnatur, occurrentibus tamen solemnitatibus, aut justa ac rationabili exigente causa id fieri potest. Feria quoque Parasceves Communio non datur, nisi ægris per modum Viatici.

Non licet etiam plures consecratas hostias uni dare, quia id à S. R. C. anno 1679. die 12. Februarii prohibitum est. Si tamen à consecratis hostiis in Altari, in quo  
San-



Sanctissimum Sacramentum non aservatur, aliquæ supersint, aut Sacerdos ad infirmum profecturus, plures hostias sumpserit, quas singillatim distribuere nequit, poterit uni plures simul tradere hostias.

*Quæres 6to: Quando tenetur Parochus Eucharistiam ministrare?*

*Resp:* Parochus toties Eucharistiam suis parochianis ministrare debet, quoties eam rationabiliter postulant, etiam solius devotionis causa. Id enim, si quoad materiam cibum debet proli suæ corporalis pater, debet & pater spiritualis quo ad eum cibum quo anima spiritualiter vivificatur. Debet quoque Parochus suis parochianis peste, aut morbo contagioso infectis, sive per seipsum, sive per alium, etiam cum propriæ vitæ periculo, Sacramentum Pœnitentiæ, & sacrum Viaticum ministrare. Quia cum sit Pastor, officii ipsius est, etiam animam suam ponere pro ovibus suis. Atque ad id Parochus sub mortali peccato obligatur, quia vi muneris & officii tenetur ovibus suis necessaria salutis providere. Nemo autem ignorat Pœnitentiam & Eucharistiam maxime salutis esse necessaria. Illa ergo suis Parochianis providere graviter tenetur.

*Quæres 7mo: Quibus danda est Eucharistia?*

*Resp: 1mo:* Infantibus usu rationis carentibus, ac recens baptisatis posset quidem Eucharistia dari, quia illius capaces sunt, cum per Baptismum justificati fuerint, & prioribus Ecclesiæ sæculis, multis in locis baptisatis infantibus Eucharistia tradebatur, id tamen modo fieri Ecclesia prohibuit, maxime propter reverentiam hujus Sacramenti, quia sæpius sacras species in os sibi immixtas, infantes expuebant. Unde Concilium Trident: Sess: 24. Cap: 4. sic inquit: *Sacrosancta Synodus docet, parvulos usu rationis carentes, nulla obligari necessitate ad Sacramentalem Eucharistiæ communionem. Neque ideo tamen damnanda est antiquitas, si eum morem in quibusdam locis servavit aliquando. Ut enim sanctissimi illi Patres probabilem causam pro illius temporis ratione habuerunt, ita certe eos nulla salutis necessitate id fecisse, sine controversia credendum.* Cum itaque receptio Eucharistiæ Sacramenti non sit infantibus ad salutem omnino necessaria, justis de causis Ecclesia eorum Communionem distulit, usque ad annos discretionis, ut scilicet prius de hoc Mysterio edocti, atque instructi, illud & devotius & fructuosius recipiant. Igitur pueris danda est sacra Eucharistia nonnisi tunc, quando jam habent sufficientem usum rationis, ad discernendum.



dum hoc Sacramentum, recognoscendum corpus Christi, & ad illud reverenter ac devote suscipiendum jam idonei sunt, quod aliis citius, nempe circa annum ætatis 10. aut 12. contingit, aliis vero tardius. Prius tamen pueri censentur esse obligati ad Confessionem, quam ad Communionem, quia ad Communionem plus requiritur discretionis, devotionis, & reverentiæ, quam ad Confessionem. Quare ætas, qua urget obligatio sacræ Communionis, & in qua jam illa pueris dari possit, est intra annos 10. & 12. vel 14. ita: ut nemo ultra recipere illam differat, dummodo sit sufficienter instructus, & recte dispositus, quia communiter, neque ante annum 10. incipit, neque ultra 14. differtur plenior usus rationis, qualis ad devote, & reverenter recipiendam Eucharistiam requiritur. In periculo tamen mortis, puero capaci Confessionis, & sufficienter instructo dandum est sacrum Viaticum, nam cum in eo periculo versatur, non potest expectare tempus commodius ad Eucharistiam cum meliori dispositione recipiendam, ut divino de illa percipienda præcepto satisfaciat, & aliunde potest se per sacramentalem Confessionem probare ne indigne sumat.

2do. Energumenis, seu à Diabolo obsessis, Eucharistia aliquando dari potest, quia ex præscripto Conciliorum pluries illis sacra Communio concessa fuit, et nonnulli, ut fide digni referunt Scriptores, per sacram communionem à Dæmone liberati sunt. Hinc si cui Sacerdoti Energumeni curam gerere contigerit, debet is perpendere, an quis sua culpa meruerit à Diabolo possideri, an antequam obsessus esset, crimina quædam perpetraverit, vel non. Si *anim.* non prius ad sacram communionem admittetur, quam congruæ pænitentiae signa exhibuerit. Si *2dum*: videndum: an lucidis intervallis fruatur, an semper subiaceat Dæmonis infestationi, & quid hinc imminet irreverentiæ erga Sacramentum. Si nihil horum verendum sit, nihil obstat quo minus Energumenus Sacramento Eucharistiæ donetur, si rite ad id prius dispositus ac præparatus fuerit, ut digne hoc Sacramentum tempore quietis percipere possit, quia eo salutari subsidio maxime indiget, quatenus hujusce status molestiam patienter ferat, & in dura adversus Diabolum pugna, non deficiat. Quodsi Energumenus adeo infestationi Dæmonis subjectus sit, ut timendum sit, ne alicui irreverentiæ Sanctissimum Sacramentum exponatur, denegandum est, & alio modo Energumenus spiritualiter juvari debet.



3tio: Perpetuo amentibus Eucharistiam dare non permittit hodierna Ecclesiæ praxis, quia satius est ut non detur, nisi iis, qui illam ex prævio devotionis affectu expectant. Iis vero amentibus, qui lucida habent intervalla, horum tempore, cum rite dispositi sunt, potest Eucharistia tribui, quia dispositionis, quæ ad fructuose percipiendam Eucharistiam necessaria est, tunc capaces sunt. Qui autem à rationis usu in amentiam, vel phrænesim inciderant, illi Eucharistia in articulo mortis refici possunt, si laudabilem vitam duxerint, vel congruæ pænitentia signa dederint, nullumque subsit irreverentiæ, aut vomitus periculum, quare talibus, quantum fieri potest, prius præparatis, hostia non consecrata, in os eorum immittenda est, antequam sacra communio detur, ad explorandum an non aliquid imminet irreverentiæ erga Sacramentum. Igitur de amentibus, & phræneticis hæc habet Rituale Romanum titulo de Eucharistiæ Sacramento: *Amentibus, seu phræneticis communicare non licet, licebit tamen, si quando habeant lucida intervalla, & devotionem ostendant, dum in eo statu manent, si nullum indignitatis periculum adsit.* Semifatis denique, seu debili usum rationis habentibus, Eucharistia porrigi debet, tum in articulo mortis, tum & in Paschate, si certo aliquo pietatis studio, erga illud moveantur, & rite prius fuerint dispositi, ut digne, & cum fructu hoc suscipiant Sacramentum. Ne tamen tanti Sacramenti dignitas vileseat, haud expedit, ut semifatis ad sacram Communionem crebro admittantur, unde admitti quidem debent urgente præcepto, ac proinde in Paschate, & in articulo mortis, sed non ultra, nisi gravis quædam urgeat ratio vg. Jubilæi, aut specialem erga hoc Sacramentum præferant reverentiam, ac devotionem.

4to: Tandem mntis, & furdis à nativitate conferri potest Eucharistia, non solum in articulo mortis, sed & in Paschate, ac aliis temporibus, si in his deprehendatur aliquis huius Sacramenti cognitio ac intelligentia, & peccata sua saltem per nutus confiteri possint. Quia istiusmodi homines reipsa possunt hoc Sacramentum intelligere, tum per imagines, & signa, tum per exteriorem, quam eidem impendunt ceteri Christiani reverentiam. Unde si pie vivant, si divinis officiis in Ecclesia devote intersint, si de culpis suis, exhibito quadantenus à Cælo vindice, admoniti, doleant, & conterantur, sibi deinceps invigilent, si peccata sua per proprios nutus, seu alio aliquo modo,



conſiteantur, nulla eſt ratio ut à ſacra Communionem proſus arceantur. Quapropter pro gradu pietatis, non in Paſchate tantum, ſed in aliis etiam ſolemnioribus feſtis, ad Communionem admitti poſſunt. Aliud eſt dicendum de mutis, ſurdis & ſimul à nativitate cæcis, hi enim huius Sacramenti dignitatem nullatenus percipere poſſunt.

*Quæres 8vo: Quibus deneganda eſt Euchariftia?*

*Reſp:* Rituale Romanum tit: de Sacramento Eucharistiæ hæc præſcribit: *Fideles omnes ad ſacram communionem admittendi ſunt, exceptis iis, qui juſta ratione prohibentur. Arcendi autem ſunt publice indigni, quales ſunt excommunicati, interdicti, manifeſtque infames, ut meretrices, concubinarij, fœneratores, magi, fortilegi, blaſphemi & alij ejus generis peccatores publici, niſi de eorum pœnitentia, & emendatione conſtet, & publico ſcandalo prius ſatiſfecerint, Occultos vero peccatores, ſi occulte petant, & non eos emendatos agnoverit, repellat, non autem, ſi publice petant, & ſine ſcandalo ipſos prætereire nequeat.* Hinc conſequitur quod peccatori occulto, ſi publice petat, non debeat negari Euchariftia, ſecus ſi privatim, & abſque teſtibus petat. Notorio autem ac publico peccatori, quocunque modo petat, omnino deneganda eſt. Non tamen licet occulto peccatori hoſtiam minime conſecratam porrigere, quia fictio de ſe illicita eſt, & mendacium continet, quod in Sacramentorum adminiſtratione execrabilius eſt.

Non eſt vero dubium, quod reis ultimo ſupplicio affectis, Communio ſacra dari poſſit & debeat, & tunc temporis reus, nonnunquam poſſet communionem ſumere per modum viatici, ac proinde etiam non jejunos.

*Quæres gno: An, & quibus Eucharistiæ receptio ſit neceſſaria?*

*Reſp: 1mo:* Nemini, nec proinde infantibus Eucharistiæ receptio eſt neceſſaria ad ſalutem neceſſitate medij. Enimvero ſi infantibus Eucharistiæ receptio eſſet neceſſaria neceſſitate medij, tunc infantes qui rite baptiſati ſine Euchariftia moriuntur, à cæleſti beatitudine excluderentur. Hoc autem dici nequit, quia ut inquit Apoſtolus, *nihil damnationis eſt iis, qui ſunt in Chriſto Jeſu*, prout certe ſunt illi, qui in Chriſto baptiſati, Chriſtum induerunt. Quare Eccleſia infantibus uſque ad annos plenæ diſcretionis, & inſtructionis Eucharistiæ differt receptionem, quod certe non faceret, ſi omnibus infantibus Eucharistiæ perceptio eſſet neceſſaria neceſſitate medij.



2do: Est tamen Eucharistiæ receptio Adultis omnibus ad salutem necessaria, necessitate præcepti divini. Et id clare indicant verba Christi Joan: Cap: 6to: *Nisi manducaveritis carnem Filii hominis, & biberitis ejus sanguinem, non habebitis vitam in vobis:* quæ certe denotant grave Christi præceptum, utpote sub interminatione æternæ damnationis constitutum. Et hoc divinum præceptum urget. 1mo: cum jam ad annos plenæ discretionis devenit. Unde peccant Parentes, & gravius adhuc Pastores, qui non curant ut crescente cum annis rationis lumine, Juvenes tempestive ad hoc Sacramentum disponantur. 2do: in articulo mortis seu quovis mortis periculo, sive ex gravi morbo proveniente, sive aliunde imminente, vg. instante prælio, difficili partu, periculosa navigatione, aut itineratione, quia instante morte maxima est Eucharistiæ recipiendæ necessitas, ac proinde tunc, maxime recipi debet. 3tio: sed & pluries in vita recipi Eucharistia debet, quia per modum Cibi ad nutriendam spiritaliter animam à Christo est instituta. Porro cibi conditio hæc est, ut pluries sumatur. 4to: aliquando etiam per accidens urget divinum præceptum ad suscipiendam Eucharistiam, quando scilicet, ejus receptio remedium esse potest, ut gravi cuipiam tentationi resistatur, imminens in peccatum caveatur lapsus.

*Quæres 1mo: Quæ circa receptionem sacri Viatici annotanda sunt?*

*Resp:* Pro viatico datur sacra Eucharistia, quando probabile est, quod ægrotus eam amplius sumere non poterit, quare potest viaticum dari brevi morituris, et am non jejunis, ita Rituale Romanum titulo de Comm: Infirmorum. Igitur circa receptionem sacri viatici hæc annotanda sunt.

1mo: Qui paulo ante morbum communicavit, si periculose infirmetur viaticum sumere tenetur, quia cum tunc mors immineat, hoc salutari subsidio summopere indiget, & tunc reipsa divinum urget præceptum, de sacra Eucharistia percipienda. Qui tamen mane communicavit, si eadem die graviter infirmetur, potest quidem viaticum accipere, sed ad id stricte non tenetur.

2do: Si quis indigne, & sacrilege viaticum sumpsisset, ad novam & dignam viatici receptionem, facta prius, cum ingenti animi dolore, Sacramentali confessione, obligatur, quia per sacrilegam viatici sumptionem, præcepto divino minime satisfecit. Pariter cum quis post acceptum viati-



cum in grave aliquod, ac mortale peccatum prolabitur, si aliquot dierum, manente eodem mortis periculo, supervixerit, expedit ut iterum præmissa Confessione, Sacram sumat viaticum, quia novo spirituali contra relapsum indiget robore.

*Quæres xmo: Utrum extet aliqua lex Ecclesiæ præcipiens Eucharistiæ sumptionem?*

*Resp:* In Concilio Lateranensi 4. præceptum est, ut omnes utriusque sexus fideles, postquam ad annos discretionis pervenerint, omnia sua peccata saltem semel in anno fideliter confiteantur, suscipientes reverenter, ad minus in Pascha, Eucharistiæ Sacramentum. Ex præcepto itaque Ecclesiæ quilibet postquam ad annos discretionis pervenerit, tenetur quolibet anno saltem semel circa Pascha, Sacram Communionem accipere. Atque prædictum Ecclesiæ præceptum, est nonnisi divini præcepti, quo aliquoties in vita Eucharistiam sumere tenemur, determinatio, tempus, quo illud implere debemus, præfigendo. Unde Cont. Trident: Sess: 13. Can: 9. sic statuit: *Si quis negaverit omnes, & singulos Christi fideles utriusque sexus, cum ad annos discretionis pervenerint, teneri singulis annis saltem in Paschate ad communicandum, juxta præceptum sanctæ matris Ecclesiæ, anathema sit.*

*Quæres azmo: An frequens esse debeat Eucharistiæ receptio?*

*Resp:* Laudabilior est frequens Eucharistiæ usus, quam rarior. Quia primis Ecclesiæ sæculis, fideles frequentissime ad Eucharistiam accedebant, unde à nonnullis SS. Patribus cibus spiritualis quotidie sumendus dicitur, & temporibus Apostolorum, primi Christiani, ut habemus Actor: Cap: 2. *erant perseverantes in doctrina Apostolorum, & communicatione fractionis panis, & orationibus.* Unde, Ecclesia frequentem Eucharistiæ usum à fidelibus semper exoptabat, quare Concilium Tridentinum Sess: 22. Cap: 6. sic habet: *Optaret Sacrosancta Synodus, ut in singulis Missis fideles adstantes, non solum spirituali affectu, sed sacramentali etiam Eucharistiæ perceptione communicarent, quo ad eos sanctissimi hujus Sacrificii fructus uberius perveniret.*

Verum, ut frequenter quis Communicet, non sufficit, ut à peccato mortali sit immunis, quare à frequenti communione arcendi sunt, qui licet nulla lethali infecti sunt labe, ex affectu tamen, peccato veniali adhærent, & modicum Eucharistiæ habent desiderium. Aliud autem est  
peccat-



peccare venialiter etiam sæpius, aliud affectu ad venialia detineri. Prius enim inadvertentiam, subreptionem, meramque naturæ fragilitatem denotat, posterius indicat certam ex inordinata complacentia, peccato adhæSIONem. Priori modo peccant viri etiam pietate pollentes, quia homines sunt, infirmo adhuc, & mortali corpore circumdati, & ii à frequenti communione arceri non debent, quia declinandis ejusmodi peccatis jugiter incumbunt, ad illam media assumunt aptissima, & quotidianas culpas, quotidianis student elbere gemitibus. Sed qui posteriori modo peccant, aliter se habent, & ii à frequenti communione arceri debent, illi enim, & parum pietatis, & nihil fervoris habent, atque pravis cupiditatibus subjecti, variis peccatis, etiam grandiusculis corde addicti, non merentur ut frequenter pane Angelorum potiantur.

*Quæres 2tio: Circa Eucharistiæ usum, quæ esse possunt regulæ?*

*Resp:* Sequentes ad id inservire possunt Regulæ 1mo: qui in unius, aut multiplicis peccati habitu vixerunt serio probandi sunt, priusquam ad sacram Communionem admitantur. Quin & absoluti à peccatis, ad dies aliquot retinendi sunt, ut sacram Eucharistiam ardentius exoptent. Hand tamen nimis diuturna ista subtractio esse debet, quia cum Eucharistia sit antidotum quo liberamur à culpis quotidianis, & à peccatis mortalibus præservamur, qui adhuc in pietate novi sunt, per eam contra relapsus firmari debent.

2do: Ut quis in recuperata gratia perseveret, monendus est instanter, ut Pænitentia, & Eucharistiæ Sacramenta, quam sæpe, & digne poterit frequentet. Sunt enim hi gratiæ fontes ac media, quibus tutissime gratia servatur, & augetur. Neque tamen quia quis per octo, aut quindecim dies in adepta justitia permansit, statim otiandæ, aut quindænæ communioni aptus judicabitur, sed talis pro gradu & numero tentationum quibus concutitur plus vel minus, sacra Eucharistia reficiendus, & confortandus est.

*Quæres 3to: An communio sub utraque specie sit ad salutem omnino necessaria?*

*Resp:* Communio sub utraque specie sumenda, non est omnino ad salutem necessaria, quia sub sola specie panis totum Christum, corpus scilicet & sanguinem ipsius sumimus, cum sub qualibet, totus, et integer contineatur. Potuit ergo Ecclesia usum Calicis subtrahere, et id justis



de causis reipsa fecit, quod etiam decretorie à Concilio Tridentino definitum est Sess: 21. Can: 1. his verbis: *Si quis dixerit, ex Dei præcepto, vel necessitate salutis, omnes & singulos Christi fideles, utramque speciem sanctissimi Eucharistiæ Sacramenti sumere debere, anathema sit.*

## CAPUT SECUNDUM

*De effectibus Eucharistiæ, & dispositionibus ad eam digne suscipiendam necessariis.*

### ARTICULUS I<sup>mus</sup>

*De effectibus SSmæ Eucharistiæ.*

*Quæres amo: Qui sunt præcipui Eucharistiæ effectus?*

*Resp:* Primus, ac principalis Eucharistiæ effectus est, spiritualis nutritio, ac confortatio hominis, atque augmentatio gratiæ sanctificantis. Namque Christus dixit Joan: Cap: 6. *Caro mea vere est cibus, & sanguis meus vere est potus*, sicut ergo materialis cibus, & potus corporaliter hominem nutrit, confortat, & corpus adauget, ita etiam iste Eucharistiæ cibus, ac potus, spiritualiter hominem nutrit, confortat, gratiam in ipso adauget, unde statim subjunxit Salvator: *Qui manducat meam carnem & bibit meum sanguinem, in me manet, & ego in illo.* Sapientissime igitur edixit Con: 1. Florent: in Decreto de Sacramento Eucharistiæ his verbis: *Hujus Sacramenti effectus, quem in anima operatur digne sumentis, est adunatio hominis ad Christum. Et quia per gratiam homo Christo incorporatur, & membris ejus unitur, consequens est, quod per hoc Sacramentum in sumentibus digne, gratia augetur, omnemque effectum, quem materialis cibus, & potus, quoad vitam agunt corporalem, sustentando, augendo, reparando, Sacramentum hoc quoad vitam spirituales operetur, à malo retrahimur, confortamur in bono, & ad virtutum, & gratiarum proficimus incrementum. Hæc vero nutritio, & spiritualis confortatio, consistit partim in augmento gratiæ sanctificantis, partim in gratiis actualibus,*  
quas



quas Deus digne sacram Eucharistiam suscipientibus uberissime concedit, & quovis tempore servitur ad charitatem, pietatemque conservandam, atque per opera bona augendam. Præterea præservat à peccatis, ad superandas ingruentes tentationes roborat, ad servanda divina mandata, dum illorum urget observatio animat, ac tandem mediante ista a peccatis præservatione, perseverantiam in gratia, atque gloriæ cælestis consecutionem operatur. Unde dixerat Christus Joan: Cap: 6. *Qui manducat hunc panem, vivet in æternum.* Insuper imminuit malæ concupiscentiæ fomitem, sanctæ charitatis augenda fervorem, semper enim juxta S. Augustinum, *augmentum charitatis, est diminutio cupiditatis*, pios excitando motus, motibus malæ concupiscentiæ, contrarios. Recte itaque pronuntiavit Concilium Trident: Sess: 13. Cap: 2. *Sumi voluit Christus hoc Sacramentum tanquam spirituales animarum cibum, quo alantur, & confortentur viventes vita illius; qui dixit, qui manducat me, & ipse vivet propter me, & tanquam antidotum, quo liberamur à culpis quotidianis, & à mortalibus præservamur.* Tandem sacra Eucharistia in futuram gloriosam corporum nostrorum resurrectionem influit, dicente Christo Joan: Cap: 6. *Qui manducat meam carnem, & bibit meum sanguinem, habet vitam æternam, & ego resuscitabo eum in novissimo die.* Quare Patres Concilii Nicani Eucharistiam vocant, *symbolum resurrectionis, & S. Ignatius Episcopus in Epist: ad Ephesios, pharmacum immortalitatis.*

*Quæres 2do. Utrum Eucharistia peccata deleat?*

*Resp:* Eucharistia per se, & directe nullum mortale delet peccatum, nec proinde primam gratiam, quæ justificationis est, confert, sed eam supponit, & hoc vel ipsa parabola convivii nuptialis, filio Regis præparati, comprobatur, quod qui sine veste nuptiali ingredi præsumpsit, in tenebras exteriores projectus est, quare Paulus Apostolus 1. Corinth: Cap: 11. sic monet: *Probet se ipsum homo, & sic de pane illo edat, & de calice bibat. Qui enim manducat, & bibit indigne, judicium sibi manducat, & bibit.* Hinc Concil: Trident: damnans errorem Lutheri, qui affirmare ausus est, primarium hunc esse sacre Eucharistiæ effectum, ut graviora quæque scelera abstergat: Sess: 13. Can: 5. sic statuit: *Si quis dixerit, vel præcipuum fructum S. Eucharistiæ esse remissionem peccatorum, vel ex ea non alios effectus provenire, anathema sit.* Certe, omnes SS. Patres ad Eucharistiæ susceptionem sanctitatem morum



rum & conscientiæ paritatem exigunt. Sic Ambrosius Lib: 6. in Caput 9. Lucæ scribens, ait: *Ubique mysteriæ ordo servatur, ut prius per remissionem peccatorum vulneribus medicina tribuatur, postea alimonia mensæ cælestis exuberet*, quare S. Cyprianus Epist: 9. graviter contra lapsos conqueritur, qui pœnitentia non absoluta ad sumendam Eucharistiam properabant, dicens: *nondum pœnitentia acta, non exomologesi facta, illis Eucharistia datur cum scriptum sit. Qui ederit panem, vel biberit calicem Domini indigne, reus erit corporis, & sanguinis Domini.* Et vero Eucharistia à Christo est instituta veluti alimentum spirituale, sicuti autem alimentum corporale non datur corporaliter mortuo, sed viventi, ita etiam alimentum spirituale, non datur, spiritu, per grave quodpiam peccatum mortuo, sed gratia viventi. Eucharistia igitur per se, & primario peccata mortalia non delet, sed illa per pœnitentiam deleta supponit, & hoc prærequisit.

Si quis autem, vel inculpabiliter, præmissa scilicet diligenti conscientiæ suæ examine, ignorans se onustum esse peccato mortali. ad sacram accerserit Eucharistiam, vel sciens ac sentiens suum mortale peccatum, sed confessario destitutus, & necessitate pressus, Eucharistiam sumpserit, probabile est tunc peccatum etiam mortale per Eucharistiam deleri. Quia ex Concilio Tridentino Sess: 7. Can: 6. Sacramenta gratiam conferunt non ponentibus obicem. Porro qui vel invincibiliter suum ignorans peccatum, vel illud sentiens, dum confiteri nullatenus possit, necessitate adactus Eucharistiam sumit, voluntarie gratiæ obicem non ponit, illam ergo percipit, & consequitur, qua imprimis peccata illius delentur & absteruntur. Unde in Missa rogat Sacerdos ut sacra communio eum purget à crimine, sit ablutio scelerum, eorum maxime quæ occulta sunt, & à nobis inculpabiliter ignorantur. Atque sic docet S. Thomas Doctor quæst. 79. art: 3. ubi hæc habet: *Potest hoc Sacramentum operari remissionem peccati etiam perceptum ab eo, qui est in peccato mortali, cujus conscientiam & affectum non habet. Forte enim primo non fuit sufficienter contritus, sed devote, & reverenter accedens consequitur per hoc Sacramentum gratiam charitatis, quæ contritionem perficiet, & remissionem peccati.*

*Sed dices: Quomodo tunc Eucharistia delet illa peccata mortalia.*

*Resp: Hac in re divisi sunt Theologi. Alii censent in*



in prædictis casibus Eucharistiam peccata mortalia dele-  
re non per se, neque immediate ex opere operato, sed  
solum ex opere operantis, scilicet mediante contritione,  
quam perficit, & charitate inflamat. Alii opinantur tunc  
Eucharistiam peccata illa deleare per se, immediate, &  
ex opere operato. Verum quomodo in prædictis casibus  
Eucharistia peccata mortalia deleat, parvi refert, dummo-  
do ea abstergat. Neque enim grandis piaculi reus erit,  
qui dicet Eucharistiam à Christo institutam fuisse, ut &  
vivi, & spiritualiter mortuis prodesset, illis quidem or-  
dinarie, istis vero extraordinarie, & non nisi aliquando, non  
quidem omnibus, sed iis, qui nihil quidem sibi conscii  
sunt, non tamen justificati sunt, quia post diligens con-  
scientiæ suæ examen, bona fide credunt se esse à morta-  
li peccato immunes, cum tamen illo occulte detinentur.

*Quæres 3tio. An, & quomodo Eucharistia delet ve-  
nialia peccata?*

*Resp:* Eucharistia peccata venialia delet per se, &  
ex opere operato. Et id constat ex Concilio Tridentino  
Sess: 13. Cap: 3. ubi Eucharistia dicitur antidotum, quo  
liberamur à culpis quotidianis. Antidotum autem ex se  
& vi propria operatur. Eucharistia igitur vi propria de-  
let peccata quotidiana, seu culpas veniales, quæ quotidie  
committuntur. Et vero Eucharistia à SS. Patribus voca-  
tur remedium quotidianæ infirmitatis. Porro non est re-  
medium quotidianæ infirmitatis, nisi quotidianæ infirmita-  
tis delicta abstergat, illas expungat noxas, quibus quoti-  
die inficimur.

Sed ut Eucharistia deleat peccata venialia, requiri-  
tur, ut & desit ad illa animi affectus, & aliquis de ipsis  
commisis concipiatur cordis dolor, unde si vel affectus  
& complacentia, ad veniale fervetur peccatum & nullus  
de ipso cordis dolor habeatur, Eucharistia illud non ab-  
sterget.

*Quæres 4to. Utrum Eucharistia pœnam etiam tem-  
poralem peccatis debitam remittat?*

*Resp:* Eucharistia prout est Sacramentum, pœnam  
temporalem peccatis debitam per se non remittit, quia ad  
id non est à Christo instituta; siquidem ut docet S. Tho-  
mas Doctor, ad spiritualiter nutriendum hominem, ipsa  
instituta fuit, non ad satisfaciendum pro peccatis. Delet  
quidem illa aliquando & mortalia peccata, quia cum eo  
fine instituta sit, ut hominem Christo uniret, quemadmo-  
dum ipse dixerat Joani Cap: 6. *Qui manducat meam car-*



ne, & bibit meum sanguinem, in me manet, & ego in eo. Ea tollere debet quæ prohibent, ne homo Christo uniatur; qualia sunt peccata, quæ hominem à Deo separant, ea igitur, si hominem constringunt, illorumque inculpabiliter conscius sibi non sit, delet, & abstergit, ut hominem Christo conjugat. Porro ad hanc spirituales unionem opus pænæ temporalis non impedit, non ergo continuo eam Eucharistia remittere debet. Aliud dicendum est de Eucharistia prout est Sacrificium, quod, quia est propitiatorium, per illud etiam pænæ temporalis peccatis debitæ satisficit. Verum etiam Eucharistia ut est Sacramentum, & si per se pænam temporalem peccatis debitam non remittat, attamen quia charitatem inflamat, ad actus pœnitentiæ, qui satisfactorii sunt excitat, devotionem, pietatemque accendit, per ea pænam temporalem peccatis debitam imminuit.

*Quæres 5to. Sumpta Eucharistia an non solum summentibus, sed & aliis prodesse possit?*

*Resp:* Sumptio Eucharistiæ non solum ipsis digne communicantibus, sed & aliis quibus applicatur, & pro quibus offertur, viventibus quidem per modum impetrationis, mortuis vero per modum suffragii prodest. Sacra siquidem Eucharistia. est actus Religionis, omnis autem actus Religionis est satisfactorius, non pro eo tantum, a quo elicitur, sed & pro aliis, quibus applicatur, & impetratorius, quia Deo in gratiam aliorum oblatus, iisdem suffragatur.

## ARTICULUS 2dus

*De dispositionibus ad Sacram Eucharistiam digne recipiendam requisitis.*

*Quæres 1mo. Quæ prærequiruntur dispositiones ad digne & fructuose sacram Eucharistiam recipiendam?*

*Resp:* Ad Sacram Eucharistiam digne & fructuose recipiendam dispositiones aliæ se tenent ex parte corporis, & sunt jejuniū, munditia corporis, & exterior suscipientis modestia. aliæ se tenent ex parte animæ, videlicet immunitas à peccato mortali, ac pia interior devotio.

*Quæres 2do. Quo jure ad Sacram Communionem jejuniū requiritur?*

*Resp:* Illud non requiritur jure Divino, sed jure solum



rum Apostolico. Universalis siquidem hæc semper tenuis consuetudo ab ipsis promanans Apostolis, ut Eucharistia nonnisi à jejunis reciperetur. Quare S. Augustinus Epist: 54. sic inquit: *Placuit Spiritui sancto, ut in honorem tanti Sacramenti, in os Christiani prius corpus Domini intret, quam cæteri cibi, nam ideo per universum orbem mos iste servatur.* Severa autem hujusce jejunii lex exigit, ut à media nocte illius diei, quo quis Eucharistiam conficere, vel recipere vult, nihil omnino sumat, sive per modum cibi, aut potus, sive per modum medicinæ, aut cujusvis rei, quæ consveto more digeri in stomacho possit. Et id constat ex unanimi omnium fidelium sensu, qui siquid minimum, licet incauti sumpserint, à sacra communione abstinent, unde Rubrica Missalis titulo de defectibus art: 9. sic statuit: *Si quis non est jejunus post mediam noctem, etiam per sumptionem folius aquæ, vel alterius potus aut cibi, per modum etiam medicinæ, & in quantumcumque parva quantitate, non potest communicare, nec celebrare.* Verum ut jejunus quis censeatur, non est necesse, ut ex quo ante mediam manducavit, aut biberat, dormierit, aut sumptus potus, cibusque sit in stomacho ipsius digestus, etsi quandoque conveniens sit, ut propter capitis gravitatem aut animi torporem, quibus impeditur devotio, à communione, & magis à celebratione absteineatur. Unde Rubrica Missalis loco supra laudato sic inquit: *Si autem ante mediam noctem cibum, aut potum sumpserit, etiamsi postmodum non dormierit, nec sit digestus, non peccat, sed ob perturbationem mentis, ex qua devotio tollitur, consulitur aliquando abstinendum.*

*Quæres 6to. Quando jejunium ad Eucharistiæ sumptionem requisitum solvitur?*

*Resp:* Hac de re ista generalis statui solet regula, nimirum id omne & solum solvit jejunium ad Eucharistiæ sumptionem prærequisitum, 1mo. quod sumitur per modum cibi & potus, in stomacho naturali calore digestibile, 2do. quod sumitur eo modo, qui proprie humanam denotat manducationem aut sumptionem. Hinc non solvit jejunium. 1mo. quidquid per modum salivæ traijeitur in stomachum, ut pituita, sanguis è cerebro, gingivisque profluens, item vini, & aquæ reliquiæ, quibus os abluitur; reliquiæ quoque cibi, quæ cum remanserint inter dentes, cum saliva, & per modum salivæ traijeiuntur. Idem est, si quis aut cibum momorderit, aut jusculum, seu liquorem lingua, & palato solum gustaverit. Secus si hæc ex  
pre-



proposito degluciantur, & sumantur, licetsi in quantum-  
cunque parva quantitate, quia tunc vere comederentur.  
2do. neque id solvit jejunium, quod per respirationem at-  
trahitur ut pulvis. musca, pluvia, nix, fumus asæ, aut co-  
ctæ carnis, quia hæc invitum subeunt, & nihil est horum,  
quod vere cibi, aut potus rationem habent.

*Quæres 7mo. Solviturne jejunium, si in stomachum  
trajiciatur res quæpiam, vel non comestibilis, ut ossiculum,  
papyrus, vel comestibilis quidem, at non trajiciatur per os,  
sed per nares, ut tabacum, aqua hungarica?*

*Resp:* Quæ nihil habent nutritivi, neque naturaliter  
in stomacho digeri possunt, & si in stomachum trajician-  
tur, non obsunt jejunio & talia sunt, ossiculum, acicula,  
lapillus, frustulum ligni. Si vero in stomachum quidpi-  
am trajiciatur, quod aliquid in se nutritivi habet, veluti  
papyrus, folium tabaci, quod masticatur, frustulum sac-  
cari, per id jejunium solvitur. Quia priora nullam ha-  
bent rationem cibi, posteriora vero retinent rationem ci-  
bi, ac proinde posterioribus jejunium solvitur, non vero  
prioribus.

Quod attinet aquam hungaricam, atque tabacum  
quæ per nares attrahuntur. Et quidem si aliquid aquæ  
hungariæ in fauces deciderit, & cum saliva in stoma-  
chum trajiciatur non solvit jejunium, quia non sumitur  
per modum potus, secus si ex proposito, sumatur. Pari-  
ter tabacum, si quod ejus in fauces inciderit, prompte,  
ac statim eijcitur, unde vix quidpiam hinc oriri potest  
scrupuli. Si vero ultro deglutiatur, impedit communio-  
nem, quia solvit jejunium.

Plus autem difficultatis habet fumus tabaci, qui ore  
attrahitur. Attamen plures Theologi docent fumo ta-  
baci, etiamsi nolenter in stomachum trajiciatur, je-  
junium non violari, quia neque vera est comestio, ne-  
que potatio, & alioqui qui cum tabacum fumigantibus  
iter agit, aut commoratur, fumumque illum ore, & na-  
ribus invitus excipit, sacrum celebrare, vel ad commu-  
nionem accedere non posset, quod nemo dixerit, qui enim  
proprii tabaci fumum excipit, communiter invitus in se  
excipit, & vel totum per os, ac nares. emittit, vel non  
nisi parum admittit, per modum respirationis.

Hic tria annotanda, & attendenda sunt. 1mo: Jeju-  
nium solvi per id etiam, quod alicui violenter infusum,  
in eos intrusum, et ab ipso in stomachum trajectum fuerit.  
Quis enim illum jejunum reputaverit, cui etsi reluctanti  
ampla



ampla vini lagena infusa fuerat. 2do: Eum, qui lectulum ingrediens, saccarum, aut simile quid liquefiens, ori imposuerit, paulatim solvendum, & in stomachum insensibiliter trajiciendum, sequenti die ad sacram Synaxim accedere non posse, nisi moraliter certus sit, quod vix fieri potest, se nihil post mediam noctem transglutisse, in dubio enim non potest jejunum semet præsumere, qui se voluntarie exposuit periculo jejunium violandi. Pariter qui dubitat utrum aliquid per modum cibi, potusque deglutierit, ac sumpserit, si dubium prudenter exenti non possit, debet tutiorem sequi partem, ac proinde à sacra Communione abstinere. Idem faciendum est, quando occurrit dubium, an quis ante, vel post mediam noctem aliquid sumpserit, aut deglutierit. 3tio: Circa horologia, cum in aliquo loco à se invicem dissonant, iis adhærendum est, quæ plus merentur fidem. Si quis tamen Astro- rum peritus, ex eorum situ certo cognosceret, horologia maturare gradum, posset istis denegare, illis adhibere fidem. Ceterum primus horologii pulsus, ubi præsertim unicum est, diei sequentis, ac proinde jejunium inchoatum indicat, unde qui celebrare, vel ad sacram communionem accedere vult, ubi primum mediæ noctis pulsum audit, quidquid in ore mandit, illico expuere debet, & sedulo cavere ne quid præcedentis cibi deglutiat, & sumat.

*Quæres 8vo: An in hoc jejunii ad Eucharistice sumptionem prærequisiti, præcepto, dari possit parvitas matericæ?*

*Resp:* Præceptum, ad servandum jejunium ab iis qui celebrare, vel sacram communionem suscipere intendunt, adstringere graviter & stricte sub mortali peccato obligare, indubitatum est. Neque in hoc parvitas materiæ, sive ex parte rei sumptæ, sive ex parte temporis, quo quidpiam post mediam noctem accipitur, occurrere potest. Unde quemadmodum graviter peccat, qui celebrat, aut communicat sumpto cibo vel potu, quamvis in modicissima quantitate, ita etiam mortaliter peccat, qui celebrat, aut communicat, si vel uno minuto horæ post mediam noctem quidpiam cibi, aut potus sumpserit.

*Quæres 9no: An, et quæ causæ excusant à lege jejunii ad sumptionem Eucharistice requisiti?*

*Resp:* Concilium Constantiense Sels: 13. sic statuit, *Eucharistice Sacramentum non debet confici post Cœnam, & à fidelibus recipi non jejunis, nisi in casu infirmitatis, aut alterius necessitatis, à jure, vel ab Ecclesia concessio,*

*vel*



vel admisso. Unde ab austera prædicti jejunii lege, excusat imprimis vitandæ irreverentiæ necessitas, ut si periculum sit, ne sacræ hostiæ in potestatem Infidelium deveniant, & profanentur, item ne comburantur, aut aliud quid inhonesti subeant. Tunc enim & à Laico contingi, & ab eo, etsi non sit jejunus, & Sacerdos desit, consumi possunt. Idem est, si post consecrationem, deficiat Sacerdos, nec præsto sit alius, qui sumat consecratas species, & ipsæ citra corruptionis, aut gravis alterius irreverentiæ periculum servari nequeunt, tunc enim & à Laico non jejuno sumi possunt, quia lex jejunii in favorem, ob reverentiam scilicet SSmæ Eucharistiæ, constituta est. Ergo non obligat, quoties ipsa ejus reverentia contrarium exigit, & postulat.

Huc etiam pertinet necessitas perficiendi Sacrificium, unde Sacerdos celebrans, qui loco vini aquam in calicem posuit, & vel totam, vel partem illius sumpsit, statim ac errorem detexit, non debet id expuere, quod ore gerit, ne quid simul hostiæ expuat sed tenetur iterum vinum consecrare, & sumere, licetsi non sit jejunus. Idem est, si peracto jam a terius speciei consecratione recorderetur Sacerdos se non esse jejunum. Imo qui post solum jejunium, etiam scienter, ad sacrificandum accessit, ubi alteram speciem consecravit, jam desistere non potest, sed præmisso sinceræ contritionis actu, sacrificium consummare debet. Quodsi vero Sacerdos ante consecrationem recorderetur se non jejunum esse, censet S. Thomas Doctor, tutius esse, incæptam Missam deserere, nisi grave scandalum timeretur, vel infamia Sacerdotis. Sed quia hæc, nec immerito, propter rei novitatem timentur, nisi celebrans notæ sit, aut saltem præsumptæ probitatis, imo & insuper iis, coram quibus celebrat, dilectus, tot forte sunt casus, in quibus sacrum continuare oportet, quam in quibus ab eo desistere necesse est. Interim qui ob violatum jejunium Missam abrumperet, hujus celsationis innocentem causam populo aperire teneretur.

*Quæres xomo: Quid faciendum sit, si sumpta ablutione superstites Hostiæ particulas advertat Sacerdos?*

*Resp:* Id definitum est verbis Rubricæ Missalis titulo 7. de Defectibus Nro 2. *Si deprehendat Sacerdos, etiam post ablutionem, reliquias relictas consecratas, eas sumat, sive parvæ sint, sive magnæ, quia ad idem Sacrificium spectant. Si vero relictæ sit Hostia integra consecrata, eam in tabernaculo cum aliis reponat, vel sequenti Sacer-*  
doti



*doti relinquat.* Et vero non potest decenter Sacrificium perfici sine ablutione, fieri autem nequit, ut ablutioni non immisceatur particula aliqua, quæ vel remansit in calice, vel dentibus, faucibusque adhæserat, vel in patena, corporalique postea apparet, qui ergo hæc etiam post ablutionem sumit, Ecclesiæ præceptum non violat. Interim sedulo curare debet celebrans, ut fragmenta quæ supersunt, quantum moraliter fieri potest, colligat, & ante sanguinis sumpcionem in calicem mittat, cum sanguine sumendo. Unde lethaliter peccant, qui ut breviorē faciant Missam, vix patenam digito purificant, imo aliquando non purificatam, abstergunt purificatorio, quia sæpius sacras reliquias excutiunt.

Sed & illæ particulæ quæ in corporali deteguntur, ab alio Sacerdote præconsecratæ, sumi post ablutionem & possunt, & debent, quia præcedentis Sacrificii defectus supplere oportet. Pariter cum Sacerdos purificat Pixidem, reliquias consecratas, quæ tandem superesse advertuntur cum una ac multiplici ablutione absumere potest, & debet.

Porro tamdiu Sacerdos superstites particulas consumere post ablutionem potest, quamdiu ab Altari non discessit, etiamsi forte diu ibi fuerit moratus v.g. ad Eucharistiæ dispensationem, quia quamdiu Altari Sacerdos adstat, unam moraliter Sacrificii actionem continuare censetur. Si vero jam ab Altari recesserit, etsi adhuc sacris vestibus indutus sit, fragmenta sumere non potest, esset enim tunc nova, ac distincta communio non jejuniis severe prohibita. Si tamen istiusmodi reliquiæ citra irreverentiam servari nequeant, tunc à Sacerdote etiam sacris vestibus exuto, sumi possunt, vel tradi debent cuiuspiam ad communionem disposito.

Non est tamen eadem ratio integræ hostiæ, ac fragmentorum. Ecclesia siquidem jejunii legem quoad fragmenta temperavit, quia illa sunt veluti quædam Sacrificii partes, & ideo ad ejus integritatem pertinent. Formulæ autem integræ, non se habent ut partes Sacrificii, sed solum consecrantur, ut vel tunc, vel postmodum fidelibus distribui possint. Ergo graviter peccat Sacerdos, si post ablutionem istiusmodi integras absumat hostias, quia in rigore non est omnino jejunus, nisi id ad vitandam Eucharistiæ irreverentiam, omnino necessarium esset, puta quia deest tabernaculum in illo loco, Sacerdos quoque qui sacra peracturus sit, non comparet.

*Quæ-*



*Quæres amo: Quæ præterea excusant à lege jejunii, ad sumptionem Eucharistiæ prerequisites?*

*Resp:* Excusant sequentia. *amo:* Necessitas vitandi scandali, alteriusque notabilis damni, quia positivæ leges non obligant cum gravi detrimento. Ita S. Thomas Doctor, & alii communiter Theologi. Hinc colligunt, Sacerdotem non jejunum celebrare posse ne incurrat gravem infamiam, si postquam sacrum inchoavit, ab altari recedat.

*2do:* Sumptio viatici ab infirmo, qui morbo pressus ad finem vitæ tendit. Sed hic notanda sunt nonnulla. Et quidem *amo:* peccare Parochum, ejusve Vicarium, qui cum commodè valeat deferre Eucharistiam ad infirmum ut jejunus communicet, id ad vesperam differt, cum ille jam jejunus non erit. *2do:* Cavendum summopere est, ne moribundo, quia jejunus non est, communionem in crastinum differat, cum periculo vel sine ea decedendi, vel illam recipiendi cum minus rationis compos fuerit. *3tio:* Nec proinde scrupulosius discutiendum est, an certum sit periculum mortis, ne dum deliberatur, interim infirmus sine viatico moriatur, *4to:* Quamvis infirmus una vel altera post mediam noctem hora jejunus permanere possit, non ideo differenda est ægroti communio, quia Ecclesiæ consuetudo non est, ut incommoda intempestivæ noctis hora ad infirmos deferatur viaticum, nisi tunc specialiter necessitas urgeat. Neque moris est, ut Pastor, qui mane ut plurimum gravibus populi negotiis detinetur, omnia statim deserat, ut nonnisi jejuno Synaxim porrigat.

*5tio:* Sacrificiî perficiendi necessitas, videlicet, cum Sacerdos, peracta consecratione solius etiam panis, deficit, nec haberi potest Sacerdos alter jejunus, qui Missam perficiat. Tunc enim & non jejunus Missam finire potest. Quia perficere Sacrificiû de jure divino necesse, jejunium vero nonnisi juris est Ecclesiastici.

Hic unam addendam est, quod facile contingere potest: Si nocte Nativitatis Domini, Sacerdos multum ante mediam noctem Missam inchoaverit, & errorem non detegat, nisi post consecrationem, tunc si quidem prope est media nox, Missa est protrahenda usque dum tempus mediæ noctis transierit, ut ea elapsa sacra communio sumatur, si vero horæ totius, aut mediæ spatîo, media nox esset expectanda, censent nonnulli Missam solito more continuandam esse, & sacram communionem lumendam. Non enim lex jejunii exigere potest, ut tanta sit inter præcipuas Missæ partes, interruptio. Quodsi in hoc casu Sacerdos

ante



ante mediam noctem ablationem sumpserit, poterit ipsa die Natali Domini, reliquas duas Missas celebrare.

*Quæres 22mo. An infirmo non jejuno pluries viaticum dare liceat?*

*Resp:* Certum est 22mo: infirmo, etiam citra mortis periculum decumbenti, sapius deferendam esse Eucharistiam, si petierit, & jejunus eam recipere possit. 2do: infirmum, si jam satis a morbo convalescit, non nisi jejunum Eucharistia refici posse, quia tunc nulla jam subest necessitas à jejunio excusans. Sed ei, qui postquam aliquantulum convalescit, & in idem, vel simile periculum relabitur, licitum est non jejunum communicare toties, quoties hæc statuum varietas contigerit, quia tunc novus redit necessitatis casus. Imo: ille etiam, qui Viaticum jam recepit, & gravi, ac diuturno detinetur morbo, licite pluries, non jejunus etiam, Eucharistiam recipere potest, quia cælestis iste cibus infirmo datur, non tantum ut divino præcepto de sumendo viatico, satisfaciatur, sed & in præsidium contra insidias & vim diaboli, qui tunc potentius insidiatur. Unde cum gravis, diuturnique morbi dolores, gravis sint, ac diuturna tentatio, cui aliæ plures accedunt, plus urget muniendi, ac corroborandi animam hominis Christiani necessitas, quam servandi jejunii obligatio. Quanto autem temporis intervallo, à Viatici receptione, distare debeat, communio sequens, à non jejunio ægro suscipienda, disputant Theologi, iis assentiendum est, qui dies octo, aut decem requirunt, prout in antiquo Rituali Romano constitutum erat. Unde qui frequentius pro devotione communionem in sua infirmitate exoptaret, jejunii legem, servare tenetur.

*Quæres 23tio: An, ne æger sine viatico decedat, licitum sit Sacerdoti non jejunio, Missam celebrare?*

*Resp:* Id licitum non esse. Quia præceptum divinum de sumendo viatico tunc solum obligat, quando sacra Eucharistia haberi & sumi potest congrue, ac convenienter, juxta statutas Ecclesiæ leges, & secundum præscriptum ab ipsa ordinem, unde ut detur viaticum, non licebit sine sacris vestibus Missam celebrare, quia tunc Eucharistia congrue, & convenienter haberi nequit.

*Quæres 24to: An Uqualis requiritur Corporis munditia, ad sacram Eucharistiam recipiendam?*

*Resp:* Corporis munditia, de qua, utrum ad summptionem Eucharistiæ sit necessaria, nunc inquiritur, iis oppositur fæditatibus, quæ humanum corpus maculant,



& inquinant, videlicet, lepra, fluxus sanguinis, menstrua muliebris, actus conjugal, ac pollutio involuntaria. Itaque *1mo*: Lepra, sanguinis fluxus, menstrua muliebris, pollutio nocturna, ac involuntaria, & alia id genus, quæ sine culpa homini eveniunt, per se ab Eucharistia non prohibent. Quia labes istæ nec peccata sunt, neque veræ obstant devotioni, & qui his subjecti sunt, commiseratione magis digni sunt, quam aliqua pœna, unde Christus claudos, & debiles ad convivium invitare jussit. Pollutio autem etsi nocturna, sed vel in se vel in causa voluntaria, magis sacram impedit communionem, quam cetera peccata, quia gravior, & tenacior est.

*2do*: Nocturna quoque illusio, in se & in causa inculpabilis, per se non obstat sacræ communioni. Quia id solum per se à sacra removet communionem, quod & gratia sanctificante hominem privat, & internam impedit devotionem. Nocturna autem illusio, sicuti & pollutio in se & in causa inculpabilis, neque gratia sanctificante hominem privat, neque internam devotionem impedit. Non ergo per se obstant sacræ communioni. Imo: istiusmodi dæmonis deceptiones contemni debent, si advertatur eas potissimum tunc ingruere, cum quis ad Eucharistiam accedere constituerat. Postulat attamen tanti Sacramenti dignitas, ne quis ad illud accedat aut corpore fædus, aut ex præcedenti illusione distractus. Hoc tamen impedimentum, quod nonnisi ex congruitate provenit, postponi debet propter rationabilem causam, quia v.g. communionem, celebrationemque exigit festus dies, vel necessitas satisfaciendi contractæ obligationi. Quod vero de pollutione nocturna modo dictum est, idem dicendum de diurna, quæ vigili contingit, si inquam involuntaria prorsus sit, sacram communionem per se non impedit, ex congruitate tamen ac reverentia tanti Sacramenti, ab ea abstinendum est, nisi aliud rationabilis exigat causa.

*3tio*: Quamquam optandum est, ut qui ad sacram Eucharistiam accedere intendunt, aliquot ante diebus ab actu conjugali abstineant. Haud tamen delinquent qui regulam hanc non servant, sive debitum conjugale reddendo, sive etiam justa de causa illud exigendo.

*Quæres 4to*. Quæ sunt ex parte animæ dispositiones, ad dignam Eucharistiæ receptionem, requisitæ?

*Resp*: Ad sacram Eucharistiam digne recipiendam, præprimis requiritur puritas conscientiæ, seu immunitas à peccato mortali, quare qui peccati mortalis sibi con-

sciens



sciens est, regulariter prius confiteri debet, quam vel Missam celebret, vel ad sacram communionem accedat. Ita docet, & jubet Concilium Trident: Sess: 13. Can: 11. his verbis: *Ne tantum Sacramentum indigne, atque ideo ad mortem, & condemnationem sumatur, declarat Sancta Synodus, illos quos conscientia peccati mortalis gravat, quantumcunque etiam se contritos existiment, habita copia Confessarii, necessario præmittendam esse confessionem Sacramentalem:* Ad Eucharistiæ siquidem consecrationem, aut illius receptionem, requiritur status gratiæ, de quo certo moraliter constet sive consecranti, sive communicanti. Porro: licet status gratiæ per contritionem perfectam haberi possit, non sic tamen, ut de eo moraliter certo constet, quoniam contritio perfecta, & difficulter & raro haberi potest. Præmittenda igitur est Confessio Sacramentalis, & hoc necessarium est, non dumtaxat, ex præcepto Ecclesiastico, sed quandantenus ex præcepto divino naturali. Jus enim divino naturale postulat, ne quis in re omnium gravissima, incerta certis præponat. Porro qui perfectæ, quam habere se putat, contritioni confidit, & ideo Sacramentalem negligit confessionem, quæ utique ad purganda peccata, & acquirendam gratiam longe & facilior, & tutior est, incerta præponit certis. Jus ergo divino naturale hoc in puncto violat. Si tamen deest copia Confessarii, & urgeat celebrandi, aut communicandi necessitas, poterit quis etiam non confessus, modo tamen verè contritus, celebrare, aut communicare.

*Quæres 16to: Quando censetur deesse copia Confessarii?*

*Resp:* Copia Confessarii censetur deesse. 1mo. Cum sine gravi incommodo adiri nequit, vel etsi præsto adest, perinde est, ac si non adisset. Hinc Confessario carere censetur. 2mo: Qui ob viarum molestiam, magnam itineris distantiam, populi diu expectaturi murmura, Confessarium adire non potest. In quo autem præcise consistat grande illud incommodum, certa lege definiari nequit, quod enim æni gravissimum est, leve est juveni. Sed hoc non favet iis, qui persistunt in concubinato, ebrietate, vel aliquo alio gravi peccato.

2do: Cui præsto non est, nisi Sacerdos, vel excommunicatus, denunciatus, vel carens jurisdictione, seu simplici, quia ad audiendas Confessiones approbatus non est, seu speciali, quia nihil potest in casus reservatos, quorum aliquem incurrerat is, qui ad celebrandum tenetur,



tunc enim nec à reservatis, nec à non reservatis absolvi potest. Non tamen censetur deesse copia Confessarii, quia ille præsto non est, cui quis confidentius, aut etiam utilius confiteri solet, aut quia Religiosus crimen à se commissum non potest sui Ordinis Sacerdoti, confiteri, quod maxime ad consulendum suæ Religionis famæ exoptaret, cogiturque nonnisi Præbytero Sæculari lapsum suum aperire, aut denique, quia non adest Sacerdos, nisi ille cum quo quis inimicitias ac lites, contentionesque gerit. Istiusmodi siquidem rationes, non sunt tantæ, ut propter ipsas Sacerdos præsens, & qui Sacramentum Pœnitentiæ ordinate administrare potest, quasi absens censeatur.

Verum ut quis peccato mortali gravatus non præmissa Confessione celebret, aut communicet, non sufficit quod desit copia Confessarii, requiritur insuper gravis necessitas, quæ sive celebrationem, sive communionem exigat. Quia grave præceptum Confessionem Sacramentalem exigens, gravem excusantem causam exigit, & Synodus Tridentina Sess: 13. Cap: 7. ad hoc, ut quis reus peccati mortalis, non præmissa Sacramentali confessione, cum ipsi copia Confessarii deest, celebrare possit, urgentem causam requirit.

*Quæres 17mo: Quæ sunt illæ graves causæ, propter quas, cum deest copia Confessarii, non præmissa Sacramentali Confessione, celebrare quis possit?*

*Resp:* Istiusmodi causæ sunt sequentes: 1mo: Si celebratio Missæ necessaria sit, ut moribundo viaticum conferatur. Pariter si urgeat aliquod præponderans præceptum. Qui enim duo simul concurrentia præcepta servare nequit, illud servare debet, quod strictius obligat, & plus urget, maxime, cum præceptum prætermisum suppleri per quidpiam aliud poterit, prout Confessio omissa per contritionem perfectam suppleri & compensari valet. Unde, si timeatur ingens populi offensa, ut si vg. dies festivus adsit, & populus jam convenerit ad divina, vel corpus alicujus defuncti parochiani præsens sit in Ecclesia, vel nubentes ad Ecclesiam venerint, pro impetranda benedictione, & matrimonio contrahendo, tunc etiam non confessus, sed vere contritus celebrare potest Sacerdos. 2do Ut vitetur grave populi scandalum, ac ingens Sacerdotis infamia, si nempe futurum sit, ut nisi Sacerdos celebret, plebs graviter obmurmuret, ac temeraria multa in eum effutiat, & is proinde grave inde fama



mæ suæ detrimentum patiat. Utrumque enim cum maxime charitati adversetur, vitari debet, & averti. Cavendum tamen est, ne populi admiratio, instar scandali habeatur, quod enim miretur populus, & habeat Sacerdotem pro minus devoto, non est grave malum.

Si vero Sacerdos jam ad Altare constitutus, mortalis peccati recordetur, cum vix ac ne vix quidem fieri possit, ut qui in Ecclesia publica coram pluribus celebrat, Missam abrupte teneatur, quia vix unquam id fieri sine gravi scandalo potest, ideo præmisso contritionis actu, prosequi Missam debet. Si tamen sine nota, accersito Sacerdote confiteri possit, seu dum habetur Concio, quia solemniter celebrat, seu dum prolixius aliquid cantatur, erit id faciendum, non tamen post consecrationem, quia non expedit Sacrificium, peracta jam consecratione, sic interrumpere. Maior est difficultas si Sacerdos vel in Sacello, vel in Ecclesia coram uno aut altero tantum, qui notæ sint discretionis, celebret. De hoc id unum statui potest, raro admodum fieri, ut Sacerdos inceptam Missam deserens, nemini sit scandalo, & hinc forte S. Bonaventura simpliciter negat, teneri Sacerdotem ab Altari discedere, ut confiteatur. Unde & Missale Romanum de defectibus Nro 8. sic statuit: *Si in ipsa celebratione Missæ, Sacerdos recordetur se esse in peccato mortali, coneratur, cum proposito confitendi, & satisfaciendi.* Quod autem de Sacerdote respectu celebrandæ Missæ dictum est, idem dicendum est de Laico, quo ad sacram communionem recipiendam, & is enim dum sine nota, utique gravi, & periculo infamiæ, à sacra Eucharistia abstinere non potest, haud tunc abstinere tenetur.

Generaliter autem, qui jam Sacra celebrans, recordatur se esse in peccato mortali, statim actum contritionis elicere tenetur, quia tanta est singularum Sacrificii partium dignitas, ut nulla sit quæ à Sacerdote fædato impune perfici queat. Id tamen moraliter accipiendum est, haud enim expedit, ut qui Evangelium legit, aut canit, hæreat in medio, ut contritionem eliciat, unde satis est, ut elevata tunc ad Deum mente, spatio opportuno brevem, sed intentum eliciat contritionis actum.

*Quæres ægros: Quid faciendum est, si delata ad moribundum Eucharistia, is in Confessione fateatur se crimen quoddam continuo tacuisse, unde iterandæ sunt multorum annorum confessiones?*

*Resp:* Vel æger morti proximus est, vel sat viri-  
& tem.



& temporis habet, ut vel tunc, vel deinceps plene confiteri possit. Si *1<sup>um</sup>*: cum non possit plene & integre, confiteri, facienda est ab eo confessio saltem quoad graviora, quantum fieri poterit, ita tamen, ut nimium non defatigetur, & absolvatur, atque communicetur. Si *2<sup>um</sup>*: & tunc æger possit, absque eo, ut gravis adstantibus ingeratur suspicio, & ipse gravem boni nominis subeat, notam, plene & integre confiteri, id efficiendum est, quod si hoc fieri nequeat, videndum, an sub aliquo legitimo prætextu, Viaticum differri possit, an non. Si differri possit, ipse æger adstantibus denuntiet, se modo propter animi indispositionem, nolle viaticum suscipere, & Sacerdos alio commodo tempore, plenam & integram ab eo recipiet Confessionem, & viaticum illi ministrabit. Quodsi Viaticum differri nequeat, quia gravem æger subiret boni nominis jacturam, neque plena, & integra Confessio possit excipi, quia gravis adstantibus de infirmo ingereretur suspicio, maxime, si solito longius protrahi debeat, tunc audita graviorum criminum Confessione, quantum permittet tempus, infirmum absolvat, & communicet; ac postea opportuno tempore ad eum reversus pleniorum ab illo excipiet confessionem.

*Quæres agno: An qui inter confitendum, alicujus mortalis peccati inculpate oblitus est, ac ipsius postea recordatus fuerit, ante communionem illud confiteri debeat?*

*Resp:* Non omnino necesse est, ut ante sumptionem Eucharistiæ illud confiteatur, quia istiusmodi peccatum cum aliis per Sacramentalem Confessionem vere deletum, ac remissum fuerat, cum unum peccatum mortale sine alio remitti nequeat, ac proinde vel omnia simul peccata mortalia delentur, vel nulla. Etsi autem hic & nunc ante Eucharistiæ sumptionem, non sit obligatio, peccatum inculpate omissum confiteri, confiteri tamen illud postea necesse est, quia id Confessionis integritas requirit.

Hic tamen quædam notanda sunt: *1<sup>mo</sup>*. qui Confessarium adhuc paratum habet, debet ei id aperire, quo gravatur, cum id nec sibi nec aliis, qui adstant, pœnitentibus, oneri erit, quod facilius est laicis, quam Sacerdoti, is enim vel scrupulosi, vel depravati, notam, apud populum, si publice confiteatur, facile consequeretur. *2<sup>do</sup>*. hæc decisio iis prodesse potissimum potest, qui Sacramenta frequentant, videlicet: qui octavo quoque die, peccata confitentur, si enim oblita peccata confiteri necesse sit, necesse etiam est, obligationem hanc in longum tempus



non differre. Unde qui raro confitentur, debent vel ante, oblitum peccatum confiteri, priusquam ad sacram communionem accelserint, vel paulo post, quia obligationis adimpletio diu differri non debet. *3tio.* non eadem est ratio omnium peccatorum, quæ tempore Confessionis memoria exciderunt; quædam enim talia sunt, quæ si fuissent in Confessione manifestata propter ea, confessis, & absolutio fuisset denegata, & Communio prohibita foret, & talibus præcedens resolutio servire nequit, istiusmodi namque peccatorum, si aliquod in Confessione oblitum fuisset, & à sacra Communione omnino abstinendum est, & ad Confessarium necessario redeundum. Unde adducta resolutio piis tantummodo, & intelligentibus, sive Ecclesiasticis, sive Laicis, potissimum vero, quo ad peccata pridem commissa, & multum exosa, inservire potest, non ceteris.

*Quæres 20mo. An qui propter Confessarii defectum prætermissa Confessione, urgente necessitate, Missam celebravit, aut communionem accepit, confiteri quam primum debeat?*

*Resp:* Debet quam primum confiteri, istud & expresse Concilium Tridentinum Sess: 13. Cap: 7. mandavit: *Si necessitate urgente Sacerdos absque prævia Confessione celebraverit, quam primum confiteatur: idem habet Rubrica Missalis Romani titulo 8. de Defectibus, ubi pressius præceptum indicat, & exprimit his verbis: Si quis in casu necessitatis, non habens copiam Confessarii, in peccato mortali absque contritione celebret, graviter peccat, secus: si conteratur, debet tamen cum primum poterit, confiteri.* Atque hoc præceptum graviter obligat, quia est in materia gravi. Unde damnata est ab Alexandro 7. sequens propositio: *Mandatum Tridentini factum, Sacerdoti sacrificanti ex necessitate, cum peccato mortali, confitendi quam primum, est consilium, non præceptum.* Hoc vero præcepto tenetur & Laicus, qui ex necessitate communicat non confessus, & Sacerdos qui in die Parasceves Sacra peragit, quamvis enim Patres Tridentini de Sacerdote celebrante loquantur, & neque Laicus communicans, neque Sacerdos in die Parasceve, defectu consecrationis, verum celebret Sacrificium, attamen ratio, finis legis, à Concilio Trident: constitutæ, in omnibus etiam Laicis militat, finis enim & ratio istiusmodi legis hæc est, ut nemo gravi culpa ligatus, ad sacram Eucharistiam accedat, nisi præmissa Confessione, qui vero secus propter urgentem necessitatem fecerit, quam primum confiteatur, & omif-



& omisionem hanc replet. Porro ratio hæc subsistit etiam respectu Laicorum. Omnes ergo sive Laicos communicantes, sive Sacerdotes celebrantes, stringit, & obligat. A fortiori autem obligat Sacerdotes, qui nulla adacti necessitate, in peccato mortali celebrant, aut etiam in ipsa celebratione, graviter delinquant, maxime ante communionem, tum & ille qui ad perficiendum ab altero inchoatum Sacrificium assumitur. Hi enim omnes, quam primum confiteri tenentur, quia qui alterius vices supplet, veram Sacrificii actionem perficit, & Eucharistiæ Sacramentum percipit, & qui nequiores sunt in violando Sacratissimo Sacramento, non ideo ab hac lege eximi debent.

*Quæres 21mo. Hæc confessio quam primum facienda, quo tempore fieri debet?*

*Resp:* Hoc tempus brevissimum esse debet, unde vox illa à Tridentinis Patribus apposita, *quam primum*, strictissimo sensu sumi debet. Unde, etsi censeant non pauci, Sacerdotem præcepto Tridentino satisfacere, qui intra triduum confitetur, multo tamen æquius, & tutius est, si post celebrationem statim, ac nactus fuerit copiam Confessarii confiteatur, ipso etiam celebrationis die, si sine magna difficultate, id facere possit. Idque adhuc certius est, si Confessarius qui modo præsens est, paulo post, ad aliquos dies abesse debeat, atque multo magis, si alioqui crastina die, adhuc sine confessione celebrandum esset, quia dilatio licet parva quo ad tempus, esset magna in qualitate, quia foret causa novæ, sine confessione, celebrationi. Merito itaque ab Alexandro 7. damnata est ista propositio: *Illa particula, (quam primum) intelligitur, cum Sacerdos suo tempore confitebitur*, quia Sacerdos non expectando suum ordinarium, si quod habet, ac consuetum confitendi tempus, statim post Missæ celebrationem, vi legis Tridentinæ, confiteri tenetur.

*Quæres 22do. Qui peccati mortalis reus, indigne sacram recipit Eucharistiam, quale committit peccatum?*

*Resp:* Qui reus peccati mortalis voluntarie sacram sumit Eucharistiam, ac proinde indigne communicat, gravissime peccat. Quia sic indigne sacram sumit Eucharistiam: ut docet Paulus Apostolus, reus est corporis, & sanguinis Christi, iudicium sibi manducat, & bibit, Filium Dei conculeat, & sanguinem Testamenti pollut. Hæc vero gravitatem, & immanitatem sceleris, apertissime ostendunt. Ceterum, quo graviora sunt peccata illius, qui indi-



indigne sacram sumit Eucharistiam, eo gravius est peccatum indignæ Communionis. Ita docet S. Thomas Quæst: 80. art: 5. *tanto magis peccat indigne communicans, quanto peccata ejus graviora sunt. Tamen peccatum fornicationis, magis reddit hominem ineptum, ad perceptionem hujus Sacramenti, in quantum, per hoc peccatum, spiritus carni maxime subijcitur.* Idem dicendum est, de aliis luxuriæ criminibus. Quare, qui cum multis, gravibusque peccatis ad Eucharistiam accessit, tenetur istam circumstantiam notabiliter aggravantem, in Confessione exprimere, saltem in genere, & aliquatenus etiam in specie. Qui ergo in confessione generali oblitus est sacrilegæ communionis, non sufficit quod dicat tantum, se in statu peccati mortalis sacram Eucharistiam sumpsisse, sed declarare debet, se ad illam accessisse multiplici peccato irretitum, videlicet: luxuriæ, ebrietatis. Sic enim & non aliter sacrilegii, ab eo commissi, gravitas, à Confessario intelligitur.

*Dices.* Contingit aliquando ut quis peccato mortali onustus, dum illius sibi concius non est, ad Eucharistiam accedat. Certe is non est reus indignæ communionis.

*Resp:* Dupliciter fieri potest, ut quis ad Eucharistiam accedens peccati, quo tenetur, conscientiam non habeat. *amo.* sua culpa, vel quia per ignorantiam juris, quæ non excusat à culpa, reputat non esse peccatum, quod grave reipsa est, vel quia negligens fuit in examinatione sui ipsius, & is peccat nihilominus graviter, indigne sumens corpus Christi. *2do.* id potest contingere sine ipsius culpa, quando aut peccati ignorantia laborat inculpabili, & facto diligenti conscientiæ examine, illud non sentit, ac tandem quantum potest conteritur, licet ei non sit sufficienter contritus, is sumendo corpus Christi, non peccat, neque reus indignæ communionis censeri potest.

*Quæres 23tio.* Præter immunitatem à peccato mortali, quæ præterea animæ dispositiones, ad dignam, & fructuosam communionem requiruntur?

*Resp:* Sequentia prærequiruntur *amo.* viva fides, quæ invisibilis in Eucharistia Christus, tanquam visibilis consideretur. Unde Apostolus ad Hebr: Cap: 10. inquit: *Accedamus cum vero corde, in fidei plenitudine.* *2do.* effusa in Deum & proximum charitas, unde quisque ante, cum fratre reconciliari debet, quia ut ait Augustinus Serm: 271. *Qui accipit Mysterium unitatis, & non tenet vinculum pacis, non Mysterium accipit pro se, sed testimonium contra se.* *3tio.* ardens devotio, ipsa enim tepiditas, ac in devo-

tio,



tio, magnum sunt fructuosæ communionis obstaculum. 4to, immunitas ab omni affectu, & adhæsione ad quodlibet veniale peccatum, ac proinde omnimoda conscientiæ puritas, animæ sanctitas, virtutum, ac bonorum operum opulentia, maxime dum sæpius, ac frequenter Eucharistia sumitur. Unde S. Chrysost: Homil: 17. in Epistolam ad Hebræos scribens, sic ait: *Quando dicit Diaconus Sancta Sanctis, hoc dicit: Si quis non est sanctus, non accedat. Non simpliciter dicit, à peccatis mundus, sed sanctus. Sanctum enim non mundatio peccati tantum facit, sed etiam præsentia Spiritus, & bonorum operum opulentia, non enim inquit, volo à cæno vos mundos esse, sed etiam albos, & pulchros.* Ad fructuose igitur, maxime frequenter communicandum, non sufficit ut à labe peccati mortalis immunis sit, sed etiam oportet, ut nulli veniali peccato adhæreat, sit sanctus, in anima albus, pulcher, virtutibus, ac bonis operibus, veluti splendidissima veste nuptiali exornatus. Magis autem illi, qui graviorum criminum rei, postquam etiam per sacramentalem Confessionem purgati & iustificati sunt, antequam ad sacram Eucharistiam admittantur, per aliquod tempus prius, in pietatis, ac pænitentiæ operibus exerceri debent, ut & certo appareat eorum sincera conversio, & ad digne atque fructuose suscipiendam sacram Eucharistiam, congrue disponantur.

## CAPUT TERTIUM

### *De Missæ Sacrificio.*

#### ARTICULUS I<sup>mus</sup>

##### *De natura, & existentia Sacrificii novæ legis.*

*Quæres amo. Utrum in Ecclesia Christi, detur aliquod Sacrificium?*

*Resp:* Christus abrogatis antiquæ legis Sacrificiis, in ultima sua Cæna, quam pridie cum Discipulis suis manducavit, novum instituit Sacrificium, sub visibilibus, panis & vini speciebus, corpus, & sanguinem suum, Deo Patri offerendo. Hoc ipsum fit in Missa, dum Sacerdos panem & vi-



& vinum consecrat, & sub sensibilibus eorum speciebus, corpus & sanguinem Christi offert. Igitur in Missa verum perficitur Sacrificium. Unde Eucharistia & Sacramentum est, & Sacrificium. Sacramentum quidem, quatenus corpus & sanguis Christi ordinatur, ad spirituales animarum nostrarum medelam. Sacrificium vero, quatenus idem corpus, & sanguis Christi, in recognitionem suppræmi, Dei in res omnes creatas dominii, offertur, atque totum ad cultum Divinum ordinatur.

*Quæres 2do: In quo consistat natura atque substantia Sacrificii Missæ?*

*Resp:* Missis variis Theologorum disputationibus, in quo unice essentia, ac substantia Sacrificii Missæ consistat, quantum ad praxim pro certo tenendum est, jure Divino utriusque speciei consecrationem, ad Sacrificium Missæ requiri, pariter ad integritatem ejusdem Sacrificii, utriusque speciei consecratæ sumptionem esse necessariam. Quare Rubricæ Missalis Romani titulo de defectibus, præcipiunt, atque ordinant, ut si defectus substantialis sive in pane, sive in vino post consecrationem advertatur, de novo panis aut vinum apponatur, & consecretur, ne mutilum, & imperfectum reddatur sacrificium. Pariter eadem disponunt Rubricæ, ut si post Consecrationem deficiat Sacerdos ante sumptionem specierum, alius etiam non jejunus substituitur Sacerdos, qui species consecratas sumendo, Sacrificium perficiat. Ipsa tamen oblatorum specierum consecratione, Sacrificium perfici videtur, quæ vero illam antecedunt præambula nonnisi esse videntur. Unde iterum Rubricæ Missalis de Defectibus in ipso mysterio contingentibus, statuunt: *Si Sacerdos ante consecrationem graviter infirmetur, aut moriatur, prætermittitur Missa, si post consecrationem Corporis tantum, ante consecrationem sanguinis, vel utroque consecrato, id accidit, Missa per alium Sacerdotem expleatur.*

*Quæres 3tio. An & quando Sacerdos, Missæ Sacrificium celebrare teneatur?*

*Resp:* Sacerdotum alii solum dignitatis suæ characterem habent, alii curam animarum gerunt, alii Beneficio ad Missarum celebrationem fundato, mancipati sunt.

Itaque 1mo. Etsi nulla lege præcipitur simplicibus Sacerdotibus, quotidiana Missæ celebratio, attamen sæpe celebrare tenentur. Et id constat ex verbis Christi, quæ, consecrato, in ultima Cæna, pane, ad Apostolos protulit. Lucæ Cap: 22. *Hoc facite in meam commemorationem.* Quæ verba



verba verum offerendi continent præceptum, quod non solum ad Apostolos referebatur, sed ad omnes Sacerdotes, utpote eorum in ministerio Successores. Unde Concilium Trid: Sess: 22. Cap: 1. ait: *Apostolis, eorumque in Sacerdotio Successoribus, ut offerrent, præcepit, per hæc verba: Hoc facite in meam commemorationem, & Sess: 23. de Reformat: Cap: 14. præcipit Episcopis, quatenus invigilent, ut Sacerdotes saltem diebus Dominicis, & festis solemnioribus celebrent: Curet Episcopus, ut Sacerdotes saltem diebus Dominicis, & Festis solemnioribus celebrent.* Et vero: Sacerdotes omnes in sua ordinatione accipiunt, non solum potestatem offerendi, sed & munus, atque officium sacrificandi. Quilibet autem munus susceptum exequi tenetur. Unde peccant graviter etiam simplices Sacerdotes, qui fere nunquam celebrant, & ad vitandum hac in re peccatum, tenentur diebus Dominicis, ac reliquis festis diebus, præsertim solemnioribus, missam celebrare, nisi legitimo quopiam impedimento, sacris operari prohibeantur.

2do: Ii Sacerdotes, qui curam animarum gerunt, sub gravi tenentur per se ipsos, aut per alios, Missam in Ecclesia celebrare, quoties eam fideles audire tenentur. Et id mandavit Concilium Trident: Sess: 23. de Reform: Cap: 14. præcipiens, ut si Sacerdotes curam habuerint animarum, tam frequenter Missas celebrent, ut suo muneri satisfaciant. Certe: quando plebs Christiana Missam audire tenetur, eo ipso ad eam celebrandam tenetur, qui Plebi præest, & curam illius spiritualem gerit. Neque sufficit Parocho, ut diebus Dominicis, festisque celebret, quibus plebs Sacrum audire debet, sed etiam aliquando per hebdomadam id præstare tenetur, ut devotioni aliquorum & populo satisfaciat, & pro Parochianorum suorum necessitatibus, apud Deum intercedat. Merito dixit S. Cyprianus Epist: 61. *Decimas ex fructibus accipientes, ab altari & Sacrificiis non recedant.*

Specialiter vero Parochi ac Vicarii perpetui, seu ad tempus constituti, tenentur Missam Parochialem applicare, pro suis Parochianis, singulis diebus festis, de præcepto, & si illis diebus habuerint alias obligationes applicandi Missam, curare debent, ut illis per alios Sacerdotes satisfaciant. Ita Bened: 14. in Bulla quæ incipit. *Cum semper.*

3tio: Capellanus celebrare tenetur, quoties, ubi, & quando præscribit fundatio. Quia pacta conventa servari debent, & ut inquit S. Gregorius M. Epist: 20. libro 9. *neceſſe*



*neceſſe eſt, ut deſuncti diſpoſitio modis omnibus conſervetur.* Hinc amo: qui Miſſam celebrat in alia Eccleſia, Capella, quam, quæ. conſtituta fundatiōe, ſunt, peccat graviter, niſi id raro fiat, quia in re notabili mentem fundatoris defraudat. Idem dicendum de eo, qui non celebrat in Eccleſia, ſive Sacello ab illo deſtinato, qui ſtipendium pro Miſſa dedit. Non tamen repetendæ ſunt, Miſſæ, quia fundator, aut dans ſtipem nihil deperdunt, niſi forte illæ Miſſæ celebrandæ erant in Altari privilegiato, & celebratæ ſunt apud altare non privilegiatum, aut majus quæ accepit ſtipendium, ut longius ad Eccleſiam, Sacellumque pro celebranda Miſſa iret, & non ivit, tunc enim exceſſum ſupra commune ſtipendium, reſtituere deberet. 2do: Mutationem quoque ſolius Altaris inducit aliquando peccatum, & grave. Et quidem: ſi Altare hoc deſignatum eſt à fundatore, vel iis qui ſtipendium dederunt, ob cauſam vel in ſe, vel in opinione fundatoris gravem, puta ob ſpecialem hujus Sancti, hujusve imaginis cultum, aut familiæ memoriam, quæ Altare illud erexit, & tunc Altaris immutatio grave erit peccatum, quia rationabilis, & gravis mens fundatoris, defraudatur. Niſi tamen id raro fiat, aut etiam rationabilis, Altare mutandi adeſſet ratio, ſi ſcilicet Altare jam occupatum ſit, nec moram ferant urgentia Celebraturi negotia, quia rationabiliter præſumitur, fundatorem, ſi tunc viveret, id eſſe permiſſurum. Si vero Altare ex mero arbitrato, abſque ſpeciali fine, aut ex fine qui jam ceſſavit, præfixum eſt, quia familia jam extincta eſt, cui illud Altare commodius ad audiendam Miſſam erat, aut alibi commemoratur, & tunc facilius excuſari poſteſt, Altaris mutatio, à peccato mortali, ſi intra eandem Eccleſiam fiat: quodſi etiam in alia Eccleſia illæ celebrentur Miſſæ, videtur jam id fieri in præjudicium illius Eccleſiæ, cui juſ illud acquiſitum fuerat. Quare multum peccant qui poſſident Altarias penes Eccleſias parochiales fundatas, cum obligatione, & certas Miſſas in iis celebrandi, & Parochos in ſuis functionibus adjuvandi, neque tamen Parochos adjuvant, neque Miſſas in deſignatis Eccleſiis celebrant.

*Quæres 4to: An qui quotidie Miſſam celebrare tenetur, ſi v.g. propter febrim, aut aliam infirmitatem per decem dies Sacrum omiſit, ſupplere teneatur?*

*Reſp:* Vel onus quotidianæ Miſſæ Capellano præſcriptum, & impoſitum eſt, ratione alienjuſ loci, in quo fundator voluit quotidie celebrari Miſſam, vel ſine reſpectu  
ad



ad locum. Si *1<sup>um</sup>*: Capellanus diebus singulis, nullo, præter postremos tres Majoris hebdomadæ, excepto die, vel per se, vel si legitimo impedimento detentus fuerit, per alium celebrare debet. Si *2<sup>um</sup>*: observandum adhuc est, quid sonet fundatio. Si enim in ea constitutum sit, ut Altarista per se, vel per alium quotidie celebret, nulla dies sine Sacrificio prætermitti debet. Si vero Capellanus simpliciter adstringitur ad quotidianam Missam, Fundatoris intentio ea fuisse merito præsumitur, ut id fieret, salva honestate, & devotione Sacerdotis, adeo: ut ei à celebrando abstinere liceret, cum id reverentia hujus Sacrificii exigere videtur, ac preterea salvo etiam infirmitatis corporeæ casu. Si enim modicæ etiam virtutis Dominus, stipendia famuli sui haud minnere solet, quia brevi infirmitate detentus fuit, æquum non est, ut durius agatur cum Christi Ministro, quem corporalis infirmitas, una vel altera hebdomada ab officio suo detinuerit. Si tamen diutius perduret infirmitas, substituendus esset, qui infirmi vices gerat.

Verum tenuitas quoque foundationis, qua, certo etiam loco, adstricta Missæ Sacrificia, præscribuntur, idonea pariter causa est, cur Capellanus per se, aut per alium non teneatur repetere Missas, quas per decem, aut quindecim dies, vel eo plus ob infirmitatem omiserit, quia iniquum est, ut qui sanus, vix ex suæ Capellanix fundatione habet, unde vivat, æger careat necessariis. Cavendum tamen ne hac in re temere aliquid fiat.

Etsi vero possit Capellanus, qui singulis diebus celebrare tenetur, aliquando à Sacro præscripto abstinere, sive ex reverentia, sive etiam ut pro propinquorum suorum necessitatibus celebret, haud tamen id facere potest, ut pro alio quopiam, accepto stipendio, celebret. Fundator enim Capellanix jus habet, ut totius anni Sacrificia in sui gratiam celebrantur, & ad summum juri huic renuntiat, ne Ministri pietatem, continua celebratione obruat, vel ut Sacerdos pro Patre, aut Matre nuper Defunctis, Missam celebret, & applicet.

His non nulla addenda sunt. *1<sup>mo</sup>*: si celebrari non possit in loco præfixo, quia Ecclesia, Sacellum, vel Altare corruerit, manet tamen obligatio celebrandi Missas, quæ, quo meliori modo poterit, in Sacello, vel Ecclesia, aut Altari proximo celebrari debent, quia legitime præsumitur Fundatorem id intendisse, ac voluisse. Si vero diu in loco designato Missæ celebrari nequeunt, hac de



re interrogandus est Episcopus, quia ipsius est, voluntates Defunctorum interpretari. 2do: Qui ex fundatione debet Missam qualibet Feria 5ta, 6ta, aut Sabbato, compensare eas non debet, quas Feria 5ta, 6ta, & Sabbato Majoris Hebdomadæ non celebravit, quia Fundator non aliam exigit Missæ celebrationem, quam quæ in Ecclesia permilla est. Ecclesia vero Feria 5ta, 6ta, & Sabbato Majoris hebdomadæ, singulis Sacerdotibus celebrare non permittit. Si vero ex stipendio erant celebrandæ, prædictis diebus, videlicet Feriis 5tis, Sextis, aut Sabbativis, quia in Majori Hebdomada prætermissæ sunt, suppleri debent, nam qui stipendium dat pro Missis determinata die, ad aliquod tempus non adeo longum celebrandis, certum Missarum numerum constituere videtur, qui semper complendus est, neque attendendo tempus Majoris Hebdomadæ, neque etiam occurrentem Sacerdotis infirmitatem, propter quæ præfixis diebus Missæ non sunt celebratæ. Si tamen Missæ ad plures annos certæ diei affixæ sint, tunc omisio unius aut alterius in majori Hebdomada, supplenda non erit.

*Quæres 5to: An Missæ quæ certis diebus affixæ sunt, variari possint, vg. an eas Feria 2da celebrare licet, quæ feria 3tia celebrandæ sunt?*

*Resp:* Vel hæc determinatio diei, sine mysterio facta est, ut si nihil aliud intenderit fundator, quam ut bis, vel ter in Hebdomada pro se celebraretur, vel etiam ex rationabili causa facta est, ut si fundator passionem feria 6ta, & Deiparam Sabbato specialiter honorare voluerit. Si *amum*: non videtur reus, qui diem diei substituit, nisi fundatoris nota dispositio, illius immutatio scandalum aliquod pariat. Si *2dum*: peccatum est. Etsi vero censent aliqui in hoc casu mortaliter non peccari, si id ex causa, & non multum frequenter fiat, multo tamen consultius est, ut fundationes, & pacta conventa ad amissim observentur. Hinc colligitur, eum, qui Missas quindecim in mense celebrare tenetur, posse aliquando triginta uno mense absolvere, nimirum quindecim pro hoc mense, & quindecim pro futuro celebrare. Si nimirum fundator id unum intenderit, ut tot Missæ, in honorem Dei, aut sui ipsius requiem celebrentur, siquidem anticipata debiti solutio, non nocet, sed prodest creditori. Id vero facere non poterit, si hoc vel in Sacelli detrimentum cedat, ut si fundator perpetuum quodammodo cultum in Capella sua fovere voluerit, aut etiam in Communitatis præjudicium vergat, ut si singulis



gulis mensibus pro Defunctis hujus Parochiæ celebrandum sit, tunc enim anticipatio efficit, ut qui sequenti hebdomada decedunt, debito sibi suffragio priventur.

*Quæres 6to: An pluries in die celebrare licet?*

*Resp:* Juxta præ-entem Ecclesiæ disciplinam, excepto festo Nativitatis Domini N. J. Xsti, pluries in die celebrare non licet.

Si tamen Parochus duas regeret Paræcias, nec populi unius, possint in templum alterius, convenire, ac desit alius Sacerdos, tunc is potest duas Missas eodem die celebrare, sed omnino jejunus. Id tamen sine licentia Episcopi fieri non debet, qui de hac necessitate recognoscet, num revera tanta sit, ut bis celebrari oporteat. Præterea si ministrandum sit infirmo viaticum, & Sacerdos Missam celebrans sumpta quidem Communione, sed ante ablationem moneatur, aliusque Sacerdos ad celebrandum desit, nec possit viaticum differri, potest Missam resumere, & alteram celebrare. Ita Bened: 14. de Sacrificio Missæ libro 3. Cap: 5. Neque etiam quolibet die celebrare licet. Nam Feria 6ta majoris Hebdomadæ proprie nulla celebratur Missa, & Sacerdos celebrans nonnisi præanotificatum panem sumit. Feria quoque 5ta, & Sabbato Sancto, Missæ privatæ prohibentur.

*Quæres 7mo: An possit Sacerdos pro Missa stipendium accipere?*

*Resp:* Potest Sacerdos pro Missa stipendium sumere, non per modum pretii, sed per modum sustentationis, Enimvero ut docet Apostolus I. Corinth: Cap: 9. *Qui in sacrario operantur, quæ de sacrario sunt edunt, & qui Altari deserviunt, cum Altari participant.* Porro de Sacrario edere, & de Altari participare, nihil aliud est, quam occasione sacri ministerii stipendium aliquod, ad congruam sustentationem percipere. Unde S. Thomas Doctor 2. 2dæ quæst: 100. art: 2. sic inquit: *Sacerdos non accipit pecuniam quasi pretium consecrationis Eucharistiæ, aut Missæ decantandæ, sed quasi stipendium suæ sustentationis, non tamquam pretium mercedis, sed tamquam stipendium necessitatis.* Unde stipendium, quod pro Missa datur, est species quædam voluntariæ oblationis, quæ sit à fidelibus ad sustentationem Ministrorum Ecclesiæ, hæc vero nihil mali habet, recipi ergo potest. Sacerdos autem stipendio contentus esse debet, si quod per legem loci, vel consuetudinem præfixum est, quia in omnibus, ac proinde etiam in sacris inhærendum est Superiorum legibus, & quæ le-



gis locum tenet, rationabili consuetudini. Igitur ultra constitutum stipendium, nemo plus exigere potest, alias peccat, & alienum rapit. Potest tamen plus quidpiam recipere, si gratis oblatum fuerit, imo & plus stipendii modeste exigere valet, ratione extraordinarii extrinseci laboris, & defatigationis, ut si Sacerdos summo mane surgere, vel peregre proficisci, vel ad meridiem usque expectare debeat, laboris hujus, & defatigationis, quam Missa per se non importat, ratio haberi debet. Hinc plus datur, & accipitur pro Missa cantata, quam pro lecta, non præcise, quia cantus æstimatur, quemadmodum in Musicis, sed quia æquum, ut qui plus laborant, majori præmio remunerentur.

Quodsi nec lege Superiorum, neque consuetudine loci, stipendium pro Missa constitutum sit, id unum exigi pro Missa potest, quod rationabili judicio, ad bonam partem sustentationis, per unam diem sufficere potest, neque enim tantum exigi potest, quantum ad plenam unius diei sustentationem sufficere potest, quia celebratio Missæ non impedit, quominus Sacerdos honestis, & quæ statum suum decent, operibus, sibi provideat.

*Quæres 8vo: Quis Sacerdos stipendium pro Missa accipere possit?*

*Resp: amo:* Sacerdos etiam dives, solitum stipendium accipere potest; quia generatim dignus est operarius mercede sua, quod autem aliunde dives sit, id per accidens se habet, & sicut operam non tollit, sic nec mercedem tollere debet.

*2do:* Parochi, pro Missis, iis diebus celebrandis, quibus eas pro suis Parochianis applicare debent, stipendium nullum recipere possunt, quia cum illas Missas suis Parochianis applicare teneantur, aliis ipsas applicare nequeunt, nec proinde pro iis stipendium accipere possunt. Aliis vero diebus possunt stipendium accipere, & Missas secundum intentionem, stipem dantis, applicare. Si tamen sufficientissimum habeant ex Beneficio suo redditum, quibuslibet diebus Missam pro suis Parochianis celebrare, & illis applicare tenentur, nisi à celebrando legitima causa excuset. Ita multoties resolvit, & deciderat Sacra Congregatio Concilii Trident: interpres.

*3tio:* Omnes Sacerdotes, quibus diebus, sive ratione foundationis, legati, sive ratione solarii, tenentur Missas celebrare, non possunt pro iisdem Missis stipendia accipere, & si pro Missis celebrandis stipendia acceperint, non possunt.

T. II. M.

G

sunt



sunt per supra dictas Missas, ex accepto stipendio contractæ obligationi, satisfacere. Ita decrevit S. Congregatio, Concilii Tridenti: interpres, approbante Urbano 8vo, quia duarum Missarum celebrandarum obligationi, per unius Missæ celebrationem fieri satis nequit. Hinc etiam sequitur non licere Sacerdoti novam stipem pro eodem, ad quod jam obligatus est, sacrificio, accipere, cum intentione cedendi in gratiam dantis, eam fructus partem, quæ ipsi Celebranti contingit. Damnata siquidem fuit ab Alexandro 7. sequens propositio: *Duplicatum stipendium potest Sacerdos pro eadem Missa licite accipere, applicando petenti partem, etiam specialissimam fructus, ipsimet celebranti respondentem*: incertum siquidem est, an ille Missæ fructus specialissimus, qui Sacerdoti celebranti contingit, ab eo alienari, & alteri applicari possit, incertum quoque est, an iste specialissimus fructus tantum valeat, quantum ille, qui illi competit, cui specialiter Missæ sacrificium applicatur, & applicari ex justitia debet. Debito autem certo ex justitia contracto, per incertam, & maxime dubiam solutionem satis non fit.

4to: Tandem, qui alicubi ex fundatione celebrare tenetur vg. in certa Ecclesia, Sacello, Altari, quamvis in fundatione non sit expressum, quod illa Sacrificia applicare debeat pro fundatore, standum tamen est pro Fundatore, illi Missæ Sacrificia applicanda sunt, neque talis Capellanus pro iisdem Missis, alteri applicandis, stipendia accipere potest, quod etiam S. Cong: Concilii sub Urbano 8. fieri expresse prohibuit, qui enim Missas fundavit, illas sibi certe reservavit, sibi que eas applicari voluit. Si autem in fundatione expresse Sacerdoti data sit facultas, fundatas Missas applicandi, cui ipsi celebranti placuerit, tunc id ipsi licebit, & in hoc casu pro iisdem Missis ab aliis stipendia accipere potest. Quare Capellani Monialium, & alii, qui incongruo præsertim stipendio subeunt onus quotidianæ Missæ, expressa hac conditione, quod non teneantur ad applicationem Sacrificii, nova pro iis Sacrificiis stipendia accipere possunt.

*Quæres 9no: An qui minora stipendia, sive ab uno, sive à multis accepit, pro pluribus Missis celebrandis, licite possit, ea in unum sufficiens coadunare, & per unius Sacrificii oblationem eis satisfacere?*

*Resp:* Non potest, quia hoc in se injustum est, facta conventio, data fides non servatur, & dantes stipendia decipiuntur. Et id constat ex Decreto jussu Urbani 8vi edi-



to his verbis: *Sacra Congregatio sub obtestatione divini iudicii præcipit, ut absolute tot Mifsæ dicantur, quot ad rationem eleemosynæ præscriptæ fuerint, etiamsi stipendia fuerint incongrua, ita: ut alioquin ii, ad quos pertinet, suæ obligationi non satisfaciant, quin imo graviter peccent, & ad restituendum teneantur.* Imo qui ex præfixo Milsarum numero, unam solum detraheret, graviter peccaret, quia etsi viginti alium iactura, plerumque non sufficiat ad culpam mortalem, privatio tamen fructus etiam unius Mifsæ, grave satis damnum est spirituale, unde mortale exurgit peccatum.

Si vero incio Sacerdote allata sint pro Misis decem stipendia, quæ nonnisi pro octo Misis sufficiunt, poterit is octo tantum Misas persolvere. Si tamen stipendii largitorem monere possit, monere tenebitur, aut ad alium, qui minori contentus sit stipe, & stipem, & Milsarum onera transmittere, facile enim præsumitur eam esse, stipendium dantis, voluntatem.

*Quæres xomo: An qui majus ex dantis liberalitate accipit stipendium, possit hujus parte retenta, Misas quas suscepit, alteri Sacerdoti committere, huic concedendo partem alteram stipendii, quæ secundum leges loci sufficiat?*

*Resp:* Id non licere, quia Sacerdos ille nullum habet titulum, quo retineat aliquam partem stipendii, hæc enim sibi gratis data non fuit, sed cum onere celebrandi, ergo cum onus illud in alium rejicit, debet & beneficium in eundem refundere, præsertim cum ii, qui consveto majus stipendium præbent, id intendunt, ut pro se ore tur specialiori affectu. Unde damnata est ab Alexandro 7. sequens propositio: *Post decretum Urbani VIII. potest Sacerdos, cui Mifsæ celebrandæ traduntur, per alium satisfacere, collato illi minore stipendio, alia parte stipendii sibi reservata.* Qui itaque sic faciunt, æquitatem violant, & ad restitutionem tenentur, nisi Sacerdos ille, cui pars nonnisi stipendii datur, de re tota monitus, residuum stipendii partem liberaliter condonet. Cavendum tamen est, ne condonatio ista, sit oretenus nonnisi liberalis, in rei autem veritate, extorta, eo quod timeat Sacerdos, ne deinceps stipendia pro Misis non inveniat. Sed hic advertenda est novissima ordinatio Benedicti 14. in Bulla quæ incipit. *Quanta cura*, ubi sub pæna Censurarum, quarum absolutio Romano Pontifici reservatur, prohibentur mercimonia, super eleemosynis Milsarum, hoc est, qui eleemosynas colligunt in iis locis, in quibus stipendia pro Misis, sunt majoris præ-



tii, Missas vero celebrare curant in locis, in quibus pro minori pretio celebrari soleant, & si Laici sunt, qui hæc mercimoniam exercent, excommunicationem, si vero Clerici, vel Sacerdotes, suspensionem à solo Romano Pontifice solvendam, incurrunt. Hinc etiam sequitur non posse pia loca stipendia pro Missis colligere, & parte illorum retenta, aliam pro celebrandis Missis distribuere.

*Quæres 1mo: An liceat Sacerdoti anticipare celebrare Missas pro iis, qui deinceps stipendia dabunt?*

*Resp:* Non licet, quia hanc consuetudinem Paulus 5. prohibuit, *tamquam pluribus nominibus periculosam, Fidelium scandalis, & offensionibus obnoxiam.* Si tamen certo prævideat Sacerdos futurum, ut à se postulentur Missæ pro defuncto Filio, poterit jam nunc eadem offerre, & deinceps stipem recipere, quia sic offertur Sacrificium pro re, & persona determinata, nec expectatur indigentia Missam expostulaturi, sed actu existens supponitur.

His quædam adjicienda sunt. Et quidem 1mo: Non licet Sacerdoti plura congerere stipendia Missarum, quibus nonnisi post diuturnum tempus satisfacere potest, quia Sacrificii dilatio, stipem dantibus, injuriosa est, quod magis adhuc verum est, quando Sacrificium postulatum, est pro re urgente v.g. pro vincenda gravi tentatione, pro lite intra paucos dies finienda, pro decumbente infirmo, pro recens mortuo, & facile contingere potest, ut dilato sacrificio, causa jam perdita sit, æger mortuus. Quæ autem mora, & Sacrificii dilatio, peccatum mortale inducat, nonnisi ex circumstantiis dijudicari potest. Unde qui pro lite hodie finienda, Missam mane petierit, aut pro infirmo periculose decumbente, peccat mortaliter, si vel una die differat, & ad restituendum tenetur periunde, ac si Sacrum omisisset. In reliquis quæ minus urgent, potest quis Missarum stipendia ad menses duos acceptare.

2do: Sacerdos qui Missas debet pro Defunctis, satisfacit obligationi, illis applicando Missas diei & officii, neque istiusmodi Missas, cum de Requiem celebrari nequeunt, in alteram diem differre debet, ne dilatio animabus suffragia expectantibus, detrimento sit. Qui tamen expresse Missam de Requiem appromisit, si nihil obstat, & Rubrica Missalis permittat, illam debet celebrare, nec aliam substituere.

3tio: Missarum onera, quamvis redditus imminuti fuerint, nec ullatenus ad illa implenda sufficiant, nemo minueret,



nuere, & ad minorem numerum reducere potest propria sua voluntate, quia nemo potest esse iudex in propria sua causa, & juxta hoc faciendi à Concilio Trident: sessione 24. Cap: 4. de form: commissum est Episcopis tamquam Executoribus Testamentorum, quamquam postea ad Romanos Pontifices devolutum sit.

*Quæres 12mo: An. quæ, & quando fieri debeat Missæ applicatio, ut hæc cuipiam specialiter prosit?*

*Resp:* Necesario Missa applicari particulariter per celebrantem debet, ut hæc cuipiam specialiter prosit: Quia sacrificium est species orationis, oratio autem, nisi particulariter applicetur, specialiter huic potius, quam alteri non prodest, & quemadmodum Sacramenta ad operandum determinantur per receptionem, sic Sacrificium per oblationem, quæ fit ab homine. Quod si celebrans Missam, applicet pro incapaci, fructus ex ea provenientes, manent in thesauro Ecclesiæ. Ad applicationem vero Sacrificii, non requiritur intentio Sacrificantis actualis, aut virtualis, sed sufficit diu præterita, dummodo non fuerit retractata. Unde qui heri Petro promisit Missam crastinam, hodie autem promissionis immemor Missam celebrat, reipsa, nisi aliud expresse constituerit, pro eo Sacrificium celebrat. Quin & toto mense, & anno, si id semel statuerit, nec animum mutaverit, pro eodem celebrabit. Quia applicatio fructus Missæ, est quædam donatio, donatio autem anticipate fieri potest, & semel facta, durat quousque revocetur, vel per aliquod contrarium retractetur. Est tamen consultius ut prædicta applicatio atque intentio sæpius renovetur.

*Quæres 13tio: Qua hora Missæ Sacrificium celebrandum sit?*

*Resp:* De hora Missæ celebrandæ sic statuunt Rubricæ Missalis Romani titulo. 15. *Missæ privata saltem post Matutinum & Laudes, quacunque hora, ab aurora usque ad meridiem dici potest.* Jam vero per auroram, non ortus ipsius solis intelligitur, sed prima lucis irradiatio, quæ crepusculum dicitur. Et istud lucis initium, longiori quandoque, quandoque breviori temporis intervallo, ortum solis præcedit, aliquando duabus, tribus, & plus horis, aliquando una hora & supra.

Quod vero attinet tempus Missam celebrandi, aurora non mathematicè attenditur, sed moraliter, & cum aliqua latitudine, adeo ut reus non sit peccati, qui sic Missam inchoat, ut finis ejus coincidat cum aurora, & sicut  
ser-



servatur præceptum non celebrandi Missam post Meridiem, cum aliquid illius dicitur ante Meridiem, licet post meridiem terminetur, ita à pari impletur præceptum non celebrandi nisi in aurora, quando licet ante auroram cœpta fuerit Missa, in Aurora tamen finitur. Quare Benedictus 14. in Instit. Eccles: 12. affirmat tolerari spatio tertiæ partis horæ anticipationem, & prolongationem celebrationis Missæ ante & ultra tempus à Rubrica constitutum. Verum in nostris Regionibus, aurora non sumitur physice sed populariter, pro illo scilicet tempore, quo homines communiter ad laborem, & sua officia perficienda surgere de quiete consueverunt, quare in hyeme multis ante crepusculum horis Missæ celebrantur.

De jure itaque communi graviter peccet, qui in celebrando Missæ Sacrificio, notabiliter prævenit tempus auroræ sive physicæ, sive popularis, quia transgreditur legem, quæ ubique habetur pro gravi. Unde Concilium Trident: Sess: 22. in Decreto de observandis in Celebratione Missæ mandat Episcopis: *Ne superstitioni locus aliquis detur, edicto & pœnis propositis caveant, ne Sacerdotes aliis quam debitis horis celebrent.* Sed ante physicam, sive etiam popularem auroram licet Missam celebrare, cum id exigit necessitas proximi, ut si aliqui moriturus sit quispiam sine viatico, quo etiam in casu, sacrum à media nocte inchoari poterit.

*Quæres 24to: Quid per meridiem intelligatur?*

*Resp:* Meridies sicut & aurora non sumitur mathematicè, sed moraliter, ita: ut non strictim mediam diei partem significet, sed id quod in usu communi meridianum tempus nuncupari solet. Quæ autem hujus temporis latitudo sit, varii varie determinant, alii illud coarctant, alii extendunt. Spectanda est consuetudo, & attendendæ circumstantiæ. Unde si Solemnitas, publica processio, sepultura, post Meridiem protrahatur, tunc aliquoto tempore post meridiem Missa haberi potest, maxime cum est consuetudo ut in fine talium Sollemnitatum Missa celebretur, quod aliqui ad totius etiam horæ, & ea plus, moram extendunt. Sed & privata aliquando sufficit necessitas, ut uno, alterove quadrante post meridiem Missa celebretur, cum nempe itinere, aut cura infirmorum præpeditus fuit Sacerdos, quominus suo tempore Missam absolveret.

*Quæres 25to: Quo in loco Missæ Sacrificium celebrare liceat?*

*Resp:*



*Resp:* Ex jure communi non licet Mifsæ sacrificia facere, nisi in locis ab Episcopo solemniter consecratis, vel ab eodem, aut à Sacerdote de illius licentia benedicto, & ad cultum divinum perpetuo destinatis, qualia sunt Oratoria, sive publica, sive privata. Porro Oratoria alia sunt publica, alia privata. *Publica* illa sunt, quæ autoritate Episcopi erriguntur, aditum habent à publica via, ab hominum habitationibus sunt separata, & ad cultum divinum perpetuo destinata. *Privata* sunt illa, quæ inter domesticos parietes, in ædibus Nobilium pro Mifsis celebrandis, ex Indulto Romani Pontificis, sub certis clausulis eriguntur. In Oratoriis ergo publicis Mifsas celebrare omnibus, & quovis tempore ab Ecclesia non prohibito, licitum est. In Oratoriis vero privatis, communiter non nisi unica Missa, & in præsentia illorum tantum, quibus indultum concessum est, celebrari potest, exceptis festis sollempnioribus, quæ in Indulto exprimuntur. Et hæc privata Oratoria non in cubiculi profani angulo, aut inter fenestræ latera, aut in quadam armarii specie construi debent, sed in loco separato, & undique concluso.

Licet tamen extra locum sacrum celebrare. *1mo:* quando inopinato casu corrui, vel flammis absorpta est Ecclesia. *2do:* in Castris Militum diebus ab Ecclesia præceptis in Campo patenti Mifsæ Sacrificia perficiuntur. *3tio:* moris quoque est, ut in Domibus Principum, Episcopo id concedente, seu cum gravi infirmitate ipsi decumbunt, sive dum mortui sunt, Mifsæ Sacrificia celebrentur.

*Quæres 2do: An in omni loco consecrato, sive benedicto Missam celebrare liceat?*

*Resp:* Non in omni loco consecrato, aut benedicto Missam celebrare licet, namque in Ecclesia execrata, violata, vel interdicta non licet Missam celebrare. Porro execratur locus & à sua consecratione sive benedictione excidit. *1mo:* cum ædes illius totaliter, aut ex majore sui parte, etiam quoad parietes simul destruantur, simulque de novo reædificantur, etiamsi id fiat ex eadem materia. Tunc enim nova opus est consecratione, sive benedictione, quia in hoc casu non est moraliter eadem Ecclesia. Aliud est si Ecclesia successive per partes deficiens, statim per partes reficiatur, neque enim nova opus est consecratione, tametsi sensim nulla pars de primo edificio supererit. Quia Ecclesia noviter, & paulatim, ac per partes resecta, eadem permanere censetur. Si tecta, aliaque, ligna Ecclesiæ combusta sint, illæis parietibus, consecratio.



tionem ipsa non amittit, quia consecratio in parietibus consistit, ubi cruces, & unctiones fiunt. Si tamen parietes etsi non corruerint, adeo ex toto, vel ex parte intus sint ab-rasi, ut omnis eorum crusta, vel major pars perierit, nova indigebunt consecratione, quia consecratio in iis partibus facta est. Quodsi crusta, vel majus ejus pars, per temporum intervalla tollatur, successive renovationis causa, manebit semper quæ prius fuit consecratio, quia iidem moraliter manebunt parietes, & pars major consecrata, minorem non consecratam ad se trahit, à fortiori autem consecrationem non aufert, parietum dealbatio.

2do: Contigit execratio, cum Ecclesia ita penes longitudinem, latitudinem, vel altitudinem amplificatur, ut partes de novo additæ, molem antiquam superent. Secus, si præexistens moles, partem additam excedat, tunc enim fatis erit, ut Episcopus id, quod superadditum est, aqua benedicta aspergat.

3tio: Licet si Ecclesia consecratione nova non indigeat, attamen ex magna decencia benedictione indigere videtur insequentibus casibus 1. si postquam consecrata fuit, hæreticæ superstitioni inservierat, & tandem ad Catholicos redierat. 2do: si diu fuit sine januis, tecto, interimque profanis usibus addicta erat. In his casibus competit, ut habita ab Episcopo facultate, Sacerdos Ecclesiam aqua benedicta aspergat.

Violatur vero seu polluitur Ecclesia. 1mo: per homicidium voluntarium, & mortaliter injuriosum, quale esse potest, etiamsi non fuerit injustum, ut si reus suspendatur in templo, quia est loco sacro injuriosum. 2do: per voluntariam, & graviter injuriosam humani sanguinis effusionem. 3tio: per voluntariam, & peccaminosam humani seminis effusionem. 4to: per sepulturam seu excommunicati denunciati, seu cujuslibet hominis infidelis, & non baptisati. Non violaretur tamen Ecclesia sive per sepulchrum Catechumeni, quia is jam fidelis esse censetur, & cum Baptismo flaminis decessisse præsumitur, sive per sepulturam Hæretici occulti, & haud denunciati, quia is propter fidem in Baptismo susceptam, in numero fidelium recensetur.

Hic tamen quatuor addenda sunt. 1mo: ut Ecclesia polluitur per Sepulturam infidelis, aut excommunicati denunciati, non requiritur ut id fiat cum peccato, sed sufficit quoquomodo ille sepeliatur. 2do: nusquam Ecclesiam in supra expressis casibus pollui, quamdiu illi manent oc-culti.



culti. Quapropter Parochus, qui cum paucis aliis Ecclesiæ violationem novit, in ea sicut prius celebrare potest, donec casus notitia sufficienter in plebem dimanaverit. *3tio:* Oratoria, quæ etiam ad Sacrarum celebrationem Episcopali authoritate designata sunt, prædictæ violationi non subjacere, quia jura de Ecclesiis, ac locis publicis loquuntur, & pænæ restringi debent, non extendi. *4to:* polluta Ecclesia, polluuntur etiam altaria in illa erecta, pariter polluto vel uno ex altaribus, Ecclesia tota polluitur: at vero, execrata Ecclesia, subversis exg. navis Ecclesiæ parietibus, non ideo execrantur Altaria, quæ integra, & illæsa remanserunt, unde nova postea non indigebunt consecratione, sicut vicissim execrato Altari, non ideo execratur ipsa Ecclesia.

Interdicitur Ecclesia, quando in ea prohibetur publica Divinorum officiorum celebratio. Quando execratur Ecclesia debet iterum consecrari, quando violatur, polluitur, debet reconciliari, quando interdicto subjacet, illud debet tolli.

Itaque qui Missæ Sacrificium celebrat in Ecclesia execrata, polluta, interdicta, graviter peccat, quia præceptum Ecclesiæ in gravissima Religionis materia transgreditur. Nullam tamen incurrit pœnam, qui in Ecclesia polluta aut execrata celebrat, qui vero celebrat in Ecclesia interdicta, excommunicationem incurrit. Qui tamen bona fide in Ecclesia violata celebraverit, omnis peccati expers erit, non tamen per hoc censetur Ecclesia esse reconciliata. Si sacerdote Missam celebrante, notorie Ecclesia polluitur ac violetur, tenetur intermittere Missam, si nondum Canonem inchoavit, si vero inchoato Canone id contingat, debet Missa perfici. Ita Rubrica missalis titulo ro. de Defectibus his verbis: *Si Sacerdote celebrante, violetur Ecclesia ante Canonem, dimittatur Missa, si post Canonem, non dimittatur*, quia scilicet jam posita est proxima ad Consecrationem præparatio.

*Quæres 17mo: Ad sacrificandum estne Altare necessarium?*

*Resp:* Altare duplex est, aliud *fixum*, quod mensæ ac basi, cui superimponitur immobiliter adhæret & tale altare communiter ex integro, uno constat lapide, qui totam mensæ constituit planitiem: aliud *portatile*, quod de loco in locum transferri potest, & hoc communiter Ara dicitur. Et istud vero ejus latitudinis esse debet, ut majorem hostiam, ac majorem Calicis partem capiat, quod etsi sufficiat,



ciat, quia tamen sæpius præter majorem hostiam minores formulæ consecrari in Pixide solent, quæ & ipsa super Altari seu Ara consecrata collocari decet, majoris amplitudinis sit oportet. Utrumque autem altare tam fixum, quam portatile, ex lapide esse debet, & quidem ex uno integro.

Altare ergo ad celebrandum Missæ Sacrificium fixum, aut portatile omnino requiritur, illudque consecratum esse debet per unctionem Chrismatis, & benedictiones in Pontificali præscriptas. Unde Rubrica Missalis titulo 20. de præparat: *Altaris sive habet. Altare in quo sacrosanctum Missæ sacrificium celebrandum est, debet esse lapideum, & ab Episcopo consecratum, vel saltem ara lapidea, similiter ab Episcopo consecrata, in eo inserta, quæ tam ampla sit, ut Hostiam, & majorem partem Calicis capiat.* Ad consecrationem vero Altaris cujuscunque, Sanctorum Reliquiæ requiruntur, quæ in eo recondi debent, alias altare non censeretur esse consecratum.

Polluitur autem atque violatur utrumque Altare si ve fixum, sive portatile, per sacrilegam humani sanguinis, ac seminis in illis effusionem. Polluto autem sive violato Altari, polluitur quoque, ac violatur ipsa Ecclesia, sed execrato Altari non eo ipso execratur Ecclesia. Cur enim si frangatur mensa Altaris, damnum hoc tota Ecclesia pati debeat. Consecrationem vero Altare fixum amittit. *1mo:* cum ipsum Altare, etsi integrum maneat, à basi sua cui innititur, amovetur. Si tamen mensæ non sit immobiliter affixum, & basi nonnisi ita superpositum, ut facile de loco in locum moveri possit, tunc si ex una Capella in aliam transportetur, non amittit suam consecrationem, quia potius est Altare portatile, quam fixum. *2do:* cum notabiliter & insigniter frangitur.

Altare vero portatile sua consecratione spoliatur cum ita frangitur, ut nulla ejus pars ita ampla remaneat, ut hostiam, & majorem calicis partem contineat, si ergo in angulis frangatur, & reliqua moles integra remaneat, quæ calicem & patenam cum hostia commodè complecti possit, stat consecratio.

Si loculus ubi reconditæ fuerunt reliquiæ frangatur, à sua sede dimoveatur, sigillum aut reliquiæ auferantur, jam in ejusmodi altari celebrare non licebit, quia probabilis est illud consecrationem suam amisisse.

*Quæres 28vo: Quot mappis tegi debet Altare?*

*Resp.* Rubrica Missalis Romani titulo 20. de præpara-



paratione Altaris, sic disponit: *Altare operiatur tribus mappis, seu tobaleis mundis ab Episcopo, vel ab alio habente potestatem benedictis, superiori saltem oblonga quæ usque ad terram pertingat, duabus aliis brevioribus, vel una duplicata.* Mappæ istiusmundi debent esse. 1mo: ex lino, docent tamen multi tobaleas ex tenui canabe confici posse, sed non ex materia serica. 2do: mundæ, unde non vacat à culpe, si adhibeantur ad Sacrificium celebrandum. Mappæ immundæ, laceratæ, vel alias indecentes ac sordidæ. Imo si enormiter immundæ fuerint, grave erit peccatum, quia gravis est contra tantum Sacramentum, atque sacrosanctum Sacrificium irreverentia. Præterea in Altari collocari debet imago Crucifixi, de qua Rubrica Missalis tit: 10. de præparat: Altaris sic habet: *Super Altare collocetur crux in medio.* Hæc autem Crux effigiem Christi in Cruce pendentis habere debet, atque illius figuræ esse debet, ut facile conspiciatur, quare non sufficit Crux, si vel ita tenuis sit, & exigua, ut ipsius celebrantis Sacerdotis, & populi assistentis oculos pene effugiat, vel ita incommode statuitur, ut facile conspici nequeat, hinc certissimum est, violari leges Ecclesiæ, si exigua solum imago Crucifixi præfigatur minori Tabulæ, vel statuæ Sancti qui superadditur. Neque igitur sufficit Crux nuda, sed requiritur Crux cum figura Christi, neque ita parva esse debet, ut non facile occurrat oculis celebrantis, sed emineas, quæ inter Candelabra statuenda est. Neque etiam sufficit Crux parva, quæ Tabernaculo præfigitur, unde S. R. C. 1660. anno sic statuerat. *Crux parva cum imagine Crucifixi posita super Tabernaculum, in quo aservatur inclusum Sanctissimum Sacramentum in Altari, non est sufficiens in Missa, sed poni debet alia Crux in medio Candelabrorum.* Non est autem necesse, ut Crux in Altari apponatur, quando Crucifixus in majori Altaris tabula vel pictus, vel cælatus, primum locum obtinet, præ ceteris omnibus, quæ in eadem tabula exprimuntur. Hinc S. R. C. 1663. decrevit: *In altari in quo adest magna statua Sanctissimi Crucifixi, non est necesse ut ponatur alia Crux dum celebratur Missa.* Ita Bened: 14. Bulla quæ incipit: *Accepimus præstantium.* Utrum vero de more apponenda sit Crux in Altari, quando in eo publice expositum sanctissimum Sacramentum, S. R. Congregatio ea de re consulta, respondit apponendam esse, postea tamen anno 1721. decrevit, ut quælibet Ecclesia suam consuetudinem retineret; apud nos viget consuetudo, ut tunc etiam Crux ap-

pona-



ponatur. Plures autem docent Theologi, Sacerdotem qui celebrat in Altari, in quo non est Crux constituta, peccare nonnisi venialiter.

*Quæres 19no: Ad Missæ Sacrificium celebrandum, quale lumen est necessarium?*

*Resp:* Ad Missæ sacrificium celebrandum lumen omnino requiritur, quare graviter peccaret, qui sine lumine celebraret, atque si cæpta Missa lumen extingvatur ante consecrationem, nec aliud haberi possit, à Sacro desistendum est, quamvis urgeret præceptum audiendi sacri, aut viaticum administrandi necessitas, nec enim præcepta hæc ad indecenter celebrandum adigere possunt.

Dux autem ad minus ex cera factæ candelæ ardere debent, dum Missa celebratur. Ita præscribit Rubrica Missalis tit: 10. de præparat: Altaris: *Candelabra saltem duoponantur cum candelis accensis hinc inde, in utroque latere altaris.* In casu tamen necessitatis, ut si alias futurum sit, ut populus die festo Missam non audiat, sufficiet si una ardeat candela, etiam ex alia materia confecta, quam ex cera, vg. ex sebo.

Cereus qui ad Sacramenti elevationem accendi in Rubrica Missalis præscribitur, non cadit sub præceptum, sed ex præcepto opus est, ut diu noctuque accensa servetur lampas coram Altari, ubi reconditum est Sanctissimum Sacramentum. Ita Rituale Romanum disponit titulo de Eucharistiæ Sacramento his verbis: *Tabernaculum Conopeo decenter coopertum, in Altari majori vel in alio, quod venerationi tanti Sacramenti decentius videbitur, sit collocatum Lampades coram eo plures, vel saltem una, diu, noctuque perpetuo colluceat.* Hoc autem præscriptum ita obligat, ut gravis peccati rei habeantur, qui per notabile tempus, per totam vg. noctem, lampadem extingvi sinunt, aut de industria illam extingvunt.

## A R T I C U L U S 2dus

### *De ipso Missæ Sacrificii ritu.*

*Quæres 20mo: Utrum Rubricæ, quæ ritus, in Missæ sacrificio celebrando præscribunt, stricte obligent?*

*Resp:* Rubricæ omnes quæ ritus, à Sacerdote in Missa celebranda servandos, præscribunt, sunt præceptivæ, & ideo sub gravi obligant, nisi ut in ceteris legibus excuset  
aut



aut materiæ levitas, aut advertentiæ defectus. Et id constat. 1mo: ex Bulla Pii 5. initio Missalis posita, ubi sic habetur. *Mandantes & stricte omnibus, & singulis præcipientes invirtute sanctæ obedientiæ, ut Missam juxta ritum, & modum, & normam in Missali præscriptam decantent, aut legant, neque in Missæ celebratione alias cæremonias, aut preces addere, vel recitare præsumant.* Quæ non instructionem meram, sed gravissimam legem denotant. 2do: ex Concilio Tridentino Sess: 7. ubi Can: 13: sic statutum est: *Si quis dixerit, approbatos Ecclesiæ ritus in solemnî Sacramentorum administratione adhiberi consuetos, aut sine peccato à Ministris omitti pro libitu, aut in novos alios mutari posse, anathema sit.* Porro si Rubricæ non essent præceptivæ, sed solum consulerent, possent sine peccato omitti, mutari, quod tamen fieri reipsa sine peccato nequit. Omnes itaque Missalis Romani Rubricæ sunt præceptivæ, & ideo sub gravi obligant. Hinc graviter ex genere suo peccat Sacerdos, qui in verbis, vel in actionibus, ea quæ per Rubricas præscripta sunt; omittit, nisi excuset materiæ levitas, aut inadvertentia, quæ in aliis rebus à toto, in aliis à parte excusant.

*Quæres 2do: In quibus levis, in quibus gravis materia censeri debeat?*

*Resp:* Quantum ad verba facile definiri nequit, quæ gravis, & quæ levis sit materia. Verumtamen communiter pro gravi materia reputatur omissio. 1mo: Confessionis quæ in plano fit in principio Missæ. 2do: Epistolæ, & adhuc magis Evangelii. 3tio: offertorii seu hostiæ, seu calicis cum sua forma. 4to: Præfationis. Aliud est si quis omiserit unam, aut alteram Collectam, seu Orationem, Tractum, Graduale, aut simile quid, minus principale. Qui tamen tot hujusmodi versiculos prætermittit, ut ex iis exurgat gravis Missæ mutilatio, non erit à gravi peccato immunis. Censebitur autem notabilis mutilatio, si tantum omittatur, quantum æquiparatur Epistolæ nec longiori, nec breviori.

Quod spectat Canonem, qui incipit ab illis verbis. *Te igitur*, & ad Orationem usque Dominicam extenditur, non ultra, multo facilius in eo mortaliter peccari potest. Unde fatentur omnes lethalis noxæ reum fieri, qui vel unam ex Orationibus in eo contentis, puta: *Communicantes*. *Hanc igitur*: vel similem prætermiserit. Imo si tot in iisdem orationibus verba omittat, ut inde Mysterii per ea representandi significatio, notabiliter minuatur, erit sine dubio negli-



negligentia hæc, grave peccatum. Extra hunc casum non videtur lethaliter peccare, qui aliquot tantum verba prætermiserit.

Quæ vero ab Oratione Dominica usque ad Communionem recitari præscribuntur, licet non sint stricte partes Canonis, ei tamen æquiparantur quoad dignitatem. Unde graviter reus erit qui omiserit. *1mo*: ipsam Orationem Dominicam, precemque: *Liberanos*. *2do*: *Agnus Dei*: aut Orationes, quæ Communioni præmittuntur. Quæ etiam Communionem subsequuntur, ejusdem sunt conditionis, ac illa quæ ipsam præcedunt. Quod attinet ritus præscriptos, qui in actione consistunt, illorum omisio grave, vel leve erit peccatum, prout gravior, vel levior præmittitur ritus. Porro ad graves ritus refertur. *1mo*: mixtio aquæ cum vino. *2do*: elevatio hostiæ, & calicis post consecrationem. *3tio*: fractio hostiæ, & ejusdem mixtio cum sanguine. *4to*: purificatio patenæ, & calicis.

Ex his autem facile inferri potest quam graviter peccent tot Sacerdotes, qui in celebranda Misa vix ullam, ut par est, exprimunt cærimoniam, tanta balbutiunt celeritate, ut vix seipsos intelligant, pene nulla verba actioni jungunt ad quam pertinent, dimidiatas genuflexiones, licet corpore sani, faciunt, signa Crucis, quasi muscas abigendo efficiunt, patenam, & calicem tam festine purificant, ut profani panis reliquias excutere videantur, at interim quotidie sine scrupulo ad celebrandum accedunt.

*Quæres 3tio: Utrum Orationes, & Psalmi pro præparatione ad Missam in Missali positi, rigoroſe præcipiuntur?*

*Resp*: Etsi optimi semper consilii sit, sequi id omne quod ab Ecclesia propositum est, quia etiam ipsis ejus consiliis divina inhæret benedictio, constat tamen prædictas Orationes & præscriptos Psalmos non cadere sub præceptum, unde etiam *pro opportunitate Sacerdotis*, dicendæ proponuntur. Verum quæcunque Oratio, atque præparatio quæ Missæ celebrationem præcedat, omnino est necessaria. Si enim ad omne opus sanctum digne perficiendum, animam præparari Scripturæ jubent, à fortiori necesse est, ut ad Sacratissimum Missæ Sacrificium digne celebrandum, oratione, præcibus, Psalmisque Sacerdos sese præparet, ac disponat. Unde à culpa excusari nequeunt, qui sine ulla præparatione, aliquando etiam à colloquiis vanis, occupationibus inutilibus, ad tremenda celebranda mysteria accedunt.

*Quæ-*



*Quæres 4to: Qualis debeat esse Calix, ad celebrandum Missæ Sacrificium necessarius?*

*Resp:* Calix & patena si non ex auro, saltem ex argento facta esse debent, si quis autem adeo pauper sit, ad minimum stanneum calicem habeat necesse est. Potest tamen pes Calicis ex ære, vel aurichalco conflari, modo cuppa illius argentea sit. Cuppa vero calicis, ac Patenæ superior planities deaurata esse debent. Unde in Missali Romano titulo imo de præparat: Sacerdotis sic habetur: *Præparat calicem qui debet esse vel aureus, vel argenteus, aut habere saltem cuppam argenteam intus inauratam, & simul cum patena itidem inaurata, ab Episcopo consecrata.* Quare ut jus loquitur Cap: 44. & 45. de Consecrat: Dist: 1. *Nullus in ligneo, aut vitreo calice præsumat Missam celebrare.* Facultas autem consecrandi calicem, atque patenam, de jure communi, ad solos Episcopos pertinet, nec ab ipsis simplici Presbytero committi potest. Nusquam vero censetur calix esse consecratus ex eo, quod in eo etsi non fuerit consecratus, quis scienter, vel ignoranter celebraverit, quia Calix, patena, non per Missæ celebrationem, sed per Chrismatis unctionem, & preces præscriptas juxta ritum Ecclesiæ consecrantur.

Calice non consecrato nunquam uti licet ad Missæ Sacrificium celebrandum, & qui hoc præsumpserit, mortaliter peccaret.

Calix vero & patena suam consecrationem amittunt, quando notabiliter immutantur, adeo: ut inepta fiant ad sacrificium, sic exg. si in fundo Calicis foramen fiat, quantumvis exiguum, aut pes à cuppa per fractionem separatur, calix amittit consecrationem; aliud est, si ista separatio fiat citra fractionem, ut in pede tornatili, tunc enim Calicis consecratio manet. Si, ut Calix gibbus resarciatur, ab Aurifice in ignem mitti, malleoque tundi debeat, non ideo suam amittit consecrationem, quia idem moraliter manet Calix. Idem est, si ab impiis hominibus ad usus profanos adhibitus fuerit. Si calix & patena ante consecrationem deaurata, inaurationem suam diuturno usu amiserint, non excident à consecratione, seu inaurationem sensim perdant, seu etiam simul. Quia licet unctio nonnisi externam Calicis, ac patenæ superficiem attingat, tota tamen ejus moles vere consecratur. Attamen Calix, ac patena, si de novo inaurantur, probabilius est, quod nova indigeant consecratione id tamen non omnino certum est.



Pixis vero in qua Hostiæ minores consecratæ conservantur, tum etiam Circulus, seu Luna, quæ corpus Christi in Monstrantia positum immediate attingunt, argentea quidem, & deaurata esse debent, sed non consecrata, sufficit quod sint benedicta ab Episcopo, vel ab eo qui Sacra linteamina benedicendi, habet facultatem.

Jam vero sacra Vasa, quæ Corpus, & Sanguinem Christi attingunt, & Chrismate inuncta, vel benedicta sunt, etsi vacua, tangere non licet Laicis, nec fæminis religiosis, neque etiam Clericis Minoribus, sed tantum Ministris sacris, quodsi attingant, erit peccatum veniale, imo nullum, si subest aliqua necessitas, vel causa honesta. Quamdiu autem hæc vasa, continent Corpus, aut Sanguinem Christi, nemo sine mortali, præter Sacerdotem, & Diaconum, potest ea attingere, nisi id absoluta exigat necessitas.

*Quæres 4to: Quæ de purificatorio, corporali, ac palla tenenda, & servanda sunt?*

*Resp:* Purificatorium, Corporale, Palla, qua parte Calicem attingunt, linea esse debent, ab Episcopo, vel alio ad id potestatem habente, benedicta. Corporale ergo, ut inquit Rubrica Missalis de Ritu celebrandi Missam, titulo 1. *ex lino tantum esse debet, nec serico, vel auro in medio intextum*, in extremis autem partibus, auro, vel serico ornari potest. Tanta vero illius extensio esse debet, ut commodè contineat Calicem & Patenam. Palla quoque in illa parte, qua Calicem tangit, ex puro lino esse debet, nec auro, nec serico intexta. Hæc autem omnia alba, ac munda esse debent, atque integra. Quare qui ad Missæ Sacrificium adhiberet Corporale, pallam, aut purificatorium, non benedicta, lacerata, immunda, atque deturpata, peccaret, & nonnunquam mortaliter, id enim gravem tanto Sacrificio, atque Sacramento irrogat irreverentiam.

Purificatorium, palla, corporale, quæ jam ad Missæ Sacrificium celebrandum adhibita sunt, tangi non debent à Laicis, nisi ab iis, qui sacris Ordinibus initiati sunt. Hæc saltem à Subdiaconis semel, atque iterum lavari debent, & lotio in piscinam Ecclesiæ mitti, deinceps à fæminis refici, & lavari perfectius possunt. Post lotionem non indigent, ut iterum benedicantur, moris tamen est, ut Corporalia, Pallæ & alia Altaris linteamina, post eorum lotionem, quasi reconcilientur, cujus modus, for-



formaque habetur in Rituali Romano, inter varias benedictiones.

*Quæres 5to: Vestes Sacræ suntne ad Sacrificium Missæ celebrandum necessariae.*

*Resp:* Vestes sacræ ad celebrandum Missæ sacrificium præscriptæ, sunt sequentes. Amictus, Alba, Cingulus, Manipulus, Stola, & Casula seu Planeta. Quæ, ut inquit Rubrica Missalis Rom: de Ritu celebrandi titulo 1. non debent esse lacera, aut scissa, sed integra, & decenter munda, ac pulchra, ab Episcopo, vel alio facultatem habente benedicta. Peccant itaque qui laceratis, consoctis, nimium attritis, sordidisque apparentis utuntur. Porro circa unum sacrorum apparamentorum hæc communiter à Theologis traduntur. *amo:* Mortaliter peccat, qui sine sacris vestibus Missæ sacrificium celebrat, quod patet ex antiqua Ecclesiæ praxi, à qua sine gravi peccato recedi nequit. Qui vel unicum Manipulum negligeret, dubium est, an à peccato mortali immunis foret, interim ex oblongo manipulo stolam, ex stola manipulum facere liceret, quia eadem benedictione donantur, ac proinde paria esse censentur. Ita vero sacræ vestes ad celebrandum sunt necessariae, ut neque in casu gravis necessitatis, scilicet ne populus die festo Missa careat, aut ut infirmus sine Viatico non moriatur, sine illis Missam facere liceat. Quia præcepta sive Missæ audiendæ, sive Viatici recipiendi, tunc dumtaxat obligant, cum Missa secundum Ecclesiæ legem celebrari potest. Qui vero ex inadvertentia, aut oblivione, unam ex prædictis sacris vestibus omitteret, & sine illa celebraret, pro qualitate negligentiae peccaret, imo nullum admitteret peccatum, si oblivio, inadvertentia, prorsus essent inculpatæ.

*2do:* Vestes ad celebrandum præscriptæ, benedictæ esse debent, & id sub gravi necessarium est. Ista vero benedictio ab Episcopo fieri debet, vel ab alio Sacerdote ad id facultatem ab Episcopo habente. Sacrarum autem vestium benedictio perit, cum formam sub qua confectæ, & benedictæ sunt, amplius non retinent, adeoque ad Ministerii functiones jam ineptæ sunt. Hinc desinit benedictio Albæ, si manica ab ea sejungatur. Cinguli, si ita rumpatur, ut neutra, quæ remanet pars ad cingendum Sacerdotem idonea sit. Stola, Planeta, benedictionem amittunt, cum novis simul reficiuntur partibus, quæ antiquas superant. Secus: si paulatim reficiantur, vel duplici constant varii coloris parte, quarum unaquæque apta sit, ad

*T. II. M. H Sacri.*



Sacrificium celebrandum, tunc enim si hæc ab illa disjungatur, servat utraque suam benedictionem, quia utraque suam servat formam.

Si ex stola plicata, & in se non mutata, fiat manipulus, haud nova opus est benedictione, quia cum subsistat prior forma, subsistit & benedictio, quæ una est pro omnibus indumentis Sacerdotalibus. Idem est, si longior Manipulus ad usum Stolæ deservire debeat. Si vero rescindantur partes Stolæ, ita ut pereat prior illius forma, perire videtur & benedictio, formæ potissimum alligata. Idem erit si Manipulo, ut Stolæ locum gerat, addantur novæ partes non benedictæ, quæ materiam jam benedictam superent. Quia etsi ex pluribus Manipulis benedictis conficiatur Stola, nova opus est benedictione, sicut si è pluribus Cingulis benedictis, de se ad cingendum inhabilibus, Cingulum unum conficiatur, necesse erit, ut totum benedicatur.

3<sup>to</sup>: Preces in induendis sacris vestibus præscriptæ, vix sine aliquo peccato omitti possunt. Et si eadem apparatus pro Vesperis, aut alias assumantur, nullibi præscribitur, ut istiusmodi preces recitentur.

4<sup>to</sup>: Vestes sacræ si fuerint vetustate attritæ, non debent in usus profanos converti, sed comburi, & Cineres in Ecclesiæ piscinam, vel in fossam pavimenti, sive locum aliquem secretum proijci, ut pedibus incedentium non conterantur. Vasa autem sacra aurea vel argentea, aliave id genus, quæ igne transmutantur, in usus profanos cedere possunt, quia moraliter eadem non manent.

Quæres 6<sup>to</sup>: An Sacerdos celebrans Ministrum, qui sibi serviat, habere debeat?

Resp: Sacerdos Missam celebrans, Ministrum qui ipsi inserviat habere debet. Sæpe enim fideles adstantes alloquitur, habere ergo debet quempiam qui ipsi respondeat. Præterea præsto esse debet, qui Sacerdoti celebranti, vinum, aquamque porrigat. Igitur habere Ministrum, qui inserviat, gravis est obligatio, ut constat ex praxi Ecclesiæ, quæ deficietiam Ministri pro gravi defectu semper habuit. Quare qui sine Ministro inserviente celebraret, graviter peccaret, nisi urgens, & gravis quædam necessitas excusaret. Etsi vero graviter præceptum sit habere ministrum ad Missam celebrandam, non tamen id cuicumque gravissimo præcepto alio prævalet. Quare licet sine ministro celebrare 1. cum id necesse est ut Sacerdos Viaticum administret. 2. Cum alio.



alioqui, nec sine gravi offensione plebs missa privabitur. Si tamen solus Sacerdos missa privandus sit, melius est à celebrando etiam die festo abstinere, quam sine ministro celebrare. 3. Si post notabiliter cæptam missam, recedat ab altari minister, tunc illam perficere oportet. Prohibendum autem omnino est, ne ulla fœmina ad Altare præsumat accedere, aut Præsbytero ministrare. Quare in casu gravis, ac urgentis necessitatis, potius sine ministro celebrandum est, quam fœminæ utendum ministerio, poterit tamen à loco dissito Sacerdoti respondere, quod & moniales faciunt, dummodo ad Altare non accedat, & tunc etiam Sacerdos sibi ipsi vinum & aquam porriget, si alius desit, qui hoc faciat.

*Quæres 2mo: An Sacerdoti celebranti Missale sit necessarium?*

*Resp:* Communiter loquendo est necessarium, quia alioqui gravi, in pluribus deficiendi, & errandi periculo se exponit. Qui secus fecerit, peccabit graviter. Et quamvis Sacerdos polleat memoria admodum felice, nunquam debet præsumere, ut sine missali celebret, quia & à praxi Ecclesiæ recederet, & experimento compertum est, firmiorem etiam memoriam sæpius hære.

Tecto etiam capite celebrare non licet. Unde qui missam celebrans, per notabile tempus, quamvis ante consecrationem, caput tectum haberet, à gravi culpa immunis non esset.

*Quæres 3vo: An quæ secreto recitari jubent Rubricæ, submissa voce dicenda sunt?*

*Resp:* Ita submissa voce dicenda sunt, ut Sacerdos, se quidem audiat, sed à circumstantibus non audiatur. Ita præscribit Rubrica miss: Rom: parte x. titulo 16. ubi hæc habentur: *Sacerdos maxime curare debet, ut ea quæ clara voce dicenda sunt, distincte, & oppositè proferat, non admodum festinanter, ut advertere possit, neque etiam voce nimis etata, ne perturbet alios, neque tam submissa, ut à circumstantibus audiri non possit, sed mediocri, & gravi, quæ & devotionem moveat, & audientibus ita sit accomodata, ut quæ leguntur intelligant. Quæ vero secreta dicenda sunt, ita pronuntiet, ut ipsemet se audiat, & à circumstantibus non audiatur.* Hinc qui vel totum Canonem, vel notabilem illius partem, aut magnam partem illarum precum, quæ secreto dici debent, alta voce recitat, peccat mortaliter, si novum ritum inducere velit, si ex contemptu id faciat, aut inde adstantium



scandalum eveniat notabile. Pariter, qui illa quæ alta voce dicenda sunt, secreto recitat, peccat venialiter, quia Rubricæ præscriptum transgreditur. Magis vero ille peccat, qui voce ita submissa recitat, ut se ipsum audire non possit. Unde allata Rubrica ad amussim observanda est.

*Quæres 9no: Utrum Sacerdos inceptam Missam relinquere, aut saltem interrompere possit?*

*Resp:* Peccat graviter qui sine sufficienti causa, Missam non perficit, sed illam deserit, quia hæc agendi ratio, reverentiam tantis mysteriis debitam, insigniter lædit. Gravior autem requiritur causa ut Missa deseri possit post consecrationem, quam ante consecrationem.

Ut Missa deseratur ante consecrationem sequentes sunt causæ 1mo: cum Sacerdos meminit se non esse jejunum, vel gravi peccato obstrictum, de quibus actum est superius. 2do: Cum excommunicatus vitandus, vult Sacrificio interesse, & neque adhortationibus cedit, nec propelli potest. 3tio: Quando Sacerdos Sacrum sine periculo mortis, aut gravis periculi, prosequi & perficere nequit, de quo sic disponit Rubrica tit. 10. de defectibus in ministerio occurrentibus: *Si timeatur incursus hostium vel alluvionis, vel ruina loci, ubi celebratur, ante consecrationem dimittatur Missa, post consecrationem vero Sacerdos accelerare poterit sumptionem Sacramenti, omittis omnibus aliis.* In hoc ergo casu incepto etiam Canone, necdum autem peracta consecratione, debet dimitti Missa, ne Sacramentum exponatur profanationi. Facta autem consecratione, debet sumere Sacerdos vel solam panis speciem, si hanc tantum consecravit, nec speciem vini, periculum imminens consecrari sinit, & omittis ceteris, fuga sibi consulere. Imo Hostiam in corporali secum auferre potest, si instet hostis, aut flamma, alibi consumendam. 4to: Si Sacerdos advertat futurum, ut desit alterutra species consecranda, vel quia propter vomitum communicare non poterit, sistere debet si nondum consecravit. Si autem facta panis consecratione, vini defectum advertat, neque hunc supplere possit, debet prosequi. Idem est, si extunc periculum vomitus sentiat, recedendum est ab altari.

Neque etiam Missa semel incepta interrompi potest, sine peccato, nisi gravis, ac justa occurrat causa. Hoc autem peccatum tanto erit gravius, quanto interruptio diuturnior, aut causa inutilior. Quia Missa est una quædam totalis actio, cujus partes secum invicem conne-



xæ else debent. Interrumpi tamem Mifsa potest. 1. Si moribundus Baptismo, aut Pænitentia indigeat. 2. Si infirmo, qui cetera Sacramenta recipere non potuit, ministranda sit Extrema unctio.

*Quæres xomo: Qui præterea in celebratione Mifcæ Sacrificiū occurrere possunt casus, & qui defectus, & quomodo iis consulendum sit?*

*Resp:* Mifcale Romanum titulo de defectibus in celebratione Mifcarum occurrentibus, varios enumerat casus & opportuna iis offert remedia. & quamvis in decursu hujus Tractatus de multis jam actum sit, eos tamen simul hic colligere, atque recensere maxime utile erit, ex his vero alii materiam, alii formam, alii ipsum celebrationis ritum concernunt.

*xomo:* Itaque. Si panis non sit triticeus, vel si sit triticeus, sed admixtus granis alterius generis, in tanta quantitate, ut non maneat panis triticeus, vel sit aliqui corruptus, non conficitur Sacramentum. Si sit confectus de aqua rosacea, vel alterius distillationis, dubium est, an conficiatur Sacramentum, ac proinde tali pane uti non licet ad Sacrificiū. Si panis cæperit corrumpi, sed adhuc non est corruptus, vel si non sit azymus, Sacramentum conficitur, sed celebrans, ac conficiens graviter peccat.

Si celebrans ante consecrationem advertat hostiam esse corruptam, aut non esse triticeam; remota illa hostia, aliam ponat, & facta oblatione, saltem mente concepta, prosequatur ab eo loco, ubi desit. Si id advertit post consecrationem, etiam post illius hostiæ sumptionem, posita alia, faciat oblationem saltem mente, & à consecratione incipiat, ab illis scilicet verbis: *Qui pridie quam pateretur:* ipsam consecret, & sumat, priorem vero si non sumpsit, post sumptionem Sanguinis sumat, vel alia sumendam tradat, vel alicubi, maxime in ciborio, reverenter servet. Si autem ipsam jam sumpserit, & forte non nisi tunc corruptam esse agnoverit, nihilominus sumat eam, quam denuo consecravit, quia præceptum de perfectione Sacramenti, ac Sacrifici, majoris est ponderis, quam ut à jejuniis sumatur.

Si hostia consecrata dispareat, vel casu aliquo, sive vento, vel ab aliquo animali accepta sit, & nequeat reperiri, tunc altera consecratur, incipiendo ab eo loco: *Qui pridie.*

*zdo:* Si vinum sit factum penitus acetum, vel putridum, vel ei admixtum fuerit tantum aquæ, ut vinum sit corru-



corruptum, non conficitur Sacramentum. Si vinum cæperit acescere, vel corrumpi, vel fuerit aliquantum acre, conficitur Sacramentum, sed conficiens graviter peccat.

Si celebrans advertat vinum cum aqua non esse in Calice positum, debet illa statim apponere, & facta oblatione consecrare. Si post consecrationem advertat vinum non fuisse positum, sed aquam, deposita aqua in aliquod vas, iterum vinum cum aqua ponat in Calicem, & consecret, resumendo à verbis: *Simili modo*.

Si hoc advertat post sumptionem Corporis, vel huiusmodi aquæ, apponat vinum cum aqua, & facta oblatione saltem mente, consecret, & statim sumat, ac cetera prosequatur. Id ipsum faciendum est, si Sacerdos ante consecrationem, vel post consecrationem advertat totum viduum esse acetum, vel alias corruptum.

Si vero celebrans percipiat ante Consecrationem Calicis, non fuisse vino admixtam aquam, statim ponat eam, si id advertat post consecrationem Calicis, nullo modo apponat.

Si materia quæ esset iterum apponenda, ratione defectus in pane aut vino occurrentis, non posset ullo modo haberi, si id sit ante consecrationem Corporis, tunc ulterius in Missa procedi non debet, si post consecrationem Corporis, aut etiam Calicis deprehenditur defectus alterius speciei, altera jam consecrata, & illa nullo modo haberi potest, procedendum erit, & Missa absolvenda, ita tamen ut prætermittantur verba, & signa, quæ pertinent ad speciem deficientem. Quodsi expectando aliquandiu haberi possit species, quæ deficit, expectandum erit, ne Sacrificium maneat imperfectum.

*3tio:* Si quis aliquid diminueret, vel immutaret de forma consecrationis Corporis, vel Sanguinis, & in ipsa verborum immutatione, verba idem non significarent, non conficeret Sacramentum. Si vero aliquid adderet, quod significationem non mutaret, conficeret quidem Sacramentum, sed gravissime peccaret.

Si celebrans non recordetur se dixisse ea, quæ in consecratione specierum communiter dicuntur, non debet propterea turbari. Si tamen certo ei constet se omisisse aliquid eorum, quæ sunt de necessitate Sacramenti, id est formam consecrationis, seu partem, resumat ipsam formam, & cetera prosequatur per ordinem. Si vero valde probabiliter dubitet se aliquid essentielle omisisse, iteret formam sub tacita conditione, Si autem non sint de  
necessi-



necessitate Sacramenti, non resumatur, sed procedat ulterius.

4to: Si Sacerdos celebrans, putans quidem decem sibi ad consecrandum porrectas esse minores hostias, voluit tamen omnes consecrare quas coram se habebat, omnes sunt consecratae, atque ideo quilibet Sacerdos talem semper intentionem habere debet, scilicet consecrandi eas omnes hostias, quas ante se ad consecrandum ordinate positas habet. Hinc etiamsi Sacerdos putans se tenere unam hostiam, post consecrationem invenerit fuisse duas simul junctas, in sumptione sumat simul utramque.

Quodsi Sacerdos deprehendat post sumptionem corporis, & sanguinis, aut etiam post ablationem, reliquias aliquas relictas consecratas, eas sumat, sive parvæ sint, sive magnæ, quia ad idem Sacrificium spectant. Si vero relictæ sit Hostia integra consecrata, etiam minor, eam in tabernaculo cum aliis reponat, si hoc fieri nequit, sequenti Sacerdoti ibi celebraturo in Altari supra corporale decenter opertum, somendam una cum altera, quam est consecraturus, relinquat, vel si neutrum horum fieri possit, in ipso Calice, seu patena decenter conservet, quousque vel in Tabernaculo reponatur, vel ab altero sumatur (quopiam ad Communionem præparato) quodsi non habeat, quomodo honeste conservetur, potest eam ipsemet sumere.

5to: Si in ipsa celebratione Missæ, Sacerdos recorderetur se esse in peccato mortali, conteratur cum proposito confitendi, & satisfaciendi. Si recordetur se esse excommunicatum, suspensum, aut locum esse interdictum, similiter conteratur cum proposito petendi absolutionem. Ante consecrationem autem in supradictis casibus, si non timetur scandalum, debet Missam inceptam deserere.

Si sacerdote celebrante violetur Ecclesia ante Canonem, dimittatur Missa, si post Canonem, non dimittatur. Si timeatur incursus hostium, vel alluvionis, vel ruina loci, ubi celebratur, ante consecrationem dimittatur Missa, post consecrationem vero Sacerdos accelerare poterit sumptionem Sacramenti, omittis omnibus aliis.

Si Sacerdos ante consecrationem graviter infirmetur, aut moriatur, prætermittitur Missa, si post consecrationem Corporis tantum, ante consecrationem Sanguinis, vel utroque consecrato id accidit, Missa per alium Sacerdotem expleatur, ab eo loco, ubi ille desiit, & in casu necessitatis etiam per non jejunum. Si autem non obierit, sed fuerit infirmus, adeo tamen ut possit communicare,  
& non



& non adsit alia Hostia consecrata, Sacerdos qui Missam supplet, dividat Hostiam, & unam partem tribuat infirmo, aliam ipse sumat. Si autem semi prolata forma Corporis, obierit Sacerdos, quia non est facta consecratio, non est necesse, ut Missa per alium suppleatur. Si vero obierit semi prolata forma Calicis, tunc alter prosequatur Missam, & super eundem Calicem repetat integram formam ab eo loco. *Simili modo postquam:* vel posset super alium Calicem præparatum integram formam proferre, & Hostiam primi Sacerdotis, & Sangvinem à se consecratum sumere, ac deinde Calicem relictum semiconsecratum.

*6to:* Si musca, vel aranea, vel aliquid aliud ceciderit in Calicem ante consecrationem, projiciatur vinum in locum decentem, & aliud ponatur in Calice, misceat parum aquæ, offerat & Missam prosequatur (poterit tamen absolute sola musca extrahi, projici, & vinum in Calice relinqui & consecrari, nisi nauseam pariat Sacerdoti.) Si post consecrationem deciderit in Calicem musca, aut aliquid ejusmodi, & fiat nausea Sacerdoti in sumendo, illam extrahat & lavet cum vino, finita autem Missa comburat, & combustio, ac lotio hujusmodi, in Sacrarium projiciatur. Si autem non fuerit ei nausea, nec ullum periculum timeat, sumat cum sanguine.

Si aliquid venenosum incidit in Calicem, vel quod provocaret vomitum, vinum consecratum reponendum est in alio Calice, & aliud vinum cum aqua apponendum de novo consecrandum, & finita Missa sanguis repositus in Ciborio, vel panno, lino, tamdiu conservetur, donec species vini fuerint vel desiccatae, vel alteratae prorsus, & tunc pannus, lino comburatur, & combustio in Sacrarium projiciatur.

Si aliquid venenatum contigerit Hostiam consecratam, tunc Sacerdos alteram consecret, & sumat, & illa servetur in Tabernaculo, loco separato, donec species panis corrumpantur, & corruptæ deinceps in Sacrarium mittantur.

Si sumendo sanguinem particula remanserit in Calice, Sacerdos digito ad labium Calicis eam adducat, & sumat ante purificationem, vel infundat vinum, & sumat.

Si Hostia ante consecrationem invenitur fracta, nisi populo evidenter appareat, talis Hostia consecratur, si autem scandalum populo esse possit, alia accipiatur, & offeratur, quodsi illius jam facta fuerit oblatio, eam post oblationem sumat. Quodsi ante oblationem Hostia appareat



reat fracta, accipiatur altera integra, si citra scandalum, aut longam moram id fieri poffit.

Si propter frigus, vel negligentiam, Hostia consecrata dilabatur in Calicem, propterea nihil est reiterandum, fed Sacerdos Miffam prosequetur, faciendo cæremônias, & figna conveta cum refidua parte Hostiæ, quæ non est madefacta fanguine, si commodè id fieri poffit. Si vero tota madefacta fuerit, non extrahat illam, fed omnia dicat, omit- tendo figna, & fumat pariter Corpus & fanguinem, fignans fe cum Calice dicens: *Corpus, & fanguis Domini.*

Si hyeme fanguis congeletur in Calice, involvatur Calix pannis calefactis, si id non proficeret, ponatur in ferventi aqua prope altare, (vel fupra Carbones teneatur Calix) donec fanguis in eo liquefcat.

Si per negligentiam Sacerdotis, aliquid de fanguine ceciderit, fiquidem fuper terram, feu fuper tabulam, lingua lambatur, & locus ipfe radatur quantum fatis eft, & abrasio comburatur, cinis vero in Sacrarium mittatur. Si vero fuper lapidem Altaris ceciderit, forbeat Sacerdos illam fanguinis stillam, & locus bene abluatur, & ablutio in Sacrarium projiciatur. Si fuper linteum altaris, & ad aliud linteum stilla pervenerit, si ufque ad tertium, linteamina hæc ter abluantur, ubi stilla ceciderat, Calice fupposito, & aqua ablutiois in facrarium projiciatur. Quod- si in ipfo folum corporali, aut si in veftribus Sacerdotali- bus stilla Sanguinis ceciderit, debet fimpliciter abluì, & ablutio in Sacrarium mitti. Si in fubtrato pedibus panno, vel tapeto, bene abluatur.

Si contingat post consecrationem totum Sanguinem effundì, si quidem aliquid, vel parum remansit, illud fumatur. Si vero nihil omnino remansit, Sacerdos ponat iterum vinum, & aquam, consecret, & fumat.

Si Sacerdos evomat Euchariftiam & fpecies integræ appareant, reverenter fumantur, nisi naufea fiat, tunc enim fpecies consecratæ caute feparentur, et in aliquo loco fa- cro reponantur, donec corrumpantur, & poftea in facra- rium projiciantur. Quodsi fpecies non appareant, combu- ratur vomitus, & cineres in Sacrarium mittantur.

Si Hostia consecrata, vel aliqua illius particula di- labatur in terram, reverenter accipiatur, & locus ubi ce- cidit mundetur, & aliquantulum abradatur, & pulvis, feu abrasio in Sacrarium mittatur. Si ceciderit extra Corpo- rale in Mappam, feu alio quovis modo in aliquod linteum, mappa vel linteum diligenter lavetur, & lotio ipfa in Sa- crarium effundatur.

TRA-



# TRACTATUS

DE

SACRAMENTO PÆNITENTIÆ.

## CAPUT PRIMUM

*De natura, vi, & effectibus Pænitentiae.*

Cum nemo mundus sit à sorde peccati, quæ nonnisi pænitentia deleri potest, nihil magis curandum est peccatoribus, quam ut optime sciant, quomodo eos pænitere oporteat, ut hoc pacto deleantur eorum delicta.

### ARTICULUS I mus

*De natura. Pænitentiae.*

*Quæres amo: Quid sit pænitentia?*

*Resp:* Pænitentia duplici modo considerari potest, scilicet: prout est virtus, & prout est Sacramentum. Pænitentia, si consideretur prout est virtus, inclinatur, & excitatur hominem ad detestandum, & odio prosequendum commissæ peccata, cum sincero emendationis proposito, & vera pro illis satisfaciendi voluntate, quare Pænitentia spectata ut virtus, est: *Odium ac detestatio commissi peccati, cum emendationis proposito, & sincera pro illis satisfaciendi voluntate.* Quia ergo vera pænitentia includere debet. *amo:* peccati commissi odium, detestationem, atque dolorem. *2do:* sincerum emendationis propositum, hinc præclare scripsit S. Gregorius M. Homil: 34. in Evangelia: *Pænitentiam agere, est perpetrata mala plangere, & plangenda non perpetrare.* *3tio:* veram satisfaciendi pro commissis peccatis voluntatem, Deo siquidem, ac sapissime etiam hominibus, per commissæ peccata, injuria non modica irrogatur, justitia exigit ut hæc resarciatur, atque congrua læsæ à lædente fiat satisfactio.

Pæni-



Pœnitentia, ut est virtus, ab initio mundi usque nunc semper fuit, & est peccatoribus ad salutem omnino necessaria, sine illa namque nullus peccator salvari potest, quare generaliter, & absolute edixerat Christus Lucæ Cap: 13. *Nisi pœnitentiam egeritis, omnes peribitis.*

Pœnitentia vero spectata ut Sacramentum, hoc modo definiri solet: *Est Sacramentum à Christo Domino institutum, quo, per Sacerdotia absolutionem, homini contrito; confesso & satisfactionem spondenti, remittuntur peccata post baptismum commissa.*

Quæres 2do: *Quæ sit materia Sacramenti Pœnitentiæ?*

Resp: Materia Sacramenti Pœnitentiæ duplex est: proxima, & remota. Materia *remota*, sunt omnia peccata post Baptismum commissa, quia illa per Sacramentum Pœnitentiæ delentur, ac remittuntur. Sed materia hæc remota, alia dicitur *necessaria*, quæ Sacramentali Confessione omnino subijcienda est, & hanc materiam constituunt peccata mortalia, quia necessario ex Christi institutione, Confessione Sacramentali subijci debent, neque aliter deleri possunt, nisi vel per ipsum Pœnitentiæ Sacramentum, vel per contritionem perfectam, quæ vices illius supplet, cum sincero desiderio ipsum suscipiendi, cum actu suscipi poterit. Alia dicitur *libera & sufficiens*, & pro tali materia reputantur peccata venialia, & mortalia etiam, quæ jam confessa & remissa sunt. Quia peccata venialia, licetsi per Sacramentum Pœnitentiæ deleantur, attamen extra illud multis aliis modis deleri possunt, & mortalia quamvis jam confessa, ac remissa, si iterum cum novo dolore, ac detestatione confiteantur, iterum per Sacramentalem absolutionem remitti possunt, atque hoc modo homo amplius, & amplius, à suis iniquitatibus emundatur, & à peccatis purgatur.

Debet autem hæc materia remota esse certa, quia non licet Sacramenti formam applicare materiæ dubiæ, alioqui exponeretur Sacramentum periculo nullitatis, ut itaque Pœnitens à Sacerdote absolvatur, debet aliquod certum, etsi solum veniale confiteri peccatum, quodsi ea omnia quæ confessus est, peccata dubia sint, suppleraddat aliquod certum, quamvis jam antea confessum peccatum, & de illo conteratur.

Jam vero materia Sacramenti Pœnitentiæ *proxima*, sunt tres actus pœnitentis, nimirum: contritio, confessio, & satisfactio. Ita docet Concilium Trident: Sess: 14.

Cap:



Cap: 3. ubi de Pœnitentiæ Sacramento tractans sic ait: *Sunt materia hujus Sacramenti, ipsius Pœnitentis actus, nempe contritio, confessio, & satisfactio, qui quatenus in Pœnitente ad integritatem Sacramenti, ad plenam, & perfectam peccatorum remissionem ex Dei institutione requiruntur, hac ratione partes Pœnitentiæ dicuntur.* Et certe: si ipsa spectetur Pœnitentia, prout est in se, cordis contritionem, & operis satisfactionem requirit, oris autem confessionem Christus peccatoribus pœnitentiam agentibus præcepit. Merito ergo tres isti actus pœnitentis, contritio scilicet, confessio, & satisfactio tamquam materia, ac partes Sacramenti Pœnitentiæ reputantur.

Verum tamen inter prædictas Pœnitentiæ partes, hoc est discrimen, quia actualis Contritio, atque Confessio, sunt partes Sacramenti Pœnitentiæ essentielles, quia sine iis, tamquam primario hoc Sacramentum constitutivis, stare illud non potest. Pariter & satisfactio in voto, seu sincerum Deo, & hominibus satisfaciendi desiderium, voluntasque, pars est Sacramenti Pœnitentiæ essentialis, quare qui nullam haberet satisfaciendi voluntatem, irritum redderet Sacramentum: Satisfactio autem in re, seu actu præstita, quæ à sacerdote imposita fuit, est tantum Sacramenti Pœnitentiæ pars integrans, quia totum Sacramentum istud sacerdotali absolutione perficitur, quamvis imposita à Sacerdote satisfactio impleta non sit.

*Quæres 3tio: Quæ sit forma hujus Sacramenti?*

*Resp:* Forma Sacramenti Pœnitentiæ consistit in iis verbis, quibus à Sacerdote, pœnitenti peccata remittuntur, hæc autem sunt ex præscripto Ritualis Romani: *Ego te absolvo à peccatis tuis in nomine Patris, & Filii, & Spiritus Sancti.* Verum tamen sola verba hæc, *absolvo te*, ad formæ essentiam pertinent, quia ipsa & actionem Ministri, & Sacramenti effectum satis exprimunt. Proindeque & Concil: Trident: Sess: 14. Cap: 3. hæc habet: *Sacramenti Pœnitentiæ forma, in qua præcipue ipsius vis sita est, in illis verbis posita est. Ego te absolvo*, quibus de Ecclesiæ more preces quædam laudabiliter adjunguntur, ad ipsius tamen formæ essentiam nequaquam spectant, neque ad ipsius Sacramenti administrationem sunt necessaria. Unde ad validitatem absolutionis non requiruntur voces à peccatis tuis, quia licet verbum *absolvo*, etiam in censuras cadere possit, ex prævia tamen peccatorum confessione, & intentione Ministri, ad remissionem peccatorum determinatur. Neque etiam vox, *Ego*, quia satis in verbo  
abso



*absolvo* includitur. Pariter invocatio SSmæ Trinitatis, formæ hujus Sacramenti non est essentialis, quia neque eam Christus in Sacramento Pœnitentiæ usurpari præscripsit, neque Ecclesia usquam judicavit illam huic Sacramento essentialem esse. Sed licetsi hæc admodum veri, similia sint, nihilominus sine iis omnibus vocibus, quæ modo Ecclesia pro forma Sacramenti Pœnitentiæ statuit, ac præscripsit, data absolutio, saltem sub conditione iterari deberet, quia Rituale Romanum titulo de Sacramento Pœnitentiæ etiam urgente gravi necessitate, & periculo mortis instante, ceteris prætermittis, sequentem absolutionis formam adhibere mandat. *Ego te absolvo ab omnibus censuris, & peccatis. In nomine Patris, & Filii, & Spiritus Sancti Amen.* Quare ex præscripta ab Ecclesia absolutionis forma, nulla prorsus vox omittenda est, sed integra supra pœnitentem pronuntiari debet.

*Quæres 4to: Quis ritus in perficiendo Pœnitentiæ Sacramento observari debet?*

*Resp:* Ritus perficiendi Pœnitentiæ Sacramentum, atque sacramentalem impertiendi absolutionem, Romanum Rituale sic præscribit: *Sacerdos dum pœnitentem absolvere voluerit, injuncta ei prius, & ab eo acceptata pœnitentia salutari, primo dicit: Misereatur tui omnipotens Deus etc. Deinde dextra, versus Pœnitentem elevata, dicit: Indulgentiam, absolutionem etc. deinceps prosequitur. Dominus Noster Jesus Christus te absolvat, & ego autoritate ipsius te absolvo ab omni vinculo excommunicationis, suspensionis, & interdicti, in quantum possum, & tu indiges. Deinde ego te absolvo à peccatis tuis in nomine Patris, & Filii, & Spiritus Sancti Amen. Passio Domini Nostri Jesu Christi, merita Beatæ Mariæ Virginis, & omnium Sanctorum, & quidquid boni feceris, & mali sustinueris, sit tibi in remissionem peccatorum, augmentum gratiæ, & præmium vitæ æternæ Amen.* Et hæc omnia ex præcepto Ecclesiæ dici, & recitari debent, voce distincta, atque articulata, maxime ipsa substantialis absolutionis forma, quia ex Concilio Florentino: *Pœnitentiæ Sacramenti forma sunt verba absolutionis, quæ Sacerdos profert, dum ait. Ego te absolvo:* debet ergo illa ore per verba articulata proferre.

Monet autem idem Rituale Romanum, quod si pœnitens laicus fuerit, omittendam esse vocem: *Suspensionis:* quia istiusmodi Censura in Laicos non cadit. Ac præterea addit in Confessionibus frequentioribus, ac breviori-

bus,



bus, omitti posse, *Misereatur*, atque *Indulgentiam* etc. & satis esse dicere *Dominus noster Jesus Christus*, & reliqua usque ad illud, *Passio Domini nostri*. Urgente vero gravi aliqua necessitate, vel instante periculo mortis, breviter pœnitens absolvendus est hac forma: *Ego te absolvo ab omnibus censuris, & peccatis in nomine Patris, & Filii, & Spiritus Sancti Amen.*

Ordinarie autem prius pœnitens à Censuris maxime ab excommunicatione absolvendus est, quam à peccatis absolvatur, quia cujuscunque Sacramenti susceptio excommunicatis graviter ab Ecclesia prohibita est, unde qui hunc ordinem scienter pervertunt, & ab excommunicatione non absolutum, à peccatis absolunt, graviter delinquant, atque istiusmodi absolutio, nulla, & irrita est.

*Quæres 5to: An absolutio, Sacramentalis conditionate dari possit?*

*Resp:* Absolutio Sacramentalis communiter absolute est conferenda, unde qui sine justa causa conditionate pœnitentem absolvit, juxta mitiores etiam Theologos peccat mortaliter. Valet tamen absolutio data sub conditione præsentis, vel de præterito, quæ de facto existit, aut extiterat, ut si quis dicat: *Absolvo te si debitum restituisti, si firmum habes restituendi propositum*, quia posita conditione, res transit in absolutam. Atque istiusmodi absolutio conditionata, aliquando licita esse potest, ut cum quis legitime dubitat, an absolutionis verba protulerit, tunc enim dicere poterit: *Si non es absolutus, ego te absolvo*: aut etiam cum Sacerdos dubitat an homo vivax, quem absolute intendit, aut etiam propter incerta signa anceps hæret an infirmus velit absolvi. At non debent absolvi conditionate illi, de quibus cum sani sunt, prudenter dubitatur, utrum rite ad Sacramentum Pœnitentiæ dispositi sint, aut qui alia quam dubia peccata non confitentur, qui aliquod grave peccatum reticuisse probabiliter creduntur, vel quorum dolor sincerus, aut efficax emendationis propositum merito suspecta sunt, hi namque omnes serio prius probandi sunt, donec ex bonis fructibus moraliter certo constet, ipsos ad suscipiendam Sacramentalem absolutionem rite esse dispositos.

Ceterum cum absolutio conditionate datur, necessum non est, conditionem verbis exprimere, quia ex sola mentis intentione, verba ad hunc vel illum sensum determinantur.

Absolutio autem Sacramentalis data sub conditione  
de



de futuro, nulla, & invalida est. Nec enim ipsa valet cum profertur, quia deest conditio cui intentio absolventis est alligata, nec valet cum ponitur conditio, quia tunc non profertur absolutio, neque conficitur Sacramentum.

*Quæres 6to: Utrum ut de novo alicui atque iterum detur Sacramentalis absolutio, opus est ut de novo proxima & remota ponatur Pœnitentiæ materia?*

*Resp:* Ita est, quia ut de novo conficiatur Sacramentum, de novo poni debet materia, & forma Sacramenti. Quare ut de novo & iterum quis absolvatur, necesse est ut iterum confiteatur, atque sincere conteratur, unde Sacrilegii reus est, qui una excepta confessione, bis pœnitenti absolutionem impendit. Potest tamen nova dari absolutio super nova eorundem peccatorum confessione. Neque redarguendus est Sacerdos, qui Scrupulosum anxium de habita contritione, denuo sub conditione absolveret.

*Quæres 7mo: Utrum Sacramentum Pœnitentiæ sit ad salutem necessarium?*

*Resp:* Hac de re Concilium Tridentinum Sess: 14: Cap: 2. ita decrevit: *Est hoc Sacramentum Pœnitentiæ lapsis post Baptismum ad salutem necessarium, ut nondum regeneratis ipse Baptismus.* Unde sequitur Sacramentum Pœnitentiæ in re, cum actu suscipi potest, aut etiam in voto, hoc est in desiderio illud suscipiendi, quando re ipsa suscipi nequit, esse ad salutem necessarium necessitate medii, quia quemadmodum ex Christi institutione Baptismus sive in re sive in voto est omnibus ad salutem necessarius necessitate medii, cum sine illo etiam inculpabiliter omisso salus obtineri nequeat, ita quoque graviter post Baptismum lapsis, Pœnitentia sive in re, sive in voto ex Christi institutione est ad salutem necessaria necessitate medii, quia unicum est salutis remedium, quo etiam inculpabiliter omisso, salus æterna obtineri nequit. Sicuti autem votum, seu desiderium Baptismi in Adultis perfectam contritionem charitatemque Dei supra omnia complecti debet, ita quoque & votum seu desiderium Pœnitentiæ, illam continere debet, ut per illam peccator iustificetur.

## ARTICULUS 2dus

*De vi & effectibus Sacramenti Pœnitentiæ.*

*Quæres 1mo: An sit aliquod gravissimum peccatum, quod*



*quod per Sacramentum Pœnitentiæ remitti nequeat?*

*Resp:* Nullum est quantumvis gravissimum peccatum quod per Sacramentum Pœnitentiæ remitti nequeat. Quia generaliter dixit Christus Apostolis, eorumque in ministerio successoribus Math: Cap: 18. *Quæcunque solveritis super terram, erunt soluta & in Cælo*, nullum ergo excipiendo peccatum, à quibuscunque etiam gravissimis peccatis solvendi potestatem Christus Apostolis eorumque Successoribus dedit, ac proinde omne quantumvis gravissimum peccatum per Sacerdotalem absolutionem in Sacramento Pœnitentiæ remitti potest.

Porro peccata mortalia, aut omnia simul in Sacramento Pœnitentiæ remittuntur, aut nullum; neque fieri potest ut unum peccatum mortale remittatur, & aliud retineatur. Quia peccata in Sacramento Pœnitentiæ remitti nequeant, nisi de illis sincerus concipiatur dolor, sincerus vero dolor de peccatis mortalibus esse nequit, nisi omnia sincere, & ex corde detestentur, quare si quis vel ad unum mortale, cui assefactus est, affectum fervet, quamvis de aliis dolere videatur, istiusmodi dolor falsus est, & nulla tunc remittuntur peccata. Unum ergo peccatum mortale sine alio dimitti nequit. Certe cum peccata mortalia dimittuntur, gratia sanctificans à Deo homini infunditur, gratia vero sanctificans cum mortali peccato consistere nequit. Ergo aut omnia simul delentur peccata mortalia, si omnia sincere detestentur, aut nulla, si vel ad unum mortale, affectus in corde fervetur. Aliud est de peccatis venialibus, unum enim, & non aliud remitti potest, quia de uno peccato veniali sincerus dolor haberi potest, & gratia sanctificans cum peccato veniali sæpe consistit, cum & justi homines levioribus peccatis obnoxii sint.

*Quæres 2do: Utrum in Sacramento Pœnitentiæ non solum peccata delentur, sed etiam pœna illis debita remittitur?*

*Resp:* Quoties per Pœnitentiam peccata mortalia delentur, & reatus culpæ tollitur, statim etiam tollitur reatus pœnæ æternæ, illaque una cum culpa à Deo remittitur, quia cum peccator in Sacramento Pœnitentiæ per gratiam sanctificantem, à peccatis emundatur, atque justificatur, ex injusto fit justus, ex inimico amicus Dei, ut sit hæres secundum spem vitæ æternæ. Qui autem iustus est, amicus Dei, ac hæres vitæ æternæ, nequit esse obnoxius pœnæ æternæ, unde & Apostolus scripsit ad Rom: Cap: 8. *Nihil damnationis est iis, qui sunt in Chri-*



sto Jesu. Porro per gratiam justificationis homo Christo conjungitur, eique incorporatur. Dum igitur per Sacramentum Pœnitentiæ peccator justificatur, peccata ipsius, licet gravia, delentur, ex tunc etiam ei pœna remittitur æterna, & nihil in eo remanet damnationis.

Verum dum remittuntur peccata, non tollitur reatus pœnæ temporalis, sed illa luenda superest, licet remissa peccata fuerint. Quia Deo, qui peccatis nostris offenditur, congrua debetur satisfactio, hæc autem ei exhibetur, dum pœnas temporales patienter tolleramus, ac libenter eas in nos suscipimus. Si tamen acris, ac intensæ fuerit peccatoris pœnitentia, dolorque fervidus, aliquando etiam temporalis pœna remittitur, quemadmodum pœnitenti Magdalenæ contigit, cui dimissa sunt peccata multa, eisque debita tum æterna, tum etiam temporalis pœna, quoniam dilexit multum.

Quæres 3tio: Utrum bonorum operum merita, per mortale peccatum mortificata, per subsequentem deinceps Pœnitentiam reviviscant?

Resp: Opera bona triplicis sunt generis. Alia sunt *viva*, quæ ab homine justo procedunt, eique tribuunt jus ad gloriam cælestem. Alia *mortificata*, quæ ab homine quidem justo prodierunt, sed deinceps per mortale peccatum exoidunt à jure, quod ad consequendam vitam æternam tribuebant. Alia demum *mortua*, quæ, etsi in se bona, fiunt ab homine in statu peccati mortalis existente, quare nullum jus tribuunt ad regnum cælorum adipiscendum. Opera ergo bona mortificari dicuntur, quando meritum suum, atque jus, quod ad regnum cæleste capessendum tribuunt, per mortale peccatum amittunt. Reviviscunt vero, cum amissum meritum, extinctum illud regni cælestis jus, recuperant. Itaque bona opera viva, & per mortale peccatum mortificata, redeunte, per subsequentem pœnitentiam, gratia sanctificante, reviviscunt. Namque Ezechielis Cap: 33. hæc appromittit Deus: *Impietas impij non nocebit ei, in quacunque die conversus fuerit.* Porro si non reviviscerent bona opera per peccatum mortificata, neque redirent illorum amissa merita, etiam sincere pœnitenti peccatori, impietas plurimum, & quidem tota æternitate noceret, cum jam nusquam posset amissa recuperare merita, quare iterum Deus, Joelis Cap: 2. postquam dixerat: *Convertimini ad m*: statim conversionis hujus subjungit mercedem: *Reddam vobis annos quos comedit locustæ.*



*sta, bruchus, & rubigo, & eruca*, id est, ut ait S. Hieronymus. *Non patiar perire meritum bonorum operum, quod per peccatum fuerat deperditum.* Et vero exigit Dei misericordia, quæ superexaltat iudicium, ut opera in gloriam ipsius, & ex illius gratia facta, sua donentur mercede, cum nihil obest. Porro cum homo lapsus per Pœnitentiam iustificatur, reditque in gratiam, cum Deo reconciliatur, nihil jam obest quominus præterita ipsius bona opera remunerentur. Ergo Dei exigit misericordia, ut ipsa per Pœnitentiam reviviscant. Certe plus virium non habet peccatum, quam gratia. Ergo si per mortale peccatum mortificantur bona opera prius facta, per gratiam iustificationis illa reviviscere debent. Verum hæc reviviscencia præteritorum meritorum, extenditur, vel restringitur secundum mensuram dispositionum, ex quibus lapsus homo iustificatur. Unde S. Thomas Doctor quæst: 89. art: 2. sic ait: *Contingit intensionem Pœnitentis quandoque proportionatam esse majori gratiæ, quam illa à qua exide- rat per peccatum, quandoque autem æquali, quandoque vero minori, & ideo pœnitens quandoque resurgit in majori gratia, quandoque autem in æquali, quandoque vero in minori.* Quod & ipsa manifestum est experientia. Illi enim quorum adeo remissa est pœnitentia, ut vix ab aîsvetis deterreantur peccatis, ad pietatis opera nimis languidi, vix quidpiam boni operantur, & ut ait S. Bernardus: *Rara illorum compunctio, oratio sine devotione, tepida conversatio, animalis cogitatio.* Contra vero, quorum vehemens est pœnitentia, splendida & novæ vitæ, & pristinæ pietatis præbent argumenta, ut ad oculum appareat eos meliores esse multis iustis, qui non indigent pœnitentia, & ut inquit S. Grægorius M. Homili 34. in Lucam. *Ex ipso suo dolore compuncti, inardescunt in amorem Dei, seseque in magnis virtutibus exercent, honores fugiunt, acceptis contumeliis lætantur, ad cælestem patriam anhelant.*

Quæres 4to: Qui sunt præterea effectus, fructusque Sacramenti Pœnitentiæ?

Resp: Concilium Tridentinum Sess: 14. Cap: 3. effectus, fructusque Sacramenti Pœnitentiæ sic describit: *Effectus huius Sacramenti reconciliatio est cum Deo, quam interdum in viris piis, & cum devotione hoc Sacramentum percipientibus, conscientiæ pax, ac serenitas, cum vehementi spiritus consolatione consequi solet.* Igitur per Sacramentum Pœnitentiæ cum Deo reconciliamur, à peccatis abluimur, iustificamur, gratia sanctificante perfundimur,



mur, abjectis terroribus conscientia pacificatur, mentis redit serenitas, devotio accenditur, ac de-nam per illud acquirimus gratias multiplices, quibus tentationes ad malum trahentes vincere, præterita peccata devitare, atque in bonis propositis perseverare possimus.

## CAPUT SECUNDUM

### *De partibus Sacramenti Pœnitentiæ.*

*Quæres. Quot, & quæ sunt partes Sacramenti Pœnitentiæ?*

*Resp:* Tres sunt partes Sacramenti Pœnitentiæ, nimirum *Contritio, Confessio, & satisfactio*, atque prædicti Pœnitentiæ actus, & materiam proximam hujus Sacramenti constituunt, & quia ad ipsius integritatem, perfectamque constitutionem necessario & essentialiter ex Christi institutione prærequiruntur, ideo partes illius constitutivæ appellantur. Hinc Concilium Tridentinum Sess: 14. Cap: 3. sic ait: *Sunt autem quasi materia hujus Sacramenti ipsius pœnitentis actus, nempe Contritio, Confessio, & satisfactio, qui quatenus in pœnitente ad integritatem Sacramenti, ad plenamque & perfectam peccatorum remissionem ex Dei institutione requiruntur, hac ratione partes Pœnitentiæ dicuntur.*

## ARTICULUS PRIMUS

### *De Contritione.*

*Quæres 1mo: Quid sit Contritio?*

*Resp:* Contritio est animi dolor ac detestatio commissi peccati, cum proposito de cetero non peccandi, & præstandi reliqua, quæ ad obtinendam à Deo remissionem peccatorum, sunt necessaria. Est itaque contritio, 1mo: dolor animi, quia ab intimo corde profluere debet, cum enim ex corde peccata prosuant, inde etiam dolor ac detestatio eorum promanare debet. Neque satis est partem sensitivam commovere, lachrymas ex oculis profundere, nisi etiam cor ipsum dolore languescens flect. 2do



est detestatio, seu odium atque abominatio commissi peccati, efficax & absoluta illius retractatio, omnem ad illud excludens voluntatis affectum, propensionemque. 3tio: contritio debet esse, cum proposito de cetero non peccandi conjuncta, ac proinde homo contritus habere debet firmam, ac sinceram voluntatem à commissis peccatis abstinendi, & divina præcepta fideliter observandi. Contritio siquidem omnem ad peccatum excludere debet affectum, hunc vero affectum pœnitens peccator non deponit, nisi habeat firmum deinceps non peccandi propositum. 4to: debet insuper habere sinceram propositum præstandi ea omnia, quæ necessaria sunt ad obtinendam à Deo remissionem peccatorum, hoc est propositum, & fideliter peccata sua Sacerdoti confitendi, & pro iis congrue satisfaciendi, quia confessio & satisfactio ex Christi institutione, ad Pœnitentiam & obtinendam à Deo remissionem peccatorum, omnino necessaria sunt.

Quæres 2do: Qualis ergo debet esse istiusmodi contritio?

Resp: Ut contritio valeat ad obtinendam à Deo remissionem peccatorum, debet esse. 1mo: vera: & non sufficit quæ falso ab aliquo putatur haberi, cum reipsa abest. Neque prodest bona pœnitentis fides; quæ credit se esse contritum, licet reipsa contritus non sit, quia bona fides aliquando excusat à peccato, sed non supplet defectum rei necessariæ, qualis est contritio, ut à Deo peccatorum remissio obtineatur. Certe Deus pollicendo peccatoribus remissionem peccatorum, exigit ut avertantur ab impietate sua, illam detestentur, & ex toto corde ad ipsum convertantur. Porro hoc non præstant ii peccatores, qui licetsi falso putent, se de suis dolere peccatis, illa detestari, reipsa tamen corde de ipsis non dolent, non conteruntur, illa corde & animo non detestantur. Ergo talis falso præsumpta contritio nihil valet, sed vera esse debet non imaginaria.

2do: Debet esse interior, quatenus non ab ore tantum prodeat, sed ex intimo cordis affectu profluat. Id enim ubique in sacra Scriptura exigit Deus: *Convertimini ad me in toto corde vestro* Joelis Cap: 2. *Scindite corda vestra*. Isaia Cap: 46. atque ut fidem facit David Propheta Psal: 50. cor contritum & humillatum non despicit Deus. Ut ergo in misericordiam, & remissionem peccatorum à Deo consequamur, necesse est, ut contritio nostra de commissis peccatis



tis ex corde humiliato procedat, ac proinde & vera, & interior sit, oportet.

3tio: Debet esse supernaturalis, tum ratione *principii*, quia scilicet esse debet ex auxilio gratiæ supernaturalis, nemo enim, ut docet Concilium Trident: Sess: 6. Can: 3. sine præveniente Spiritus sancti inspiratione, atque ejus adjutorio pœnitere potest, sicut oportet, tum etiam ratione *motivi*, ut ex aliquo supernaturali motivo concipiatur, ex motivo videlicet, quod per lumen fidei attingitur, quare contritio de peccatis ex motivo pure naturali concepta, exg. propter temporale damnum, ad justificationem, quæ supernaturalis est, & per gratiam perficitur, hominem disponere nequit.

4to: Debet esse summa, non quidem *intensive*, quia etsi paulo remissior contritio, vera tamen esse potest, hinc non ideo suspecta debet esse Pœnitentis contritio, quod Patris, aut Matris mortem doleat vehementius, quam commissum peccatum, quia id provenit ex commotione partis sensitivæ, quod à gratia deinceps emendatur. Curandum tamen enixe, ut quam altissimum, si fieri potest, de peccatis dolorem concipiamus, cum ex eo id proveniat ut peccata supra omnia etiam mala detestemur. Hinc S. Cyprianus libro de lapsis necesse ait: *ut quam magna deliquimus, tam granditer defleamus, & pœnitentia crimine minor non sit.* Sed debet esse summa *appretiative*, ita: ut pœnitens plus odio prosequatur Dei offensam, quam malum aliud quodcunque, nihilque cogitet, nihil velit, quod Divinæ dilectioni sit contrarium. Unde dicitur Deut: Cap: 4. *Cum quæsieris Dominum, invenies eum, si tamen toto corde quæsieris eum, & tota tribulatione animæ tuæ.* Etsi vero pœnitens ita affectus esse debeat, ut generaliter quamlibet pœnam pati, ac quodlibet sustinere malum malit, quam ad pristina reverti peccata, non tamen per singulas species excurrere debet, ut exploret, an hoc vel illud mali genus præ peccato sustinere velit, id enim & inutile, & periculosum est.

Etsi vero aliquando contingere potest, ut quis à profundo peccatorum cæno emersus, repentine consurgat; & debite conteratur, prout contigit Davidi, qui, ad vocem exprobrantis Prophetæ, corde contritus dixit, *Peccavi: & illico audire meruit: Dominus transtulit peccatum tuum,* constat tamen eos qui longa peccandi consuetudine tenentur, multo, ut plurimum, opus habere tempore, ut vera conterantur. Enimvero, ut Eccles: Cap: 1. dicitur: *Per-*



*versi difficile sanantur: & S. Augustinus Serm: 54. de diversis sic inquit: Paulatim recipitur, quod semel amissum est, si enim cito rediret homo ad pristinam beatitudinem, ludus illi esset peccando cadere in mortem.*

*Quæres 3tio: Quæ præterea requiruntur, ut contritio vera, atque sufficiens sit?*

*Resp: Ut contritio & vera sit, & ad obtinendam à Deo remissionem peccatorum valeat, debet præterea esse. 1mo: universalis eo sensu, ut pœnitens peccator de omnibus prorsus commissis peccatis mortalibus sincere, & ex corde doleat, omniaque ex animo detestetur. Nemo sincere & vere dolere potest de commissis peccatis, aut corde conteri quod eis Deum offenderit, si vel unum mortale peccatum à dolore excipiat, in eoque sibi complaceat, neque etiam sperare quis poterit à Deo remissionem suorum peccatorum, si vel in uno adhuc mortali perseverare velit, eoque adhuc Deum offendere pergat. Hinc in sacris scripturis præcipit Deus, ut peccatores Pœnitentiam agant ab omnibus iniquitatibus suis, projiciant à se omnes prævaricationes suas. Sic Ezech: Cap: 18. dicitur: *Convertimini, & agite pœnitentiam ab omnibus iniquitatibus vestris: & iterum: Projicite à vobis omnes prævaricationes vestras.* Quare Concil: Lateran: 2. Cap: 22. sic ait: *Falsam esse pœnitentiam constat, cum spretis pluribus, de uno solo pœnitentia agitur, aut cum sic agitur de uno, ut non discedatur ab alio.* Unde scriptum est, *qui totam legem observaverit, offendat autem in uno, factus est omnium reus, sicut enim si peccatis omnibus esset involutus, ita si in uno tantum maneat, æternæ vitæ januam non intrabit.* 2do: Debet habere adjunctum, *propositum non peccandi de cetero.* Vera siquidem cordis ad Deum conversio, prout docet Concil: Trident: Sess: 14. Cap: 4. vitæ novæ propositum, & inchoationem, continere debet, atque omnem peccandi excludere voluntatem. Contritio ergo omnino adjunctum habere debet sincerum, atque firmum non amplius peccandi propositum, atque istiusmodi propositum generatim loquendo formale, atque explicitum esse debet, & distinctum ab elicitio contritionis actu concipi, & efformari. Si quis tamen peccatis super omnia detestandis unice intentus, de futuro non cogitans, istiusmodi propositum distinctim elicere, & efformare prætermiserit, non ideo defectuosa, ac manca censi poterit illius contritio.*

*Quæ.*



*Quæres 4to: Utrum contritio sit ad salutem peccatori necessaria?*

*Resp:* Peccatoribus omnibus contritio ad salutem necessaria est, tum necessitate medii, tum necessitate præcepti. Quia contritio præcipua est pars Pœnitentiæ. Porro Pœnitentia ad salutem omnibus peccatoribus est necessaria necessitate medii, & præcepti à Deo impositi. Unde Lucæ Cap: 13. dixit Christus: *Nisi pœnitentiam habueritis, omnes peribitis.* Istud vero divinum eliciendæ contritionis præceptum obligat. 1mo: per se, in evidenti, aut probabili quovis mortis periculo, qui enim tunc contritionem elicere omittit, graviter peccat, quia se exponit periculo moriendi in peccato. Quare ad contritionem eliciendam non solum tenentur graviter ægrotantes, sed & milites ante pugnam, nautæ ante periculosam navigationem, prægnantes ante puerperium, maxime cum difficile esse consuevit. 2do: obligat etiam per accidens, seu ratione alterius urgentis præcepti quod impleri debito modo nequit, nisi saltem elicitâ contritione conscientia purgetur, ut cum Sacerdoti peccato mortali onusto incumbit necessitas quodpiam administrandi Sacramentum, aut etiam cum cuiuspiam gravis imminet tentatio, quæ vinci difficulter potest, nisi de pristinis homo conteratur, & sic corde contrito, & humiliato, uberem à Deo exoret sibi gratiam ad futuram.

*Quæres 5to: Postquam lapsus est homo in aliquod mortale peccatum, an illico actum contritionis elicere debet?*

*Resp:* Id est saluti hominis maxime congruum, atque conveniens, qui enim postquam in peccatum lapsus est, illico conteritur, quantum potest occurrit, ne illum in peccato mors subitanea apprehendat, & æternæ damnationi exponat, unde Eccles: Cap: 5. sic Deus peccatorem admonet: *Ne tardes converti ad Dominum, & ne differas de die in diem, subito enim veniet ira illius:* quare qui in peccato obfirmato animo diu permanet, neque ad Deum, tactus dolore cordis intrinsecus, statim convertitur, continuo æternæ damnationis periculo se exponit, ac proinde graviter delinquit, atque è peccato in peccatum fere quotidie proruit, ut enim S. Gregorius M. docet. Homil: 11. in Elzechielem: *Peccatum quod per pœnitentiam non deletur, suo pondere in aliud trahit.* Imo quoties peccatum, quo Deum offendimus, menti occurrit, toties aliquo contritionis actu est expurgandum, & cum displicentia repudiandum. Sibi enim in illo complacere, novum est peccatum, indifferenti etiam oculo illud intueri, & divi-



nam offensam pro nihilo habere, Deo injuriosum est. Ergo necesse est, ut tunc homo peccatum illud dedignetur, de eoque aliquo saltem modo conteratur.

*Quæres 6to: Quotuplex est contritio?*

*Resp:* Contritio duplex est, alia perfecta, alia imperfecta. Contritio *perfecta*, est animi dolor, ac detestatio de peccato commisso, ex motivo charitatis Dei perfectæ procedens, quando nimirum homo dolet ex toto corde pro commisso peccato, ideo unice: quia Deum super omnia propter se dilectum, atque in se summe amabilem offenderat. Contritio *imperfecta*, quæ etiam *attritio* dicitur, est animi dolor, ac detestatio de commisso peccato, ex aliquo supernaturali motivo concepta, exg. ex metu gehennæ, amissione regni cælestis, aut turpitudine peccati, prout hæc per lumen fidei apprehenduntur.

*Quæres 7mo: Utrum contritio perfecta semper justificet?*

*Resp:* Contritio perfecta semper etiam extra Sacramentum Pœnitentiæ justificat. Namque Ezechielis Cap: 53. dicitur: *Impietas impii non nocebit ei, in quacunque die (sen in quocunque momento) conversus fuerit.* Unde S. Leo Epist: 84. sic ait: *Apud Deum nullas patitur veniæ moras, vera conversio, dicente Spiritu Dei, per Prophetam. Cum conversus ingemueris, salvus eris.* Unde Contritio perfecta ad Sacramentum Pœnitentiæ non prærequiritur, quia hæc etiam extra Sacramentum justificat, ac proinde non potest esse ad Sacramentum necessaria.

Ut vero Contritio perfecta extra Sacramentum Pœnitentiæ justificet, debet adjunctum habere votum Sacramenti Pœnitentiæ, seu peccator qui conteritur, habere debet sinceram voluntatem hoc Sacramentum actu suscipere, quam primum id facere poterit, quare Concilium Trident: Ses: 14. Cap: 4. istiusmodi peccatoris justificationem docet, ipsi contritioni, sine Sacramenti Pœnitentiæ voto, quod in illa includitur, non esse adscribendam. Non est autem necesse, ut istiusmodi votum, seu Sacramenti Pœnitentiæ suscipiendi propositum formale, & explicitum sit, sed sufficit virtuale & implicitum, quod continetur in recte disposita voluntate hominis satagentis id omne præstare ac perficere, quæ ex Dei institutione ad suam justificationem, atque salutem necessaria sunt.

*Quæres 8vo: In Sacramento Pœnitentiæ quæ ergo sufficit Contritio?*

*Resp:* In Sacramento Pœnitentiæ sufficit Contritio imper-



imperfecta, quæ attritio dicitur. Cum enim non requiratur Contritio perfecta, quia hæc etiam extra Sacramentum justificat, consequens omnino est, ut sufficiat Contritio imperfecta. Et ita docet Concilium Trident: Sess. 14. Cap: 4. his verbis: *Illam vero contritionem imperfectam, quæ attritio dicitur, declarat, (S. Synodus) donum Dei esse & Spiritus Sancti impulsu, non adhuc quidem inhabitantis, sed tantum moventis, quo pœnitens adjutus, viam sibi ad justitiam parat. Et quamvis sine Sacramento Pœnitentiæ per se ad justificationem perducere peccatorem nequeat, tamen eum ad Dei gratiam in Sacramento Pœnitentiæ impetrandam disponit.*

Quæres 9no: Qualis debet esse istiusmodi attritio ut in Sacramento Pœnitentiæ ad justificationem peccatoris sufficiat?

Resp: Attritio communiter concipitur ex metu ac timore gehennæ, ceterarumque pœnarum, quibus Deus peccata punire consuevit. Est autem istiusmodi timor quadruplex. 1mo: *servilis*, quando quis peccatum fugit, quia more servorum pœnam peccato præparatam reverteretur. 2do: *serviliter servilis*, cum quis abstinere quidem exterius à peccato, quia pœnam metuit, ita tamen est affectus, ut si abesset pœna, illud admitteret. 3tio: *simpliciter servilis*, cum quis abstinere à peccato, quia pœnam inducit, adhuc tamen illud non admitteret, etsi pœna deesset. 4to: timor *filialis*, quando quis peccatum fugit, non quia pœnam inducit, sed quia Deum ter optimum ac summe amabilem offendit. Et iste timor *filialis* vel est *initialis*, quando peccatum cavetur primario, quia Deum offendit, secundo, quia pœnam inducit, vel *perfectus* quando peccatum cavetur unice quia Deum ter optimum, ac summe amabilem offendit.

Attritio ergo oriri potest. 1mo: ex timore *serviliter servili*, & talis timor, quoniam voluntatem affectumque ad peccatum non excludit, siquidem qui sic timeat, paratus est peccare si pœna abesset, malus ac vitiosus est, ac proinde etiam attritio ex tali timore concepta, mala, ac vitiosa est. 2do: oriri potest ex timore *simpliciter servili*, & talis timor, atque ex eo profluens attritio, quamvis bona sit, atque maxime utilis, quia à peccato retrahit, ad pœnitentiam excitat, ad consequendam gratiam justificationis hominem disponit, attamen ut peccator in Sacramento Pœnitentiæ reipsa justificetur, ipsa sola non sufficit, quia ut peccator justificetur, atque cum Deo reconcilie-

tur,



tur, necesse est ut ad Deum ex toto corde convertatur. Porro qui ex solo timore servili conteritur, non censetur ad Deum ex toto corde converti, quemadmodum enim homo per peccatum avertitur à Deo, quia amore rei adhæret illicitæ, ita quoque convertitur ad Deum, quia cordis amore adhæret Deo. Qui vero ex solo servili timore conteritur, nihil amoris erga Deum in corde suo habet. Non potest itaque censi vere ad Deum ex corde conversus. Proinde attritio ex solo servili timore concepta, & quæ nihil habet adjuncti benevolentia erga Deum amoris, ad justificationis gratiam in Sacramento Pœnitentiæ consequendam insufficiens est. 3tio: ut ergo attritio in Sacramento pœnitentiæ sufficiens sit, debet illa profluere ex timore *filiati* saltem *initiali*, ac propterea in Sacramento Pœnitentiæ omnino necessarius est, saltem initialis, benevolentia Dei amor, ut non solum ex timore, sed etiam ex Dei amore homo de peccatis suis doleat, atque conteratur. Atque id manifeste constat ex Concilio Tridentino, quod Ses. 6. Cap: 6. exponens dispositiones quibus adulti ad justificationem consequendam præparantur, sic docet: *Disponuntur ad ipsam justitiam, dum à divinæ justitiæ timore, quo utiliter concutuntur, ad considerandam Dei misericordiam se convertendo, in spem eriguntur, fidentes Deum sibi propter Christum propitium fore, illumque tanquam justitiæ fontem diligere incipiunt, ac propterea moventur adversus peccata, per odium, ac detestationem.* Ut ergo in Sacramento Pœnitentiæ peccator justificetur, necesse est. 1mo: ut divinæ justitiæ timore concutiat. 2do: considerando divinam misericordiam in spem erigatur, confidens Deum sibi propitium fore. 3tio: illum tanquam omnis justitiæ fontem diligere incipiat. 4to: ac tandem ex hoc Dei amore ad odium, detestationemque suorum peccatorum moveatur. Et id conandum, atque totis viribus enitendum est unicuique sincere pœnitenti, alias, ut inquit Pallavicinus in historia Concilii Trident: libro 8. Cap: 12. *si tota pœnitentia esset ex timore, sine amore justitiæ, & dolor esset propter pœnam tantum, non propter Dei offensam, infructuosa esset.* Et certe sæpe in vita urget magnum, diligendi super omnia Deum, præceptum. Nullum autem est tempus quo magis tenetur homo suum erga Deum amorem ostendere, quam cum per Pœnitentiam satagit cum eo reconciliari, & in gratiam redire. Tunc ergo ignitos amoris erga Deum affectus in se excitare debet, & postposito omnis pœnæ timore, solam Dei



Dei offensam deplorare, ut ipsi remittantur peccata multa, quoniam dilexit multum, qui autem minus diligit, minus ei remittitur.)

*Quæres æomo: Actus contritionis quando à Pœnitente elici debeat?*

*Resp:* Actus contritionis à Pœnitente elici debet ad minus ante absolutionem Sacramentalem, quia Pœnitens dolore de peccatis destitutus, neo est vere pœnitens, neque ad Sacramentalem absolutionem rite dispositus, atque ideo tunc ipsa suo effectui frustratur. Quare curandum est & Sacerdoti, & ipsi Pœnitenti, ut finita Confessione Contritio excitetur, atque ardentius renovetur, antequam absolutio Sacramentalis detur. Etsi necessarium non sit ut actualis dolor totam confessionem comitetur, quia aliquando vix fieri potest, ut qui totus ad peccatorum enarrationem, ad Confessarii interrogata, ad responsa iis facienda, intendit, contritionis interim actus eliciat. Sategendum tamen semper Pœnitenti est, ut ante Confessionem, actum contritionis eliciat, & multa prece sincerum dolorem, et ardentem charitatem à Deo obtineat. Nemo siquidem confidere potest futurum, ut brevi illo temporis spatio, quod Confessionem inter & absolutionem defluit, quodque totum pene audiendis Confessarii monitis destinatum est, cor suum debite conterat, & congruum in se de peccatis excitet dolorem.

Non ergo sufficit contritio, quæ diu Confessionem præcessit, sed necesse est, ut contritionis actus Confessionem uniatur, non quidem physice, sed saltem moraliter. Unde qui elicito contritionis actu, mentem ad alia avertit, etsi Sacramenti suscipiendi voluntatem non abjecerit, curare tamen debet, ut saltem breviter in Confessionis fine, ante absolutionem, contritionis actum renovet.

Pariter non sufficit contritio, quæ non nisi absolutionem Sacramentalem, licetsi mox atque illico, subsequitur. Quia absolutione Sacerdotali perficitur Sacramentum, & quia tunc pars illius essentialis, ac primaria Pœnitentis dispositio, nempe contritio, defuit, irritum est Sacramentum.

Sed præterea necesse est, ut contritio quæ confessionem antecedit ad ipsam ordinetur, atque ex animo obsequendæ Sacramentalis absolutionis eliciatur. Quare qui elicit Contritionem ex alia aliqua ratione, non ex animo Confitendi, si constiteatur nactus Confessarii oportunitatem.



tatem, actum Contritionis ad Pœnitentiæ Sacramentum recipiendum ordinatum renovare, & elicere debet.

*Quæres 2mo: Utrum ad venialium etiam peccatorum in Sacramento Pœnitentiæ obtinendam remissionem, contritio omnino necessaria sit?*

*Resp:* Est omnino necessaria, quia etiam venialia peccata à Deo non remittuntur nisi sincerus de iis concipiat dolor, atque eorum detestatio. Quare qui sola etiam venialia peccata confitetur, sed voluntarie atque culpabiliter sine ullo cordis dolore, sine ullo emendationis proposito, mortaliter peccat, quia Sacramentum pœnitentiæ irritum facit, quod subsistere nequit sine vero Pœnitentis de commissis peccatis dolore. Qui ergo sola confitetur venialia, enixe curare debet, ut quantum potest, de ipsis ex corde doleat. Pro majori autem tutioritate, addi solet aliquod præteritæ vitæ peccatum, sed hoc fieri debet cum doloris, atque compunctionis sensu, sicca siquidem illa peccati impera'ditio, nihil omnino præstaret. Sed etiam huic, venialibus elicite contritioni, desuper addi debet propositum, deinceps evitandi singula non collective quidem, quia humana fragilitas non fert, ut ab omni etiam veniali peccato homo liber sit, sed distributive, majori semper studio invigilando ad eorum diminutionem. Instanter ergo monendi sunt à Confessario ii pœnitentes qui sæpius sola venialia confitentur, ut nusquam ad confessionem accedant, quin prius Contritionis donum fervida oratione à Deo deprecati fuerint, deposito etiam pro viribus affectu ad ea, quæ frequentioris lapsus sibi occasio esse poterant, iisque omnino renuntiatis.

*Quæres 2mo: Quid faciendum sit ei, qui sine sufficienti contritione peccata sua confessus est.*

*Resp:* Qui mortalia peccata confessus est sine sufficienti contritione, si eundem habere possit Confessarium, cui peccata sua confessus fuerat, & is eorum memoriam teneat, non est necesse ut illam Confessionem repetat, quia integre supponitur facta fuisse, sed ei declarandus tantummodo est defectus Contritionis, illaque cum maxima cordis compunctione elicitæ, absolutio à Sacerdote expostulanda. Quod si idem Confessarius haberi nequeat, aut quamvis idem habeatur, nullam jam habeat memoriam depositorum apud se peccatorum, tunc Confessio repetenda est, & cum acri doloris sensu absolutio obtinenda. Qui vero sola venialia sine sufficienti contritione confessus fuerat, non quidem venialia hæc iterum confi-

teri



teri debet, quia venialia peccata non sunt necessario confitenda, sed si illam Confessionem scienter & culpabiliter sine sufficienti contritione fecerit, istiusmodi sacrilegium confiteri omnino debet, quia grande peccatum commisit, scienter, ac culpabiliter irritum reddens Pœnitentiæ Sacramentum. Si vero id inculpabiliter acciderat, quia nimirum bona fide crediderat se esse contritum, cum vere contritus non esset, a peccato sacrilegii equidem immunis est, sed ex tali Confessione nullum percipit fructum, hanc tamen jacturam alia Confessione cum congrua contritione peragenda reparare potest.

*Quæres 1tio Quibus signis dignoscere possit Confessarius Pœnitentis sui contritionem?*

*Resp:* Triplex est classis eorum, qui ad Confessionem accedunt. 1mo: Enim sunt illi qui Deum timent, & pie vivunt, quod si pro humana fragilitate, in aliqua probabuntur, statim culpam suam amare desunt. Et horum ipsa vivendi ratio, sufficiens esse solet veræ contritionis argumentum. 2do: Sunt alii qui de salute sua nihil sunt solliciti, vix quidquam boni, multum vero mali data quavis occasione perpetrant. Et his non sufficit aliquod contritionis desiderium, aut pia aliqua ad eam excitandam oratio, consideratioque, neque illico eos vere contritos esse arbitrabitur Confessarius, quia humiliter peccata sua contentur, impositam sibi pœnitentiam, quamvis difficilem, promptè acceptant, sæpe namque qui hæc, & multo plura fecerant, vitiis suis adhæserunt, nec ab iis sese retraxerunt, quod quam frequentissime iis maxime contingit, qui veteres inimicitias gerunt, in proxima peccandi occasione versantur, pravi consuetudinis nodo irretiti sunt, illi enim etsi per aliquod tempus, Missionis nimirum, aut Recollectionum intervallum, angelice vivant, mira deinceps facilitate in pristina prorumpunt peccata. Hi ergo & serio & diu probandi sunt, ut certo moraliter Confessarius judicare possit, eos vere esse contritos. Namque ut inquit Apostolus Paulus: *Tristi ia quos ex Deo est, pœnitentiam in salutem stabilem operatur.* 3tio: Sunt tandem pœnitentes omnino tepidi, nec totaliter mali, sed neque boni, & iis serio ponderandum est istud divinum effatum: *Utinam frigidus esses aut calidus, sed quia tepidus es, incipiam te evomere ex ore meo.* ex quo apparet quam periculosus sit tepidorum status, proinde & gravissime a Confessario admonendi sunt, justo terrore concutiendi, ne sua culpabili insensibilitate, impenitentes



tes effecti, omnia salutis remedia irrita atque inania efficiant. Illi ergo ex fructibus bonis recognosci, & dijudicari debent, eorum dolor, contritio, ac vera conversio, ex pietatis, ac fervoris operibus æstimanda est.

*Quæres 24to: Quibus mediis, uti debeat Confessarius ut in suo Pœnitente veram excitet contritionem?*

*Resp:* Satagere debet Confessarius 1. ut Pœnitenti suo pro ratione status, & conditionis illius, proponat motiva, maxime timoris & amoris Dei, quibus animus ejus contentiatur, & cor durum conteratur. 2. Iis qui diu in peccatis perdurarunt, præscribet aliquos pios contritionis, detestationis suorum peccatorum actus, timoris, spei, amorisque erga Deum affectus, breves preces orationesque, quibus efflagitent à Deo cor contritum atque humiliatum, concedet propterea ipsis tempus opportunum, ut in iis se exerceant, iis eliciendis asvescant, antequam absolvantur. 3. Nunquam Pœnitentem absolvat, quin prius cum ipso breves, sed fervidos eliciat actus contritionis, detestationis peccatorum, ac firmi propositi illa amplius non perpetrandi.

## ARTICULUS 2dus

### *De Confessione.*

*Quæres 1mo: Quid sit Confessio?*

*Resp:* Est accusatio peccatorum, à pœnitente post Baptisma commissorum, facta Sacerdoti, ad illorum absolutionem, ab eo obtinendam. Est itaque Confessio accusatio peccatorum post Baptisma commissorum, quia peccata ante Baptismum commissa, per illud ipsum regenerationis Sacramentum delentur, & Sacramento Pœnitentiæ non subsunt, nec proinde confiteri illa necesse est. Non alio autem Confessio fieri potest nisi Sacerdoti, & quidem non cuilibet, sed qui potestatem habet non solum Ordinis, sed & jurisdictionis absolvendi à peccatis. Neque alio fine hæc peccatorum accusatio fieri debet, nisi ut absolutio Sacramentalis ab iis obtineatur.

Confessio hæc dicitur, *secreta & auricularis*, quia non palam, sed secreto, & ad aures Sacerdotis fieri solet.

*Quæres 2do: Hæc peccatorum Confessio estne præcepta?*

*Resp:* Confessio peccatorum, quæ post Baptisma commissa



missa sunt, præcepta est tum jure divino, tum jure Ecclesiastico. Et quidem amo: Jure divino, quando enim Christus Joan: Cap: 20. dedit Apostolis suis potestatem remittendi, ac retinendi peccata, eo ipso etiam eorum præcepit confessionem, neque enim remitti aut retineri possunt, nisi prius ipsa Sacerdoti innotescant, innotescere autem nequeunt nisi confiteantur. Unde Concilium Trident: Sess: 14. Cap: 5. ait: *Ex institutione Sacramenti Pœnitentiæ universa Ecclesia semper intellexit, institutionem etiam esse à Domino integram peccatorum confessionem, & omnibus post baptismum lapsis, jure divino necessariam existere, quia Dominus noster Jesus Christus è terris ascensurus ad Cœlos, Sacerdotes sui ipsius Vicarios reliquit, tamquam præsides, & judices, ad quos omnia mortalia crimina referantur, in quæ Christi fideles ceciderint, qui pro potestate Clavium remissionis, aut retentionis peccatorum sententiam pronuntient.* 2do: Jure quoque Ecclesiastico præcepta est Confessio, sic enim statuit Concilium Lateran: sub Innocentio 3. celebratum: *Omnis utriusque sexus fidelis postquam ad annos discretionis pervenerit, omnia sua peccata confiteatur fideliter saltem semel in anno proprio Sacerdoti, & injunctam sibi pœnitentiam studeat pro viribus adimplere.* Quod etiam Concilium Trident: Sess: 14. Cap: 5. collaudavit, atque morem salutarem confitendi sacro, ac maxime acceptabili Quadragesimæ tempore, sacra illa Synodus amplexa est, & merito retinendum esse constituit.

*Quæres 3tio: Qui, & quando divino præcepto ad faciendam Confessionem obligantur?*

*Resp: amo.* Divino præcepto. ad faciendam Confessionem tenentur ii omnes, qui post Baptismum mortaliter deliquerunt, quia sola mortalia peccata post Baptismum commissa, sunt materia Confessionis necessaria. Obligat autem hoc præceptum, 1. Per se in quovis probabili mortis periculo, videlicet in gravi infirmitate, periculosa navigatione, instante aliquo opere, unde mors evenire solet. Hic & nunc etiam confiteri tenetur, cum quis gravi onustus peccato vereri debet, ne deinceps confiteri nequeat, puta quia illi imminet periculum amentiae, vel captivitatis ab infidelibus. Sæpe etiam in vita, & extra mortis periculum, urget divinum Confessionis peragendæ præceptum. Cum enim Christus Confessionem præceperit, nec illius tempus præfixerit, noluit illam diu, aut ad extremum usque vitæ terminum protrahi, quare cum Concilium



cilium Lateranense constituerit, ut quilibet fidelis, postquam ad annos discretionis pervenerit, saltem semel in anno confiteatur, videtur tempus determinasse, quo divinum Confessionis præceptum adimpleri debeat. 2. Obligat etiam per accidens quando nimirum aliud præceptum rite adimpleri nequit, nisi præmissa confessione, ut cum sacra Eucharistia est recipienda, & quis peccato mortali se onustum esse sentit, aut sacra quædam functio imminet peragenda, quæ statum gratiæ requirit, vel demum quando Confessio est medium necessarium ad præcavendum aliquem gravem lapsum, superandam imminentem tentationem.

*Quæres 4to: Sed utrum post admissum mortale peccatum, jure divino statim homo teneatur confiteri?*

*Resp:* Multi ex Theologis affirmativam tenent sententiam, & illorum opinio, utpote salutis animarum tutior tenenda est. Si enim post admissum peccatum contritionem diu differre non licet, pari de causa non licet Confessionem procrastinare, ob innumera, quæ hanc dilationem sequuntur, pericula, plures siquidem sine Confessione pereunt, qui eam de die in diem differunt. Attamen non sunt vexandi, qui aliquanto tempore huic defuerunt officio, neque novi peccati rei censi debent, quia hic ignorantia, ac bona fides adesse potest.

*2do:* Ex præcepto autem Ecclesiastico ad faciendam Confessionem obligantur omnes utriusque sexus, qui ad annos discretionis pervenerunt, seu qui malum à bono morali discernere valent, quare si malitia ætatem superet, ut sæpe in aliquibus vividioris ingenii contingere solet, si graviter peccent, etiamsi ætas competens desit, confiteri tenentur. Imo si dubium sit, an puer qui graviter deliquit, pleno polleat rationis usu, confiteri debet, quia id tutius est. Sed & qui sola venialia peccata habet, probabilis est, eum ad annuam Confessionem teneri. Hæc vero Confessio præcepto Ecclesiæ injuncta, saltem semel in anno fieri debet, & quidem juxta universalem nostrarum Regionum consuetudinem, & antiquissimum morem, eo tempore peragi debet, quando Communio Paschalis suscipi debet.

*Quæres 5to: Quæ excusant ab annua facienda confessione?*

*Resp:* Excusat impossibilitas physica, ac moralis, nec enim Deus, vel Ecclesia impossibilia jubent. Unde si grave alicui ex Confessione immineret damnum, ab extrinseco pro-



proveniens Confessionem differre posset. Attamen timor amittendæ apud Confessarium bonæ famæ, à Confessione non eximit. Qui non potest confiteri voce, veluti mutus, confiteri debet, vel per nutus, & signa, vel per scripturam, si scribere sciat. Hic enim confitendi modus, nullum grave infert incommodum. Præceptum autem confitendi obligat, cum sine gravi damno quod per accidens ex Confessione evenire potest, id fieri valet.

Cum vero quis neque per nutus, & signa, neque per scripturam confiteri potest, an per interpretem confiteri teneatur? controvertunt Theologi. Multi docent neminem teneri ad confitendum per interpretem, quia Christus non obligavit ad declaranda peccata, nisi soli Sacerdoti, ut per eum ab ipsis absolvamur. Et Concilium Trident: Sess: 14. Cap: 5. docet Christum non præcepisse ut publice, & coram aliis peccata nostra declaremus, sed secreto tantum *apud solum Sacerdotem*: Concilium quoque Lateranense 4. hoc tantummodo mandavit ut omnia peccata Sacerdoti declaremus. Alii ex adverso docent etiam per interpretem confiteri oportere, maxime in articulo mortis, quia revelatio suorum peccatorum uni aut alteri sigillo graviter obstrictis, non est adeo grave incommodum, ut propterea Confessio prætermitti debeat. Atque huic opinioni favet S. Thomas, qui in 4. dist: 17. ubi de præsentī casu disserens, ait: *Quando non possumus uno modo, debemus secundum quod possumus confiteri*: Unde in praxi hæc sunt sequenda *2mo*. Qui aliter confiteri non potest nisi per interpretem, & ideo Confessionem annuam suo tempore facere prætermittit non est severe arguendus, *2do*: Si per interpretem significaret se vehementer de suis peccatis dolere, seque sacram Eucharistiam desiderare, ac suscipere velle, aut constet ipsum satis Christiane vivere, post exhibita doloris signa, absolutio Sacramentalis, & sacra communio ei dari poterit. *3tio*: Si in extremis positus sit, quia tunc divinum, omnia mortalia confitendi peccata præceptum potissimum urget, hortari debet ut ea confiteatur per interpretem, modo is notæ foret probitatis, quod si ad id invictam ostenderet repugnantiam, & instet periculum mortis, postquam exhibuerit sinceræ pœnitentiæ signa, absolvi poterit.

*Quæres 4to: Qualis debet esse Confessio, ut ipsa legitima ac salutaris sit?*

*Hesp:* Quatuor sunt conditiones ad legitimam, confessionem requisitæ, ut ipsa recte instituat, atque pe-



nitenti salutaris sit, nempe debet esse *integra, simplex, humilis, atque parere parata*. Et quidem 1<sup>mo</sup>: debet esse *simplex*, id est: non artificiose composita, vel superfluis contexta. Modus itaque confitendi debet esse accuratus, sed brevis, necessariis contentus, inutilibus carens. 2<sup>do</sup>: Debet esse humilis, proindeque vera ac sincera, qualis esse debet nocentis, veniamque deprecantis accusatio, ideoque cum intimo propriæ indignitatis sensu facta. Contra hanc legem agunt, qui gravia sua peccata ad ignotum deferunt Confessarium, & leviora ad ordinarium, & id melius est, quam reticendo peccata Sacrilegium committere, dummodo prius gravia, ignoto confiteantur, & ab iis absolvantur. Contra eandem legem & ii delinquant, qui ad excusanda sua peccata, ipsa in alium refundunt exg. in Conjugem, fratrem, famulos, domesticosque. 3<sup>tio</sup>: Debet esse *integra*, scilicet: ut omnia mortalia peccata declarentur, illorum species, numerus, atque circumstantiæ. 4<sup>to</sup>: *Parere parata*, ut scilicet pœnitens cum Sacerdote non disputet, eique non refragetur, sed in omnibus obtemperet.

*Quæres 5<sup>to</sup>: An graviter peccet pœnitens, qui in Confessione mentitur?*

*Resp*: Mandacium à pœnitente in Confessione commissum quandoque mortale est, & tunc Sacramentum Pœnitentiæ irritat, quandoque nonnisi veniale est, & tunc non obest valori hujus Sacramenti. Unde 1<sup>mo</sup>: qui dicit se commisisse veniale, quod non commisit, aut negat illud se commisisse, quod reipsa commiserat, peccat venialiter, quia nonnisi in re levi, & in materia non omnino ad Sacramentum Pœnitentiæ necessaria, suum defraudat Confessarium, ac proinde istiusmodi mendacium, non irritat Sacramentum pœnitentiæ. Attamen si pœnitens constanter, levibus etiam, exg. mendaciis asvetus, mendaciter in Confessione neget, se iterum mentitum fuisse, ne à Communionem sumenda prohibeatur, atque sic fraudulenter Communionem surripiat semel atque iterum, id summi est periculi, ac deceptionis. Idem atque eadem de causa dicendum est de eo, qui negat se reum esse peccati mortalis, quia ipsum jam confessus est. Potest enim peccatum jam confesum causa esse, cur in præsentī Confessione denegetur, aut alio modo impendatur absolutio, ut si injungenda sit restitutio, vel præscribenda contra relapsus, proximasque occasiones remedia. Atque generaliter timendum est, ne pœnitens qui in ipsa Confessio-



ne mentitur, & deliberate novo peccato Deum offendit, debita caret contritione, ac proinde non sit rite ad Sacramentalem absolutionem recipiendam dispositus, quare istiusmodi Confessiones, veluti dubiæ iterandæ esse videntur, nisi hanc in Confessione admittam culpam, aut minuat, aut etiam totaliter tollat intempestiva Confessarii interrogatio, ac animi in pœnitents perturbatio.

2do: Qui in Confessione negat se commisisse mortale peccatum, quod reipsa perpetravit, aut accusat se peccati mortalis esse reum, quod non commisit, graviter peccat, quia in materia gravi, ac Confessioni necessaria, Confessarium decipit, & iudicium illius pervertit, ac propterea talis Confessio nulla, atque irrita est. Idem dicendum est de iis, qui in designando numero mortalium peccatorum excedunt, vel ut certa accusant peccata, quæ dubia sunt, aut ut dubia, quæ certo sibi constant, quia & hi Confessarium in re gravi fallunt. Sæpe tamen per bonam fidem excusantur saltem à gravi peccato, tum simplices homines, qui pene ideo fallunt, ne fallant, quique tutiorem sibi videntur eligere partem, certa enuntiando, quæ nonnisi dubia sunt, & numerum eorum adaugendo, tum etiam scrupulosi, qui peccata vix dubia, pro indubitatis habere solent.

3tio: Qui inter confitendum mentitur, in rebus ad Confessionem non pertinentibus, pro ratione materiæ graviter vel leviter peccat, gravius tamen, quam peccasset, extra Sacramentum idem mendacium committendo, propter irrogatam eidem Sacramento injuriam. Unde qui sua gravi detractioe, in sacramentali Confessione grave committunt peccatum; non solum priorum criminum absolutionem non obtinent, sed & novo coinquinantur scelere.

Quæres 6to: Utrum graviter peccet, qui in Confessione generali miscet peccata jam confessa, cum nondum confessis?

Resp: amo: Pœnitens generalem Confessionem peracturus, curare debet, ut peccata post ultimo acceptam absolutionem commissa, declaret, quia id necesse est, ut præsens illius status à Confessario intelligatur. Qui tamen novam omnium peccatorum confessionem instituit, quia præteritas omnes, suo, vel novi Confessarii iudicio, habet pro sacrilegis, omnia peccata seu confessa, seu non confessa uno contextu aperire debet, quia quidquid hactenus deliquit, habetur pro non confesso, & ut tale, una



cum ipsis sacrilegis Confessionibus, satisfactione congrua expiari debet.

*2do:* Qui autem in confessione generali, quasi animo pietatis, & quasi ad maiorem cautelam facta, dolose peccata necdum confessa, miscet cum peccatis jam confessis, ita ut jam omnia confessa fuisse à Confessario judicentur, graviter peccat, quia in re gravi & Confessione omnino necessaria, Sacerdotem decipit, qui citius absolvit eum, quem jam rite absolutum esse credit, & levio-rem ei decernit pœnitentiam. Quare is confessionem suam generalem inchoare debet à peccatis, post ultimo acceptam absolutionem, commissis, & ea quæ antea oblitus erat, tamquam non confessa, declarare.

*Quæres 7mo: An qui scienter peccatum aliquod grave in confessione reticuit, confessiones omnes postea factas iterare teneatur?*

*Resp:* Talis iterare debet primam illam confessionem, in qua peccatum celavit, addito sacrilegio quod commiserat, iterare quoque debet illas omnes Confessiones, quas exinde fecit, habendo memoriam prius in confessione suppressi peccati, quia hæ omnes sacrilegæ fuerunt. Quod si deinceps, & suppressi in Confessione peccati, & commissi sacrilegii inculpate oblitus sit, confessiones exinde bona fide factas repetere non tenetur, quia formaliter integre fuerunt, & cum debitis dispositionibus peractæ supponuntur. Hinc non semper tenetur subsequas repetere Confessiones, qui prævias iterare debet.

*Quæres 8vo: Quid faciendum pœnitenti, qui advertit Sacerdotem tempore suæ Confessionis dormire?*

*Resp:* Si id advertat confitendo, debet eum à somno suscitare, & postrema repetere, ut intelligat, num illa audierit, quæ confessus est. Si id advertat finita jam Confessione, totam debet repetere. Pariter si pœnitens nesciat quæ Confessarius audierat, & quæ non audierat, omnia iterato confiteri debet. Et id etiam à suo pœnitente exigere debet Confessarius, postquam advertit, se intra audiendum fuisse aliquo tempore somno oppressum, ne inauditum, & non plene cognitum, forte etiam indignum, absolvat.

*Quæres 9no: An Confessio frequens esse debeat?*

*Resp:* Generaliter loquendo frequens confessio laudabilis est, qui enim frequenter & pie confitentur, vitia fugiunt, nec raro ab ipsa specie mali abhorrent. Non tamen temere, & passim omnibus syadenda est, frequens Con-



Confessio, potest enim periculosa esse tum iis, qui scrupulis constringuntur, tum illis mulierculis, quæ in frequentibus confessionibus nihil aliud quærunt, quam vel vanum pietatis nomen, vel loquacitatis suæ satisfactionem. Utiliter vero iis frequens Confessio svaderi potest, sed & præcipi, qui necdum satis à peccato, & peccati occasione sejuncti sunt. Quia licet istiusmodi homines adhuc digni non sint sacramentali absolutione, plurimum tamen ex iterata confessione capere possunt utilitatis. Satagendum proinde Confessario est, ut quos à peccatis solvere nequit, ad se, post duas circiter hebdomadas, revocet, consiliis instruat, exhortationibus roboret, piis monitis excitet, donec idonee probatos, absolvat.

*Quæres xmo: Quid faciendum sit pœnitenti, ut integram peragat suam confessionem?*

*Resp:* Ad integram, & debito modo peragendam Confessionem, imprimis instituendum est diligens conscientiæ examen, quale exigere solet res magni momenti: quare ut docet Catechismus Trident: parte 2. qui nimis remisisse conscientiam suam scrutantur, peccata sua non recordari quidem voluisse merito videri possunt, cum finem nolle censeatur, qui non vult media ad finem conducantia usurpare. Id autem si factum fuerit, confessionem iterare omnino oportebit, aut saltem defectum illius apud eundem Confessarium reparare. Non idem tamen, neque æquale in omnibus debet esse examen. Minus enim sufficit iis, qui extra peccati occasiones versantur, qui crebro peccata confitentur, qui cum sint timorati, etiam leves noxas memoria facile tenent, neque Confessionem differunt, si præter morem gravius quidpiam commiserint. Aliud est de iis, qui in obvia quæque peccata inconsiderate prouunt. Hi ergo diligentiori, & longiori indigent conscientiæ examine.

Hinc colligitur xmo: eum qui ex gravi negligentia, grave aliquod peccatum in Confessione omisit, mortaliter peccare, eique iterandam esse Confessionem. Debet autem Confessarius suos pœnitentes, maxime rudes interrogationibus industriose adjuvare, ut sua peccata sibi in memoriam revocent, aliquando etiam postquam eos breviter edocuerit modum, suam conscientiam examinaudi, illis tempus opportunum concedat, atque injungat, ut paratiores ad se, pro facienda Confessione revertantur. Verum si iustet periculum mortis, postquam Pœnitentis conscientiam, pro posse examinaverit, & confessionem illius exceperit,

absol-



absolvat, magis sollicitus, ut debite conteratur & compungatur, quam ut ad amulsum Conscientiam ipsius exploret.

2do: Iis qui examen Conscientiæ, ante Confessionem parant, decurrendas esse varias species, classesque peccatorum. Unde præter capitalia peccata, singillatim percurrere debent Dei, & Ecclesiæ mandata, negotia, quæ tractarunt, loca, societates, in quibus, vel periculose versati sunt, occasiones ad peccata allicientes, in quibus extiterunt, generalia status sui munia, occupationes, & alia. Maxime autem divinum lumen implorare debent, ut conscientiæ suæ latebras detegere possint.

*Quæres 1mo: Quotuplex hæc est Confessionis integritas?*

*Resp:* Duplex est: *materialis* & *formalis*. Integritas *materialis*, est adæquata, atque omnimoda peccatorum omnium, quæ pœnitens commiserat, accusatio. Integritas *formalis*, est accusatio illorum dumtaxat peccatorum, quæ post diligens conscientiæ examen, in memoriam pœnitenti venerant.

Porro ut legitima, & fructuosa sit Confessio, non requiritur integritas *materialis*, quia hæc aliquando physice, aut moraliter impossibilis est homini, cujus peccata multiplicata sunt super capillos capitis ipsius. Sufficit ergo integritas *formalis*, & id docet Concilium Trident: Sess: 14. Cap: 5. ubi sic decernit: *Oportet à Pœnitentibus omnia peccata mortalia, quorum post diligentem sui discussionem conscientiam habent, in confessione recenseri, etiamsi occultissima illa sint.*

*Quæres 2mo: Quæ requiruntur ad formalem confessionis integritatem?*

*Resp:* Ad formalem confessionis integritatem requiruntur: 1mo: ut exprimat peccatorum numerus, species, & circumstantiæ speciem moraliter, & mortaliter mutantes. Nisi enim hæc accurate in confessione exprimantur, confessarius rectum de interiori statu sui Pœnitentis, iudicium, ferre nequit. Unde Concilium Trident: Sess: 14. Cap: 5. statuit: *etiam eas circumstantias in confessione explicandas esse, quæ speciem peccati mutant, quod sine illis peccata ipsa nec à pœnitentibus integre exponantur, nec iudiciis innotescant, & fieri nequeat, ut de gravitate criminum recte censere possint, & pœnam quam oportet, pro illis, pœnitentibus imponere.* Sed in confessione exprimendæ tantummodo sunt circumstantiæ. 2mo. speciem peccati moraliter mutantes: quæ enim speciem peccati  
solum



solum *physice* mutant, exprimendæ non sunt. Unde ad confessionem non pertinet, quod quis hominem dextra, vel sinistra vulneraverit, scilicet, vel gladio occiderit, nisi eum per hoc duriori morte affecerit. 2do: speciem peccati *mortaliter* mutant. Si enim circumstantiæ venialem solum actui peccaminoso superaddant malitiam, poterant, sicut alia venialia peccata in confessione prætermitti. Pariter si circumstantia etiam mortaliter speciem peccati immutans, inculpabiliter, atque invincibiliter ignota fuit, aut nonnisi leviter ignorata, non erit necessario in confessione exprimenda, ut si quis graviter hominem vulneraverit, nesciens eum Clericum esse. Exinde sequentia colliguntur. 1mo: illos qui antea solas peccatorum species confessi sunt, dicendo exg. *aliquoties detraxi, pejeravi*, teneri ad iterandas, post majus examen, confessiones, quotquot hoc modo apud imperitos Sacerdotes fecerunt. Si tamen ex accurata ultimi anni confessione, præcedentium defectus intelligi possint, quia uniformis fuerat in Pœnitente peccandi ratio, non esset opus ista repetitione, sed tunc subdenda forent hæc paucula: *Accuso omnia & singula quæ in ceteris retro Confessionibus non expressi*. Quod si peccata quædam, ab iis quæ in postrema confessione deposuit, specie distincta ante commisisset, hæc denuo declarare teneretur, unde dandum erit huic congruum tempus, quo suam discutiat conscientiam. 2do: qui post diligens examen certo comperire non potest, quot præcise numero admiserit peccata, ille curare debet ut numerum, vero propiorem exprimat, hæc verba addendo, *plus, minusve*: neque tamen formula hac utendum est, quasi divinando, sed quando rebus coram Deo pensatis, numerus expressus verisimilior apparet. Qui vero nihil fixi detegere potest, id saltem agere debet, ut in qualibet peccati specie aperiatur suum vivendi morem, occasiones, propensiones ad illud peccatum, spatium temporis, quo in illo perduraverit, in eo quamdiu sibi complacuerit, ut omnibus pensatis intelligat Confessarius, quoties circiter pœnitens lapsus fuerat, in mense, in hebdomada, in die, atque ex hoc aliquatenus deveniat numerum commissi ab illo peccati. 3tio: quare, qui illa adjectione *plus, minusve*, post diligens examen usi sunt, facta semel confessione non tenentur majorem, quem postea certo detegunt, exprimere numerum, si is eum, quem jam in confessione expresserant, notabiliter non excedat. Unde qui confessus est se decies, plus vel minus inebriatum fuisse,



ae, & postea deprehendit id duodecies contigisse, non tenetur hunc excedentem numerum iterum declarare. Secus si id factum fuisset quindecies, quia in his formulis, *circiter, plus, minusve*, non comprehenditur excelsus vel defectus quicunque, etiam notabilis, sed modicus, major tamen vel minor proportionate ad numerum jam in confessione expressum. Porro quemadmodum unum ad quinque levem excelsum facit, sic duo vel tria ad decem, tria vel quatuor ad viginti, à contrario vero quatuor vel quinque grandem faciunt excelsum relative ad decem.

2do: Ad formalem Confessionis integritatem necesse est, ut exprimantur etiam circumstantiæ peccatum in eadem specie, notabiliter aggravantes. Enimvero circumstantiæ notabiliter aggravantes illæ sunt, quæ ita moralem actionis malitiam in eadem specie adaugent, ut unum peccatum pluribus æquivalens efficiant, seu ratione quantitatis, ut si quis aureos decem furatus sit, seu ratione durationis, ut si venereæ delectationi per plures horas indulserit, seu ratione intensiōis, ut si mala omnia, ipsamque damnationem inimico suo quis exoptaverit. Porro circumstantiæ istæ necessario in Confessione exprimi debent, quia etiam sine illarum notitia, confessarius nec de gravitate criminum recte judicare, nec pro illis pœnam, quam oportet Pœnitentibus imponere potest. Certe: circumstantiæ notabiliter aggravantes sæpe criminis gravitatem magis adaugent, quam circumstantiæ speciem mutantes, magis enim est peccatum centum aureos furari in loco profano, quam unum in loco sacro. Si ergo in confessione necessario exprimendæ sunt circumstantiæ speciem peccati immutantes, exprimi quoque debent circumstantiæ malitiam peccati in eadem specie notabiliter aggravantes.

Hinc manifestum est, eum qui commissum à se confitetur incestum, exprimere debere consanguinitatis, aut affinitatis gradum, in adulterio addendum esse; quod utraque pars matrimonii vinculo ligata fuerit, qui libidine se commaculavit exprimere debet, si est voto castitatis ligatus, qui detraxit adjicere debet, quod pluribus simul detraxerit. Varia hæc in confessione recensere oportet, quia peccatum notabiliter aggravant, aut etiam multiplicant. Verum tunc tantum aperiendæ sunt in confessione circumstantiæ, sive speciem peccati mutantes, sive aggravantes, quando confessario ignotæ sunt. Unde si Sacerdos, confessario suo bene notus, confiteatur, se contra Castitatem deli-



deliquisse, non tenetur status sui obligationem exprimere, utpote satis compertam.

Justum quoque ac æquum esse videtur, ut pœnitens in Confessione illas exprimat circumstantias, quæ peccatum imminunt, maxime si ex mortali faciant veniale, non ut peccata sua excuset, sed ut statum conscientiæ suæ confessario candide manifestet.

*Quæres 2tio: Quæ præterea exprimenda sunt in Confessione, ut ipsa sit formaliter integra?*

*Resp:* Necesse est præterea exprimere. 1mo: actum peccati exteriorem, & effectum ex eo secutum. Quia sine actus exterioris confessione, non satis innotescit actus interioris malitia, intensio, efficacia, extensio, nec proinde tota ipsius sciri potest gravitas. Nisi etiam declaratur peccati effectus, sciri nequit an aliquam pœnitens contraxerit, obligationem exg. restitutionis, unde qui venenum propinavit, an inde effectus aliquis secutus sit, declarare debet.

2do: Dubia quoque peccata confiteri necesse est, & quidem ut dubia aperiri debent, sive pœnitens dubitet de substantia actus, videlicet an hoc peccatum commiserit, sive etiam dubitet de qualitate actus, nimirum utrum commissum à se peccatum mortale sit. Ad hoc autem requiritur verum & prudens dubium prout opponitur inani scrupulo. Qui autem confessus est mortale aliquod peccatum ut dubium, si illud subinde detegat esse certum, aut multo probabilius, iterum illud ut tale confiteri debet. Quia peccatum confiteri necesse est, prout est in conscientia pœnitentis. Porro tunc jam illud peccatum est in conscientia Pœnitentis ut certum, vel ut multo probabilius, & non est confessum, nisi ut dubium. Debet ergo iterum ut certum, aut veluti multo probabilius confiteri. Et vero certitudo peccati, certam ei addit gravitatem, quæ notabiliter immutat iudicium Confessarii, cum dubia delicta minoribus, quam certa, subiaceant pœnis. Quodsi etiam pœnitens confiteatur peccatum, cujus ipse, vel Confessarius tunc nesciebat gravitatem, quamvis postea cognoverit illud esse mortale, non est necesse ut illud denuo confiteatur, cum jam illud rite confessus sit.

*Quæres 3to: Utrum scrupulosi teneantur dubia etiam peccata confiteri?*

*Resp:* Si scrupulosi, qui vere timorati sunt, & à peccatis sedulo abstinere, non tenentur dubia quæque confiteri peccata, quia minus est malum, quod forte scrupulo-



sus quædam dubia confiteri omittat peccata, quam ut perpetua vexetur anxietate, seipsum, & Confessarium jugiter defatiget, capitis periculum, & quandoque etiam desperationis subeat. Unde id genus scrupulosi, qui sæpius confessionem frequentant, modico opus est examine, & declaratione brevi suorum peccatorum, iique non raro, etiam non auditi celebrare, vel ad Eucharistiam accedere jubendi sunt. Vix unquam permittat Confessarius scrupuloso confessiones generales, ne scrupulis infinitam præbeat materiam. In ordinariis autem Confessionibus præscribat aliquando modum, vg. ut Pœnitens vel de certis solum peccatis confiteatur, vel respondeat ad nonnulla tantum interrogata, ne inter examinandum nimis suam conscientiam, pacem animi vel amittat totam, vel magna ex parte. Non permittat abstinere à frequentandis Sacramentis, & vix unquam sinat scrupulosum de blasphemii in Deum, de desperatione, murmuratione contra divinam providentiam, cogitationibus inhonestis, suspicionis, confiteri. Solent enim hæc omnia scrupuloso venire in mentem, sed vix unquam præbetur illis consensus.

Quod vero attinet illos scrupulosos qui nigro colore obducti sunt, ad peccati horrorem, indeque ad scelus perpetuo circuitu transvolant, ii quantum ad præterita, audiendi non sunt, donec adversus præsentia roborati, actualibus peccatis serio renuntiare inceperint.

*Quæres 2to: Quæ excusant à Confessionis integritate?*

*Resp: 1mo:* Excusant, oblitio inculcata, & invincibilis ignorantia. Namque impossibilia Deus non jubet. Porro impossibile est illa confiteri, quæ vel inculpate à memoria exciderunt, vel quæ invincibiliter ignorantur. Hinc Concilium Tridentinum definierat, ea solum peccata confitenda esse, quorum homo post diligens examen conscientiam habet, quæ vero vel inculpate oblitus est, vel quæ mala esse invincibiliter ignorat, illorum conscientiam non habet. Ea igitur confiteri nequit.

Sed ista oblitio debet esse *inculpata*, si quis enim defectu examinis idonei, aliquod mortale omiserit confiteri peccatum, nulla erit ipsius confessio, nisi forte hæc negligentia modica sit, ac proinde oblitio venialiter solum culpabilis, quod etsi absolute fieri possit, non est tamen facile præsumendum. Debet etiam illa ignorantia esse invincibilis, quæ enim vincibilis est, licet non sit crassa, nec à Sacrilegio, nec ab iteranda confessione excusat.

Ut



Ut autem iudicetur an vincibilis hæc fuerit ignorantia, videndum, an pœnitens culpa sua defuerit instructionibus sibi necessariis, an lectione saltem jacturam hanc resarcire potuerit, an confitendo sic fuerit affectus, ut peccatum quod tacuit, aperiret, si scivilset aperiendum esse, an paria, vel etiam graviora confessus fuerat. Ex his enim decidi poterit, utrum illa suppressio peccati refundi possit in invincibilem ignorantiam, an non. Verum ignorantia hæc invincibilis præsumi non debet in gravibus quibusdam peccatis, ut est *pollutio*, *mollities*. Qui enim hæc peccata in Confessione supprimunt, vel illis etiamnum adhærent, vel ab iis resipuerunt? Si *amum*: quis hominem in gravi juris naturalis puncto cæcum, veniam à Deo promeruisse certo confidat, ut eum ab iterandis Confessionibus eximere audeat. Si *2dum*: ergo suspicabatur aliquid in sua actione esse mali. Jam vero qui in actione sua aliquid mali suspicatur, & illud ultra non inquirat, reus est. Ac propterea qui istiusmodi pollutionis, mollitiei ac similia peccata in Confessionibus supprimebant, dicentes se ignorasse ea esse peccata, audiendi non sunt, sed ad iterandas Confessiones cogendi. *2do*: excusat etiam ab integritate Confessionis actualis, vel imminens, seu ex parte Pœnitentis, seu ex parte Confessarii impotentia. Hinc absolvi debet pœnitens, licet necdum integre confessus. 1. cum vereri est, ne in amentiam vel phrænesim incidat: 2. cum quia mutus, surdus, balbusve, vel pene lingvæ imperitus, omnia adamussum confiteri non potest. His enim, cum id quod confiteri possunt, confessi fuerint, impertienda est absolutio, non in mortis tantum periculo, sed etiam quando urget Confessionis præceptum. *3tio*: cum in ipso confessionis tractu ingruit periculum mortis. *4to*: cum gravi laboranti infirmitate, candide fatetur superesse alia quæ confitenda sint, sed ultra ob defatigationem prosequi non posse. Neque tunc scrupulose differenda est absolutio, etsi in alterum diem æger supervivere posse videatur, ne mortuus reperiatur, qui audiendus sperabatur. *5to*: cum tempore pestis, instantis naufragii, prælii, non possunt integræ multorum confessiones excipi, tunc enim, si fieri potest, distinctim ab unoquoque peccati cujuscumque exigenda est confessio, & unusquisque seorsim absolvendus; vel si id fieri nequeat, et urgeat periculum, omnes simul & confessionem, & dolorem per exteriora signa, & pectoris tensionem, exhibere debent, atque tunc præmissa prout poterit vivida, & brevi ad contritionem exhortatione, omnes simul



simul sub hac absolvantur forma: *Ego vos absolvo à censuris, & peccatis vestris etc.*

Sed etiam ab integritate confessionis excusat impotentia, quæ imminet ex parte Confessarii. Unde necdum integre confessis impertienda est absolutio. 1mo: cum pœnitens simul & confessarius, qui unus præsto est, æque ad interitum vergunt, adeo: ut vereri sit, ne Sacerdos totius usum amittat, priusquam pœnitentem absolvat, si omnia peccata sua ipse confiteatur. 2do: cum Sacerdos pœnitentem lue exg. infectum absque evidenti mortis periculo, diutius audire non potest, tunc enim auditis aliquibus, potest ipsum pacificare, & absolvere.

3tio: Excusat tandem ab integritate confessionis iusta formido gravis damni, seu spiritualis, seu temporalis, inde proveniens, confessario, pœnitenti, vel alii tertio. Quia positivæ leges cum tali ac tanto damno non obligant, & ubi duo concurrunt præcepta, quæ simul observari nequeunt, illud observandum est, quod est fortius. Porro charitatis præceptum fortius est præcepto integræ confessionis, & charitas jubet avertere grave damnum sive à nobis, sive à Pœnitente, sive à quopiam tertio.

Hinc 1mo: si confessario, diutius cum Pœnitente acturo immineat grave periculum gravis morbi, mutilationis, perpetuæ captivitatis, poterit is pœnitentem non integre confessum absolvere, si eum absolvi postulet justa causa, qualis est necessitas muniendi se gratia sacramentali adversus molestissimam aliquam tentationem. 2do: excusatur etiam ab integritate confessionis pœnitens, si ex illa grave sibi malum, vel peccatum vereatur, veluti, ne Sacerdos confessionem ejus revelet, ipsum prodat, ne grave ipsius odium incurrat, & necessariis deinceps ad victum, ac vestitum, privetur, ne occasione confessionis ad turpia sollicitetur, quia id aliis scit contigisse. Pariter cum juste timet pœnitens, ne præsumma sua fragilitate novum carnalibus peccatis consensum præbeat, si diutius eorum examini immoretur, tunc enim his commemorandis levius insistendum est, tum à Pœnitente, tum à Confessario, ne Sacramentum ad purganda peccata institutum, novi peccati occasio fiat. 3tio: Excusat pariter ab integritate confessionis iustus timor imminenti alicui tertio notabilis damni. Unde Sacerdos qui peccatum suum pandere nequit, nisi auditum in Confessione alterius, bene suo confessario noti, peccatum declaret, suum silentio præmere debet. Idem est de pœnitente, qui si suum peccati complicem mani-



manifestet, prout ad proprii sui sceleris integram confessionem tenetur, gravis eidem foret detrimenti causa.

Porro: ut peccatum aliquod in Confessione reticeri possit, hæc concurrere debent. 1<sup>mo</sup>: ut & grave sit malum quod timetur, & non fictitia, sed certa moraliter de causa timeatur. 2<sup>do</sup>: ut desit confessarius alter, cui rem totam secure aperire liceat. 3<sup>tio</sup>: ut confessio in aliud tempus commode differri non possit, puta quia Missa, vel communio sine gravi scandalo hic & nunc omitti nequeat, aut etiam quis mortalibus gravatus peccatis multo tempore sine Sacramentis in iis permanere deberet. 4<sup>to</sup>: solum id reticeri potest peccatum, cujus confessio periculum habet. Unde qui justam habet exterioris peccati reticendi causam, actum interiorum, si tuto potest, aperire debet. Interim illi, qui justam causam habet reticendi aliquod in Confessione peccatum, sollicitè cavendum est, ne ad confessionem, ac multo minus ad Eucharistiam accedat, si merito dubitat an non eidem adhæreat peccato. Unde dimidiatæ confessionis doctrina nusquam iis servire potest, qui in habitu peccati mortalis versantur, & raro iis, qui necdum à proxima peccati occasione recesserunt.

Ceterum qui ex inculpata oblivione, aut invincibili ignorantia peccatum aliquod mortale confiteri prætermiserunt, si illud in memoriam veniat, aut illud grave esse cognoscant, confiteri illud tenentur, quam primum opportune id facere poterunt, nec proinde diu illius confessionem differre poterunt. Pariter qui propter impotentiam, imminens periculum, ac subsequens damnum integre confiteri non poterant, his celsantibus obstaculis integre peccata sua confiteri tenentur. Quia quamvis per Sacramentalem absolutionem in prioribus confessionibus remissa sint, manet tamen ex jure divino obligatio ea confitendi, cum confiteri possunt.

*Quæres 16to: Quæ non excusant ab integritate confessionis?*

*Resp:* Ab integritate confessionis non excusat. 1<sup>mo</sup>: frequens populi concursus, qui exg. fieri solet in aliquo die sollemni, licet ex integra priorum Pœnitentium confessione futurum sit, ut multi Sacramentis, & indulgentia festo annexa priventur. Damnata siquidem est ab Innocentio 11. contraria opinio sequenti expressa propositione: *Licet sacramentaliter absolvere dimidiate tantum confessos, ratione magni concursus Pœnitentium, qualis v.g. potest contingere in die magnæ alicujus festivitatis, vel indul-*

*gen-*



*gentiæ.* Certe si propter concursum Pœnitentium liceret dimidiare confessionem, quam plurimi vix examinati, leviter confessi, indigni ad Sacram Eucharistiam accederent. Inde autem quot, & quanta sacrilegia?

*2do:* Non excusat ab integritate confessionis necessario facienda complicitas apud confessarium revelatio. Quia complex peccati, famæ suæ cessit, sciebat enim peccatum hoc in confessione aperiendum esse, atque cum aliter plene declarari non poterit, se etiam manifestandum. Et certe non plus juris habet complex peccati, ne apud confessarium denigretur, quam ipse auctor, & primus peccati motor. Porro is tenetur & sibi noto confessario, apud quem bonam obtinet famam scelera sua pandere, etiam cum sui infamia. Ergo cum aliter gravitatem peccati sui exprimere pœnitens nequit, complicem peccati sui, etiam cum ipsius infamia, manifestare tenetur. Sed hoc fieri debet, quando denigratio apud confessarium complicitas sui, sine incommodo vitari nequit, quia difficile est ad ignotum recurrere confessarium, quia is longe distat, aut quia consuetus confessarius nonnisi ægre à pœnitente mutari potest, cum perplexum conscientiam ipsius statum jam bene sciat. Idem est, si diutius in peccato manendum sit, quia nonnisi diu post, alius aderit Sacerdos, cui complex peccati ignotus est. Porro incommodi gravitas, ex gravitate commissi criminis, quod confiteri necesse est, æstimari debet. Plus enim efficere debet pœnitens ne suum cum sorore commissum pandat in confessione incestum Parocho, cui utraque pars criminis rea bene nota est, quam ut detegatur libidinosus assentientis consanguineæ amplexus, tactus, osculumque turpe. Unde in priori casu nihil else videntur duæ, vel tres leuæ, homini præsertim vergeto ad quærendum ignotum confessarium, multum vero erunt in casu posteriori. Si tamen complex præ infirmitate, aut alia gravi de causa ad ignotum Sacerdotem recurrere nequeat, sed noto confiteatur confessario, non est cur alter extranei Sacerdotis ministerium quærat.

*Quæres 17mo: An etiam liceat in Confessione alterius & aliud propalare crimen, ut pœnitens gravitatem sui peccati declarare possit?*

*Resp:* Talis potest occurrere casus. Occidit quis sororem suam ex crimine gravidam. Personam novit Sacerdos, crimen ignorat, teneturne rem totam aperire prædictus Sororicida? In tali ergo, ac simili casu *1mo:* cum majori incommodo quærendum else ignotum confessarium, quam



quam cum agitur de occultando criminis complice, quia illa injuste interempta plenum retinet jus, ne sine gravi necessitate diffametur. 2do: quodsi ille Sororicida, ignotum confessarium non inveniat, ut suum crimen integre confiteatur, potest & debet alterius scelus cum illius etiam infamia in confessione aperire. Namque licet alterius crimen revelare, quando id exigit gravis necessitas, puta ad consilium capiendum, ad grave corporis, vel animi detrimentum evitandum. Licebit ergo etiam ad exonerandam conscientiam suam, alterius manifestare crimen, ut proprium Sacramentali purgetur confessione. Neque inde proveniens apud confessarium denigratio, veri nominis infamiam parere potest, sapiens siquidem ac pius confessarius audiens alterius à pœnitente enarratum crimen quodcumque, ingebit humanam fragilitatem, iudicium suum suspendet, rem totam Deo committet.

Licet pariter alterius crimen in confessione aperire, si id postulet notabilis utilitas aut pœnitentis, aut delinquentis, exg. ut puella contra importunas ad peccatum sollicitationes obfirmetur, aut etiam ipse seductor, & incitator à malo revocetur, atque delinquens corrigatur, ac emendetur. Caute tamen tali notitia utendum est confessario, ne vel reipsa sigillum confessionis violet, vel saltem in suspicionem hujusce violationis veniat, quod malum tanti est, ut ei quodcumque Pœnitentis, vel alterius delinquentis bonum cedere debeat. Advertendum quoque est ne locus detur fictis confessionibus, & injustis innocentium calumniis.

*Quæres 28vo: Utrum absolvi possit moribundus, qui vel nullatenus, vel integre non confitetur?*

*Resp: amo: Debet absolvi moribundus, qui vel quædam tantum peccata, vel etiam nulla in specie confiteri valens, in genere solum declarat se peccasse, aut præsentem, vel absentem Ministros, quædam dat pœnitentiæ signa ad obtinendam absolutionem. Quia talis moribundus confessionis legem à Christo constitutam adimplet, quantum potest. Qui autem præstat quod potest, ad amplius non tenetur. Sæpius tamen ingemiscere debet, quod neglexerit habito tempore integre confiteri. Quare sic præscribit Rituale Romanum titulo de Sacram: Pœnit: Si inter confitendum, vel etiam antequam incipiat confiteri, vox & loquela ægrum deficiat, nutibus & signis conetur Sacerdos, quoad fieri poterit, peccata Pœnitentis cognoscere, quibus utcumque vel in genere, vel in specie cognitis, vel etiam*



*etiãsi confitendi desiderium sive per se, sive per alios ostenderit, absolvendus est.* Sufficit autem vel unus testis, qui etiã ab alio didicerit, moribundum Sacerdotis opem voce, aut signis implorasse. Sufficiunt quoque dubia pœnitentiæ signa, ut si visus est æger pectus tundere, oculos in cælum tollere, quia in his angustiis præsumitur quisque, salutis animæ suæ omni modo consulere.

21o: Debet etiã ab eo moribundus, qui catholicam religionem est professus, etsi nulla ante, vel post Sacerdotis adventum exhibuerit pœnitentiæ signa. Quia in extremis licet in administrandis Sacramentis dubia etiã uti materia, quando certa haberi non potest. In præsentii autem casu suppetit saltem dubia Sacramenti Pœnitentiæ materia, vita siquidem præterita moribundi, in catholica religione transacta, est quasi illius confessio, cum distinctior haberi nequit. Forte etiã moribundi gemitus, intuitus, corporei motus, sunt signa quibus ille indigere vult, se de peccatis dolere, & velle absolvi. Certe quidam per minoris pedis sui digiti motum contritionem suam indicare voluit, quod autem semel contigit, pluries contingere potest. Præsumi igitur debet, in iis circumstantiis à moribundo dari quædam pœnitentiæ signa, quæ tamen ab adstantibus percipi nequeunt, in fundamentum itaque istius piæ & justæ præsumptionis, moribundus absolvendus est.

22o: Neque tandem redarguendus est Sacerdos, si moribundum in catholica regione repertum conditionate absolvat, etsi nulla dederit Pœnitentiæ signa, modo nec impœnitens appareat, nec in flagranti delicto deprehensus sit. Quia nec omnino constat talem hominem indignum esse Sacramentali absolutione, cum etsi nequidem rationis compos esse videatur, fieri tamen potest, ut re ipsa & de peccatis intus doleat, & aliquod doloris signum, quamvis impervium exhibeat, per suspiria videlicet, & gemitus. Absolvi ergo debet. Neque per hoc aliqua Sacramento inferitur injuria, huic enim obviatur per appositam conditionem, & fatius est Sacramentum nullitati exponere, quam hominem periculo æternæ damnationis subijcere. Certe cum Sacramenta propter homines constituta sint, ut in tali casu moribundos tuto absolvantur, sufficit ut è millibus hominum, qui in tam misero statu versantur, sit vel unus, cui tunc data absolutio prodesse valeat. Id autem fieri posse quis negaverit?

Tunc autem danda erit absolutio non solum sub conditione-



ditore facti, qualis est duplex hæc, *si vivis, si es baptisatus*, sed etiam sub hac juris conditione, *si es recte dispositus*. Qui tamen in flagranti delicto exg. duello, aut ebrietate sensibus destituitur, illi absolutio dari nequit, quia actu est ad id indispositus.

*Quæres 18vo: Utrum Confessio voce fieri debeat?*

*Resp:* Non est absolute necessarium, ut confessio voce fiat, quia Christus tantum præcepit, ut peccata Sacerdoti cum dolore declarentur, quod per Scripturam, & nutus, satis præstari potest, & ea est Ecclesiæ praxis, ut mutos, qui sufficienter instructi sunt, per signa confitentes, absolvat. Et confessio scripto, aut nutibus facta, non solum utilis est, sed etiam quando voce fieri nequit, prorsus est necessaria, quia ut docet S. Thomas Doctor: *quando non possumus uno modo, debemus secundum quod possumus, confiteri*. Graviter tamen peccaret, ideoque invalide confiteretur, qui extra casum physicæ vel moralis impotentiae, scripto, aut nutibus non autem voce confiteretur. Quia usus voce confitendi & in Ecclesia universalis est, & gravibus de causis inductus fuit. Ab ea tamen praxi excusat impotentia, tum *physica*, qualis occurrit in mutis, iisque qui præ morbi gravitate usu vocis destituti sunt, tum *moralis*, ut si æger oppresso pectore nonnisi ægre loqui possit, vel si unus, qui præsto est Confessarius, surdus sit ipse, aut Pœnitens sit, & non possit in Xenodochio confiteri, quin ab aliis audiatur, audirive merito formidet. Tunc autem melius, & tutius est, ut postquam confessionem Sacerdos legerit, pœnitens hæc saltem addat verba, si potest: *De his omnibus scriptis me accuso, & peto absolvi*.

*Quæres 19no: An absenti etiam per litteras confessio fieri possit?*

*Resp:* Id severe vetitum est, & Clemens 8vus prohibuit, ne opinio, quæ absolutionem absentis ab absente datam, ratam esse censet, ullo in casu teneatur tamquam probabilis. Invalida ergo censeri debet istiusmodi absolutio, quare neque in extrema necessitate adhiberi potest. Ceterum id non tantum conjunctive, sed & disjunctive intelligi debet, unde absolvi non debet, neque præsens, qui absens per litteras confessus est, neque absens, qui confessus est, cum esset præsens. Requiritur autem, & sufficit moralis Sacerdotis cum Pœnitente præsentia, quæ adest cum Sacerdos, & Pœnitens non longius ab invicem distant, quam ut possint se audire, ea loquentes voce,



qua homines in communi sermone uti solent, imo & altiori. Quare non est arguendus Sacerdos, qui Carceri v.g. inclusum, elata voce, vel etiam nutibus, si loqui non possit, confitentem, è regione ipse stans, gravi de causa absolvat.

## ARTICULUS 3<sup>tius</sup>

### De Satisfactione.

*Q. Quæres 1<sup>mo</sup>: Quid sit satisfactio?*

*Resp:* In homine qui graviter delinquit, triplex est reatus, videlicet *culpæ*, qui est ipsum peccatum vinculum, *pœnæ æternæ*, quia propter mortale peccatum subijcitur homo damnationi æternæ, & reatus *pœnæ temporalis*. Peccatori vere pœnitenti Deus misericordissime reatum tum culpæ, tum etiam pœnæ æternæ remittit, & liberalissime condonat, at post utriusque remissionem, atque condonationem, remanet reatus pœnæ temporalis quæ piis Pœnitentis laboribus, atque perpersionibus redimi debet, & hoc satisfactionem vocamus. Est itaque satisfactio: *Voluntaria pœnæ mitioris perpessio, atque tolleratio ad compensandam injuriam Deo per peccatum illatam, & redimendam graviolem pœnam, eodem peccato promeritam*. Satisfactio itaque est 1<sup>mo</sup>: *perpessio* qui enim satisfacit alteri, semper aliquid ardui, ac molesti sustinet. 2<sup>do</sup>: est *voluntaria*, sive sponte & propria voluntate illa pœna suscipiatur, sive ab alio imponatur, & libenter acceptetur. 3<sup>tio</sup>: non alio autem fine hæc pœna toleratur, nisi ut & injuria Deo per peccatum illata resarciatur, atque compensetur, & pœna longe gravior, quam peccatis suis promeritus est homo, quamque vel in hac, vel in futura vita luere deberet.

Satisfactio autem duplex est: sacramentalis videlicet, & non sacramentalis. Satisfactio *sacramentalis* est adimpletio pœnitentiæ à Sacerdote in Sacramento Pœnitentiæ impositæ. Satisfactio *non sacramentalis* est illa, quam quis sponte eligit, & pro peccatis suis sibi imponit.

*Q. Quæres 2<sup>do</sup>: Quid ad satisfactionem requiritur?*

*Resp:* Ad satisfactionem præ ceteris requiritur opus pœnale, & afflictivum, quia satisfactio assumitur, ut præterita peccata puniantur, & futura caveantur, quare Scriptura sacra satisfactionem in jejunio, fletu, planctu aliisque arduis operibus reponit. Sed pro praxi nulla hinc



emergit difficultas, quia omnis Christianæ virtutis actus, carnis afflictionem importat, unde docet Concilium Trident: Sels: 14. Can: 13. *pro peccatis Deo satisfieri pœnis sponte susceptis, ut jejuniis, orationibus, eleemosynis, vel aliis etiam pietatis operibus*. Non solum autem illi pietatis actus sunt satisfactorii, qui sponte à nobis fiunt, sed & flagella, quæ nobis Deus immittit, si libenter acceptentur, & patienter tollerentur, sunt satisfactoria, quia tunc quodammodo sunt patientis opera. Unde vitæ nostræ incommoda patienter sunt tolleranda, si volumus ea esse satisfactoria. Per actus quoque pietatis internos satisfactio Deo præstari potest, quia & ii, si cum fervore & intentione fiant, multum laboris, & defatigationis continent, semper tamen opera externa, internis superaddita, satisfactionis pondus augent, quia carnis augent afflictionem, unde communiter plurius est jejunium exercitum, quam illius observandi pia voluntas. Etsi vero quibusvis pietatis operibus Deo pro peccatis satisfieri possit, maxime tamen jejunio, oratione, ac eleemosyna, quia hæc præcipue in Scripturis sacris commendantur.

*Quæres 2tio: Utrum Sacerdos pœnitenti suo, quem absolvit, satisfactionem sacramentalem imponere tenetur?*

*Resp:* Omnino tenetur, & id constat ex Ecclesiæ usu, quæ nusquam pœnitentes sine congrua satisfactione reconciliavit. Hinc Concilium Trident: Sels: 14. Cap: 8, sic statuit: *Debent Sacerdotes Domini, quantum spiritus, & prudentia suggererit, pro qualitate criminum, & pœnitentium facultate, salutare, & convenientes satisfactiones injungere*. Quare graviter peccaret Sacerdos, si scien- ter, & volenter, nullam Pœnitenti satisfactoriam imponeret pœnitentiam, quia gravem Sacramento Pœnitentiæ inferret injuriam, illud mutilando, cum satisfactio pœnitentialis, sit ipsius pars integralis. Et hoc verum est etiamsi pœnitens vel sola venialia confiteatur peccata, vel illa tantum, quæ jam rite confessus est, semper enim, ut integrum sit Sacramentum, salutaris pœnitenti injungi debet satisfactio. Imo si Sacerdos, mox novam, pro oblito inperacta Confessione peccato, tribuat absolutionem, novam etiam pœnitentiam imponere tenetur, quia de novo conficit Sacramentum.

Si tamen injunctam adimplere pœnitentiam, pœnitenti sit impossibile, quia sensibus destitutus est, non est cur imponatur. Monendi tamen sunt, qui ægrum circumstant, ut si tantisper reviviscat, & confortetur, pro



pro salutari pœnitentia ad actus fidei, spei, charitatis; dolorisque excitent.

Non qualiscunque autem in Confessione assignanda est pœnitentia, sed par crimini, prudenter tamen omnibus bene perpensis. Ita docet Concilium Trident: Sess: 14. Cap: 8 *Debent Sacerdotes Domini, quantum Spiritus, & prudentia suggererit, pro qualitate criminum, & pœnitentium facultate salutare, & convenientes satisfactiones injungere, ne, si forte peccatis conniveant, & indulgentius cum pœnitentibus agant, levissima quædam opera pro gravissimis delictis injungendo, alienorum peccatorum participes efficiantur.* Quare non est liberum Confessario pro gravibus criminibus levem quampiam imponere pœnitentiam, sed sub gravi tenetur parum, & criminibus proportionatam injungere satisfactionem, ne alias particeps alienorum peccatorum efficiatur. Prudenter autem id præstare debet Confessarius, quia non solum gravitatis peccatorum, ac numeri illorum, sed & Pœnitentium facultatis rationem habere debet. Hinc quandoque minor imponitur pœnitentia iis, qui majori defungi non possunt, videlicet graviter ægrotantibus, quibus proinde declarata, quam promeruerunt, pœnitentia, & quam, si convalescant, adimplere tenebuntur, levior, & mitior est assignanda. Cavendum quoque est, ne iis etiam qui corpore sani sunt, sed labore continuo sibi suisque ad victum necessaria comparare debent, imponantur prolixæ ferialibus diebus orationes, crebra jejunia, vel eleemosynæ, quas erogare non possunt. His ergo injungendum est, ut festivis diebus Ecclesiam frequentent, mane, & vespere preces devote persolvant, labores suos, Deo, in satisfactionem peccatorum suorum commendent, & quidquid mali obveniet, patienter ferant.

Compatiendum quoque est spiritualiter infirmis, ita ut mitigetur satisfactio, cum Pœnitens ob majorem pœnitentiam tabescit, & illam aliquo modo detrectat, non quidem ex cordis pertinacia, ignavia, vel langvore voluntario, sed quia propriæ fragilitatis sibi bene conscius est, ac proinde veretur, ne sibi in ea persolvenda deficiat animus, quare si illius omisio prudenter timeatur, & quæ eam non raro sequuntur relapsus, ac desperatio, mitius agendum est, ne sub obtentu maioris boni, malum gravius inducatur, tunc enim valet tritum illud, *satius est hominem cum minori pœnitentia in Purgatorium mittere, quam in Infernum cum majori detrudere.* Unde sic inquit



inquit S. Franciscus Salesius: *Confessarius melleis & consolatoriis verbis imponere debet pœnitentias, & petere semper debet ab eo, an pœnitentiam injunctam libenter faciat, quia si videret eum angustiari, rectius faceret aliam leviozem imponendo, & alia duriora quæ Pœnitenti necessaria esse judicaverit, per modum consilii proponat, ut per aliquot hebdomadas, vel dies in iis se exerceat, atque experiatur ipse quid ferre possit.*

*Quæres 4to: Qualem pœnitentiam Confessarius assignare debet?*

*Resp:* Confessarius pœnitentiam assignare debet *amorem* criminibus à pœnitente commissis. Nemo autem judicare potest, pro aliquot mortalibus peccatis, sufficientem pœnitentiam esse, aliquas preces, vel Coronam quinque decadam. An enim peccata ebrietatis, mollitiei, aut fornicationis congrue diluet, aliquot precum recitatione? Certe ea esse debet pœnitentiæ ratio ut à peccatis revocet, & quasi fræno coerceat. An vero incontinentiæ gravitatem quis sentiet ex unius Coronæ in honorem B. V. Mariæ sibi injunctæ recitatione? potius ex levitate pœnitentiæ, peccata illa levia reputabit, ac præceptum in illa iterum ruet, thesaurisans sibi iram ac vindictam Dei, in die iræ ac justæ ultionis illius. Ex gravitate ergo pœnitentiæ, pondus peccatorum suorum, Pœnitentes sentire debent, atque sic cautiores, vigilantioresque in futurum effici.

*zdo:* Debet pœnitentia esse peccatis, pro quibus imponitur, opposita, atque ex adverso respondens, quia is etiam est injunctæ à Sacerdote pœnitentiæ scopus, prout docet Concil: Trident: Sess: 14. Cap: 8. ut medeatur peccatorum reliquiis, & vitiosos habitus male vivendo comparatos, contrariis virtutum actionibus tollat. Quare Rituale Romanum præscribit ut Sacerdos: *Contrarias pro peccatis jungat pœnitentias, velut avaris eleemosynas, libidinis jejunia, vel alias carnis afflictiones, superbis humilitatis officia, desidiis devotionis studia: & S. Carolus Borrom: hæc Confessario mandat: Pro peccatis luxuriæ imponantur jejunia, vigiliæ, cilicii usus, alique hujus modi macerando corpori propria. Pro avaritiæ peccato, præter debitas restitutiones, elleemosynæ, pro cuiusque facultatibus jungantur. Sanandæ superbiæ, aliisque peccatis interioribus, oratio adhibeatur. Pro negligentia rerum Christianarum, quas ignorant, Conciones audiant, Catecheses frequentent. Inde votis, & tepidis juvabit imponere, ut*  
Eccle-



*Ecclesias, divinaque officia oraturi sæpius adeant, multasque orationes usurpent.*

3tio: Maxime autem pœnitentia medicinalis esse debet. Præscribi scilicet, & injungi debent ea, quæ ad pœnitentis emendationem, ad præcavendum relapsum inservire possunt. Unde potest & debet Confessarius suo pœnitenti, injungere ut hoc officium quod pessime gerit, dimittat, hanc Domum in qua peccare assolet, non frequentet, ab hac persona quæ ipsi proxima est peccandi occasio, se separet. Hæc nimirum & similia etiam, pro Pœnitentia sacramentali imponi à Confessario possunt, & injungi omnino debent. Pœnitentia itaque in Confessione à Sacerdote imponenda, duo precipue habere debet, scilicet ut sit & medicinalis, & pœnalis. Hinc Concilium Trident: Sess: 14. Cap: 8. sic Confessarios admonet: *Habeant præ oculis, ut satisfactio quam imponunt, non sit tantum ad novæ vitæ custodiam, & infirmitatis medicamentum, sed etiam ad præteritorum peccatorum vindictam, & castigationem.*

Quæres 5to: *Quæ opera pro pœnitentia imponi possunt?*

Resp: In pœnitentiam imponenda sunt à Confessario, opera, amo: quidem pœnalia, talia scilicet, quæ inservire possint, ad vindictam, & castigationem præteritorum peccatorum.

2do: Quamvis possint imponi opera aliunde jam præcepta, quia hæc bona, ac pœnalia sunt, atque non obstante debito legis, satisfactoria sunt, generatim tamen injungenda sunt, pro pœnitentia opera, alias indebita, quia generatim intendit Ecclesia, ut quisque pro delictis suis, per opera alias indebita satisfaciatur, ut & peccatorum suorum pondus peccator sentiat, & ipsius ac innocentis, qui etiam opus lege præscriptum adimplere debet, æqualis non sit conditio. Et id factum esse à Confessario, scilicet opus alias indebitum, pro pœnitentia injectum fuisse, semper præsumendum est, nisi aliud ex illius verbis, vel ex circumstantiis innotescat. Credere siquidem oportet, Confessarium à trita via recedere noluisse. Porro hæc trita est Confessorum praxis, ut dum jejunium, vel Missæ auditionem præcipiunt, ea præcipere censeantur, ad quæ Pœnitens jam aliunde non tenebatur. Unde si jejunium quis voverit, in illam diem, in qua abstinentiam præcepit Confessarius, reiicere illud non potest, quodsi Confessarius voti nescius, eadem die jejunium imponet, quæ jam voto appromissum fuerat, pœnitens eum monere debet,



bet, ut vel aliam pœnitentiam assignet, vel assignatum jejunium in aliam diem differe pernittat. Pariter injunctæ sibi à Confessario auditioni Missæ non satisfacit pœnitens, Missam audiendo die festo, ad quam audiendam jam Ecclesiæ præcepto tenetur. Quare Sacramentalis pœnitentia ex indebitis esse debet, & talis à Confessario imposita esse semper præsumenda est. Quandoque tamen vel ex communi sensu, vel extempore pœnitentiæ implendæ præfixo, vel ex aliis circumstantiis judicari potest, rem alias præceptam, ac debitam à Confessario injunctam fuisse. Quapropter si duæ Missæ die festo audiendæ imponantur, communiter intelligitur una tantum imponi Missa, præter eam, quæ præcepta est. Si inchoante Quadagesime, injungatur jejunium, intelligitur quadragesimale, quia alioqui satisfactio Sacramentalis diu differretur. Si imponatur eleemosyna, satisfit dando etiam extreme indigenti, quamvis aliunde ad id charitas obliget, nec enim præsumitur Confessarius extraordinariam hanc circumstantiam exclusisse, ne alioqui, nimium Pœnitens & angatur, & gravetur.

*2tio:* Pro occultis peccatis pœnitentiam manifestam Confessarius imponere non potest. Et ita statutum est in Rituali Romano his verbis: *Pro peccatis occultis, quantumvis gravibus, manifestam pœnitentiam non imponat*, quia talis pœnitentia pœnitentem rationabiliter redderet invitum, probro afficeret, & culpæ foret improporcionata. Quandoque tamen in medicinalem pœnitentiam imponi potest quidpiam exterius faciendum, etsi inde sequatur suspicio vel notitia peccati à pœnitente commissi, quando aliter relapsus vitari nequit. Sic qui in hac Domo, vel in hoc officio peccat, adigi debet, ut ab iis recedat, quod si id facere renuat, sine absolutione dimittendus est. Neque tunc Confessionem revelat Sacerdos, sed ipse se prodit Pœnitens, ut suæ obligationi satisfaciat.

Potest vero Sacerdos pro publicis peccatis, manifestam imponere pœnitentiam. Et ita docet Concilium Trident: Sess: 14. Cap: 8. ubi hæc habet: *Apostolus monet publice peccantes, palam esse corripiendos. Quando igitur ab aliquo publice, & in multorum conspectu crimen commissum fuerit, unde alios scandalo offensos, commotosque fuisse, non sit dubitandum, huic condignam pro modo culpæ pœnitentiam publice injungi oportet.* Id autem à Confessario fieri debet, servatis consilii & prudentiæ legibus, & vix quando sine scitu Episcopi fieri debet. Quare S.

Tho-



Thomas Doctor Quæst: 28. art: 3. sic ait: *Magna peccata indigent magna cautela ad sui curationem, & ideo injectio pœnitentiæ solemnis, quæ non nisi pro gravissimis peccatis fit, solo Episcopo reservatur.* Propterea potestatis suæ limites transgreditur Parochus, qui sine auctoritate Episcopi pœnitentem jubet ad Ecclesiæ foras stare, cum cereo accenso, aut Processionem sequi nudis pedibus. Quos ergo ipse in Parochia sua reperit publice adulteros, concubinos, eos ad Episcopum deferat, ut quæ via medendum ipsorum vitiis sit, consulatur.

Jam vero hæc satisfactoria pœnitentia, potest à Confessario pœnitenti imponi vel ante datam absolutionem, vel statim post ipsam. Quia utrolibet modo censetur in Confessione esse data & moraliter cum aliis hujus Sacramenti partibus conjungitur. Satius tamen semper est, ut ante absolutionem injungatur, quia Sacerdos absolvere non debet, nisi quem novit bene dispositum esse. Piam autem hanc pœnitentis dispositionem, non melius deprehendet, quam cum pœnitens injectam sibi pœnitentiam humiliter, & prompte suscipit.

*Quæres 6to: Utrum pœnitens impositam sibi pœnitentiam acceptare teneatur?*

*Resp:* Pœnitens impositam sibi pœnitentiam, modo sit æquitati, & rationi congrua, acceptare, & adimplere tenetur. Quia Sacerdos pœnitentiam imponere pœnitenti tenetur, ut Sacramentum Pœnitentiæ integrum sit. Ergo eadem de causa pœnitens illam acceptare, & adimplere obligatur. Modo tamen hæc æquitati & rationi consentanea sit. Quare si nutrice, aut infirmo jejunia, pauperi largæ eleemosynæ, mulieri prægnanti longæ peregrinationes indicantur, hæc nec acceptare, nec adimplere tenetur. Tunc tamen impotentia hæc Confessario exponenda est, ut vel idoneam magis injungat, vel hæc ab alio Confessario una cum absolutione expostuletur. Verum raræ admodum sunt pœnitentiæ graviores, quas suscipere & adimplere pœnitens non possit. Unde generatim statuendum est, teneri sub gravi pœnitentem impositam sibi pœnitentiam acceptare. Hinc S. Thomas Doctor in 4. dist: 20. inquit: *Pœnitens, cui major condigno, pœnitentia injecta est, tenetur eam explere ex Sacerdotis injunctio- ne, qui non solum debitum pœnæ considerat, sed peccato remedium adhibet.* Licet quidem pœnitenti pro faciendâ Confessione, quem voluerit adire Confessarium, sed factâ



confessione, non licet eum deserere, ne mutilum reddatur Sacramentum.

Sub gravi autem tenetur pœnitens, impositam sibi adimplere pœnitentiam, sive hæc gravis sit, & pro gravibus injecta peccatis, sive levis & pro venialibus tantum imposita. Quia qualiscunque, & pro quibuscunque peccatis imponatur pœnitentia, semper illa ad integritatem Sacramenti requiritur, mutilum vero reddere Sacramentum, gravis est materia, gravis per hoc Sacramento irrogatur injuria. Ergo levem etiam, & pro venialibus tantum peccatis assignatam non adimplere pœnitentiam, grave est peccatum. Qui tamen modicam pœnitentiæ sibi assignatæ omittit partem, poterit aliquando à mortali peccato excusari, quia & aliquam pœnitentiæ persolvendo partem, jam integrum est Sacramentum, & pars omissa modica esse reputatur. Tutius attamen est, integram, totamque adimplere.

*Quæres 7mo: Quando pœnitens impositam sibi pœnitentiam adimplere debet?*

*Resp:* Pœnitens tenetur impositam sibi pœnitentiam exequi tempore per Confessarium præfixo, quia temporis circumstantia includitur in præcepto pœnitenti imposito. Unde cui injectum est, ut feria 6ta jejundet in honorem passionis Christi, vel singulis mensibus semel confiteatur, debet hæc, prout demandata sunt, exequi, proinde nec anticipare, nec differre, nisi gravis & improvisa necessitas contrarium exigat, tunc enim ex præsumpto confessarii consensu aliter fieri poterit. Brevis etiam ad aliquot dies dilatio, grave peccatum non inducet, quia aliquot dierum mora nec gravem Deo injuriam, nec grave Pœnitenti damnum infert. Quodsi vel ad horam differens impositam implere pœnitentiam, gravi se tentationis, aut alterius peccati periculo exponat, graviter se reum faciet. Si vero nullum sit à Confessario determinatum tempus, quo imposita pœnitentia debeat adimpleri, hæc debet impleri quamprimum fieri potest. Ea siquidem legum est conditio, ut cum iis nullum est præfixum tempus, quam primum moraliter fieri potest, impleantur.

*Quæres 8vo: Utrum pœnitens impositam sibi à Confessario pœnitentiam, mutare possit?*

*Resp:* Pœnitens impositam sibi à Confessario pœnitentiam, nutu proprio, etiam in aliquid melius, mutare non potest, quia pœnitens utpote inferior, Confessarii sui, qui Superior & Judex ipsius est, sententiam variare nequit,

&



& præceptum illius adimplere tenetur. Præterea pœnitentia à Confessario imposita Sacramentalis est, ex Sacramento etiam vim satisfaciendi pro peccatis habet, pœnitentia vero licetsi major, à Pœnitente proprio nutu assumpta, Sacramentalis non est, neque ex Sacramento habet vim satisfaciendi. Imposita ergo à Confessario pœnitentia, nequit etiam in aliquod melius à pœnitente proprio nutu mutari.

Potest tamen impositam in confessione pœnitentiam mutare, sive idem Confessarius, qui eam imposuit, sive alter. Et id constat ex ipsa etiam praxi, sæpe namque Confessarii impositas pœnitentias mutant, cum à pœnitentibus vel admodum difficile, vel inutiliter, aut etiam periculose adimplerentur. Id autem semper fieri debet in confessione Sacramentali, ut sciat Sacerdos pro quibus peccatis nova injungenda sit pœnitentia, & illa Sacramentalis sit.

Hic quædam addenda & annotanda sunt. *1mo*: non posse mutari pœnitentiam semel impositam, nisi id iusta postulet causa, qualis est vel notabilis Pœnitentis utilitas, vel gravis in ea adimplenda difficultas, periculum eam negligendi, etiam ex sola Pœnitentis infirmitate proveniens, ac tandem evidens illius excelsus. Semper tamen aliquid prioris pœnitentiæ est relinquendum, ut prius Sacramentum integrum sit. *2do*: potest aliquando pœnitentia mutari, etiamsi id non expostulet Pœnitens, cum alia multo plus ei profutura censetur. *3tio*: non mutatur prior pœnitentia eo solum, quod idem, vel alius Confessarius audita eorundem peccatorum confessione, novam imponat, sed necesse est ut prior expresse revocetur. *4to*: non expedit ut Pœnitens obtenta pœnitentiæ sibi injectæ commutatione, novam deinceps deserat, & ad priorem redeat, quia ad minus dubium est, an id sine iudicio & consensu Confessarii, proprio nutu facere possit, & si posteriorem totaliter reliquerit, mutilum reddet posterius Sacramentum, quod sine piaculo gravi fieri nequit. *5to*: Non potest mutari pœnitentia sive ab eodem Confessario, nisi confusam saltem mente teneat, aut de novo à Pœnitente recipiat peccatorum notitiam, pro quibus illa assignata fuit, vel ab alio, nisi auditis peccatis, propter quæ imposita fuit. Secunda siquidem pœnitentia debet esse peccatis proportionata, & Sacramentalis, ad quod requiritur, ut imponatur pro peccatis Sacerdoti cognitis, & in confessione manifestatis. Neque tamen tunc requiritur accurata peccatorum



torum repetitio, sed ea tantum, unde Sacerdos statum Pœnitentis intelligere possit.

*Quæres gno: Quomodo pœnitens impositam pœnitentiam adimplere debeat?*

*Resp:* Debet illam adimplere. 1mo: in statu gratiæ, licet enim homo in statu peccati mortalis existens, nulum tamen ad illud retinens affectum, opera pœnitentiæ salutariter perficiat, iisque divinæ justitiæ satisfacere possit, semper tamen opera satisfactoria ab homine justo præstita, majoris sunt efficacæ. Quare cum Sacerdos longiorem alicui assignat pœnitentiam, aliquam determinet illius partem, quæ statim post Confessionem, absolvenda sit. 2do: pœnitentia Sacramentalis ex aliqua, ipsam adimplendi intentione, perfici debet. Unde cui injuncta est exg: parvi B. V. Mariæ officii recitatio, hancque quispiam adimplevit eadem hora, qua antea solitus fuerat persolvere, pœnitentiæ sibi impositæ plane immemor, ut recitatio hæc rationem Sacramentalis pœnitentiæ habeat, denuo fieri debet, & quidem cum aliqua saltem virtuali ad Pœnitentiæ Sacramentum, & factam sibi à Confessario injunctionem, relatione.

---

## CAPUT TERTIUM

*De Ministro Sacramenti Pœnitentiæ, ipsiusque obligationibus.*

### ARTICULUS I<sup>us</sup>

*De Ministro Sacramenti Pœnitentiæ.*

*Quæres 1mo: Quis est Minister Sacramenti Pœnitentiæ?*

*Resp:* Solus Sacerdos rite ab Episcopo ordinatus. Et id definitum est in Concilio Trident: Ses: 14. Can: 10: *Si quis dixerit, non solos Sacerdotes esse Ministros absolutionis, anathema sit:* Potestatem autem remittendi peccata, atque ab iis absolvendi Sacerdotes habent vi suæ Ordinationis, unde potestas Ordinis dicitur. Verum hæc non suffi-



sufficit, sed præterea, ut Sacerdos valide à peccatis absolvat, necessaria ipsi est potestas jurisdictionis. Unde Concilium Trident: Sess: 14. Cap: 7. sic inquit: *Quoniam natura, & ratio judicii illud exposcit, ut sententia in subditos dumtaxat feratur, persuasum semper in Ecclesia Dei fuit, nullius momenti eam absolutionem esse debere, quam Sacerdos in eum profert, in quem ordinariam, aut subdelegatam non habet jurisdictionem.* Jurisdictio enim est potestas, quæ in alium tanquam subditum exercetur, absolutio autem est sententia judicialis, quæ in sibi subiectum profertur, eum à vinculo peccatorum solvendo. Ut ergo valida sit, jurisdictionis potestatem prærequirit, & sine ipsa irrita omnino illa est. Quare potestas jurisdictionis à superioritate profluit, quemadmodum potestas ordinis ab Ordine promanat. Utraque igitur potestas & Ordinis, & jurisdictionis, Sacerdoti omnino necessaria est, ut valide in Sacramento Pœnitentiæ à peccatis absolvat.

*Quæres 2do: Quotuplex est jurisdictio?*

*Resp:* Jurisdictio duplex est, *ordinaria*, & *delegata*. Jurisdictio *ordinaria* illa est, quæ alicui competit ratione officii sui, & hanc habent omnes ii, qui ex officio sunt Pastores animarum, ac proinde Episcopus in sua Diœcesi, Parochus in sua Parochia, sed cum debita ad suum Episcopum subordinatione. Et hæc jurisdictio magis afficit personas loci, quam ipsum locum, unde Episcopus suos Diœcesanos, & Parochus suos Parochianos, ubique locorum possunt absolvere. Ad amovendum tamen scandalum, quod daret ignotus Sacerdos, in alterius Ecclesia confessiones audiendo, debet à loci Præposito licentiam petere.

Jurisdictio *delegata* illa est, quæ alicui ab habente ordinariam, committitur, vel *directe*, ut si Episcopus Sacerdotem quempiam approbet ad audiendas in sua Diœcesi Confessiones, vel *indirecte*, ut si Episcopus permittat alicui, ut confiteatur cui voluerit. Delegatus autem subdelegare nequit, quia potestatem habet sibi tantum concessam, non ut alteri eam committat. Quodsi ei expresse & specialiter concessum fuerit, ut subdelegare possit, tunc non suo, sed delegantis nomine censebitur subdelegare.

Sed etiam ut is qui ordinariam habet potestatem, subdelegare valeat, requiritur. *amo:* ut delegare non prohibeatur sive à jure, sive à consuetudine. Hinc Parochus nequit in sua Parochia simplici Sacerdoti concedere facultatem suorum Parochianorum excipere Confessiones, quia

id



id excedit limites ipsius officii, ratione cujus, Episcopo subiectus atque subordinatus est, & proinde sine ipsius licentia neminem ab eo non approbatum, possunt ad suorum Parochianorum audiendas Confessiones deputare. 2do: ut intra limites suæ jurisdictionis deleget, quia extra illos delegandi potestatem non habet. 3tio: ut delegatus delegari non prohibeatur, ut prohibentur illi, qui Censuris innodati sunt.

Jurisdictione autem delegata non expirat morte concedentis, aut dimissione officii, si sine ulla temporis limitatione ab illo concessa fuit, nec revocata ab eo qui illam concessit, aut ab ejus successore, vel illius Superiore. Potestas siquidem delegata ad excipiendas confessiones, est gratia. Porro gratia morte concedentis non expirat.

*Quæres 3tio: Quomodo jurisdictione acquiritur?*

*Resp:* Jurisdictione ordinaria acquiritur multis modis, scilicet ratione privilegii, & consuetudinis, ratione periculi mortis alicui imminentis, ac tandem ratione erroris communis. Et quidem 1mo: ratione officii, sic Parochus vi consecuti officii, jurisdictionem in suos Parochianos obtinet.

2do: Ratione domicilii, aut quasi domicilii, quia ex ratione domicilii, aut quasi domicilii, ordinariæ loci jurisdictioni quivis subditur. Qui enim in aliquo territorio degit etiam ad tempus, illius Parocho subiacet, ab eoque Sacramenta recipere valet, ne ad odum utilibus, ac necessariis salutis remediis diu privetur. Hinc qui in duobus Parochiis duo, pariter ferme moræ, habet domicilia, alterutri Parocho pro nutu confiteri potest, atque ei etiam intra ejus Parochiæ fines actu non versatur, licet diversæ sit Diæceseos. Unde etiam ordinarius Confessarius Mercatorum in Nundinis, Studentium in Scholis degentium, est ipse Parochus locorum, in quibus iidem commorantur, in iis namque quasi domicilium habent. Vagi quoque ac peregrini, quo in loco degunt, illius loci Parocho confiteri possunt.

3tio: Acquiritur jurisdictione per privilegium, aut per consuetudinem, quæ privilegio æquivalet, quia licetsi consuetudo jurisdictionem, quæ à Superiore provenire debet, conferre nequeat, est tamen indicium consensus sufficienter præstiti. Hinc possunt tam Prælati Regulares, quam Confessarii Regularium, audire Confessiones illorum Sæcularium, qui inibi sunt vere de familia & continui commensales: Prout decrevit Clemens 9nus Papa anno 1670.

Con-



Confessarius quoque quem Episcopus Monialibus sibi subiectis constituit, potest Confessiones excipere, & ipsarum Monialium, & commensalium quæ apud illas continuo degunt.

4to: Acquiritur cuilibet sacerdoti ad absolvendum à peccatis etiam reservatis, jurisdictio plena, ratione articuli mortis alicui imminentis, tunc enim ex concessione Ecclesiæ, ut docet Concilium Trident: Ses: 14. Cap: 7. *Omnes Sacerdotes, quoslibet pœnitentes, à quibusvis peccatis, & censuris absolvere possunt.*

5to: Acquiritur tandem jurisdictio ratione erroris, non quidem *privati*, qui paucorum est, sed *communis*, quo nempe tenentur omnes, aut pene omnes qui degunt in loco, ubi quis jurisdictionem exercet. Ut autem error communis jurisdictionem tribuat, requiritur ut junctus sit cum titulo colorato, qui videlicet pro vero, & legitimo publice habeatur, quamvis minime reipsa subsistat, veluti cum quis pro vero Parocho reputatur, functiones Parochi exequitur, licet reipsa Parochus non sit, quia Beneficium suum nulliter, propter simoniam, possidet. Tunc enim Ecclesia illum occultum defectum supplet, & ad impedienda multa, & magna Fidelium damna, jurisdictionem transeunter pro singulis casibus tribuit. Quare licetsi adsit error communis, desit vero titulus coloratus, jurisdictio non acquiritur. Unde si quis resciat se confessum esse Sacerdoti fallaci, qui falsas approbationis litteras finxit, tenetur eadem peccata denuo confiteri. Idem à fortiori dicendum est, si excipiens Confessionem naturali labore impedito, ut si Laicus se pro Sacerdote gerat, quia defectum hunc naturalem Ecclesia supplere nequit.

*Quæres 4to: Quot modis jurisdictio delegata acquiratur?*

*Resp:* Tribus modis acquiritur, ab homine, à jure, & à legitima consuetudine. Et quidem jurisdictio delegata acquiritur. 1mo: ab homine, cum is qui ordinaria gaudet jurisdictione, illam alteri committit, ut quotidie faciunt Episcopi, simplices Sacerdotes ad excipiendas Fidelium Confessiones approbando. 2do: à jure, quia jure canonico & Romanorum Pontificum indultis, multis concessum est, ut ad se concurrentes in Sacramentali Confessione absolvant, vel etiam ab eo, quem sibi elegerint, Confessario absolvantur. 3tio: à legitima consuetudine, ut autem legitima sit, debet esse saltem tacite approbata, approbatio enim etiam tacita, modo vere actualis, Superioris consensum



sum exhibet; qui tamdiu durat, donec ab eo revocetur. Sic ubi Episcopus notæ sibi non contradicit consuetudini, juxta quam vicini diversæ Diœceseos Sacerdotes sese mutuo in excipiendis fidelium Confessionibus adjuvant, datæ ab iis absolutiones validæ sunt.

*Quæres 5to: Quinam indigent Episcopi approbatione, ut fidelium Confessiones audire, & valide absolvere possint?*

*Resp.* Omnes tum Regulares, tum Sæculares Sacerdotes non habentes Beneficium, cui annexa sit animarum cura, indigent Episcopi approbatione, ut fidelium Confessiones audire illosque valide absolvere possint. Ita decrevit Concilium Tridentinum Ses: 23. Cap 15. *Quamvis præbyteri in sua ordinatione a peccatis absolviendi potestatem accipiant, d cernit tamen S. Synodus nullum etiam Regularem posse Confessiones sæcularium, etiam Sacerdotum, audire, nec ad id idoneum reputari, nisi aut parochiale beneficium, aut ab Episcopis per examen, si illis videbitur esse necessarium, aut alias idoneus judicetur, & approbationem, quæ gratis detur, obtineat, privilegio & consuetudine quacunque, etiam immemorabili non obstantibus.* Est autem approbatio consensus, & facultas Episcopi ut munus Confessarii exerceat is, quem ad id idoneum ipse judicaverit, & sine tali approbatione nullus, qui non habet Beneficium curatum, sive Sæcularis sive Regularis Sacerdos, nec licite, nec valide Confessiones audire, aut suos pœnitentes absolvere, potest. Cum enim ad valorem Sacramentalis absolutionis præter potestatem Ordinis requiratur potestas jurisdictionis, sive ordinariæ sive delegatæ, qui non habent ordinariam, habere debent delegatam, quæ communiter Episcopi approbatione conceditur.

Debet autem hæc approbatio esse. 1mo: Actualis, reipsa obtenta. Hinc non valet approbatio sperata, aut ratihabitio præsumpta. Quia ad validam Sacramentalem absolutionem requiritur jurisdictio actualis, quam non tribuit approbatio sperata, aut quæ facillime concederetur, si peteretur, neque etiam ratihabitio præsumpta. Unde absolutiones sic datæ ex sequenti Episcopi approbatione, ratihabitione, non conualescunt, quia non firmatur tractu temporis quod ab initio irritum fuit. Non est vero necessaria approbatio expressa, quæ scilicet verbis expressis, aut scripto datur, sed sufficit tacita, qualis esse censetur, cum Episcopus sciens, & noscens quid egatur, in id consentit, unde non est tacita concessio, dum res nescitur, & ignoratur. 2do: Debet esse signo aliquo exteriori declarata,



rata, approbatio enim pure interior, & consensus Episcopi nullo signo externo declaratus, non valet, quia potestas jurisdictionis quæ in tribunali Pœnitentiæ necessaria est, more humano conferri debet. 3tio: Debet concedi ab Episcopo loci, in quo audiuntur Confessiones, quare approbatus in una Diœcesi, non potest in alia Diœcesi confessiones audire, sine approbatione Episcopi illius Diœcesis. Quia approbatio ad audiendas confessiones, est actus jurisdictionis, quæ ad eos non extenditur, qui subditi non sunt. Porro alterius Diœcesis incolæ, non sunt subditi huic Episcopo, qui quempiam ad Confessiones audiendas approbavit, in eos ergo jurisdictionem exercere non potest, neque ulli, in ipsos eam delegare valet. Unde etiam Concilium Tridentinum simplicibus Sacerdotibus, atque Religiosis, ut Confessiones audire, suosque pœnitentes absolvere possint, statuit approbationem ab Episcopis esse necessariam, hoc numero plurali significare volens, in diversis Diœcesibus, diversas requiri Episcoporum approbationes, quapropter Alexander 7mus Papa oppositum damnavit. Imo etiam Sacerdos Sæcularis, ac Regularis in una Diœcesi approbatus, non potest valide absolvere in alia Diœcesi subditum Diœcesis in qua est approbatus, & ita constituit Clemens Papa 10. Constit; quæ incipit: *Superna*: ubi decernit: *Religiosos ab Episcopo ad Confessiones Sæcularium in sua Diœcesi audiendas approbatos, non posse in alia Diœcesi eos absque Episcopi Diœcesani approbatione audire, quamvis pœnitentes subditi sint ejus Episcopi, à quo ipsi religiosi jam fuerant approbati.* Idem dicendum est de Sacerdotibus Sæcularibus. Quia jurisdictio delegata, pendet in sui exercitio ab approbatione Episcopi illius loci, in quo confessiones audiuntur. Unde à contrario Sacerdos Sæcularis sive Regularis approbatus in una Diœcesi, potest in ea Confessiones audire, atque absolvere subditos alterius Diœcesis, pro qua non est approbatus, & quidem etiam à Casibus ibi reservatis, sed non reservatis in sua Diœcesi pro qua est approbatus. Et ita iterum decrevit Clemens 10. in laudata Constitutione his verbis: *Posse autem Regularem Confessarium in ea Diœcesi, in qua est approbatus, confluentes ex alia Diœcesi à peccatis in ipsa reservatis, non autem in illa, ubi ibidem Confessarius est approbatus, absolvere, nisi eosdem pœnitentes noverit in fraudem reservationis, ad alienam Diœcesim pro absolutione obtinenda migrasse.* Idem dicendum est de Sacerdote Sæculari ad audiendas Confessiones approbato, ob tacitum

Epi-



Episcoporum consensum, communi consuetudine firmatum, Hinc mercatores, litigantes, peregrini, & alii ex aliis etiam Diœcesibus ad Nundinas, aut lucrandas Indulgentias confluentes, possunt absolvi à Confessariis loci ubi confitentur, Nam jurisdictionio delegata locum afficit, & tales jure communi, & ex consuetudine ubique Episcopis nota, & tacite approbata, quoad Pœnitentiæ, & Eucharistiæ Sacramenta, jurisdictioni loci, in quo versantur, subjecti esse censentur.

*Quæres 6to: Qui non indigent Episcopi approbatio-  
ne ad audiendas fidelium Confessiones?*

*Resp:* Ad audiendas fidelium Confessiones speciali Episcopi approbatione non indigent. 1mo: qui actu Beneficium possident, cui animarum cura est annexa, sed hoc respectu suorum Parochianorum, & illorum qui ratione domicilii aut quasi domicilii in hac Parochia fixi, ipsis subjecti sunt quoad recipienda ab illis Sacramenta. Parochianorum, qui in eos ordinariam habet jurisdictionem, ac proinde delegata non indiget, & eo ipso ad audiendas suorum Parochianorum Confessiones censetur esse ab Episcopo approbatus, quod tale ei beneficium conferatur. Quare & Concilium Tridentinum à necessitate obtinendæ ab Episcopo, ad audiendas Confessiones approbationis, exemit eos, *qui parochiale beneficium obtinent.* Resignato autem Beneficio, jam Parochus neminem valide absolvere potest sine speciali Episcopi approbatione, quia cum jam non habeat Parochiale beneficium, jurisdictionio ipsius ordinaria celsavit. Verum ut Parochus extra suam Parochiam aliorum Parochianorum Confessiones audire possit, speciali Episcopi indiget approbatione, quia in illos cum non habeat jurisdictionem ordinariam, delegata omnino indiget, quæ cum ipsi ab eorum Parocho concedi nequeat, ab Episcopo haberi debet. 2do: Prædicta Episcopi approbatione non indigent Religiosi respectu Religiosorum sui Ordinis, sed sufficit iis approbatio sui Ordinis Prælati, quia cum Prælati Regulares, quales sunt Abbates exempti, Ordinum Generales, Provinciales, habeant jurisdictionem quasi Episcopalem in sibi subditos, illis ex jure communi, & antiquo competit facultas approbandi ad audiendas suorum Religiosorum Confessiones, & hac in re nihil Concilium Tridentinum innovavit. Verum Religiosus, sive à sui Ordinis Prælato, sive etiam ab Episcopo approbatus, non potest audire Confessiones alterius Ordinis personarum, nisi forte ipsi Religiosi, qui confiteri volunt, opportunitatem ad id



fuorum Prælatorum habeant licentiam. Sed itinerantes Religiosi, aut quacunq[ue] de causa extra Monasterium existentes, si sui Ordinis socium cui confiteri possint, non habeant, possunt cuicunq[ue] approbato Sacerdoti, sive Sæculari à suo Episcopo, sive Regulari à suo Prælato, confiteri. Et ita Benedictus 14<sup>us</sup> Tract: de Sacrificio Missæ libro 3. Cap: 11<sup>us</sup> concessit: *Cuilibet Regulari, sive Sacerdoti, sive Converso, dum extra Claustra moratur, cum bona uenia, & in loco ubi non alius quispiam ex eorum Ordine reperiatur facultatem confitendi peccata, & absolutionem recipiendi à quocunq[ue] Sacerdote, qui vel Sæcularis à suo Ordinario, vel Regularis à suo Superiore ad confessiones audiendas sit approbatus.* Et hanc facultatem extendit idem Pontifex etiam ad casus juxta Constitutionem Ordinis reservatos, & ad censuras in quas inciderint, addita tamen obligatione, ubi primum potuerint, coram suo Superiore sese sistendi, & novam ab illis casibus, & censuris absolutionem impetrandi.)

Sed etiam approbatione Episcopi non indigent Regulares respectu illorum quoque Sæcularium, qui in Monasteriis eorum, sunt continui eorum commensales. Et ita constituit Clemens romus Papa in Bulla quæ incipit *Superna*: his verbis: *In monasteriis ac etiam collegiis, ubi juxta instituta Regularia vivitur, posse tam Prælatos Regulares, quam Confessarios Regularium eorundem Monasteriorum seu collegiorum, audire Confessiones illorum Sæcularium, qui inibi sunt de familia, & continui commensales, non autem illorum, qui tantum ipsis deserviunt.* Censentur vero de familia else, & continui commensales, etiam qui ipsis Regularibus deserviunt, sed intra Monasteriorum septa resident, ac sub illorum obedientia vivunt, non quidem ratione voti, sed ratione servitutis pro qua, solario sunt stipati. Quare concessio Clementina ad illos tantum deservientes non extenditur, qui tantum deserviunt Monasteriis, sed in eis non sunt de familia, nec continui commensales, atque cum ceteris exteris Sæcularibus extra Monasteria habitant & vivunt.

*Quæres 7<sup>mo</sup>: Quæ annotanda, atque advertenda sunt, circa istam ab Episcopis dari solitam approbationem?*

*Resp:* Sequentia annotari & adverti debent. *amo:* potest Episcopus approbationem quoad tempus, locum & personas limitare. Quia approbatio, quam ad audiendas fidelium Confessiones, dat Episcopus, tota ab ejus dependet voluntate. Ergo illam quoad tempus, locum, & perso-



nas, limitare, ac restringere potest. Quare damnata est ab Alexandro 7. sequens propositio: *Non possunt Episcopi limitare, seu restringere approbationes, quas Regularibus concedunt ad confessiones audiendas, neque ulla ex causa revocare.* 2do: approbationem ad certum tempus datam, eo finito desinere, quia hæc est Episcopi approbantis voluntas, ac proinde sine obtenta approbationis proratione, datæ absolutiones nullæ sunt. 3tio: approbatio quæ datur sine limitatione temporis, permanet donec revocetur. 4to: approbatio ab Episcopo data, non expirat morte, aut celsione illius, quod etiam quotidiana constat praxi, alias grave, atque periculosum esset, si Sacerdotes quotquot in Diœcesi delegati sunt, simul omnes à potestate audiendi Confessiones exciderent. Et id quoad casus etiam reseratos locum habet.

*Quæres 8vo: Qui Monialium Confessiones excipere potest?*

*Resp:* Generaliter, ad audiendas fidelium Confessiones, ab Episcopo approbatus, Monialium cujuscunque Ordinis, sive Episcopo sint immediate subjectæ, sive Regularibus subditæ, si in illa approbatione expressa earum non sit facta mentio, Confessiones audire nequit. Ita constituit Clemens 10. Papa Constit: quæ incipit: *Superna*: his verbis: *Generaliter approbatus ab Episcopo ad audiendas personarum Sæcularium Confessiones, nequaquam censeri approbatus ad audiendas Confessiones Monialium sibi subjectarum, sed egere quoad hoc speciali Episcopi approbatione, atque approbatus pro audiendis Confessionibus Monialium unius Monasterii, minime audire posse confessiones Monialium alterius Monasterii.* Ibidem Confessarios extraordinarios semel deputatos, atque approbatus ab Episcopo ad Monialium confessiones pro una vice audiendas, haud posse expleta deputatione, in vim approbationis hujusmodi, illarum Confessiones audire, sed toties ab Episcopo esse approbandos, quoties casus deputationis contigerit. Quare non solum Sæculares Sacerdotes, & Parochi, in quorum Parochiis Monialium Monasteria sita sunt, generaliter ab Episcopo ad audiendas fidelium Confessiones approbati, non possunt Monialium excipere Confessiones, sed neque ipsi Regulares, etsi ipsis Moniales sint subjectæ, & illorum regimini subditæ, sed ad id opus est speciali, & expressa Episcopi destinatione, & approbatione.

*Quæres 9no: Quid sit casuum reservatio?*

*Resp:* Casuum, seu peccatorum reservatio, est sub-



tractio potestatis absolventi à certis peccatis, salva potestate absolventi ab aliis. Reservare autem certa peccata, potest non solum Papa in tota Ecclesia, sed etiam Episcopus in tota Diœcesi, atque etiam Prælati Regulares in suo Ordine. Qui autem generaliter ad audiendas Confessiones, approbati sunt, à reservatis valide absolvere nequeunt, quia pro talium absolutione necessaria potestate, jurisdictioneque carent.

*Quæres 10mo: Quænam requiruntur, ut peccatum quodpiam censeatur esse reservatum?*

*Resp:* Tria requiruntur. 1mo: Debet esse mortale, quia venialium reservatio inutilis foret, cum non sint necessario confitenda. Hinc peccatum nullatenus est reservatum, quoties à mortali excusetur, sive propter ignorantiam, sive ob defectum plenæ deliberationis, ut contingit in iis primis motibus, qui advertentiam ad lethale peccatum necessariam impediunt. Quare ut à Censuris, sic à reservatione excusare potest ignorantia, aut inadvertentia venialiter solum culpabilis. In casibus etiam Papæ reservatis, quidquid excusat à Censura, excusat etiam à reservatione, quia casus illi non nisi propter censuram reservari solent. Sed hic advertendum est, materiam, quæ secundum se levis est, vel etiam indifferens, ex circumstantiis tamen, & fine, quem sibi Legislatores præstituit, posse esse gravissimam, & prohiberi etiam sub censuris reservatis, quia nimirum viam aperit multis criminibus. Sic plures Episcopi, propter gravissimas causas, prohibuerunt Clericis popinas frequentare, chartarum ludos, licet chartis ludere, aliquando nullum sit peccatum, & temperanter in popina comedere, & bibere, non sit res per se mala.

2do: peccatum ut reservetur, debet esse externum. Alias per reservationem peccatorum interiorum injicere-tur intollerabilis fidelibus laqueus, qui sæpe sunt anxii an cogitationibus internis consenserint, vel non. Hinc Hæresis & Simonia mere mentalis, quamvis gravia coram Deo sint peccata, non contrahunt pœnas juris, quare qui intus, & in corde dicit: *Nullus est infernus:* à quolibet approbato Sacerdote absolvi potest. Secus si hæresim hanc dicto, aut facto, etiam nemine conscio manifestasset, elset enim jam peccatum externum, quamvis aliis ignotum. Quamvis autem peccatum externum, ex prava agentis intentione sit mortale, si tamen in opere externo sit veniale, ut si quis affectu libidinoso tangat manum Monialis, illud non erit reservatum. Quia ad reservationem requi-

ritur



ritur peccatum exterius mortale, cum itaque alterutrum deficit, nulla est reservatio, ac propterea cum actus exterior leve peccatum est, licet intentio agentis graviter sit peccaminosa, reservatio non incurritur.

3tio: peccatum reservandum debet esse in suo genere consummatum, quia reservatio, utpote pœnalis restringi debet, ac proinde opus nonnisi attentatum, sed non completum, non debet censeri esse reservatum. Hinc si reservatum sit homicidium, is dumtaxat reservationi subjacet, qui de facto occidit, non qui vulneravit, verberavit, sed mors secuta non est, aut secuta, sed non ex inflictio vulnere, verum ex inopinato casu, qui prævideri non poterat. Pariter si reservata sint, adulterium, incestus, qui hæc non plene exercuit, neque complevit, liber est à reservatione. Aliquando tamen reservantur etiam actus non consummati, sic sola provocatio ad duellum, & ejusdem acceptatio reservantur, etiamsi non sequatur conflictus. Peccatum tamen ante reservationem commissum, dum post factam reservationem illud quispiam confitetur, nonnisi ab illo Sacerdote absolvi potest, qui pro reservatis approbatus est.

Quæres 11mo: *Utrum peccata dubia censeantur esse reservata?*

Resp: Plurimi Theologi docent in dubio facti non contrahi reservationem, unde peccata dubia non censentur esse reservata. Quia reservatio est odiosa, ac proinde restringi debet ad casus certos, non extendi ad dubios. Ideoque qui dubitat an Clericus esset, quem percussit, reservationi non subjacet. Pariter qui admisit peccatum ex suo genere reservatum, sed dubitat, an illud admisit cum advertentia, vel consensu ad mortale sufficienti, non incurrit reservationem.

Sed in dubio juris, quod provenit ex ipsa ambiguitate legis, stat reservatio. Neque tunc Confessarius, qui non est pro reservatis approbatus, pœnitentem suum absolvere potest. Quia in Sacramento Pœnitentiæ jurisdictione ac potestate ad absolvendum dubia uti non licet. Cum vero occurrit casus de quo legitime dubitatur, propter ambiguitatem juris, an sit reservatus, an non, tunc in Confessario pro reservatis minime approbato, potestas absolvendi, jurisdictioque illius dubia est. Illa ergo uti nequit, neque tunc pœnitentem suum absolvere valet.

Quæres 12mo: *Quæ præterea circa reservationem casuum sciri debent?*

Resp:



*Resp:* Sequentia. *1mo:* Reservatio contrahitur etiam si invincibiliter ignoretur, nam non est proprie pœna, sed legis ordinatio, neque contumaciam ipsa in peccante requirit. *2do:* in materia reservationis valet istud: *Favores auge, restringas odia:* quia reservatio strictiori, quo pruden-ter potest, sensu, intelligi debet, & ejus tollendæ extendi potestas. Sic approbatus à Papa pro casibus reservatis, pro censuris etiam approbatus intelligitur, quia omnes pe-ne casus Pontificii, ratione censuræ eisdem annexæ, re-servantur. Sic etiam peccatum tunc solum reservatur, quan-do completum est. Verum hæc regula in pluribus fallit, qui enim ab Episcopo pro casibus reservatis approbatus est, non ideo à Censuris ab eo latis absolvere potest, & qui ab eodem habet jus eligendi sibi Confessarium, non ideo, si *communem*, hoc est: pro reservatis non approbatum eli-gat, à reservatis per eum absolvi poterit. *3tio:* in eadem materia non valet argumentum à fortiori, & eo magis non valet à pari. Hinc male quis arguet. Reservata est lectio librorum Hæreticorum, ergo à potiori reservata est auditi-o Concionis eorum. Potuit enim illa, non hæc prohi-beri, & reservari. *4to:* reservationem, adversus eos, qui ori-men exequuntur, latam, non afficere eos, qui crimen illud mandarunt, nisi ipsi mandantes lege reservationis compre-hendantur.

*Quæres 23tio: Qui possunt à reservatis absolvere?*

*Resp:* A casibus reservatis absolvere valet potestate ordinaria is, qui reservavit, ejus successor, & ipso in foro Pœnitentiæ Superior. Hinc Papa absolvere potest à Casibus, quos sibi Episcopi reservarunt. Non tamen Archiepi-scopus, qui est Episcopo superior, nonnisi in foro exteriori, non autem in foro interiori. Et hi etiam extra Sacramen-tum Pœnitentiæ possunt solam reservationem tollere, pro Sacramentali à peccatorum culpa absolutione, ad quemlibet Sacerdotem remittendo. Delegata vero potestate, à reser-vatis absolvere potest ille, qui ad hoc specialiter est ap-probatus ab eo, qui ordinariam in reservata habet pote-statem. Quia fidelium interest, ut qui reservat, faculta-tem à reservatis absolvendi communicare valeat, atque hæc est totius Ecclesiæ praxis. Jam vero hæc delegata potestas à reservatis absolvi, morte delegantis non cessat. Ce-terum cui datur delegata, imo etiam ordinaria quædam, ut Parochis, facultas audiendi Confessiones, non ideo da-tur potestas absolvendi à reservatis, sed hæc expresse, & specialiter concedi debet. Neque etiam cui datur gene-ralis



ralis facultas à reservatis absolvendi, ideo semper datur facultas ab universis prorsus reservatis absolvendi, quia aliquis nonnunquam sibi specialissime Episcopi reservare possunt casus. Tandem qui specialissimam à reservatis absolvendi habet facultatem, quoad Moniales illam exercere non valet.

Confessarius autem communis, seu à reservatis non approbatus, potest ex aliena Diœcesi confitentem, absolvere à reservatis etiam in illa Diœcesi peccatis, sive cum Censura, sive sine censura sint reservata, modo non sint reservata in hac Diœcesi, in qua ipse audit Confessiones, quodsi in hac Diœcesi in qua ipse Confessiones excipit, peccata, quæ pœnitens ex aliena Diœcesi adveniens, confitetur, sint reservata, quamvis in Diœcesi pœnitentis reservata non sint, non potest enim absolvere. Quia tota jurisdictio Confessarii ab illo Episcopo dimanat, in cujus Diœcesi confessiones excipit, alius Episcopus nec datam ipsi à suo Episcopo potestatem constringere, nec dilatare potest, ac proinde quemcunque sibi confitentem absolvere potest, si peccata in hac Diœcesi reservata non sint, licetsi alibi reservata sint, non potest absolvi si hic reservata sunt, quamvis alibi reservata non sint. Hic tamen duo advertenda sunt. 1mo: eos, qui ad alienam Diœcesim emigrant in fraudem reservationis, ut absolutionis obtinendæ difficultatem, & correctionis severitatem effugiant, non possunt absolvi, quamvis in ea Diœcesi, ad quam confessionis causa venerant, eadem peccata non sint reservata. Non censetur vero in fraudem reservationis venire, qui more communi, exg. occasione festi sollemnis, Indulgentiarumque, vicino alterius Diœcesis Sacerdoti confitetur. Parochus tamen, sui parochiani extra suam Diœcesim excipiens Confessionem, potest eum absolvere etiam à peccatis ibi reservatis, ubi transeunter ipsius audit Confessionem, quia tota ejus absolvendi potestas non provenit ab Episcopo loci in quo tunc sui parochiani excipit confessionem, sed illam habet ex suo officio, ac Beneficio, quod possidet. 2do: à censura quæ dicitur ab homine, & quæ per specialem sententiam in aliquem fertur, in aliena Diœcesi absolvi nemo potest, quia ubique ipsa ille constringitur.

Quæres 24to. Utrum à communi Confessario absolvi possit, qui hic & nunc absolvi indiget, quia ei gravis incumbit celebrandi, aut communicandi necessitas, & peccato



*to reservato onustus, non habet Confessarium pro reservatis approbatum?*

*Resp:* In tali casu reservato peccato onustum, à communi Confessario absolvi non polse, quia illa absolutio foret nulla, cum ejusmodi Confessario desit potestas absolvendi. Quare qui tali casu gravis necessitatis celebrandi, vel communicandi constrictus est, elicitò fervido contritionis actu, poterit celebrare, aut communicare, quia tunc ei copia Confessarii deesse censetur, sed à communi Confessario absolvi nequit. Neque etiam tunc *communis* Confessarius poterit directe absolvere à peccatis non reservatis, & indirecte à reservatis, cum enim unum peccatum mortale sine alio remitti nequeat, nullatenus potest pœnitens absolvi à non reservatis, quin simul absolvatur à reservatis, ab his autem absolvere communis Confessarius nequit, quia in ea potestatem non habet, ergo neque absolvere potest à non reservatis. Hinc etiam qui apud *communem* Confessarium peccata deposuit, & reservati inculpabiliter oblitus est, istud si in memoriam redeat, Sacerdoti pro reservatis approbato aperire debet, quia legi reservationis non satisfecit, atque reservatio non est sublata. Quodsi pœnitens apud Sacerdotem pro reservatis approbatum confessus sit, unanimiter Theologi cœnent, reservationem tunc esse sublatam, adeoque latis esse ut peccatum illud *communi* Confessario declaratur. Attamen si illa confessio apud approbatum pro reservatis facta, fuisset culpabiliter nulla, videlicet quia voluntarie grave aliquod celavit peccatum, reservatio non est sublata, quia pro reservatis approbatus non potest reservationem tollere, nisi Sacramentaliter à peccatis absolvendo. Cum igitur absolutio illa irrita sit, & nulla, reservatio non est sublata.

*Quæres 2to: Quomodo se gerere debet communis Confessarius, qui quempiam à reservatis peccatis incaute absolvit?*

*Resp:* Irrita est, & nulla hujusmodi absolutio, quia Confessario defuit absolvendi potestas, quare talis Confessarius curare debet, ut caute præmoneat Pœnitentem erroris à se commissi. Quodsi id præstare tuto nequeat, Pœnitentem bonæ fidei relinquere debet, spe consequendæ ab ipso justificationis in subsequenti confessione. Ille siquidem in subsequenti confessione, & à non reservatis, quæ tunc deponet, directe absolvetur, & indirecte à reservatis, quæ jam confessus est, & quorum amplius conscientiam non habet. Alias, reservatio non in utilitatem, sed in  
da.



damnum fidelium cederet. Tunc ergo censetur Ecclesia defectum potestatis supplere.

*Quæres abto: Quotuplicis sunt generis casus reservati?*

*Resp:* Duplicis sunt generis, alii sunt Papæ, alii Episcopo reservati. Casus Papæ reservati alii in Bulla *Cœnæ Domini* continentur, alii extra illam positi sunt. Et horum accuratam notitiam quilibet Confessarius habere debet, ne forte ultra competentem sibi potestatem in Sacramento Pœnitentiæ agat, & eum absolvat, quem absolvere nequit. Casus autem Papæ reservati, & in Bulla *Cœnæ Domini* contenti, sunt sequentes, qui etiam in Rituali Provinciali describuntur, latæ siquidem sunt in prædicta Bulla Excommunicationes soli Papæ reservatæ.

*1ma:* contra Hæreticos cujuscunque sectæ, eorum fautores, defensores, eorum libros hæresim continentes, vel de religione tractantes, scienter legentes, aut retinentes, imprimentes, nec non Schismaticos, & eos qui se à Romani Pontificis obedientia pertinaciter subtrahunt, & recedunt.

*2da:* contra eos, qui Christianorum quorumcunque navibus tempestate jactatis, vel quocummodo naufragium passis, sive in ipsis navibus, sive ex eisdem eiecta, in mari, vel in littore inventa, cujuscunque generis bona, in cujuscunque maris regionibus & littoribus surripuerint.

*3tia:* contra falsarios litterarum Apostolicarum, etiam in forma brevis, ac supplicationum, gratiam, vel justitiam concernentium, per Romanum Pontificem, aut de mandato ejusdem signatarum, nec non contra fabricantes litteras Apostolicas, etiam in forma brevis, & etiam falso signantes supplicationes hujusmodi sub nomine Romani Pontificis, seu Vicecancellarii, aut vices prædictorum gentium.

*4ta:* contra interficientes, mutilantes, vulnerantes, detinentes, seu deprædantes Romipetas, seu peregrinos ad Urbem Romam causa devotionis, seu peregrinationis accedentes, & in ea morantes, vel ab ipsa recedentes, & in his dantes auxilium, consilium, favorem.

*5ta:* contra interficientes, mutilantes, vulnerantes, percutientes, capientes, carcerantes, detinentes, vel hostiliter insequentes S. R. E. Cardinales, ac Patriarchas, Archiepiscopos, Episcopos, sedisque Apostolicæ legatos, vel Nuncios, aut eos à suis Diœcesibus, territoriis, terris, seu dominiis ejicientes, nec non ea mandantes, vel rata habent-



habentes, seu præstantes eis qui talia perpetrant, auxilium, consilium, favorem.

*6ta*: contra eos, qui ad Romanam curiam pro eorum causis, & negotiis recurrentes, eorum advocatos, Procuratores, vel Judices super his deputatos, offendunt, mutilant, occidunt, verberant, aut bonis spoliant, aut executionem litterarum Apostolicarum, sive aliarum expeditionum impediunt, & ad gratias impetrandas accedentes prohibent, ac etiam contra appellantes à gravamine, vel futura litterarum Apostolicarum executione ad laicam potestatem. Demum contra Officiales Principum Sæcularium, & Prælatos Ecclesiasticos, qui causas Ecclesiasticas, à Judicibus Apostolicis avocant, & actores ad revocanda impetrata compellunt.

*7ma*: contra Judices Sæculares, qui personas Ecclesiasticas, præter Juris Canonici dispositionem ad suum tribunal trahunt, vel trahi faciunt, quique Ecclesiasticam libertatem tollunt, lædunt, deprimunt, unde quarumcunque Ecclesiarum juribus, quomodolibet præjudicatur.

*8va*: contra impediētes Prælatos Ecclesiasticos, ne sua Ecclesiastica jurisdictione utantur, ac contra eos, qui illorum, ac delegatorum judicia eludunt, ad Curias sæculares recurrunt, contra illos prohibitiones, mandata, procurant, exequentur, aut in his consilium, auxilium, favorem, præstant.

*9na*: contra usurpantes quarumcunque Ecclesiarum jurisdictiones, fructus, redditus, proventus, aut eos sequestrantes. Pariter contra Judices Sæculares in Causis criminalibus contra personas quascunque Ecclesiasticas, se interponentes, processando, sententias proferendo, aut exequendo.

Sunt quoque alii Casus, illisque annexæ Excommunicationes Papæ reservatæ extra Bullam *Cænæ Domini*: positæ, ex quibus præcipuæ, quarum notitia Confessariis necessaria est, hic breviter, & compendiose annectuntur.

*1ma*: Contra eos, qui violentas manus in Clericum vel Monachum injecerint.

*2da*: Contra Sacrilegos, qui cum effractione spoliant Ecclesias.

*3tia*: Contra Simoniacos, in Beneficiis, sive Ordinibus Simoniam committentes, & eorum mediatores. Similiter contra accipientes, & retinentes aperte, vel occulte, quæcunque Beneficia in confidentiam. Ac tandem con-

tra



tra accipientes aliquid ex fructibus Beneficii vacantis, in collatione, aut provisione eorum.

4ta: Contra alienantes bona Ecclesiastica in detrimentum Ecclesiarum, piorumque locorum. Pariter contra consentientes usurpationibus istiusmodi. atque etiam contra occupantes bona, & census Ecclesiarum, & piorum locorum.

5ta: Contra violatores immunitatis Ecclesiasticæ, cum in loco sacro aliquis, in rebus, vel in persona offenditur, vel extrahitur de Ecclesia.

6ta: Contra eos, qui inducunt aliquem ad vovendum, aut jurandum, de eligenda vel de electa non mutanda sepultura in suis Ecclesiis.

7ma: Contra Religiosos administrantes Sacramenta Extremæ Uctionis, vel Eucharistiæ vel Matrimonia sollempnizantes, sine licentia Parochorum.

8va: Contra absolventes sub prætextu Privilegorum, à Casibus Bullæ Cœnæ Domini: aliisque Casibus Papæ & Loci - Ordinario reservatis.

9na: Contra fœminas ingredientes Clausum Monasteriorum Regularium. Item contra fœminas, sive masculos ingredientes septa Monasteriorum Monialium prætextu licentiarum in casibus non necessariis.

10ma: Contra simulantes, & fingentes se alios esse pro Beneficiis in Dataria Romæ obtinendis. Item contra mentientes personas in litteris Apostolicis, ut earum expeditionem gratis alsequantur.

Sed sunt præterea alii casus Papæ reservati, qui tamen rarius in his Regionibus occurrunt, idcirco Confessarius ad Episcopum recurrere debet, si forte quosdam in Pœnitentibus suis detegerit casus iis similes, qui hic enumerati sunt, Maxime tamen advertendæ sunt sequentes Excommunicationes latæ, & Papæ reservatæ.

11ma: Contra pugnant s in duello, eidem adstantes, ad ipsum provocantes, illud consulentes, acceptantes, quamvis ipsa pugna non subsequatur.

12da: Contra eos qui mercimonia exercent super stipendiis, atque eleemosynis Misarum, hoc est, qui stipendia Misarum colligunt in iis locis in quibus majoria sunt prætîi, Misas vero celebrare curant in locis, in quibus pro minori prætîo celebrari solent. Et hanc mercimoniam exercentes si Laici sint, Excommunicationem, si Ecclesiastici, suspensionem, Romano Pontifici reservatas incurrunt.

13tia:



3tia: Contra illos Sacerdotes, qui suos, in peccato turpi, & inhonesto contra Sextum Decalogi præceptum commisso complices, absolvunt. Hæc enim & nulla, atque irrita est absolutio, nisi in articulo mortis, & qui suum, extra casum extremæ necessitatis, nimirum in ipso mortis articulo, & deficiente tunc quocunque Sacerdote, qui munus Confessarii obire possit, absolvit complicem, Excommunicationem incurrit Papæ reservatam.

4ta, Tandem qui innoxios Sacerdotes apud Ecclesiasticos Judices falso sollicitationis ad turpia in Confessione sibi factæ insimulant, à nullo, nisi à Romano Pontifice, excepto mortis articulo, absolvi possunt.

Quæres 7mo: Quæ circa Casus Papæ reservatos scitu digna, ac notatu necessaria sint?

Resp: Sequentia scitu digna, atque notatu necessaria sunt. 1mo: Casus qui per Bullam *Cænæ Domini*: Papæ sunt reservati, specialiter ipsi esse reservatos, unde qui generalem habet facultatem absolvendi à Casibus Papæ reservatis, non ideo potest absolvere à casibus in Bulla *Cænæ Domini* contentis. Imo etiam ex casibus hujus Bullæ, hæresis specialius censetur esse reservata, adeo ut necesse sit, quod in data facultate absolvendi à Casibus *Cænæ Domini*: hæresis expresse ponatur, alias ab illa non poterit Confessarius absolvere, qui generatim concessam sibi habet facultatem à Casibus *Cænæ Domini*: absolvendi. Sed insuper relapsus in hæresim adhuc specialissime est Papæ reservatus, quapropter, ut quis ab eo absolvere possit, specialissima indiget facultate, unde qui potest ab hæresi etiam absolvere, non continuo potest absolvere à relapsu in hæresim, nisi hoc ei expresse, & distinctim concessum fuerit. Est autem relapsus in hæresim, quando quis, postquam pœnitens errores abjuravit, iterum in hæresim relabatur.

2do: A casibus Papæ reservatis si occulti sunt, possunt Episcopi absolvere. Ita constituit Concilium Trident: Sess: 24. Cap: 6. *Liceat Episcopis in quibuscunque Casibus occultis etiam Apostolicæ Sedi reservatis, delinquentes quoscunque sibi subditos in Diœcesi sua, per se ipsum, aut Vicarium ad id specialiter deputandum, in foro conscientie absolvere.* Hoc tamen non extenditur ad casus Papæ reservatos, qui in Bulla *Cænæ Domini*: continentur. Et id manifestum est ex verbis ipsius Bullæ *Cænæ*, ubi expresse adempta est Episcopis facultas absolvendi à Casibus in ipsa contentis, & reservatis, quomodocunque etiamsi per  
cujus.



cujuscunque Concilii decreta prius concessa fuerit, sic enim in eadem Bulla Papa constituit. *Ceterum à prædictis sententiis nullus per alium, quam per Romanum Pontificem, nisi in mortis articulo constitutus, absolvi possit, etiam prætextu quorumvis facultatum, & indultorum, per Nos, & dictam sedem, ac cujusvis Concilii decreta concessarum, & innovatarum:* atque hoc declaratum est à Romanis Pontificibus Pio 5to, Gregorio 13tio, & Clemente 8vo. præterea Congregatio Concil: Trident: anno 1644. die 5. 9bris sic ultimo decrevit: *Congregatio censuit huic decreto Concilii Trident: Sess: 24. Cap: 6. de Refor: non tantum in crimine hæresis, sed in omnibus casibus comprehensis in Bulla Cœnæ Domini, esse derogatum.* Quare in Casibus occultis Papæ reservatis, quæ extra Bullam *Cœnæ Domini:* positi sunt, possunt Episcopi sive per se, sive per Vicarium specialiter delegatum in foro conscientiæ absolvere. Quodsi istiusmodi casus publici fuerint, ab iis Episcopi absolvere nequeunt. Neque etiam possunt Episcopi absolvere à Casibus intra Bullam *Cœnæ Domini:* contentis, etiamsi occulti sint, quia hæc in re omnis potestas ipsis per prædictam Bullam ablata est. Verum tamen potest Episcopus resipiscentem hæreticum, aut sponte coram se comparentem, aut etiam ad suum forum quomodo deductum, pro utroque foro absolvere, vel per se, vel per alium. Ita Benedictus 14. libro 9. Cap: 4. de Synodo Diœcesana.

3tio: A casibus Papæ reservatis Episcopi absolvere possunt, quando impossibilis, aut valde difficilis est accessus ad Romanum Pontificem. In hoc autem eventu absolvere Episcopi valent ab omnibus censuris, & casibus Papæ reservatis, etiam in Bulla *Cœnæ Domini:* contentis, etiam hæresi, sive delicta hæc publica sint, sive occulta. Tunc vero reputatur aut impossibilis, aut valde difficilis accessus ad Romanum Pontificem, quando adest periculum mortis, læsionis, gravis infirmitatis in via, gravis debilitas, ætas senilis, aut juvenilis, exercendi officii alterius potestati subiecti necessitas, obligatio alendi filios, & filiorum obediendi parentibus, tandem famineus sexus. Hæc sunt impedimenta quæ valde difficilem reddunt accessum ad Romanum Pontificem, & propter hæc à Casibus ipsi reservatis, sive occultis, sive publicis, etiam in Bulla *Cœnæ Domini:* contentis, ab ipsa quoque hæresi, Episcopi absolvere possunt. Impediti vero personaliter adire Romanum Pontificem, & qui physice, vel moraliter præ  
senio



senio, sexu, infirmitate, bello, statu, conditioneque sua, similibusque de causis id præstare nequeunt, non tenentur mittere Procuratorem, aut scribere ad sacram Pœnitentiarum pro obtinenda absolutione à casibus Papæ reservatis, quia id iura non exigunt, sed tantum requirunt, ut tunc ad Episcopum recurrant, & ipsi se sistant, a quo absolvantur. Qui tamen tunc propter occurrentia impedimenta, ab Episcopo absolvuntur, his cessantibus, tenentur se Romano Pontifici præsentare, non ut ab eo absolvantur, quia jam absoluti sunt, sed ut legi statutæ satisfaciant.

*Quæres 18vo: Qui sunt casus Episcopo reservati?*

*Resp:* Sunt casus alii jure communi Episcopo reservati, alii per statuta Synodalia, alii denique per edicta ab Episcopis promulgata. Verum juxta præsentem disciplinam Episcopi dum in scriptis ad audiendas fidelium Confessiones approbationes suas concedunt, solent statim exprimere Casus sibi reservatos, à quibus potestatem absolvendi, sibi tantum retinent.

Porro Regulares, qui vi suorum Privilegiorum, quæ ipsis Romani Pontifices concesserunt, licetsi possint absolvere à nonnullis Casibus Papæ reservatis, non possunt tamen absolvere à casibus quos sibi Episcopi reservarunt & id eo usque certum est, ut Alexander 7mus hanc damnaverit propositionem: *Mendicantes possunt absolvere à casibus Episcopo reservatis, non obtenta ad id Episcoporum facultate.*

*Quæres 19no: In articulo mortis utrum omnis cessat reservatio?*

*Resp:* In articulo mortis omnis cessat reservatio, unde quilibet Sacerdos, etiam ad Confessiones audiendas non approbatus, ab Ecclesia nominatim excommunicatus, degradatus, schismaticus, vel hæreticus, quemlibet pœnitentem, à quovis peccato absolvere potest. Id patet ex Concilio Tridentino Sess: 14. Cap: 7. ubi sic habetur: *Pie admodum, ne hac ipsa (casuum reservatorum) occasione aliquis pereat, in Ecclesia custoditum semper fuit, ut nulla sit reservatio in articulo mortis, atque ideo omnes Sacerdotes, quoslibet pœnitentes à quibusvis peccatis & censuris, absolvere possunt.* Quemadmodum ergo in articulo mortis quoslibet pœnitentes etiam excommunicatos absolvere licet, ita etiam omnes Sacerdotes, excommunicati, degradati absolvere possunt, ne scilicet aliquis periret.

Per articulum autem mortis intelligitur grave, ac  
mora-



morale mortis periculum. Nam articulus mortis, & morale illius periculum, in hac materia ab Ecclesia pro eodem usurpantur. Unde & Rituale Romanum titulo de Pœnitentiæ Sacramento sic habet: *Si vero quis confiteatur in periculo mortis constitutus, absolvendus est ab omnibus peccatis, & censuris, quantumvis reservatis, cessat enim tunc omnis reservatio.*

Certe pia mater Ecclesia non censetur velle quemquam exponi probabili periculo damnationis. Porro in articulo mortis, stricte illud sumendo, quando jam vita desperata est, sæpe, imo fere semper fieri nequit confessio, nec recte disponi valet pœnitens ad sacramentalem absolutionem recipiendam. Quare in periculo mortis constitutus is censendus est, de quo incertum est, an de infirmitate sua evadere potest. Quoti enim ea incertitudine delusi, vel nullam darent moribundo absolutionem, vel tunc tantum darent, cum salutaribus destituta monitis multo minus proficesset.

Si tamen in periculo, & articulo mortis, adsit Confessarius approbatus, qui promptus sit ad Confessionem excipiendam, probabilius est, non posse simplicem Sacerdotem absolvere, quia tota ratio propter quam conceditur simplici Sacerdoti facultas tunc absolvendi, est, ut dicit Concilium Tridentinum, *ne aliquis pereat*, scilicet non absolutus, propter defectum Confessarii approbati. Cessante ergo tali necessitate, cum adest Confessarius approbatus, Sacerdos non approbatus absolvere moribundum non poterit. Si tamen simplex Sacerdos jam incepisset Confessionem, quando approbatus supervenit, is potest illam continuare, quia legitima potestas qua inchoata fuit Confessio, non expirat, nec interrumpitur propter adventum approbati Sacerdotis. Similiter si quando is qui approbatus est, nollet audire Confessionem, simplex Sacerdos potest audire, & absolvere.

Hic duo notari debent. *imo:* Absoluti in periculo mortis à casibus reservatis, qui habent censuram annexam, si convalescant tenentur Papæ, vel Episcopo respective se præsentare, mandata ipsius humiliter susceperunt & parti læsæ prout justitia fuserit, satisfacturi. Quodsi elapso mortis periculo, cum commode possint, non se Papæ, vel Episcopo præsentaverint, & parti læsæ, in quantum possunt, satisfacere renuant, reincident in Excommunicationem. Absoluti vero in mortis periculo à casibus reservatis, qui nullam habent annexam censuram, si convales-



valescant, non tenentur se præsentare Superiori qui illos casus sibi reservavit. Quia jus in articulo mortis à reservatis absolutis, tunc solum onus præsentandi se ei, cui casus reservati sunt, imponunt, quando illi reservati casus annexam habuerunt censuram. non vero quando casus reservati sunt sine censura,

2do: Sacerdos, si complex illius in turpi, & inhonesto peccato, in periculo mortis versetur, non potest se ad audiendam illius confessionem ingerere, imo omni industria curare debet ut alius Sacerdos advocetur, etiam simplex & non approbatus, quæ si neglexerit, & ipse se ingesserit ad audiendam complicitis Confessionem, valida quidem est data ab ipso absolutio, verum ipse sic suum absolvens complicem, incurrit Excommunicationem Papæ reservatam. Quodsi omnem adhibuerit diligentiam, ut alius advocaretur Sacerdos ad excipiendam complicitis Confessionem, & minime reperiri poterat, aut alius advocari non poterat sine gravi scandalo, & infamia, tunc perinde est ac si nullus alius adesset Sacerdos, atque eo in casu suum ipse complicem & valide, & licite absolvere posset, neque Excommunicationis Papæ reservatæ, reus efficeretur. Ita decrevit Benedictus 14. in Bulla: *Apostolici muneris*.

## ARTICULUS 2dus

### *De Obligationibus Confessariorum.*

*Quæres 1mo: Quæ sunt obligationes Confessariorum?*

*Resp:* Duæ sunt præcipuæ Confessariorum obligationes, 1mo. Ut distinctam & accuratam peccatorum quoad numerum, species, & circumstantias à pœnitente eliciat confessionem. 2do: Ut solvat pœnitentem, qui solvi debet; sacramentalem largiendo absolutionem illi, qui ad eam recipiendam rite dispositus est, & liget qui ligandus est, illi absolutionem denegando, cui aut periculose, aut inutiliter concederetur. 3tio: Ut inviolabile Sacramenti Pœnitentiæ secretum exactissime, & strictissime servet.

*Quæres 2do: Quæ faciendæ sunt Confessario, ut accuratam, & exactam à pœnitente eliciat confessionem?*

*Resp:* Tenetur pœnitentem diligenter examinare de specie, numero, circumstantiis peccatorum, inquirere debet peccatorum causas, habitus, atque consuetudines occasio-



occasioneseque illorum proximas. Unde Confessarius certam, in interrogationibus pœnitenti faciendis, methodum sequi debet, cujus ope singula Dei mandata, præcepta Ecclesiæ, delicta capitalia, obligationes statui pœnitentis annexas, decurrat. Ad unumquodque peccatum mortale, inquirere debet Confessarius, quoties admissum fuerit, quoties animo propositum? Unde Concilium Lateran: 4. Cap: 21. inquit: *Sacerdos sit discretus, & cautus diligenter inquirens & peccatoris circumstantias, & peccati.* Quare sæpe necesse est interrogare pœnitentes de statu, ætate, officio. Non sunt autem pœnitentes interrogandi nisi de peccatis quæ verisimiliter committere poterant, & quæ communiter committi solent à personis ejusdem ætatis, sexus, & conditionis. Non omnes autem eodem modo examinandi, & interrogandi sunt, sed modo cuique accommodato. Sic ceteris paribus, magis examinandi sunt rudes, imperiti, quam periti ac timorati, item plus interrogandi sunt, qui raro, minus qui frequenter confitentur. Cautio autem magna adhibenda est in examine de peccatis luxuriæ instituendo, ne scandalisetur pœnitens, & mala quæ ignorat, doceatur cum periculo ea deinceps perpetrandi. Quare quærendum est à pœnitente primum generaliter, num menti ipsius irrepserit turpis aliqua cogitatio, num opere aliquid inhonesti admiserit? Si affirmaverit, ulterius progrediendum erit, gradatim ad particularia descendendo. Cavendum tamen Confessario est, ne inutilia à suo pœnitente exploret, ne fortunam, nomen ejus exquirat,

*Quæres 3tio: An, & quando Confessarius suo pœnitenti absolutionem dare debeat?*

*Resp:* Danda est absolutio pœnitenti, quem Confessarius moraliter judicat rite esse dispositum. Sicut tamen quæ hodie proficisset medicina, ad aliquos dies differtur aliquando, quia creditur magis profutura, sic et quandoque jam dispositis potest ad aliquod tempus suspendi absolutio, cum prudenter judicatur futurum hinc, ut magis pœnitens à peccando revocetur, nec vereri est, ne animo concedat, aut nimium affligatur. Differenda vero est absolutio iis omnibus, quorum nulla est, aut dubia dispositio, quare Confessarius maxime scrutari debet dispositiones sui pœnitentis, *quasi Medicus vulnus, & judex causas*, ut ait S. Thomas Doctor: Nulla autem, aut saltem dubia est dispositio eorum, qui vel in occasione pro-



xima peccandi, vel in criminis habitu versantur, qui scitu necessaria ignorant, illaque addiscere negligunt.

*Quæres 4to: Quibus differenda est absolutio, propter ignorantiam rerum, quæ scitu omnino necessariæ sunt?*

*Resp:* Neganda, & differenda est absolutio iis, qui præcipua fidei mysteria, Dei, & Ecclesiæ præcepta ignorant, atque illa addiscere negligunt. Et ideo damnata est ab Innocentio primo sequens propositio: *Absolutionis capax est homo, quantumvis laboret ignorantia Mysteriorum fidei, & etiamsi per negligentiam etiam culpabilem nesciat Mysteriorum SS. Trinitatis & Incarnationis Domini Nostri.* Hinc S. Carolus Borro: in instruct: Confels: ita præclare docet: *Si Confessarius pœnitentem reperiat istorum omnium ignarum, nec ad ea quam primum discenda dispositum, non debet eum absolvere. Imo si ad ea discenda se paratum exhibuerit, si alias à Confessario suo, vel eodem, vel diverso, aut à suo Parocho sit admonitus, nec debitam diligentiam adhibuerat, ut ea secundum ingenii sui modum, captumque adlisceret, differatur illi absolutio, donec huic obligationi aliqua saltem ex parte fecerit satis. Si vero ea de re nusquam antea monitus fuerit (modo aliunde sufficienter dispositus sit) absolvat, præmissa semper instructione de his rebus necessaria, ut sit in præsentiarum absolutionis capax.* Si tamen quis in periculo mortis constitutus, accuset se, quod primaria fidei Mystéria quæ necessario necessitate medii credenda sunt, addiscere neglexerit, ea hic & nunc edoceri nequeat, poterit quidem absolvi, quia pie credendum est, Spiritum S. qui ad hujus ignorantie confessionem, & detestationem moverat, id per se edocere, quod jam homo docere nequit, sed tamen absolutio dari debet sub conditione, si capax es, quia quorum fides necessaria est, ad salutem necessitate medii, sine eorum fide explicita nemo justificari potest, qui autem illa ignorat, fidem eorum non habet. Justificari ergo non potest. Ex hoc vero manifeste consequitur iterari Confessiones factas ab eo, qui præcipua fidei nostræ Mystéria, quæ necessitate medii sciri & credi debent, ignorat. Quodsi ignoraverit solum ea, quæ ex necessitate præcepti scienda, & credenda sunt. Videndum an ignorantia illa invincibilis & inculpabilis fuerit, an non? Si *num:* necesse non erit ut iterentur præteritæ Confessiones. Si *2um:* iterandæ erunt factæ in tali statu confessiones, & accusandum præterea hujus ignorantie peccatum. Idem faciendum est, quando Confessarius pruden-



prudenter dubitat an ignorantia pœnitentis graviter fuerit culpabilis, quod semper suspicari debet, quando neglectæ fuerunt Conciones, Catechismi, propter incuriam salutis, atque desidiam.

Si pœnitens adeo hebes sit, ut necessaria etiam necessitate medii addiscere non valeat, explorandum erit, an hebetudo illa oriatur ex prava cordis dispositione, quæ mentis oculum obscurat? an ex ingenii debilitate, & imbecillitate? Si *primum*: quod sæpe contingit, atque inde provenit, ut homo, dum etiam splendide de terrenis rebus discurret, in iisque satis sit perspicax, in spiritualibus, & quæ salutem animæ ejus concernunt, plane sit cæcus, sensim ergo debet excuti pessimus ille animi affectus, atque torpor. Si *secundum*: Confessarius nulli labori parcere debet, ut hisce rudibus, fidem obtinendæ salutis, omnino necessariam, inculcet, scitu necessaria quoquomodo eos doceat. Quodsi post repetitas Catecheses, perseveret illa mentis hebetudo, & pœnitens sincerum addiscendi necessaria demonstret studium, ac præterea christiane vivat, à vitiis declinet, quamvis fidei mysteria sub consuetis locutionum formulis profiteri nequeat, non videtur omnino Sacramentis privandus, quia stabilis Christianæ vitæ professio, interioris fidei signum est. Neque etiam iis, in quibus senium hebetudinem parit, subtrahenda esse videntur Sacramenta, si constet quod congruam prius Mysteriorum habuerint notitiam, & Christiane conversentur. Nec est quod Confessarius moras faciat, spe futuri profectus, quia illa intellectus debilitas crescit cum tempore. Attamen senes, qui diu in oblivione Dei vixerunt, interrogari debent circa primaria fidei capita & articulos præcipuos, quia constat, eos non raro Catechismi prorsus esse ignaros. Pariter neganda est absolutio iis, qui curam aliorum gerunt, quales sunt Patres familias, ac Domini, permittunt tamen ut à suis famulis, filiis, filiabusque, à suis servis, domesticis, ignorentur scitu necessaria, neque satagunt, ut illa edoceantur, atque sciant. Ait enim Apostolus 1. Timoth: Cap: 8. *Si quis suorum & maxime domesticorum curam non habet, fidem negavit, & est infideli deterior.* Porro quemadmodum suorum curam non habet, qui iisdem corporis necessaria non providet, sic & ille, qui iisdem, animæ necessaria non procurat, ea scilicet, sine quibus salus obitineri nequit, non subministrat.



*Quæres 5to: Quibus præterea propter ignorantiam negari debet absolutio?*

*Resp:* His quoque neganda est absolutio, qui necessaria ad suam professionem, munus, atque officium quod gerunt, ignorant, nisi vel officio, muneri cedere parati sint, aut scientiam, qua indigent, comparare sibi quam primum studuerint, & interim ab officio abstinuerint. Quia Judex exg. Medicus, Advocatus, qui illa ignorat quæ muneris, & officii sui sunt, maximum multis afferunt detrimentum, in continuo propter suam nescientiam versantur periculo graviter peccandi, absolvi ergo negant. Neque satis est ut spondeant se debitam scientiam comparaturos, sed videndum est *1mo:* an illius capaces sint? *2do:* exigendum, ut, dum ad comparandam scientiam se accingunt, quod non unum postulat mensem, interim ab officio abstineant. *3tio:* Curandum præterea ut per suam ignorantiam illata proximis damna resarciant, quod quidem etsi difficile, omnino tamen necessarium est.

*Quæres 6to: An, & quando Confessarius tenetur monere Pœnitentem suum, qui ex ignorantia facit aliquid illiciti?*

*Resp:* Explorandum est *1mo:* an pœnitentis ignorantia vincibilis sit, an non? dum autem id ex tota pœnitentis agendi ratione expenderit, cavere debet, ne prius quam oportet tollat bonam fidem, in qua est pœnitens. *2do:* Attendet Confessarius, an ignorantia illa, sit facti, vel juris? si juris: an juris naturalis, an divini, vel humani? *3tio:* An ignorantia correctio fieri possit citra scandalum, aut grave damnum? *4to:* An ex Confessarii monitis fructus aliquis speretur, an nullus? Itaque *1mo:* Moneri debet pœnitens quoties error ejus, vel ignorantia vincibilis est, etiamsi nullus hinc speretur fructus, sed potius scandalum pœnitentis. Quia ignorantia hæc peccatum est, & causa peccati, utrumque vero à suo pœnitente Confessarius pro viribus amovere debet. Nec obest, quod hinc non speretur fructus. Saltem enim monitio isthæc proderit, ut pœnitens aliquando conscientia stimulis agitetur, & ut non conquæratur absolutionem sibi inique fuisse denegatam. A fortiori monendus est pœnitens *2mo:* cum ipse dubitat, an sua actio vacet à peccato, eaque de re Sacerdotem interrogat, quia tunc Confessarii taciturnitas, pœnitentem in suo errore confirmaret. *2do:* Cum error pœnitentis eidem est perniciosus, puta cum pro gravi habet id, quod leve peccatum est, aut pro levi, quod



quod reipsa grave est. Ut autem detegat Confessarius, an vincibilis sit pœnitentis ignorantia, videndum, an is nullum scrupulum, vel dubium habeat? Id tamen erga eos solum locum habet, qui non obtusæ sunt, aut esse incipiunt conscientiæ. Fieri etiam potest, ut pœnitens malæ olim fidei, nunc bonæ sit, puta quia quosdam ea de re doctos consuluerit, qui conscientiam ejus sedaverint. Quod si pœnitens consultis duobus Theologis, deteriore partem amplexus sic peccat, nisi hæc tradita sit à quopiam adeo gravi, ut ejus autoritas, authoritati alterius longe prævaleat.

2do: Pœnitens quacunque juris, vel facti labore ignorantia, erudiendus est. 1mo: Cum ex errore ejus sequitur grave aliquod malum, vel scandalum publicum. 2do: Cum error illius vergit in damnum injustum proximi, si tamen damnum illud sine graviore incommodo averti possit. Quia bonum publicum, bono privato anteferri debet, & malum etiam privatum proximi avertire oportet. Quodsi pœnitens admonitioni acquiescere noluerit, absolvi à Confessario non potest, quia noluit intelligere, ut bene ageret.

Hæc tamen limitanda sunt. 1mo: Cum damnum proximi sine graviore detrimento averti nequit. Sic uxor, quæ à putatitio conjuge indigne vapulat, de matrimonii sui nullitate moneri non debet, ne ab illo recedat cum gravi Parochiæ scandalo, aut dispendio prolis. 2do: Cum monitio quæ hic, & nunc omittitur, postea profutura judicatur. In his tamen habenda est ratio circumstantiarum, puta an qui hodie confitetur, reversurus sit, an proxime moriturus, an error ejus, spectato statu ipsius sit inculpabilis, vel culpabilis?

3tio: Cum ex invincibili etiam pœnitentis errore, sequitur malum aliquod, moneri debet, quoties monitio videtur citra scandalum, & grave proximi damnum profutura, alias non debet moneri. Quia ad actum inutilem, & gratis exitiosum nemo tenetur, & in tali casu monitio habet se veluti correptio fraterna, hæc autem sublata spe fructus, & à fortiori dum mali quidpiam timetur, omitti debet. Unde qui matrimonii sui nullitatem inculpate nescit, moneri debet, dum prævidetur futurum, ut dispensationem petat, & obtineat, interim absteineat ab ea, quam comperit non esse suam legitimam uxorem. Secus non est monendus, sed differenda erit in aliud tempus monitio. Imo si uxor deneget debitum conjugale ei, quem  
invin-



invincibiliter ignorat non esse suum legitimum maritum; Confessarius eam adigere potest ad illud reddendum. Neque tunc mentietur Confessarius, quia ex errore invincibili ille maritus pro legitimo à sua reputatur conjuge:

*Quæres 2mo: Existentibus in proxima peccati mortalis occasione, potestne dari absolutio?*

*Resp: 1mo:* Ordinarie absolvi non debet, qui in proxima, simul & præsentis peccati mortalis permanet occasione, nisi eam dimiserit, cum actu dimitti potest. Is enim qui occasionem statim dimittere potest, si illam re ipsa non dimittit, satis testatur se habere cor peccato addictum. Hinc damnata est ab Innocentio 11. sequens propositio: *Potest aliquando absolvi qui in proxima occasione peccandi versatur, quam potest, & non vult omittere.* Hinc qui habet domi mulierem, cum qua graviter peccat, non ante absolvi debet, quam eam ejecerit, & quamvis ploret, promittat, juret, se statim, ac reversus domum fuerit, concubinam ejecturum, non debet Confessarius absolutionem dare, etsi de vero pœnitentis proposito certus esset, quia sola concubinæ præsentia, vox, solæ lachrymæ, vel etiam Samsonis vim, ac virtutem in ictu oculi labefactare possunt. Aliquando tamen mors ita potest proxime imminere, ut absolvi debeat, qui necdum amasiam suam ejecerat. Quodsi etiam tunc hanc statim ejicere valet, non ante erit absolvendus, quam re ipsa illam ejecerit. Poterit enim sub honesto prætextu eliminari, atque debet, ut moribundus ab objecti periculosi intuitu liber reddatur.

*2do:* Si occasio sit proxima, & præsens, sed physice dimitti non potest, ut cum duo, qui simul peccant, in eodem carcere detinentur, pœnitens absolvi nequit, nisi se vere & efficaciter corde, & animo ab occasione separaverit, cum corpore ab ea sejungi non valeat, tunc ergo cum ipsam occasionem auferre nequeat, proximitatem, atque vim illius tollere debet. Quare qui per habitum pravum exg. pollutionis, sibi metipsis facti sunt proxima peccandi occasio, non ante sunt absolvendi, quam tempore notabili vim pravæ consuetudinis superaverint, unde qui quotidie peccabat, & bis adhuc, aut ter in mense relabatur, non debet absolvi, quia ad minimum dubium est ejus emendationis propositum.

Cum vero occasio proxima & præsens, nonnisi moraliter dimitti nequit, idest sine gravi difficultate, scandalo, murmure, damno, deseri non potest, veluti si fra-



ter cum sorore peccet, aut filius familias cum ancilla quam ejicere non potest, aut famulus cum Domina ad cujus obsequium contractu obstrictus est, vel denique Chirurgus artem suam exercendo, hæc in praxi sequenda sunt. 1mo: Si promittat pœnitens se post aliquod tempus opportunitatem habiturum recedendi ab occasione, illud expectandum est, ut absolvatur. 2do: Si pœnitens in ipsa permanentis occasionis tempore, post probationem vere sufficientem, serio videatur emendatus, absolvi quidem poterit, sed omni conatu efficiendum erit, ut cum moraliter possibile erit, actu illam occasionem deserat, quia semper timendum est, ne illa occasio, ex remota, iterum fiat proxima. 3tio: Si pœnitens ob nimiam difficultatem recedere ab occasione non possit, cum eo agendum erit, ac cum iis, qui in occasione versantur, quam etiam physice deserere nequeunt, unde neganda est absolutio, donec certa appareant veræ conversionis, & emendationis signa. 4to: Demum attentatis, quæcunque ad hujus pœnitentis emendationem, tentari possunt, is tamen aliquando ab occasione vincatur, absolute neganda est absolutio, donec, quidquid contingat, ab occasione reipsa recesserit.

5tio: Absolvi non debet, qui non vult recedere ab occasione absente, & extra quæsita, quales sunt choreæ, domus luxuriæ, tabernæ, personarum periculosarum frequentatio. Qui enim hæc sibi funesta rursum invisere vult, amat periculum, & ruinam periculo annexam. Quod si spondeat ab his se recessurum esse, videndum erit an non jam defuerit promissis, & tunc differenda erit absolutio, donec satis probatus fuerit. Cum vero quis ea peccata primum confitetur, vel olim illa confessus, non satis de gravitate eorum monitus fuit, tunc si vera sinceri doloris signa exhibeat, poterit absolvi. Quia tamen multi omnia in Confessione promittunt, & eadem facile retractant, aliquando consultius est, ad tempus absolutionem differre, hujus autem diuturnitas ex variis circumstantiis æstimanda est.

A fortiori famulæ, ancillæ, quæ ad malum sollicitantur, non modo mercedis partem, sed & totam potius perdere debent, quam in proximo ruinæ periculo commorari. Imo: etsi auxiliante Deo, plenam sibi victoriam polliceantur, quam primum exire debent è domo, ubi licet invitæ, sunt occasiones peccandi. Tunc tamen ne paeta mercede priventur, ad aliquod tempus expectare possunt, quia quod ex illis sumitur scandalum, acceptum est,  
non



non datum. Sed vix, aut ne vix quidem unus qui mulieri secum cohabitanti aliquoties mortifere adhæsit, sive per ultimum crimen, sive per tactus impudicos, & oscula, emendatus est, nisi per separationem. Ipsa siquidem peccati memoria, objecti præsentia, naturalis ad peccatum propensio, ita cor emolliunt, ut non obstantibus omnibus cautelis, sæpius miserabiliter labatur.

Excipiendus autem est, tanquam in proxima occasione positus, qui semel in anno, sive negotii, sive hospitalitatis causa, ad aliquem locum pergens, ibidem cum vicina muliere sibi familiari peccat, quod si falso jam promiserat, se vel in illud oppidum nunquam jam profecturum esse, vel si ex urgentibus negotiis, causisque illuc profisciscatur, fœminam hanc ne raptim quidem invisurum esse, constanter probandus est, donec moraliter certo constet Confessario, eum à peccato toto corde abhorrere. Neque tamen semper toto anno expectandum erit, quia sincera conversio quandoque signis manifestis se prodit, ut omne excludat dubium.

*Quæres 8vo: An etiam iis deneganda sit absolutio, qui aliis præbent peccandi occasionem?*

*Resp:* Qui aliis occasionem peccandi præbent, non debent absolvi, nisi firmiter statuerint ab iis abstinere, quæ alios ad peccandum alliciunt. Unde absolvi non debent, qui componunt, imprimunt, vendunt libros amatorios, qui Comœdias luxuriosas, & periculosas exhibent, statuas, imagines libidinem spirantes exponunt. Item absolvi non debent fœminæ quæ nudum pectus, habitum lasciviam spirantem gerunt. Hæ enim misera sunt Diaboli instrumenta, quibus innumeros ad gravissima pertrahit peccata.

*Quæres 9no: Quid de inhabituatis censendum sit?*

*Resp:* Habitus peccati, est facilitas, atque promptitudo peccandi, seu propensio inclinatioque ad peccatum orta ex repetitis illius actibus. Multi tamen ex uno, alterove peccati actu, plus ad illud contrahunt propensionis, quam qui illud pluries admiserunt. In aliis vero repetita peccata nauseam pariunt, & fastidium, aut saltem tollunt novitatis illecebras, vanitatem, ac turpitudinem rei amata ostendunt. Unde nec semper habendus est pro consuetudinario, qui pluries in certo genere peccavit, nec semper pro non consuetudinario reputandus est, qui ter, aut quater idem commiserat peccatum. Pœnitens ergo Confessario ignotus, cum grave aliquod peccatum confitetur,



tetur, interrogari debet, an illud ex habitu committat, solerterque inquirendum an non habeat inveteratam illius assuetudinem? Sine hoc enim debitum de statu pœnitentis iudicium ferre nequit. Neque enim eum, qui semel, aut iterum ex fragilitate aut malitia peccavit, eodem modo excipiet, ac illum qui ex pravo habitu, diuturna consuetudine peccando, iniquitatem veluti aquam bibit. Quare ab Innocentio II. damnata est sequens propositio. *Non tenemur Confessario interroganti fateri peccati alicujus consuetudinem.* Habitus siquidem peccandi est quædam circumstantia notabiliter peccatum aggravans. Circumstantiæ autem peccatum insigniter aggravantes, in Confessione aperiendæ sunt. Ergo peccati habitus Confessario aperiendus est.

*Quæres 1.º: Utrum inhabituatis absolutio neganda sit?*

*Resp:* Ordinarie loquendo absolvi non debet, qui mortalis peccati consuetudinem habet, donec idonea emendationis signa exhibuerit. Quia Confessarius neminem absolvere debet, quin moraliter certus sit, pœnitentem suum efficacem habere propositum fugiendi suum peccatum. Porro moraliter certum est, consuetudinarios istiusmodi carere proposito, quod ex continuis eorum relapsibus manifestissimum est. Ergo absolvi non debent, nisi exhibeant manifesta suæ emendationis signa. Quare Innocentius II. hanc damnavit propositionem: *Pœnitenti habenti consuetudinem peccandi contra legem Dei, naturæ, aut Ecclesiæ, etsi emendationis spes nulla appareat, nec est deneganda, nec differenda absolutio dummodo ore professat, se dolere, & emendationem proponere.* Etsi enim aliquando inhabituati cum fletu, & lachrymis peccata sua confiteantur, emendationem appromittant, cum stupenda tamen facilitate ad sua revertuntur peccata. Hi ergo antequam absolvantur, juxta habitus gradum, nativam in illa vitia propensionem, probandi sunt, & eo usque differenda est illis absolutio, donec vitiosum habitum sic vicerint, ut periculum peccandi proximum ac probabile sublatum fuerit.

*Quæres 2.º: An & quibus propter relapsum deneganda sit absolutio?*

*Resp:* Ei qui ex gustu, & propensione in idem scelus relabitur absolutio communiter neganda est. Quia timendum est ne relapsus, præsertim facilis, ex inveterato habitu procedat, & signum sit, ut frequentissime else so-

let,



let, deficientiæ, in præcedenti Confessione, firmi propositi, qui enim facile in confessa relabitur peccata, ostendit sibi defuisse firmitum illa evitandi propositum, nisi forte relapsus sit ex vi occasionis, vel extraordinariæ tentationis, nec quæsitæ, nec prævisæ, & relapsus secutus sit sincerus cordis dolor. Sed etiamsi relapsus non procedat ex habitu, neque ex inveterata consuetudine, quandoque absolutio deneganda est, ut per hoc magis à peccato pœnitens retrahatur, & ne facilitas absolvendi sit incentivum denuo peccandi, quare præclare dixerat Bellarminus: *Non esset tanta facilitas peccandi, si non esset tanta facilitas absolvendi.*

*Quæres 2mo: Quibus præterea denegari debet absolutio?*

*Resp:* Iis omnibus denegari debet absolutio, quos moraliter certo constat, non esse ad illam recte dispositos, quia videlicet carent & vera cordis contritione, & sincero emendationis proposito. Atque tales sunt. 1mo: qui aliena retinent, cum ea restituere possint, vel etiam illam in fama, honore, aliisque bonis proximo injuriam, pro viribus non reparant, & quamvis spondeant se satisfacturos, non sunt absolvendi, si jam moniti à Confessario, vel à sua conscientia, id perficere omiserint. 2do: qui cum proximo, quantum in se est, reconciliari nolunt, quive illum alloqui, salutare, cum eo Christiane conversari nolunt, maxime quando hinc sequitur scandalum aliorum, vel majus utriusque odium, & spes affulget adversarium aliquo benevolentia signis placari. Illi quoque, qui cum priores proximum læserint, eum tamen priores invisere, eique satisfacere nolunt. 3tio: hi quoque, qui publicum dederunt scandalum, nec illud hucusque reparare studuerunt. Litigantes, qui cum possint, nullam pacis viam sequi volunt, partem adversam dictiteris, injuriis defatigant. 4to: qui illicita commercia, artes prohibitas exercent, officia sua negligunt, desidiosi, & inertes, suis obligationibus minime respondent, nimio vestium, sapellectilium, dapumve apparatus, debita viribus suis majora contrahunt: His omnibus cum desit ipsis & verus cordis de commissis peccatis dolor, & sincerum emendationis propositum, absolutio sacramentalis juste denegatur.

*Quæres 3tio: Quando adigendus est pœnitens ad iterandas præteritas Confessiones?*

*Resp:* Pœnitens adigendus est ad iterandas confessiones. 1mo: quando voluntarie, & ex defectu legitimi examinis.



minis, vel ex imperitia notabiliter culpabili, peccata quædam mortalia occultavit. 2do: quando in eadem peccata prolapsus est, valde siquidem suspecta est illorum pœnitentia, qui facile ad vomitum suorum peccatorum redeunt. Proinde iterare confessiones suas debent, qui relapsi sunt, quia ab occasionibus sibi funestis non recesserunt, & præscripta sibi à Confessario, adversum peccata, remedia, neglexerunt. 3tio: quando quis ex prava consuetudine, inveterato habitu eadem perpetrabat, & perpetrata confitebatur peccata, longa siquidem consuetudine implicati, semper corde & animo suis adhærent peccatis, & quamvis se de suis peccatis dolere, illa detestari profiteantur, mentitur tamen iniquitas sibi. Quod vero eos attinget, qui ad aliquod tempus à peccatis abstinnerunt, & aliquatenus emendati sunt, videndum est, quoto tempore in bono proposito perstiterunt, an superatis variis temptationibus, inopinatæ cesserint, an sibi vim aliquam in declinandis peccatis fecerint? Quo enim quis minus in bono proposito perseveravit, quo remedia ad præcavendum peccatum præscripta, quæ neglexit, erant observatu facilliora, quo magis ordinaria & superatu facilis fuit tentatio, cui quis succubuit, eo magis suspecta pœnitentia, magis dubiæ confessiones erunt.

Quibus autem iterandæ sunt præteritæ Confessiones, illis Confessio generalis injungenda est, utpote omnino tunc necessaria, cum priores invalidæ fuerint.

*Quæres 4to: An semper & statim Confessarius debeat injungere suo pœnitenti Confessionem generalem, cum ei judicat esse necessariam?*

*Resp:* Aliquando Confessarius non debet confessionem suo pœnitenti injungere, etiamsi sentiat illam ei esse necessariam, quando scilicet, pœnitens modo christiane vivit, & circa præteritas Confessiones in bona versatur fide, pacatusque manet, atque ex olim tentatis prævidetur pœnitens, si generalem confessionem faciat, pluries ex recordatione præteritorum, mortaliter peccaturus. Tunc enim in bona fide relinquendus est, cum ab errore suo, sine gravis mali periculo educi nequeat. Omnino autem à Confessione generali prohibendi sunt illi, qui pie viventes eam tantum ex scrupulo, & vanis anxietatibus facere volunt, ipsis enim Confessio generalis, & inutilis, & sæpe nociva esse solet.

Sed etiam cum Confessarius ex prima, quam excipit Confessione, judicat suo pœnitenti Confessionem generalem



lem esse necessariam, ab eoque fieri illam posse advertit, non continuo illam ei injungere tenetur, sed potest ipsam ad tempus differre. Quia qui primo convertitur huic oneri portando insufficiens est, ab inchoata pœnitentia facile posset deterreri, & aliquando etiam necdum plene devictis pravis habitibus, posset inutilis esse. Ergo per aliquod tempus in operibus pœnitentiæ exercendus est, detestatio peccatorum modis omnibus inspiranda, ut tactus cordis dolore intrinsecus, totus ad Deum convertatur. Ali-ter agendum cum plene jam conversis, illis, cum neces-saria judicatur, confessio generalis, injungenda est, modus-que quo fieri debeat porrigendus. Cui autem injuncta est Confessio generalis, satius est ut eam perficiat apud Sacerdotem, cui ordinarie confiteri solebat, nisi aliquid obstat.

*Quæres igitur: Ad quid tenetur Confessarius propter aliquem defectum in Confessione admissum?*

*Resp:* Confessarius qui pœnitentem suum, in aliquem errorem etiam inculpate induxit, ex quo sequitur alio-jus præcepti violatio, tenetur errorem illum revocare, quia quisque tenetur auferre mali etiam inculpate à se positam causam. Hinc Confessarius qui etiam inculpate pœnitentem à restitutione debita deobligavit, vel ad in-debitam obstravit, jure charitatis & justitiæ tenetur eum errorem dedocere. Nam quisque ex charitate, & justitia tenetur impedire ne sua actione, etiam inculpabili, pariat alteri damnum, alioquin cognito errore, si eum non re-vocaverit, tenetur de damno subsecuto. Magis autem ad id ex justitia tenetur Confessarius, cum ex malitia, vel ignorantia vincibili, aut gravi advertendi negligentia, positive à restitutione debita avertit, vel ad indebitam coegit, quia tunc culpabiliter est causa alterius damni. Imo si ex ignorantia vel negligentia culpabili prætermi-sit tantum injungere faciendam restitutionem, quæ fieri debebat, & pœnitentem ea de re non præmonnit, plures Theologi putant Confessarium ad restituendum parti læsæ obligari. Quia sola etiam omissione injungendæ restituti-onis Confessarius fit causa damni alterius, quod proinde re-sarcire tenetur. Siquidem unusquisque pœnitentium ex eo putat se esse à restitutione liberum, quod re tota Con-fessario exposita, injunctam sibi non habuerit restituti-onem. Alii tamen licet numero pauciores affirmant, ad-monendum quidem esse pœnitentem de facienda restituti-  
one, quod in Confessione prætermisum est, sed ipsum

Con-



Confessarium dicunt ad restituendum non teneri, nisi ex Officio, quemadmodum Parochus, Confessiones excipiat. Quia Confessarius præcise qua Confessarius, non censetur ex iustitia obligatus esse ad avertendum omni modo damnum illius, cui debetur restitutio. Qui vero ex officio Confessiones excipit, quemadmodum Parochus, cum sit Superior, ex munere suo tenetur impedire, ne sibi subditi aliis inferant damnum, & ut illatum resarciant procurare. Verum si pœnitenti interroganti, an debeat restituere, nihil Confessarius respondeat? tenetur pro suo pœnitente restituere, quia sua taciturnitas sit causa quadante-nus positiva, cur pœnitens non restituat.

## ARTICULUS 3<sup>tius</sup>

### *De Sigillo Confessionis.*

*Quæres 1<sup>mo</sup>: Quid sit sigillum Confessionis?*

*Resp:* Est religiosa obligatio servandi secretum circa ea, quæ per Sacramentalem Confessionem, vel occasione illius quocunque modo cognita sunt. Et ad istiusmodi Sigillum Confessarius omni jure naturali, divino & Ecclesiastico strictissime obligatur, unde gravissime peccat Sacerdos, qui etiam minimum peccatum in Confessione auditum revelat. Parvitas ergo materiæ hic à peccato mortali non excusat, sed sola tantum inadvertentia excusare potest, ut cum quis, quæ in Confessione audivit, se vidisse ratus, aliis narrat. Verum ei usquam, certe cum de Pœnitentium defectibus agitur, vigili opus est attentione.

*Quæres 2<sup>do</sup>: Quæ sigillo Confessionis subjaceant?*

*Resp:* Sigillo Confessionis subsunt, non solum gravia, aut venialia peccata, sed & illa, quæ ad eorum objecta, circumstantias, expositiva quædam spectant, ea demum omnia, quæ etiam indirecte pœnitentem, aut alium infamarent. Præterea ad sigillum Confessionis pertinent ea omnia, quæ statim ab absolutione dicuntur, veluti præcedentium appendices. Quia nihil horum revelari potest, quin Confessio pœnitenti, & aliis reddatur odiosa, & quidquid statim post absolutionem dicitur Confessario, ut tali narratur, & moraliter ad Confessionem pertinere censetur. Igitur non licet Confessario 1<sup>mo</sup>: ullum pœnitentis grave aut leve delictum revelare, exg. quod is, vel illa mendacium commiserint. Sed neque tentationes,  
quas



quas quis patitur, peccata imiginaria, quæ in se peccata licet non sint, sed à scrupuloso pro peccatis habita & confessa sunt. Imo & illi Confessarii improbandi sunt, qui dicunt ab hoc suas aures perpetuo inutilibus scrupulis, & vanis obrui narrantiunculis. 2do: neque circumstantias peccati, quamvis gravitatem peccati quodammodo diminueret, videantur, ut exg. quod Petrus Paulum quidem occiderit, sed cum esset inculpabiliter ebrius, quia facilius credetur homicidium, quam inculpabilis ebrietas, quæ ad excusationem ficta reputabitur. 3tio: ea, quæ pœnitentem quocummodo infamare, aut ludibrio apud alios exponere possunt, vg. quod sit eunuchus, spurius, in arte sua rudis, scrupulosus, à Judæis oriundus. 4to: neque illa quæ alium à pœnitente demigrare valent, ut quod Joannes uxorem percussisset turpiter inventam, quod Paulus inutiliter Annæ pudicitiam labefactare conatus sit. Certe auro æstimari debet hæc regula: *Confessarium nunquam silentii, sæpe sermonis pœnitebit.* Attamen sigillo Confessionis non subjacent, defectus pœnitentis naturales, qui in argumentum malitiae trahere nequeunt, ut quod surdus sit, aut balbus.

*Quæres 3tio: An Confessionis sigillum etiam erga mortuos obliget?*

*Resp:* Obligat quam strictissime, quia æternum Confessarius circa audita in confessione observare debet silentium. Hinc qui ex sola Confessione didicit puellam esse gravidam, non potest sine consensu ejus, id, ea defuncta propalare, ut per baptismum proli in utero degenti succurratur. Illi tamen, nisi hoc vel à Confessario declarari permittat, vel quod melius est, alteri extra confessionem manifestet, absolutio impendi nequit, quia temporale famæ suæ bonum, æternæ salutis infantis anteponit. Quod si puella hæc in extremis Confessarium revocari jussisset, & eam is reperisset omni sensu destitutam, non posset ejus secretum prodere, nec enim ubi agitur de sigillo Confessionis, sufficere potest licentia pœnitentis præsumpta, sed requiritur expressa. Et tamen tunc danda foret absolutio, quia in extremis ad illam tribuendam sufficit aliqua contritionis præsumptio.

*Quæres 4to: Ex quali confessione oritur obligatio sigilli?*

*Resp:* Nascitur ex omni & sola confessione Sacramentali, seu ex ea quæ fit apud Sacerdotem animo obtinendæ absolutionis, sive hanc statim obtineat, sive judicio Confessarii ad aliquod tempus differatur. Hinc generatim sigil-



sigillo non subiacet Confessio ad illudendum, vel subornandum Confessarium facta, licet ei quædam vera, vel ficta admisceantur peccata, ut confessionis speciem præferens, Confessarium secreti sigillo obstringat. In his tamen occasionibus caute procedendum est, & videndum an pœnitens pravum consilium suum fixum speriat, tantumque Confessarium seducere velit, an non gravem suam tentationem revelet, cui medelam à Confessario quærat? tunc enim non desineret Confessio esse Sacramentalis, etiamsi postea crimen à pœnitente perficeretur. Quodsi Confessio prorsus esset illusoria, & nonnisi ad subornandum Sacerdotem instituta, si ageretur de gravi aliquo publico, vel privato damno avertendo, utendum esset monitione generali, ut quantum fieri potest auctor mali non detegatur. Verum etiam ex Confessione non Sacramentali, nascitur nonnunquam secreti naturalis obligatio. Unde confessio facta existimato tantum Sacerdoti, qui verus Sacerdos non est, eum stricte ad secretum servandum jure naturali & divino obligat. Rarissime etiam utendum est scientia ex confessione, quamvis minime Sacramentali, par-  
ta, quare extra casus, vel conspiracyonis adversus Principem, aut hæresis, quæ in populo spargi incipit, quæ immane multitudini damnum afferre possunt, alto premedum est secreto crimen privatum in Confessione auditum, licetsi illa foret ad subornandum tantummodo Sacerdotem instituta.

*Quæres 5to: Præter Confessarium, an etiam alii ad Confessionis sigillum teneantur?*

*Resp:* Tenentur, & quidem 1mo: Episcopus, sive aliquis quivis Superior, ad quem sive ipse pœnitens, sive illius Confessarius recurrit, pro casu reservato, ut ab eo absolvi, aut absolvere possit. Si enim ipse pœnitens pro casu reservato recurrit, est inchoata confessio, si Confessarius, à Confessione inchoata promanat notitia. 2do: consiliarius, seu ii omnes, quos Confessarius, sive ex licentia pœnitentis, sive sine illa consulit. Hic autem notandum est, nusquam declarandum esse pœnitentem sive Superiori, à quo pro reservato casu absolvendi petitur facultas; sive ei, à quo petitur consilium sine expressa, & minime extorta licentia. Si vero ex consilii petitione, quod sine scitu pœnitentis exquiritur, delictum ipsius innotescere possit uni, ad alium virum, imo etiam ad alium locum recurrendum est, cum vero tempus urget, periculum mortis instat, res tota divinæ misericordiæ committenda est, agendumque



est, quod melius, & utilius videbitur. Neque etiam duo Confessarii, qui eandem ejusdem pœnitentis confessionem exceperant, de eâ consilii capiendi gratia colloqui possunt, nisi in id libere pœnitens consenserit. Alioqui uterque fracti sigilli reus erit.

*Quæres 6to: Qui præterea sigillo Confessionis obligantur?*

*Resp:* Sequentes *1mo:* qui alterum, in Confessione sua peccata Sacerdoti enarrantem audit, sive fortuito, sive de industria, quod grave est sacrilegium, vel etiam ex verbis, aut gestibus Sacerdotis intellexit. Idem est de iis quibus eadem audita peccata ab iis, qui illa audierunt, revelarentur, etiamsi innumeris revelata fuerint, quia res transit cum onere suo. Pariter qui reperit chartam ubi descripta est confessio peccatorum seu facta, seu facienda. Quia licet scriptio hæc non sit confessio actualis, est tamen illius internuntia, & ipsius inchoatio, unde istiusmodi scripturam legens non solum ad naturale secretum gravissime tenetur, sed etiam ad Sacramentale obstringitur sigillum. *2tio:* pœnitentis interpret, pariter qui amici, aut rudis hominis scribit confessionem, quia tota, quam habent peccatorum notitia, est Sacramentalis, cum ad Sacramentalem confessionem ordinetur. *4to:* Judex, aut quis Superior, statim ac vident delictum ad se delatum, ex sola confessione innotuisse, tenentur reum, ejusque complices intactos relinquere, nisi aliunde horum facinus ipsis innotuerit.

*Quæres 7mo: An Confessarius de auditis in confessione cum suo pœnitente loqui possit?*

*Resp:* Non est redarguendus Sacerdos, qui simpliciter dicit pœnitenti, se absolutionem ex oblivione non dedisse, aut datam non fuisse validam, quia comperit, suam approbationem effluxisse, in hoc enim nulla est delicti manifestatio. Et extra hunc casum, non licet, nisi petita, & obtenta venia extra tribunal Pœnitentiæ cum pœnitente loqui de iis, quæ sub sigillum Confessionis cadunt, quia Sacerdos qui extra Confessionem suo pœnitenti peccata in memoriam revocat, Confessionem ipsi reddit odiosam. Certe qui vix in angulo peccata sua confitetur, eadem sibi exprobrari, & recantari nimis ægre feret. Unde hac in parte peccant qui è sacro suggestu in Concione, sive Catechismo delicta quædam tot circumstantiis delineant, ut pœnitens sua sibi peccata exprobrari non imprudenter existimet. Consultissimum autem est, ut nusquam, ne in genere



genere quidem, coram sæcularibus, misceantur sermones de auditis in Confessione. Hinc enim ipsi inferunt peccata sua à Sacerdotibus memoria retineri, & propterea se contemni. Quare etiam si Sacerdos peccatum suum confiteri non possit, nisi aperiat peccatum, quod in Confessione audiuit, & cujus author à Confessario intelligendus est, neque alium Confessarium invenire possit, debet peccatum illud hic & nunc reticere, quia fortius est, vinculum sigilli confessionalis, quam integritas confessionis.

*Quæres 8vo: An etiam ipse pœnitens teneatur sigillo confessionis?*

*Resp:* Non tenetur, quia aliquando potest sua peccata humilitatis causa propalare, licet frivole; & id sine discretione facere non debet, & Confessarius tantummodo pœnitenti obligatur ad servandum Confessionis secretum, quia in gratiam ipsius est institutum, non vero pœnitens Confessario. Verum tamen pœnitens gravi secreto illa præmere tenetur, quæ sine damno Confessarii, aut Sacramenti præjudicio revelari nequeunt. Unde peccant qui in Confessione prudenter sibi factas quæstiones, monita pie data, satisfactiones impositas, quæ graviores apparent, quia nescitur quibus de causis impositæ sunt, ut plurimum deridendo, propalant. Quod si Confessarius errorem doceat, ab usu Sacramentorum avertat, ad turpia sollicitet, denuntiandus est suo Prælato, si malum aliter certo averti nequeat.

*Quæres 9no: Quotupliciter violatur Confessionis sigillum?*

*Resp:* Violatur dupliciter, directe cum expressis verbis de aliquo etiam mortuo, vel ejus complice, per solam confessionem cognito, dicitur, quod tale peccatum siye mortale, siye veniale commiserit, *indirecte* ut *impò:* cum Confessarius, etsi generatim, iis pœnitentem depingit coloribus, qui etsi certam peccati notitiam non præbent, at suspicionem illius inducunt. *2do:* Cum auditis paucorum confessionibus, dicit, tacito etiam nomine personæ, se tale peccatum audivisse, tunc enim singuli, ex indiscreta hujusmodi locutione, aliquid patiuntur suspicionis. *3tio:* Cum non nominando personam, sed certum Ordinem designando, refert commissum crimen, quod in Confessione intellexit. Hinc enim fuit ignominia totius Ordinis. *4to:* Cum in loco præsertim angusto ubi Confessiones excepit, dicit Sacerdos vigere, furta, in juvenibus mollietiam, in conjugatis adulteria. Hæc enim, nisi aliunde publica sint,



gravem toti communitati illius loci aspergunt notam, quæ in singula illius defluit membra. Imo quamvis hæc nota essent per publicum rumorem, non debent referri ut nota per Confessionem, hujus enim testimonium longe gravius est, quam publici rumoris, qui sæpe fallit. 5to: Cum Confessarius verbo, vel signo, vel alio quovis modo prodit aliquatenus peccatum, etsi aliunde iis cognitum coram quibus loquitur. Quare graviter delinquant, qui tanto cum æstu loquitur in Confessionali, ut adstantes suspicentur grave quid à pœnitente confessum fuisse, pariter, qui pœnitentem, cum quo ante Confessionem amice tractabat, tristi, & acerbo aspicit oculo. 6to: Cum Confessarius ait se huic ad certum tempus absolutionem distulisse, vel talem pœnitentiam imposuisse, quæ gravis peccati suspicionem jure, aut etiam immerito inducunt. 7mo: Cum Confessarius refert è pœnitentibus unum, aut unam, impense, celebrat, quod tantum venialia confiteatur, sic enim alii graviora deposuisse intelliguntur. Sed etiamsi solerter taceantur, persona, & locus, qui peccata præcise, ut in confessione audita refert, non est sine peccato, & id semper apud Laicos male audit, eos offendit, & scandalizat atque fieri potest, ut ex variis, quæ secum invicem, contra spem omnium, conferunt, circumstantiis, detegatur reus peccati generatim tantum expressi.

*Quæres 1mo: Quid respondere debeat Confessarius cum interrogatur, an ipsius pœnitens tale crimen commiserit, an ipsi absolutionem dederit?*

*Resp:* Generatim cuicumque de auditis, & factis in Sacramentali Confessione interroganti, sive an pœnitens tale crimen commiserit, sive an absolutio ipsi data fuerit, hoc unum semper respondere debet Confessarius, se de auditis & peractis in Confessione nihil omnino loqui posse, sed tacere prorsus debere. Et istiusmodi responsio, quocunque modo Sacerdos interrogatur, sive ut Sacramenti Minister, sive ut privatus homo, danda est. Verum Sacerdos qui vidit scelus perpetrari, vel à testibus fide dignis illud rescivit, quod postea ipsi confessum est, hac sua exterius comparata notitia uti potest, ita tamen, ut notitiæ extra Confessionis tribunal acquisitæ, limites non excedat, seu quidquam addendo, quod ex sola confessione novit, seu firmiter asserendo, quod ante Confessionem, nonnisi dubium habebat.

*Quæres 2mo: An Confessarius possit uti scientia in*  
Con-



*Confessione parta, ad avertendum grave sui, vel alterius damnum?*

*Resp:* Nec verbo, nec facto, nec nutu, nec aliquo signo licet in aliquo casu, quantumvis Ecclesiæ, vel Reipublicæ damnosus, revelare Confessionem. Quia quod juris divini est, nullam patitur exceptionem, nisi hæc in eodem jure apposta fuerit. Porro sigillum Confessionis Sacramentalis jure divino est constitutum, nullaue apposta est exceptio, Ergo in omni casu, sine ulla exceptione servari debet. Certe non sunt facienda mala, ut eveniant bona, præsertim cum bona hæc longe minora sint malis. Jam vero bonum quod per revelationem Confessionis aliquando obtineri posset, longe minus est ipso malo fractionis sacramentalis sigilli, quia & ingens sacrilegium est, & ipsum per hoc subverteretur Sacramentum, quo semel sublato innumera hominum in æternum perirent millia, quod eane malum omne superat bonum, quodcumque ex revelatione Confessionis sperari, aut etiam consequi possit. Hinc neque ad servandam ipsam vitam, licet uti Confessionis notitia v.g. abstinere à celebrando ne ex venenato vino Sacerdos moriatur, tunc enim etiam indirecta esset Confessionis revelatio, quæ nunquam licita esse potest. Potest tamen Sacerdos fugere, cum ipsi mors ob negatam absolutionem intentatur, quia hæc mortis comminatio, non subijcitur Confessioni ut culpa ipsius deleatur, sed est peccatum quod in ipsa Confessione animo obstinato perpetratur, quemadmodum ergo effugere potest Sacerdos, cui pœnitens in Confessione evaginato gladio mortem inferre attentat, ita pariter effugere potest cum inferendam comminatur. Si etiam pœnitens ob negatam sibi absolutionem gravem Confessario impingeret calumniam, omni via tueri, & famæ suæ providere Sacerdos potest, sed nunquam impactæ calumniæ causam, negatam scilicet absolutionem manifestare potest. Neque etiam Sacerdos recusare potest audire Confessionem pœnitentis, quem novit tempus in Confessione inutiliter terere, quia insulsa multa congerit sine ullo emendationis fructu. Quia indirecta & tunc esset Confessionis revelatio, atque tunc Sacerdos notitia in Confessione acquisita abuteretur. Vocatus ergo ire tenetur.

*Quæres 22mo: An saltem occulte possit Sacerdos uti notitia in Confessione, acquisita?*

*Resp:* In certis casibus quæ externum regimen non respiciunt, neque alios, nisi solum attingant Confessarium, potest



potest ille uti scientia in Confessione acquisita. Sic potest 1mo; pro pœnitente Deum orare. 2do: In dubiis, virum doctum consulere, secluso semper quocunque manifestandi suum pœnitentem periculo. 3tio: Ex unius confessione aliam circa quædam necessaria, & utilia interrogare, modo is non intelligat unde Confessarius ad istiusmodi interrogata moveatur. 4to: Propriam suam emendare agendi rationem, cum ex duritie sua, vel quodam deridendi modo murmura, & aliquod scandalum enasci animadvertit. 5to: Poterit rebus suis diligentius invigilare, non quidem quoad hanc ancillam, aut hunc in particulari famulum, qui furtum suum confessi sunt, ac illi eo animadverterent illud sibi tacite exprobrari, sed quoad alios nebulones, quibus ex Confessione multorum, locum impleri intelligit. Quia in his, ut jacet, nihil est, quod speciem revelationis factæ confessionis habeat, nihil, quod Sacramento Pœnitentiæ injuriosum sit.

In iis vero quæ spectant exterius regimen, nullatenus licet uti scientia in Confessione acquisita, sive hic Confessionis usus possit à pœnitente adverti, ut si confessus se noctu è domo egredi, præter morem inveniat januas clausas, sive non possit adverti, & à nemine intelligi queat, ut si Superior non conferat Pœnitenti officium, quod ei mente jam destinaverit, in utroque ergo casu nullatenus licet uti notitia in Confessione acquisita, quia alias homines à Confessione averterentur, & data pœnitenti fides violaretur, qui sua Confessario pandit interiora, quia scit eum ad secretum, quam strictissime obligari, & hæc censentur suis pœnitentibus tacite spondere qui Confessionibus audiendis se accingunt. Unde damnata est sequens propositio: *Scientia ex Confessione acquisita uti licet, modo fiat sine directa aut indirecta revelatione & gravamine pœnitentis, nisi aliud multo gravius ex non usu sequatur, in cuius comparatione prius merito contemnatur.* Hinc non potest Sacerdos ejicere famulum aut observare curiosius, quem ex Confessione scit furem esse, neque in Confessione præcipere potest, ut clavem reddat, aut sponte discedat, quia hoc esset fractio sigilli. Pariter non posset Parochus ejicere ancillam, quam ex propria ipsius Confessione resciret, Nepotis, aut sui Vicarii pudicitiae insidiari. Neque etiam Monasterii Superior ad coercendos suorum abusus, quos in Confessione cognovit, solito attentius invigilare posset, ut peccantes deprehendat.



*Quæres 13tio: Utrum Confessarius exigere potest à pœnitente ut sibi peccati complices revelentur?*

*Resp:* Nusquam exigenda est à pœnitente revelatio complicitis peccati, cum nec subest periculum relapsus, nec ab eo cuiquam impendat damnum, vel ruina spiritus. Neque in casu impendentis damni exigere debet Confessarius ut sibi sceleris complex manifestetur, si gravi alicui viro, maxime Superiori id fieri possit, qui securius, & efficacius malo mederi possunt, etsi periculum sit in mora, quia exg. sequenti nocte virgo rapienda est, ad id pœnitens urgeri debet. Quod si pœnitens declaraverit, se neminem nosse, qui malo efficacius mederi possit, præter Confessarium, quærendum est, ex pœnitente, an sperare licet reum prudenti correctioni celsurum esse, an non? Si pœnitens asserat reum certiora quoque negare paratum esse, imposturam conclamare, Sacerdotem insequi, hærendum est protinus. Si vero complex ex iis sit, qui blandæ correctioni cedunt, nihil est cur Confessarius hoc onus non suscipiat. Cavere tamen debet, ne cuivis spiritui credat, & multo minus muliebri. Unde Confessarius non facile pœnitenti alios accusanti, præsertim fæminis, credet, nec onus monendi in se suscipiet, sine gravi necessitate. Quodsi necessitas expostulet, expedit, ut complicitis, aut alterius commonendi licentie, extra Confessionem à pœnitente Sacerdoti detur, quatenus liberius, & tutius procedat.



# TRACTATUS

DE

## SACRAMENTO ORDINIS, & EXTREMÆ UNCTIONIS.

Sacramento Ordinis Ministri Christi, & Dispensatores divinatorum Myfteriorum conftituuntur. Extrema unctione infirmis in ultimo vitæ agone conftitutis falubriter fuccurritur. Ecclefie ergo & Chrifti fidelibus maxime neceffaria hæc duo Sacramenta.

### CAPUT PRIMUM

#### *De Sacramento Ordinis.*

*Quæres. Quid fit Sacramentum Ordinis?*

*Res: Est Sacramentum novæ legis à Chrifto institutum, quo fpecialis quædam, ac fpiritualis traditur potestas, ad divina, & Ecclefiaftica munia exercenda, & gratia per illud confertur. Quibus effectus, & finis hujus Sacramenti designatur. Quilibet fiquidem Ordo maxime facer, & fpecialem fpiritualement tribuit potestatem, & fingularia habet fibi annexa munia, ad quæ rite peragenda fpecialis etiam confertur gratia. Ordinem autem elfe verum novæ legis Sacramentum, Concilium Tridentinum Sef: 23. Can: 5. his verbis definivit: Si quis dixerit Ordinem, five facram Ordinationem, non elfe vere & proprie Sacramentum à Chrifto institutum, aut elfe tantum ritum quemdam eligendi miniftros verbi Dei, & Sacramentorum, anathema fit, & Cap: 3. hanc doctrinam explicans ait: Cum Scripturæ testimonio, Apostolica traditione, & Patrum unanimi confensu perfpicuum fit, per facram ordinationem, quæ verbis, & fignis exterioribus perficitur, gratiam conferri, dubitare nemo potest, Ordinem elfe vere & proprie unum ex feptem Sanctæ Ecclefie Sacramentis.*

ARTI.



ARTICULUS I<sup>mus</sup>

*De materia, forma, Ministro, subjecto & effectu Sacramenti Ordinis.*

*Quæres 1<sup>mo</sup>: Quæ est materia ac forma Sacramenti Ordinis?*

*Resp:* Materia essentialis Sacramenti Ordinis est manuum impositio, forma vero oratio, quæ ei adjungitur. Universa siquidem Ecclesia Latina, & Græca semper in Sacris Ordinibus conferendis, manuum impositione, & oratione in libris Ritualium præscriptis usa est, & hucusque utitur. Verum tamen correctio quoque instrumentorum cum adjunctis verbis accurate observanda, & omnino retinenda est, & ne quis circa suam Ordinationem anxius sit, necesse est, ut ea omnia sedulo observentur quæ præscribit Pontificale, & Ecclesiæ usus habet, ac si quid omisum fuerit caute supleatur.

*Quæres 2<sup>do</sup>: Quis est Sacramenti Ordinis Minister?*

*Resp:* Soli Episcopi jure divino sunt Ministri Sacramentorum Ordinationum. Simplex tamen Sacerdos ex Romani Pontificis concessione, aut Ecclesiæ dispensatione, potest conferre primam tonsuram, minores Ordines, & aliquando Subdiaconatum etiam, non vero ceteros sacros Ordines.

*Quæres 3<sup>tio</sup>: An à quolibet Episcopo liceat ordines percipere?*

*Resp:* Non à quocunque Episcopo Ordines suscipi possunt, sed à proprio tantum Episcopo. Sic enim disposuit Concil: Trident: Ses: 23. de Refor: Cap: 8. *Unusquisque à proprio Episcopo ordinetur, quodsi quis ab alio promoveri petat, nullatenus id ei, etiam cujusvis generalis, aut specialis rescripti, vel privilegii prætextu, etiam statutis temporibus permittatur, nisi ejus probitas, ac mores Ordinarii sui testimonio commendentur. Si secus fiat, ordinans à collatione Ordinum per annum, & ordinatus à susceptorum Ordinum executione, quamdiu proprio Ordinario videbitur expedire, sit suspensus.* Porro in jure triplex proprius distinguitur Episcopus, originis scilicet, Beneficii, & domicilii Episcopus. Originis est ille, in cujus Diœcesi quis natus est. *Dummodo, ut inquit Innocentius 12. Constit: Speculatores ibi natus non fuerit ex accidenti, occasione nimirum itineris, officii, legationis, mercaturæ, vel cujusvis alterius temporalis moræ, seu permanen-*  
tior



*tiæ ejus patris in illo loco, quo casu nullatenus ejusmodi fortuita natiuitas, sed verâ tantum & naturalis patris origo erit attendenda.* Episcopus domicilii ille est, in cujus Diœcesi aliquis ita commoratur, ut perpetuo manendi, nec in locum originis suæ remeandi gerat voluntatem. Unde qui studiorum causa in aliqua Academia commorantur, inde absoluto studiorum cursu discessuri, pariter, qui ad aliquod tempus Republicæ causa alibi versantur, proprie his in locis domicilii jus non habent. Episcopus Beneficii ille est, in cujus Diœcesi aliquis Beneficium obtinet, etiam simplex, & modicum. Cavendum tamen ne per fraudem Beneficium conferatur, vel obtineatur, si enim Episcopus alieno Clerico conferat Beneficium, animo sibi illum addicendi, vel ipse Clericus ut proprii Episcopi examini se subducatur, in aliena Diœcesi Beneficium adipiscatur, tam Ordinans, quam ordinatus incurrunt pœnas à jure statutas. Potest etiam Episcopus ordinare familiarem suum, etiam sibi non subditum, modo id non fiat in fraudem proprii Episcopi, ac per triennium familiaris ille apud Episcopum commoratus sit, & Beneficium ab eo habeat. Ita Concil: Trident: Ses: 23. de Refor: Cap: 9.

*Quæres 4to: Quos, & ubi Episcopus ordinare potest?*

*Resp:* Episcopus non potest ordinare nisi sibi subditum, aut suum familiarem. Porro ex triplici capite quis censetur esse alienjus Episcopi subditus, scilicet ratione originis, domicilii, ac Beneficii. In aliena tamen Diœcesi, neque suos subditos Episcopus valet ordinare, absque licentia Episcopi illius loci, in quo ordinare vult, quia non potest Pontificalia exercere in aliena Diœcesi, sine licentia illius Episcopi. Alienos quoque subditos, in propria Diœcesi ordinare potest, si habeant litteras dimissorias, aut speciale ad id privilegium.

*Quæres 5to: Quid sint litteræ dimissoriæ, & à quibus concedi possint?*

*Resp:* Litteræ dimissoriæ illæ dicuntur, per quas Clericus à suo proprio Episcopo dimittitur, ac libera ipsi datur facultas Ordines suscipiendi à quocunque Episcopo. Porro istiusmodi litteras dimissorias dare, ad ipsum Episcopum pertinet, quemadmodum id constituit Concil: Trident: Ses: 23. de Refor: Cap: 3. Idem potest Vicarius generalis, modo tamen specialem ad id ab Episcopo concessam sibi habeat facultatem. At Capitulum sede vacante, litteras dimissorias dare non potest infra annum à die va-



eantis sedis, si secus fiat, Capitulum contraveniens Ecclesiastico subiacet interdicto, & sic ordinati, si in minoribus Ordinibus constituti fuerint, nullo privilegio Clericali gaudeant, in maioribus vero, ab executione Ordinum, ad beneplacitum futuri Prælati, sint ipso jure suspensi. Anno autem elapso à die obitus Episcopi, id facere potest Capitulum, sed & iis litteras dimissorias dare valet, qui Beneficii Ecclesiastici recepti, vel recipiendi occasione coarctantur. Ita decrevit Conoil: Trident: Sess: 7ma Cap: 10. Ceterum litteræ dimissoriales non extinguuntur per mortem Episcopi qui illas concessit, quia quæ sunt gratiæ, non cessant per mortem concedentis.

*Quæres 6to: Quas pœnas jus constituit adversus eos, qui vel alienos subditos ordinant sine licentia proprii eorum Episcopi, vel ab alieno Episcopo ordinantur?*

*Resp: Concilium Trident: Sess: 14. Cap: 2. sic statuit: Nemo Episcoporum qui titulares vocantur, etiamsi in loco nullius Diœcesis, etiam exempto resederint, aut moram traxerint, alterius subditum, etiam prætextu familiaritatis continuæ, commensalitatis suæ, absque sui proprii Prælati expresso consensu, aut litteris dimissoriis, ad aliquos sacros, aut minores Ordines, vel primam tonsuram promovere, aut ordinare valeat. Contrafaciens ab exercitio Pontificalium per annum, taliter vero promotus, ab executione Ordinum sic susceptorum, donec suo Prælato visum fuerit, ipso jure sint suspensi. Quæ autem hujus censuræ sit vis, patet ex Bulla Pii 5. quæ incipit: Cum ex Sacrorum: ubi hæc habentur: Ordinamus quod omnes & singuli, qui absque dispensatione canonica, aut legitima licentia, sive extra tempora à jure statuta, sive ante legitimam ætatem, vel absque dimissoriis litteris, ad aliquem ex sacris Ordinibus se fecerint promoveri, à suorum Ordinum executione ipso jure suspensi sint, & si hujusmodi suspensione durante, in iisdem Ordinibus ministrare præsumperint, eo ipso irregularitatem incurrant.*

*Quæres 7mo: Quæ requiruntur ad Ordines rite suscipiendos?*

*Resp: Sex præcipue requiruntur. 1mo: vocatio ad Clericalem statum, morum pietas, ac vitæ innocentia sive diligenter custodita, sive congrue reparata. 2do: certa ætas. Pro Minoribus Ordinibus nulla ætas à jure statuitur. Ad majores vero Ordines ex decreto Concilii Trident: Sess: 23. Cap: 12. certa ætas omnino prærequiritur, nullus enim ad Subdiaconatus Ordinem ante 22. ad Diaconam.*



conatus ante 23. ad Præsbyteratus ante 25. ætatis suæ annum promoveri potest, quare pro Subdiaconatu requiruntur anni 22. pro Diaconatu anni 23. pro Præsbyteratu 25. ex usu tamen ubique recepto, sufficit ut hi anni sint inchoati. 3tio: sæcularis Clericus non potest licite ordinari, nisi titulum habeat congruæ sustentationis sive ex beneficio, sive ex proprio patrimonio. 4to: necesse est, ut ferrentur interstitia, hoc est ut certum temporis intervallum inter unum & alterum Ordinem decurrat, quare de re sic statuit Concil: Trident: Ses: 23. Cap: 11. *Minores ordines iis, qui saltem linguam latinam intelligant, per temporum interstitia, nisi aliud Episcopo magis expedire videretur, conferantur, atque ita de gradu in gradum ascendant, ut in eis cum ætate vitæ meritum & doctrina major accrescat, quod & bonorum morum exemplum, & assiduam in Ecclesia Ministerium, atque major erga Præsbyteros, & superiores ordines reverentia, & crebrior quam ante corporis Christi communio, maxime comprobabunt. Cumque hinc ad altiores gradus sit ingressus, nemo iis initiatur, quem non scientiæ spes majoribus ordinibus dignum ostendat. Hi vero nonnisi post annum à susceptione postremi gradus minorum Ordinum, ad sacros ordines promoveantur, nisi necessitas, & Ecclesiæ utilitas, iudicio Episcopi, aliud exposcat.* Igitur inter ultimum minorem Ordinem & Subdiaconatum, annus integer effluere debet, à Subdiaconatu pariter ad Diaconatum, & ab hoc ad Præsbyteratum similiter annus decurrere debet, ut præscribit idem Concilium Cap: 13. & 14. Ses: 25. de Reformatione. Jam vero circa hæc interstitia Episcopus dispensare potest propter Ecclesiæ necessitatem, aut utilitatem. 5to: nequeunt autem eodem die duo simul sacri Ordines suscipi, sic enim habet Concilium Trident: eadem Ses: 23. Cap: 13. *Duo sacri Ordines non eodem die, etiam Regularibus, conferantur, privilegiis ac indultis, quibusvis concessis, non obstantibus.* Neque in hoc Episcopus dispensare potest, sed solus tantummodo Papa concedere potest, ut uno die duo simul sacri Ordines alicui conferantur. Sacra etiam Congregatio Concilii Trident: interpres declaravit, Ordines Minores, & Subdiaconatum eodem die non esse conferendos. Neque etiam licet superiorem ordinem suscipere prætermisso inferiore, & qui sic, per saltum, ut communiter dicitur, ordinatus fuerit, & graviter peccat, & manet suspensus ab exercitio Ordinis sic suscepti. Ex Cap: unico de Clerico per saltum promoti. Si tamen



tamen in illo Ordine non ministraverat, potest Episcopus ex legitima causa cum eo dispensare. Ita Concil: Trid: Ses: 23. Cap: 14. Porro Minores Ordines conferri possunt omnibus Dominicis, & aliis festivis diebus, sed de præcepto, ut habetur in Pontificali Romano. Tonsura autem clericalis quocunque die, & hora. Sacri vero Ordines solum quatuor temporibus, aut Sabbato Sancto vel Sabbato ante Dominicam Passionis. Quodsi ex dispensatione extra prædicta. Tempora, Sacri Ordines conferantur, conferri debent diebus Dominicis & aliis festivis diebus de præcepto.

*Quæres 8vo: Qui sunt effectus Sacramenti Ordinis?*

*Resp:* Effectus Sacramenti Ordinis varii sunt, ac multiplices. Et quidem *1mo:* imprimit characterem, unde semel rite facta ordinatio iterari nequit. *2do:* confert gratiam sanctificantem iis qui hoc Sacramentum digne suscipiunt. *3tio:* tribuit jus ad opportuna gratiæ auxilia in exequendis susceptorum Ordinum officiis maxime necessaria.

## ARTICULUS 2dus

### *De variis Ordinis speciebus.*

*Quæres 1mo: Quot & quotuplices sunt ordines?*

*Resp:* Ordines generatim dividuntur in majores seu sacros, & minores seu non sacros, & sic tres sunt majores ac sacri Ordines, scilicet Præbyteratus, Diaconatus, & Subdiaconatus. Minores seu non sacri quatuor videlicet Ostiariatus, Lectoratus, Exorcistatus, & Acolythatus. Prima tonsura Clericalis est præparatio ad Ordines, Episcopatus quamvis & ipse verus sit Ordo, sed quia est culmen omnium Ordinum, atque illorum perfectio, & ideo inter Ordines non numeratur.

*Quæres 2do: Utrum Episcopatus sit verus Ordo, Sacramentumque à Presbyteratu distinctum?*

*Resp:* Episcopatus est verus Ordo verumque Sacramentum, natura & characterè à Præbyteratu distinctum. Siquidem per Episcopatum longe major & excellentior potestas confertur, quam per Presbyteratum, cum Episcopi etiam Sacerdotes valent consecrare, quod non possunt Presbyteri, ipsaque divina institutione in omnibus majores sunt simplicibus Præbyteris, unde etiam ordinati

Epi-



Episcoporum aliis perficitur ritibus, atque caeremoniis ac Præbyterorum. Ex his ergo manifestum efficitur, Episcopatum esse Ordinem ac Sacramentum natura, & characterè distinctum à Præbyteratu.

*Quæres 3tio: Quæ sit materia, & forma Episcopatus?*

*Resp:* Plura in Ordinatione Episcoporum observantur. 1mo: enim Evangeliorum liber super cervicem & scapulas in Episcopum electi imponitur, nihil dicentibus Episcopis consecrationem perficientibus. 2do: Episcopus consecrator; & ejus Assistentes, caput consecrandi ambobus manibus tangunt, dicentes: *Accipe Spiritum sanctum*. 3tio: Episcopus Consecrator extensis manibus duplicem recitat orationem, qua consecrando gratiam Spiritus sancti apprecatur, ut digne Episcopali officio fungatur. 4to: postea caput, & ambæ manus consecrandi à Consecratore chrismate inunguntur. 5to: tandem Consecrator tradit consecrato cum suis formulis baculum benedictum, annulum, ac librum Evangeliorum. Cum vero ab Ecclesia non sit decisum, quid ex his pro materia, quid pro forma essentiali Ordinis Episcopalis haberi debeat, neque hic constans ac uniformis est Theologorum sensus, ideo quæcunque in Pontificali Romano pro Episcoporum consecratione præscripta sunt, quam accuratissime observari debent.

*Quæres 4to: Quis sit Episcopalis ordinis Minister?*

*Resp:* Soli Episcopi. Et hoc etiam ex continua Ecclesiæ praxi apertissime constat, nunquam enim Episcopos ordinant, nisi Episcopi. Tres porro in Pontificali Romano exiguntur Episcopi, verum an plures ita ad consecrationem Episcopi sint necessarii, ut Episcopatus aliter collatus, nullus sit, disputant inter se Theologi. Alii affirmant, alii negant. In hac vero sententiarum varietate, pars tutior in praxi tenenda est.

*Quæres 5to: Quis in Episcopum consecrari potest?*

*Resp:* Ut quis legitime in Episcopum consecratur, debet esse Sacerdos rite ordinatus. Etsi enim in aliis Ordinibus, inferior gradus non sit necessarius, ut superior valide recipiatur ac possit exg. esse verus Præbyter, qui prius Diaconus non fuit ordinatus, irrita tamen foret ordinatio Diaconi in Episcopum. Quia cum Episcopus ex suo officio Corpus Christi consecrare debeat, necesse est eum illa prius ordinatione esse donatum, per quam confertur potestas consecrandi Corpus Christi, hæc autem potestas quoniam in Ordinatione Præbyteri datur, non ve-



vo in ordinatione Episcopi. Ut igitur valide ac legitime quis in Episcopum consecratur, necesse est, ut sit prius rite ordinatus Sacerdos.

*Quæres 6to: Præbyteratus, & Diaconatus suntne vera Sacramenta?*

*Resp:* Sunt vera Sacramenta. Cum enim Ordo facer sit veri nominis Sacramentum, & Præbyteratus ac Diaconatus sint præcipui sacri ordines, divinæque institutionis. Sequitur Præbyteratum, & Diaconatum esse quoque vera Sacramenta.

Materia vero tum Præbyteratus, tum Diaconatus, est impositio manuum, forma vero, adjuncta oratio. Omnia tamen quæ pro Ordinatione Præbyterorum, aut Diaconorum in Romano Pontificali præscribuntur, diligentissime observanda, & adimplenda sunt.

*Quæres 7mo: Quid de Subdiaconatu sentiendum sit?*

*Resp:* Verisimilius est Subdiaconatum non esse Sacramentum, quia non est institutionis divinæ, sed Ecclesiasticæ tantum, attamen à multis jam sæculis inter sacros Ordines refertur, & majoribus annumeratur. Subdiaconatus vero annexum esse perpetuum cælibatum, sive ex voto castitatis implicito, sive etiam ex præcepto Ecclesiæ, notissimum est. De Subdiaconi, & Diaconi ordinatione hæc statuit Concilium Trident: Ses: 23 Cap: 13. *Subdiaconi & Diaconi ordinantur, habentes bonum testimonium, & in minoribus ordinibus jam probati, ac litteris, & iis, quæ ad ordinem exercendum pertinent, instructi, qui sperent Deo auctore, se continere posse.*

*Quæres 8vo: Quæ requiruntur ad Minores Ordines suscipiendos?*

*Resp:* Concilium Tridentinum Ses: 23. de Refor: ad Ordines Minores recipiendos requirit, ut ii, qui ad dicto Ordines promovendi sunt, bonum à Parocho, & à Magistro Scholæ in qua educati sunt, habeant testimonium. Et saltem linguam latinam intelligant.



## CAPUT SECUNDUM

*De Sacramento Extremæ Uctionis.*

Cum multæ in Ecclesia catholica usitatæ sint unctiones, hæc quæ infirmis traditur, estque veri nominis Sacramentum, extrema dicitur, ut ab aliis unctionibus ipso nomine secernatur, atque etiam significetur, illam nonnisi in extremo vitæ agone dari consuevisse.

ARTICULUS I<sup>mus</sup>*De materia ac forma Extremæ unctionis.*

*Quæres 1<sup>mo</sup>: Quid sit Extrema unctio?*

*Resp:* Est Sacramentum à Christo Domino institutum ad sanitatem mentis & corporis infirmis, precibus Sacerdotum conferendam, per infusionem gratiæ sanctificantis & sanationem morborum, quando salutem animarum expedit. Est itaque Extrema unctio verum Sacramentum à Christo Domino institutum, prout definierat Concil: Trident: Ses: 14. Can: 1. quæ quidem sacra unctio apud S. Marcum Cap: 6. insinuata est, per Sanctum autem Jacobum Apostolum in Epistola ejus Cap: 5. commendata, ubi sic ait: *Infirmatur quis in vobis? inducat Præbiteros Ecclesiæ, & orent super eum, ungentes eum oleo in nomine Domini, & oratio fidei salvabit infirmum, & alleviabit eum Dominus, & si in peccatis sit, dimittentur ei.*

*Quæres 2<sup>do</sup>: Quæ sit materia Sacramenti Extremæ unctionis?*

*Resp:* Cum cujuslibet Sacramenti materia duplex sit, remota scilicet, & proxima, Sacramenti Extremæ unctionis materia remota est oleum. Ita docet Concil: Trident: Ses: 14. Cap: 1. his verbis: *Ex Apostolica traditione per manus accepta, Ecclesia didicit, materiam hujus Sacramenti esse oleum ab Episcopo benedictum, nam unctio aptissime Spiritus gratiam, qua invisibiliter anima ægrotantis inungitur representat.*

Porro



Porro istud oleum debet esse ex olivis expressum, quia tale solum, proprie oleum nuncupatur. Debet quoque esse simplex absque ulla admixtione. Duplex ergo oleum est in usu in Ecclesia, aliud *mixtum*, cui balsamum admiscetur, & vocatur *Chrisma*, quo solent inungi in vertice illi, qui baptisantur, & in fronte ii, qui confirmantur, atque in manibus, qui ordinantur, aliud est purum ex olivis expressum, cui nihil quidquam admiscetur, quo unguntur baptisandi in pectore, & scapulis, & aegroti in quinque sensibus.

*Quæres 3tio: Debetne istud oleum esse benedictum?*

*Resp:* Ex omnium Theologorum sententia, jure saltem Ecclesiastico necesse est, ut istud oleum infirmorum sit ab Episcopo consecratum, atque benedictum. Ita quippe docet constans Traditio. Unde & Concilium Trident: Ses: 14. Cap: 1. Materiam Sacramenti Extremæ unctionis docet esse *oleum ab Episcopo benedictum*. Si usus, & consuetudo Ecclesiæ Latinæ attendatur, certum est hoc oleum ab Episcopo debere esse benedictum, quia solis Episcopis reservata est facultas oleum infirmorum benedicendi, & simplicibus Præbyteris nunquam concessa fuit. Apud Græcos autem simplices Præbyteri, oleum infirmorum benedicunt toties, quoties Extremæ unctionis Sacramentum administrant, qui Præbyterorum Græcorum usus ab Ecclesiâ Latina non improbat.

Sed præterea istud oleum debet esse hoc anno benedictum, unde ut præscribit Rituale Rom: Tit: 5. Cap: 1. de Sacr: Extr: Unct. singulis annis, veteri combusto, renovandum est.

Si deficit oleum infirmorum ab Episcopo benedictum, propter frequentem hujus Sacramenti administrationem, & aliud benedictum haberi nequeat, potest Sacerdos oleum non consecratum miscere cum consecrato, modo in minore quantitate, quemadmodum præscribit Rituale Romanum. Tit: 5. Cap: de Sacram: Extremæ Unct: ex illa enim unione quod non fuit consecratum, quamdam contrahit consecrationem.

*Quæres 4to: Quæ sit materia proxima Extremæ Uctionis?*

*Resp:* Est ipsa unctio. In omnibus siquidem Sacramentis, quæ in actu transeunte posita sunt, materia proxima, est applicatio materiæ remotæ. Jam vero juxta præscriptum Ritualis Romani: *Quinque corporis partes præcipue ungi debent, quas veluti sensuum instrumenta homi-*



*homini natura tribuit, veluti oculi, aures, nares, os, & manus, attamen pedes etiam, & renes ungenti sunt, sed renum unctio in mulieribus, honestatis gratia, semper o-mittitur, atque etiam in viris, quando infirmus commode moveri non potest. Sed sive in mulieribus, sive in viris, alia corporis pars, pro renibus ungi non debet. Manus vero, quæ in reliquis infirmis, interius ungi debent, Præsbyteris exterius ungantur. Si quis autem sit aliquo membro mutilatus, pars loci illi proxima, inungatur, eadem verborum forma.*

An vero istiusmodi plures unctiones sint ad hujus Sacramenti substantiam necessariæ, disputant Theologi. Illorum magis placet sententia, qui putant perinde esse ad essentiam hujus Sacramenti, sive una, sive plures unctiones adhibeantur, attamen quinque sensuum unctiones, ad integritatem Sacramenti, atque ad majorem illius effectus expressionem pertinere. Unde Rituale Romanum disponit: *Si quis laborat in extremis, & periculum immineat, ne decedat, antequam unctiones finiantur, cito ungatur, incipiendo ab eo loco, per istam sanctam unctionem, & suam piissimam misericordiam, indulgeat tibi Dominus quidquid per visum, sive per auditum etc. deliquisti.* Quare in casu urgentis necessitatis, unico peruncto sensu, dicendum est breviter: *Per istam sanctam unctionem, & suam piissimam misericordiam, indulgeat tibi Dominus, quidquid per sensus deliquisti.* Sed extra casum gravis necessitatis nusquam licet istiusmodi unctiones prætermittere. Imo præcipit Rituale Rom: ut si instante periculo, unica tantum cum generali forma adhibita fuerit unctio, & adhuc infirmus supervivat, dicantur Orationes prætermissæ.

Si autem accidat, ut infirmus dum inungitur, decedat, Præsbyter ultro non procedat, & reliqua omittat. Quodsi dubitet, an infirmus adhuc vivat, unctionem prosequatur sub conditione pronuntiando formam dicens: *Si vivis, per istam sanctam unctionem etc.* Ita Rituale Rom: Tit: 5. Cap: 1. de Sacram: Extr: Unct:

*Quæres 5to: Quæ sit forma Sacramenti Extremæ Unctionis?*

*Resp: Forma Sacramenti Extremæ Unctionis, ut inquit Rituale Romanum, solemnitas illa precatio est, quam Sacerdos ad singulas unctiones adhibet, quia scilicet illa Sancta Romana Ecclesia ubique utitur. Monet autem idem Rituale. Dum oculos, aures, & alia corporis membra, quæ paria sunt, sacerdos ungit, caveat ne alterum ipso.*



ipsorum inungendo, Sacramenti formam prius absolvat, quam ambo hujusmodi paria membra perunxerit.

Verum tamen verba formæ hujus Sacramenti essentialia sunt ista: *Per istam unctionem indulgeat tibi Deus, quidquid deliquisti.* Quia per hæc exprimuntur actus Sacramentalis, causa Sacramenti principalis, nempe Deus, subjectum cui Sacramentum applicatur, & effectus illius. Cavere tamen summopere debet Sacerdos, ne omittat cetera verba, quæ in Rituali Romano præscripta sunt.

## ARTICULUS 2dus

*De Ministro, subjecto, & effectibus Sacramenti Extremæ Uctionis:*

*Quæres 1mo: Quis sit Minister Sacramenti Extremæ Uctionis?*

*Resp:* Est Sacerdos. Ex constanti namque Ecclesiæ praxi, simplex Sacerdos potest hoc Sacramentum conficere. Quilibet ergo Sacerdos Sacramentum Extremæ Uctionis potest valide administrare, quis ad hoc sufficit potestas Ordinis, quam quilibet habet Sacerdos. Verum ut etiam licite hoc Sacramentum administretur, requiritur potestas jurisdictionis, sive ordinaria, sive delegata. Si vero desit Sacerdos qui tali jurisdictione præditus sit, in casu extremæ necessitatis hoc Sacramentum à quolibet Sacerdote, sive Regulari, sive sæculari licite administrari potest. Jam autem extra casum extremæ necessitatis, id Religiosis prohibitum est, ne scilicet jura Parochorum violentur.

*Quæres 2do: Quibus administranda est Extrema Uctio?*

*Resp:* Extrema Uctio administranda est. 1mo. solis infirmis. Et id persvasum habuit, suæque praxi confirmavit Ecclesia. Quare sanis, & bene valentibus hoc Sacramentum administrari non debet, etsi probabile, aut certum mortis periculum subeant. Hinc Rituale Rom: ita præscribit Tit: 5. Cap: 1. de Sacramento Extremæ Uct: *Non ministretur prælium inituris, aut navigationem, aut peregrinationem, aut alia pericula subituris, aut reis ultimo supplicio mox afficiendis, quamvis enim hi omnes egeant præparatione ad mortem, non tamen pro illis sed pro solis ægotantibus hoc Sacramentum est à Chri-*



esto institutum. Non est etiam dandum Sacramentum istud iis infirmis, qui levi aliqua laborant infirmitate, ex qua probabiliter mors timeri non potest, quia iis solum ægris administrari debet, qui graviter decumbunt, adeo ut ex illorum infirmitate prudenter, & probabiliter mors timeri debeat.

2do: Administranda est Unctio extrema iis, qui in exitu vitæ positi sunt, ac vere moribundi censentur, & de quorum morte prudenter timetur, licetsi non ita proxima sit, quia ex Conciliis Florentino, & Tridenti: Sacramentum Extremæ unctionis administrari debet periculose decumbentibus, qui in exitu vitæ esse videntur, & infirmis de quorum morte merito timetur. Unde Rituale Romanum sic habet de Extrema Unctione. *Debet hoc Sacramentum infirmis præberi, qui cum ad rationis usum pervenerint, tam graviter laborant, ut mortis periculum imminere videatur, & iis qui præ senio deficient, & in die videntur morituri, etiam sine alia infirmitate.* Quare graviter peccant, qui illud tempus ad iungendum ægrotum expectant, cum jam omnis spes vitæ amissa fuerit, cum jam ægrotus vita, & sensibus carere incipiet. Ad dandam igitur Extremam unctionem, non est expectanda ultima illa vitæ periodus, qua homo extremum agit spiritum, sed illud observandum est tempus, cum infirmus integris adhuc est sensibus.

3tio: Danda est Extrema unctio senibus, qui propter decrepitam ætatem, quamvis nulla urgente infirmitate, in dies morituri creduntur, quia & Rituale Romanum ita disponit, ut mox vidimus Tit: 5. Cap: 1. de Sacram: Extremæ Unct: & ipsa gravis, atque annosa senectus infirmitas est morti proxima. Merito itaque Concil: Mediol: 4. sub S. Carolo sic constituit: *Parochus Extr: Unctionis Sacramentum sicut his ministrare debet, adultis scilicet, periculose ægrotantibus, propeque moribundis, senio confectis, etiam non ægrotis, in diem morituris, ita istis non ministret, nempe pueris rationis usu carentibus mulieribus in partu laborantibus, ad bellum proficiscentibus, navigantibus, peregrinantibus, & iis, qui mox ultimo supplicio mulctandi sunt.* Unum his addendum est, quod Rituale Romanum de hoc Sacramento præterea constituerat, nimirum: Impœnitentibus, & qui in manifesto peccato mortali moriuntur, atque excommunicatis, penitus esse illud denegandum.



*Quæres 3tio: Infantibus, amentibus, estne dandum Sacramentum Extremæ unctionis?*

*Resp:* Infantibus baptisatis, in quibus nullum est peccatum, Sacramentum Extremæ unctionis dari non debet, quia illud ad delenda peccata est à Christo institutum. Amentibus vero furiosis, abreptitiis, qui dum sana mente erant, signa sinceræ pœnitentiæ, & veræ ad Deum conversionis ostenderint, maxime si antea Sacramenta exoptaverint, non debet illis hoc Sacramentum denegari. Si tamen istiusmodi homines nulla haberent lucida intervalla, aut etiam non possit ipsis Extrema unctio administrari, sine periculo irreverentiæ, latius foret, eo in casu illos non inungi, quia hoc Sacramentum non est ompino ad salutem necessarium. Unde Rituale Rom: ita statuit: *Infirmis, qui dum sana mente & integris sensibus essent, illud petierunt, seu verisimiliter petiissent, seu dederint signa contritionis, etiamsi deinde loquelam amiserint, vel amentes effect sint, vel delirent, aut non sentiant, nihilominus præbeatur ipsis hoc Sacramentum. Sed si infirmus, dum phrenesi, aut amentia laborat, verisimiliter posset quidquam facere contra reverentiam Sacramenti, non inungatur, nisi periculum tollatur omnino.* Non est ergo deneganda Extrema unctio iis qui subito vi mortis oppressi omni sensu destituuntur, nec suum de peccatis dolorem, ac Sacramenti desiderium significare possunt, eorum quippe perspecta Christiana fides, videtur non obscurum esse argumentum eorum voluntatis, ac desiderii suscipiendi hoc Sacramentum, quod demonstrarent si possent.

*Quæres 4to: Qui sunt effectus Sacramenti Extremæ Uctionis?*

*Resp:* Effectus Sacramenti Extremæ Uctionis, sic descripsit Concilium Trident: Ses: 14. Cap: 2. *Res & effectus hujus Sacramenti, gratia est Spiritus Sancti, cujus unctio delicta, si quæ sint adhuc expianda, ac peccati reliquias abstergit, & ægroti animam alleviat & confirmat, magnam in eo divinæ misericordiæ fiduciam excitando, quæ infirmus sublevatus, & morbi incommoda, ac labores levius fert, & tentationibus dæmonis calcaneo insidiantis facilius resistit, & sanitatem corporis interdum, ubi salutis animæ expedierit, consequitur.* Ex quo liquet primarium & directum hujus Sacramenti effectum esse gratiam sanctificantem, prout ipsa ordinatur ad fines ejusdem Sacramenti proprios, quos esse quatuor ex prædictis Concilii Tridentini verbis colligimus, nempe remissionem peccatorum,



torum, abstersionem reliquiarum peccati, infirmi levamen contra tedium, torporem, atque infirmitatis incommoda, denique sanitatis corporeæ restitutionem.

*Quæres 5to: Quenam peccata per Sacramentum Extremæ Uctionis delentur?*

*Resp:* Ea omnia delentur, sive mortalia sint, sive venialia, quæ interdum remanent post alia suscepta Sacramenta, & ab infirmo ignorantur. Fieri enim potest ut quis post peractam in infirmitate Confessionem, Communionemque, in peccatum mortale incidat, & ignoret se eo peccato detineri, potest etiam accidere ut Confessionem, Communionemque infirmus non rite peregerit, & hoc ipse nesciat. Ista ergo peccata, quæ expianda supersunt, ut loquitur Concilium Trident: sive mortalia sint, sive venialia, Sacramentum Extremæ Uctionis nisi quis obicem ponat, & male dispositus sit, vere delet, & remittit, unde in unctionibus dicitur, *quidquid per visum, auditum, tactum, odoratum deliquisti*. Fieri ergo facile potest, ut infirmus per hoc Sacramentum salvetur, qui alioquin sine ipso damnaretur, quemadmodum docet S. Carolus Borromæus.

*Dices:* Extrema unctio datur post Confessionem, & absolutionem. Ergo supponit jam remissa peccata, non illa remittit.

*Resp:* Si vere per Sacramentalem absolutionem remissa sunt, illa non remittit, & alios tantummodo parit effectus, si vero propter occultum aliquem defectum remissa non sunt, aut nova supervenerint peccata, quæ ab infirmo ignorantur, illa remittit, dummodo infirmus recte dispositus sit, maxime de peccatis suis vere contritus inveniatur. Quare infirmus, qui vel in præcedenti Confessione aliquod mortale ex oblivione confiteri prætermisit, aut peracta Confessione novum aliquod peccatum mortale admisit, & illorum sibi conscius est, debet prius confiteri, & absolvi, antequam ungatur.

*Quæres 6to: Quis est secundus Extremæ unctionis effectus?*

*Resp:* Secundum effectum Extremæ unctionis Concilium Trident: hunc ponit, quod abstergat reliquias peccati, id est penam temporalem peccatis debitam, pravas animi ad peccatum dispositiones, ac denique torporem ex peccatis proveniente. Ceterum Extrema unctio istas peccati reliquias non ita tollit, ut nullæ remaneant, sed saltem id efficit, ut istiusmodi animi torpor, ignavia de-

pres-



pressæ ac debilitatæ, minus ægrotum impediunt, ab illarum rerum cogitatione, & operatione, quæ ad ipsius pertinent salutem.

*Quæres 7mo: Qui sunt reliqui Extremæ unctionis effectus?*

*Resp:* Duo sunt adhuc reliqui, scilicet: *Alleviatio animæ ægrotantis*, ex qua magnam illa concipit divinæ misericordiæ fiduciam, morbi incommoda levius tollerat, ac tandem in spem melioris vitæ quadam interna consolatione erigitur, & diaboli tentationibus facilius resistit. *Sanitas corporis*, si tamen illa salutis animæ expedierit, unde hic ultimus effectus conditionatus est, & facile intelligitur, cur virtute hujus Sacramenti non semper convalescant infirmi.

*Quæres 8vo: An & quomodo Sacramentum Extremæ Uctionis, sit ad salutem necessarium?*

*Resp:* Sacramentum Extremæ unctionis non est quidem ad salutem necessarium necessitate mellii, quia ordinarie supponit remissa esse peccata per Sacramentum Pœnitentiæ, cujus perfectio est, & consummatio: Jure tamen divino præcepta est, atque Ecclesiastico. Unde qui periculosa præmuntur infirmitate, tenentur tum ex præcepto divino, tum ex mandato Ecclesiæ, hoc Sacramentum recipere. Sæpius autem in vita ab eodem homine, in alia & alia infirmitate recipi potest, unde Concilium Trident: Sess: 14. Cap: 3. de Extrema Uctione sic habet: *Infirmi si post eam susceptam convalescerint, iterum hujus Sacramenti subsidio juvari possunt, cum in aliud simile vitæ discrimen inciderint.* Rituale vero Romanum Tit: 5. Cap: 1. de Sacramento Extr: Uct: sic disponit: *In eadem infirmitate hoc Sacramentum iterari non debet, nisi diuturna sit, ut si, cum infirmus convalescerit, iterum in periculum mortis incidat.*

*Quæres 9no: Quæ requiruntur dispositiones, ut digne & fructuose Extrema Unctio percipiatur?*

*Resp:* Requiritur 1mo: prævia Confessio, & absolutio, unde qui reum mortalis peccati se esse sentit, prius confiteri, & absolvi debet, antequam sacro oleo inungatur. 2do: devotio actualis, quare semper danda est Extrema unctio, cum infirmus est adhuc integris sensibus, non expectandum ultimum vitæ momentum, cum jam homo ad omnia fere ineptus efficitur.



## TRACTATUS

DE

## SACRAMENTO MATRIMONII,

Matrimonium adhuc in Paradiso Deus instituit, quando ex Adæ costa formatam mulierem ad illum adduxit, quam ipse intuitus dixit: Genesis Cap: 2. *Hoc nunc os ex ossibus meis, & caro, de carne mea. hæc vocabitur Virago, quoniam de viro sumpta est. Quamobrem relinquet homo Patrem suum, & matrem, & adhærebit uxori suæ, & erunt duo in carne una.* Christus vero illud confirmavit, indissolubilitatemque ipsius corroboravit, dicens Math: Cap: 19. *Quod Deus conjunxit, homo non separet:* suæque præsentia Nuptias in Cana Galileæ non solum cohonestavit, sed & sanctificavit.

## CAPUT PRIMUM

*De Matrimonii natura, institutione, causisque ipsius.*

ARTICULUS I<sup>mus</sup>

*De natura, essentia Matrimonii, illiusque institutione.*

*Quæres 1<sup>mo</sup>: Quid sit Matrimonium?*

*Resp:* Matrimonium spectari potest vel ut est contractus naturalis ac civilis, in officium naturæ ad propagandum genus humanum, à Deo institutus, & juxta proprias locorum leges initus, vel etiam in est Sacramentum. Matrimonium ut est contractus civilis ac naturalis: *Est maritalis conjunctio viri & fæminæ, individuum vitæ pariens societatem.* Requiruntur autem personæ ad istiusmodi maritalem conjunctionem, habiles, ut neque à natura, neque à locorum legibus ad eam impediuntur. Parit autem individuum vitæ societatem, ad ipsamque strictissime obligat, unde solo partium consensu, sicut



ti ceteri contractus dissolvi nequit. Matrimonium vero ut Sacramentum definiri solet: *Sacramentum novæ legis, à Christo Domino institutum, quo vir & mulier baptisati, secundum stricto fœdere conjunguntur, ad prolem procreandam, atque pie & Christiane instituendam.* Matrimonium itaque consistit in mutua pactione, qua vir & mulier individuum vitæ societatem sibi spondent, & appromittunt, ex hac vero pactione oritur vinculum, quo vir & mulier sibi mutuo obstringuntur.

Triplex autem secernitur Matrimonium, nimirum *Legitimum* tantum, & est illud quod mutuo consensu inter personas habiles juxta locorum leges contrahitur, tale est Matrimonium inter Gentiles, & Judæos contractum. *Ratum* quod inter baptisatos contrahitur, & ideo majorem habet firmitatem, quia illi ratio Sacramenti supervenit: *Consummatum* denique, quod per carnalem copulam completur.

*Quæres 2do: Utrum Matrimonium sit vere Sacramentum à Christo Domino institutum?*

*Resp:* Matrimonium est verum Sacramentum à Christo Domino institutum. Ita definivit Concilium Trident: Sess: 24. Can: 1. his verbis: *Si quis dixerit, Matrimonium non esse vere et proprie unum, ex septem Legis Evangelicæ Sacramentum, à Christo Jesu institutum, neque gratiam conferre, anathema sit.* Et revera SS. Patres, & Concilia maxime Lateranense 3. Constantiense, & Eugenius 4. in suo decreto Matrimonium verum esse novæ legis Sacramentum tradiderunt, & hoc semper universa Orientalis, & Occidentalis Ecclesia tenuit, & docuit, contrarie sentientes, tamquam hæreticos anathematizavit.

*Quæres 3tio: Matrimonia inter Infideles, seu non baptisatos contracta, suntne valida?*

*Resp:* Matrimonia inter Infideles, seu non baptisatos, secundum justas loci leges contracta, valida sunt, quia nullo jure irritantur. Non Divino, cum nullum tale extat jus à Deo latum, imo Apostolus Paulus 1. Corin: Cap: 7. statuit: *ut si quis frater uxorem habet infidelem, & hæc consentit habitare cum illo, non dimittat illam.* Non jure Ecclesiastico, quia Ecclesia nihil potestatis habet, in non baptisatos.

Debent tamen hæc matrimonia contrahi juxta Patriæ leges, quia Principes etiam Ethnici jus habent constituendi leges, juxta quas Matrimonia contrahantur, & si aliter contrahantur, invalida sint, his vero subditi obtemperare



porare tenentur, si igitur illas violent invalide contrahunt. Contracta nihilominus etiam legitime ab Infidelibus Matrimonia, non sunt tam firma, sicut Matrimonia baptisatorum, quia hæc postquam consummata fuerint, nullo modo solvi possunt, illa vero aliquando solvi possunt.

*Quæres 4to: Quid de Matrimoniis Fidelium cum Infidelibus, aut Catholicorum cum Hæreticis contractis sentiendum est?*

*Resp:* Matrimonia Fidelium cum Infidelibus contracta nulla, & irrita sunt, quia jam pridem cultus disparitas est impedimentum Matrimonium dirimens. At matrimonia Catholicorum cum Hæreticis inita valida quidem sunt, sed illicita, quia graviter, & iustissimis de causis ab Ecclesia prohibita sunt. Istiusmodi namque Matrimonia peccandi periculo exponunt Catholicum qui ducit hæreticam mulierem, & magis adhuc catholicam, quæ nubit hæretico. Et nempe periculum ne ex irrisione avertatur à Pœnitentiæ, & Eucharistiæ Sacramentis, à jejuniis, cultu Sanctorum, ne prolem pariat hæresi, non Christo, ne demum à recta fide abducatur ab Hæretico viro, cujus sermo ut cancer serpit.

Aliquando tamen ex concessione & dispensatione Ecclesiæ, potest inter Catholicos, & Hæreticos licite contrahi Matrimonium, quia & sæpius id ex dispensatione Romanorum Pontificum, & Episcoporum factum est, & non raro istiusmodi Matrimonia nihil, vel parum habent periculi, ut cum conjux hæreticus, parum de sua Religione sollicitus est, & magis exterius, quam cordis affectu illi adhæret. Igitur poterunt Catholici Matrimonium contrahere cum Hæreticis *1mo:* cum illi conversionem serio promittunt, sed raro habenda est fides ejusmodi promissionibus, quas fervens amor facile elicit, refrigescens vero eludit. *2do:* Quando graves causæ istiusmodi conjugia exigunt, puta spes certa sopiendi graves inimicitias inter familias, flectendi animum alicujus Domini, Principis in gratiam Catholicorum. *3tio.* Cum præsto est legitima Superioris concessio, ac dispensatio. *4to:* Cum pars Catholica habitura est facultatem ac libertatem omnia suæ Religionis officia adimplendi, infantes utriusque sexus catholice instituendi, nec ullum vereri est subversionis periculum. Dispensatio vero ac concessio ad contrahendum Matrimonium cum hæretica parte, si agatur de magnis Principibus, quorum Conjugia insigniter Religionem tangunt, illa concedi debet vel à Romano Pontifice, vel ab Episcopia, si vero agatur



agatur de inferioris conditionis hominibus, curandum est, ut id non fiat inconsulto Parocho, qui utriusque partis ingenium, veræ fidei in uno, errori in altero adhæSIONEM, ac futuri matrimonialis contractus clausulas, maxime educationem proli spectantes, diligenter examinabit, & si quod fidei, vel moribus imminere periculum præsentiat, ministerium denegabit, & rem totam ad Episcopum deferet, imo nunquam istiusmodi assistet matrimonio nisi sciente, & consentiente Episcopo.

*Quæres 5to: Utrum Matrimonia valeant per Procuratorem inita?*

*Resp:* Valent. Quia omnis contractus per Procuratorem constitui potest. Cum igitur Matrimonium verus sit contractus, qui inter virum & mulierem constituitur, possunt Matrimonia per Procuratorem constitui, & reipsa Matrimonia sic contracta, Ecclesia approbat, & rata habet, non est itaque dubium, quod ipsa valeant.

Ut vero per Procuratorem Matrimonium valide contrahatur, necesse est. 1mo: Ut Procurator speciale habeat mandatum non modo in genere ad Matrimonium contrahendum, sed ad Matrimonium contrahendum, cum tali persona. 2do: Ut mandatum istud per se, non per alium exequatur, nisi hoc ei specialiter sit commissum, neque etiam mandati sui limites excedat, atque ritu ab Ecclesia præscripto contrahat. 3tio: Maxime autem & præcipue, ut mandatum non sit revocatum. Porro valet revocatio mandati, etiamsi quis iuraverit se mandatum non revocaturum. Valet quoque revocatio etiamsi mere interna foret, quia tollit internum consensum, qui ad Matrimonium omnino necessarius est, licetsi in foro exteriori talis pure interna revocatio nihil prosit, nisi probetur. Magis autem valet revocatio tacita, hoc est non quidem verbis, sed facto declarata, ut si quis aliud det mandatum ad contrahendum cum altera, qui enim secundam ducere vult, primam abiicit, & illam ducendi habitam immutat voluntatem. Curandum vero semper est, ut Matrimonium per Procuratorem contractum, deinceps inter præsentem Conjuges renovetur, & benedicatur, & id habet communis usus.

*Quæres 6to: Quæ sit materia ac forma Sacramenti Matrimonii?*

*Resp:* Materia Sacramenti Matrimonii sunt actus contrahentium conjugum quibus consensum suum ad seum perpetuo convivendum exprimunt, fidemque maritalem



talem sibi mutuo appromittunt. Forma vero sunt verba in Rituali Romano præscripta, quibus Sacerdos nomine Ecclesiæ contractum matrimonialem rati habendo benedicit.

*Quæres 7mo: Ad validitatem Matrimonii, estne omnino necessarius Conjugum consensus?*

*Resp:* Ad valorem Matrimonii omnino necessarius est utriusque Conjugis consensus, quia Matrimonium est contractus, jam vero contractus subsistere nequit sine mutuo contrahentium consensu, ubi autem deest matrimonialis contractus, ibi etiam Matrimonii Sacramentum subsistere nequit, cum hoc in illo fundetur ipsumque necessario præsupponat. Sive ergo Matrimonium spectetur ut purus contractus, sive ut Sacramentum, semper ad illud mutus Conjugum consensus est omnino necessarius. Quoniam vero Matrimonium est duorum in idem conspirantium conventio, ideoque mutus utriusque Conjugis requiritur consensus, unde si unus tantummodo Conjugum consentiat, alter vero vel nullatenus, vel nonnisi fecte, & fraudulenter, non stabit matrimonium. Consensus autem istiusmodi, debet esse utriusque Conjugis simultaneus non quidem physice, ut eodem temporis momento ponatur, sed moraliter, scilicet ut dum unus Conjugis consensus ponitur, alterius jam prius positus, ac præstitus, moraliter perseveret, nec revocatus sit sive implicite, sive explicite, alioquin non esset mutus utriusque Conjugis consensus, prout omnino esse debet. Sufficit autem ut consensui unius prius præstito, nec revocato, sed virtualiter perseveranti, accedat alterius consensus licet interposito intervallo, id enim in omni contractu satis est.

*Quæres 8vo: Qualis debeat esse consensus ad Matrimonium requisitus?*

*Resp:* Debet esse 1mo: liber ac proinde immunis tum ab errore circa ea quæ substantiam Matrimonii spectant, tum à metu gravi injuste inculso, unde error & vis, sunt impedimenta Matrimonium dirimentia.

2do: Debet esse verus, ac sincerus, unde Matrimonium nullum est, si aut uterque Conjunx, aut unus eorum fecte, & exterius solum consentit, interius dissentiendo.

3tio: Debet esse exterior. Consensus enim unius Conjugis debet ab altero acceptari. Acceptari autem nequit nisi exterius manifestetur. Debet ergo consensus matrimonialis esse exterior. Sed ut sit exterior, non debet omnino verbis exprimi, sed sufficit ut quibuscunque signis exterior-



exterioribus declaretur, unde muti Nuptiarum capaces sunt. Cavendum tamen, ne qui verbis possunt, signis contrahant, quia à trito Ecclesiæ usu non est recedendum.

*Quæres 9no: Ad quid tenetur qui fecte solum consensit?*

*Resp:* Qui fecte consensit, huic nihil eorum licitum est, quæ veris Conjugibus permilla sunt, quia cum defuerit consensus unius Conjugis, nullum, ac irritum est Matrimonium. Qui itaque fecte tantummodo consensit, nisi obstet vis, metus inique inculsus, aliaque gravis causa, qualis est, magna conditionis inæqualitas, capitales inimicitiae ex tali Matrimonio oriundæ, tenetur de novo vere & interius consentire ac contrahere, quia aliter factam comparti injuriam resarcire non poterit, neque ad alias Nuptias convolare potest, quia semel in facie Ecclesiæ contractæ, pro validis exterius habentur. Dum vero post contractum Matrimonium una pars affirmat se nonnisi fecte consensisse, altera pars non tenetur ei credere. Ita statuit Innoc: 3. Cap: 10. de probat: quia verisimilius est quod nunc mentiat, quam tunc cum Matrimonium contraxit. Unde ei nequidem juranti fides adhibenda est, nisi id speciales exigant circumstantiæ, ut si puella metum sibi inculsus fuisse probet.

*Quæres 10mo: An possit verus consistere consensus cum scientia juris, & errore facti, exg. Petrus duxit in uxorem Mæviam quam ex errore credebat esse sibi affinem in eo gradu, in quo sciebat se illam ducere non posse?*

*Resp:* Multo probilius es, istiusmodi Matrimonium nullum esse, propter defectum consensus in Petro, quia vix fieri potest, ut vere & sincere velit Mæviam habere uxorem suam, quam credit, & plene persuasus est, suam uxorem esse non posse, nunquam enim voluntas in id inclinari potest, quod intellectus judicat fieri non posse. Res ergo plena dubii est, utrum sic contractum Matrimonium valeat, quare qui cum tali errore contraxit, deposito errore consensum renovare debet.

*Quæres 11mo: Utrum valeat Matrimonium sub conditione contractum?*

*Resp. 11mo:* Valet Matrimonium si conditio sit de præsentī, & extet, vel de præterito & extiterit, quia posita conditione, cui alligatur consensus, ille ex conditionato, transit in absolutum. Secus si conditio non subsistat, nam tunc deest consensus contrahentis, siquidem non vult tunc consentire in matrimonium nisi posita conditione.



ditione: Si ergo hæc non subsistat, non subsistit etiam consensus, quo deficiente deficit Matrimonium.

2do: Matrimonium contractum sub conditione honesta, vel indifferenti de futuro contingente, valet quidem, sed non absolute, donec impleatur conditio. Quia ea est generatim natura conditionis contractui adjectæ, ut contractus valorem sub illa initi, usque ad illius eventum suspendat. Quare post sic contractum Matrimonium, nihil permissum est Conjugibus, quod alias ipsis licitum foret, si absolute Nuptias contraxissent. Inest tamen certus huic Matrimonio valor, quare post ipsum neutra pars resilire potest alia invita, usque ad eventum conditionis. Si vero partes quæ sic contraxerunt, ante conditionis eventum vel revocent consensum suum, vel alias contrahant nuptias, ilico corrumpit Matrimonium.

3tio: Si conditio apposita repugnet naturæ Matrimonii, atque ipsius fini, & scopo, irritum est Matrimonium. Ita statuit Gregorius 9. Cap: ultimo de Conditionibus, ubi sic habetur: *Si conditiones contra substantiam conjugii inserantur, puta si alter dicat alteri contraho tecum, si generationem prolis evites, vel donec inveniam aliam diutorem, aut si pro quæstu adulterandam te tradas, matrimonialis contractus, quantumcumque sit favorabilis, caret effectu.* Quod si vero conditio adjecta non adversetur fini, & substantiæ Matrimonii, licetsi sit turpis, vel etiam absolute impossibilis, non irritat Matrimonium, ut ibidem in jure sancitur his adjectis: *Licet aliæ appositæ conditiones in Matrimonio, si turpes, aut impossibiles fuerint, debeant propter ejus favorem pro non adjectis haberi.* Et merito conditio turpis, & impossibilis eodem in gradu habetur, id enim solum possumus, quod jure, & licite possumus, quare pari jure conditio turpis, ac impossibilis Matrimonio apposita, pro non adjecta habetur. Si tamen ex circumstantiis appareret conditionem impossibilem, aut turpem serio adjectam fuisse, & contrahens vere affirmet se non habuisse voluntatem contrahendi, nisi sub ista conditione, irritum erit Matrimonium propter defectum consensus in sic contrahente.

Quotiescunque autem Matrimonium conditionate contractum, irritum redditur, nunquam ab eo Conjuges resilire possunt, & ad alias convolare nuptias, sine Judicis Ecclesiastici declaratoria sententia. Semel enim in facie Ecclesiæ contractum Matrimonium, rescindi nequit nisi Ecclesiæ judicio.



*Quæres 12mo: An peccent qui sub conditione Matrimonium contrahunt?*

*Resp:* Qui sub conditione quacunq[ue] etiam honesta Matrimonium contrahunt, & qui ipsis assistunt peccant, maxime autem si conditio de futuro apponatur. Quia mortaliter peccat qui Sacramenta sub conditione de futuro contingente absque gravi necessitate conficit, aut iis cooperatur. Vix autem unquam subesse potest justa necessitas Matrimonium conditionale contrahendi, cum suo potiori effectui careat, ante conditionis eventum, & ante eum rescindi possit. Et vero Matrimonia sub conditione inita, mille anxietatibus subjacent. Ergo cum ille averte[n]de sint, talia Matrimonia non sunt permittenda. Cum vero Matrimonium in facie Ecclesiæ contractum fuerit, etiam adjecta conditione, licetsi apposita conditio non verificetur, nunquam ab eo resilire licet sine Judicis Ecclesiastici sententia, ne iniquis effugiis & fraudibus, ac Sacramenti profanationibus janna pateat.

*Quæres 13tio: An, & quomodo renovari debeat Matrimonialis consensus?*

*R sp:* 1mo: Quando Matrimonium ex defectu veri in utraque contrahentium parte consensus, invalidum fuit, ut si ex metu, aut fide contraxerint, debet utraque pars novum præbere consensum, & quidem non interius solum, sed & exterius etiam idque si fieri potest coram legitimo Sacerdote. Quia Matrimonium verum esse nequit, nisi utriusque contrahentis ponatur, & acceptetur consensus. Cum igitur prius defuit, nunc dum renovandum, & convalidandum est Matrimonium, poni debet. Et quia omnibus modis curandum est, ut Matrimonium rationem Sacramenti habeat & Sacramentum esse nequit, sine benedictione Sacerdotali, ideo satagendum est, ut iste matrimonialis consensus coram legitimo Sacerdote renovetur. Si vero desset Sacerdos, vel ab omni coitu abstinendum est, vel renovato utrinque consensu, hærendum intra fines contractus civilis. Quodsi Matrimonium invalidum sit, ex defectu consensus unius nonnisi partis, quamquam probabile sit sufficere, ut ab ea solum renovetur consensus, dum alterius partis perseverat, quæ compartem constanter pro sua reputat conjuge, eaque maritaliter utitur, attamen tutius est, ut utraque pars contractum matrimoniale renovet coram Sacerdote, nisi grave quidpiam obstet. Sic enim valori Sacramenti optime consulitur.

*2do:* Cum matrimonium fuit clandestinum, & propter defe-



defectum præsentiae Parochi, & Testium nullum, necessum est, ut coram iis iteretur. Suppleri enim debet illa solemnitas à Concilio Tridentino præscripta, quæ illi defuit. Si vero Matrimonium nullum fuit, propter aliud dirimens impedimentum, ante omnia curandum est, ut pars nullitatis Matrimonii conscia, nec debitum conjugale exigit, neque illud exigenti reddat, aliqui scilicet fornicaretur. Ut autem illud Matrimonium convalescat, primo obtinenda est dispensatio, deinde uterque Conjugum novam exterius consensum præstare debet, quare matrimonii nullitas comparti hoc ignoranti, quam cautissime, detegenda est. Quia prior consensus, propter interveniens dirimens impedimentum, nullus fuit, novus ergo ponendus est, atque ideo pars, quæ matrimonii nullitatem ignorat, hac de re admoneri debet, aliqui proprie non ponit consensum novum, sed priorem, qui fuit reipsa invalidus, ex errore putans esse validum, renovat. Jam vero consensus in se invalidi, renovatio, Matrimonium invalidum non convalidat. Verum quando Confessarius advertit Conjuges cum impedimento dirimente, quod invincibiliter ignorant, contraxisse, sedulo illi cavendum est, ne de ipso eos prius admonere quam perspexerit an, & quale ex sua monitione commodum, vel incommodum subsequi possit. Unde ei pensandum est istud Innocentii 3. Cap: 6. de Consang: præscriptum: *Disimulare poteris ut remaneant in copula sic contracta, cum ex separatione grave videas scandalum imminere.*

3tio: Matrimonium ex impedimento dirimente invalidum, post dispensationem, publice iterari debet, cum nullitas illius notoria est, aut verisimiliter manifestanda, unde tunc coram Parocho & testibus de novo celebrandum est Matrimonium. Et tunc tamen nova Bannorum promulgatione non est opus, si paulo ante factæ sint, pro priori contracto conjugio, vel conjugii illius invaliditas necdum publice innotuerit. Imo semper in talibus casibus expedit, ut ab Episcopo petatur Bannorum dispensatio, & assumptis pro testibus iis, qui impedimentum novaverant, secreto Matrimonium renovetur, & convalidetur.

Occulte autem tantum renovari debet Matrimonium, quando cum impedimento dirimente nunc & in futurum occulto celebratum fuit, & ita declaravit Pius 5. Papa, neque Decretum Concilii Trident: quo clandestinæ prohibentur nuptiæ, ad hunc se extendit casum. Cum enim Matrimonium primo contractum, licet à parte rei pro-

pter



pter occultum defectum, nullum sit, nihilominus in facie Ecclesiæ cum debitis solemnitatibus contractum sit, & in exteriori foro, validum reputetur, non est necesse, ut iterum cum iisdem solemnitatibus renovetur.

4to: Tandem cum Matrimonium conditionate juxta formam Concilii Trident: coram Parocho & testibus contractum est, non videtur necessarium esse, ut post conditionis eventum, coram iisdem renovetur, quia contractus conditionate initus, statim ac impleta est conditio, absque novo Partium consensu perficitur, & completur. Practice tamen curandum est, ut post conditionis eventum istud Matrimonium coram Parocho renovetur, ut hoc modo rationem etiam Sacramenti ex illius benedictione habeat.

*Quæres 14to: Utrum ad valide contrahendum Matrimonium à filiis, filiabusque, necessario requiratur consensus illorum Parentum?*

*Resp:* Non requiritur. Unde Matrimonium filiorum, filiarumque sine consensu suorum Parentum contractum, validum est. Quia ut Matrimonia, sine scitu, & consensu Parentum ab illorum liberis contracta valeant, sufficit ut nullo obstante impedimento libere contrahantur. Repugnantia autem Parentum, & dissensus eorum, nullibi statuitur pro impedimento, quod valori Matrimonii obesse possit. Ergo sine scitu, & consensu Parentum, imo ipsis repugnantibus, ab eorum Liberis contracta Matrimonia valida sunt. Hinc Concilium Trident: Ses: 24. Cap: 1. eos: *anathemate damnat, qui falso affirmant Matrimonia à filiisfamilias, sine Parentum consensu contracta, irrita esse, & parentes ea rata, vel irrita facere posse.* Verum graviter peccant filii, filięque, quæ sine scitu, consensuque suorum Parentum, Matrimonium contrahunt. Exigit siquidem reverentia Parentibus debita, ut in re, quæ gravior nulla esse potest, filii filięque suorum Parentum & consilium exquirant, & contra eorum voluntatem nihil agant. Quare Concilium Tridentinum, licet definierat Matrimonia filiorumfamilias sine consensu Parentum contracta valida esse, adjecit tamen, quod *Sancta Dei Ecclesia ex justissimis causis illa semper detestata sit, & prohibuit.*

Cum autem valeant Matrimonia à filiis, filiabusfamilias sine scitu & consensu suorum Parentum inita, magis valent Sponsalia ab illis sic contracta, cum hæc non nisi quædam sint ad Matrimonium præparatio, strictiusque sit Matrimonii vinculum quam Sponsalium obligatio.

Sed



Sed quemadmodum filii, filiæque non debent sine scitis & consensu suorum Parentum Matrimonia inire, ita neque Sponsalia iis invitis, & inconsultis contrahere.

## ARTICULUS 2dus

### De causis Sacramenti Matrimonii.

*Quæres 1mo: Quæ, & quot sunt Sacramenti Matrimonii causæ?*

*Resp:* Sacramenti Matrimonii causæ aliæ sunt efficientes, qualis est Sacerdos Matrimonium benedicens, qui hujus Sacramenti verus est Minister, aliæ prævie ad illud disponentes, ut sunt Sponsalia & Bannorum promulgatio.

*Quæres 2do: Utrum Sacerdos sit reipsa Minister Sacramenti Matrimonii?*

*Resp:* Sacerdos est verus Sacramenti Matrimonii Minister, quia semper à primis Ecclesiæ Sacerdotibus Matrimonium benedicebat, & benedictione sua gratiam Sacramentalem Conjugibus conferebat, ut constat ex antiquissimis SS. Patribus, unde Concil: Trident: Ses: 24. Cap: 1. sic statuit: *Parochus viro, & muliere interrogatis, & eorum mutuo consensu intellecto, vel dicat: Ego vos in Matrimonium conjungo in nomine Patris etc. vel aliis utatur verbis juxta receptum uniuscujusque Provinciæ ritum.* Certe ille est Minister Matrimonii qui Conjuges in Matrimonium conjungit. Porro Sacerdos Conjuges in Matrimonium conjungit. Est ergo verus hujus Sacramenti Minister. Quare in Rituali Nostrarum Provinciarum, postquam Conjuges mutuam sibi datam fidem juramento confirmaverint, Sacerdos eos alloquens sic dicit: *Quod Deus conjunxit homo non separat. Et ideo Matrimonium inter vos contractum, ego autoritate Ecclesiæ Catholicæ confirmo, & benedico. In nomine Patris, & Filii, & Spiritus Sancti. Amen.*

*Quæres 3tio: Desponsandi suntne etiam causa Matrimonii?*

*Resp:* Si Matrimonium spectetur ut est contractus, illius causa sunt desponsati, quia Matrimoniale contractum in præsentia Sacerdotis constituunt, dum juxta præscriptum Ritualis nostri uterque Sponsorum dicit: *Ja ci. bie biorg &c.* hunc vero Matrimoniale contractum sic inter  
Spon-



Sponsus constitutum, Sacerdos confirmando, sua benedictione Sacramentum esse facit, dum ait: *M*atrimoniu inter vos contractum, confirmo, & benedico.

Quæres 4to: Quid, & quotuplicia sunt Sponsalia?

Resp: Sponsalia nihil aliud sunt, quam: *Promissio mutua, & deliberata futuri Matrimonii, sufficientibus verbis, aut signis declarata, inter personas ad contrahendum Matrimonium habiles, atque idoneas.* Ut igitur vera sint sponsalia, debet esse. 1mo: promissio. Neque enim sufficit simplex propositum, etiam verbis expressum exg. *Volo te ducere in uxorem.* Propositum enim stat sine animo se vere obligandi, jam vero animus se vere, & sincere ad contrahendum Matrimonium obligandi, ad sponsalia necessario prærequiritur. Hinc qui fecte futurum Matrimonium promittit, aut expresse obligare se non vult, licet ob deceptionem in re gravi peccet mortaliter, & damnum ex fraude sua exurgens reparare teneatur, re ipsa tamen Sponsalia non contrahit, quia non ex animo, sed specie tenus Matrimonium promissit.

2do: Debet esse promissio mutua, quia Sponsalia pariunt obligationem onerosam, & una pars non censetur velle se obligare, nisi altera repromittat, & vicissim se obliget. Unde Sponsalia dicuntur reciproca promissio. Quapropter promissio futuri Matrimonii etiam jurata non obligat, nisi fuerit acceptata. Non tamen promissio hæc, donec acceptata sit, pro libitu revocari potest, quia graviter læderetur Puella, cum facta ei publice, Matrimonii sponsio, sine ulla, quæ supervenerit causa, rescinderetur. Et hoc à fortiori verum est, si promissio juramento confirmata fuerit. Potest tamen constitui tempus, quo elapso, corrumpat facta promissio, cum necdum acceptata fuerit. Imo si longior sit deliberatio, poterit non acceptatio pro repulsa haberi. Interim qui promissionem necdum acceptatam revocat. vera Sponsalia non contraxit. Debet autem ista promissionis factæ acceptatio, esse personalis, quare, licet in multis Contractibus Pater pro filia stipulari possit, non tamen in sponsalibus, sicut enim ad conjugium, ita ad Sponsalia, quæ ad illud ordinantur, maxime personalis requiritur consensus. Si tamen Pater pro filia, cui optime vult, præsentem, & tacentem, factam futuri Matrimonii promissionem, acceptet, erit hoc illius silentium sufficiens acceptatio. Strictè etiam loquendo non exurgunt Sponsalia ex sola promissionis acceptatione, donec accedat repromissio, quæ obligationem

T. II. M.

Q

repro-



repromittentis inducat. Potest enim Johanna promissionem Filii sibi factam acceptare, ne consilium mutet, & interea expendere an sibi expediat, ut mutum Filio fidem præstet. Si tamen agatur de Sponsalibus jam pridem optatis, industrie quæsitis, silentium ipsum habebit repromissionis rationem. Si autem promissio futuri Matrimonii facta sit absenti, & hæc ei intimetur, per aliquem, qui ad id deputatus non erat, repromissio illi facta non inducet Sponsalia, quia nemo alterius personam assumere potest, & Procuratorem ipsius gerere, sine illius licentia, & consensu.

3tio: Ut Sponsalia sint vera, debet esse promissio deliberata, hoc est fieri debet cum ea advertentia, quæ ad mortale peccatum prærequiritur. Sponsalia namque inducunt obligationem sub mortali, hæc autem per actum vel nullatenus, vel non satis deliberatum, induci nequit. Quare Sponsalia contrahere nequeunt ebrii, phrænetici, amentes, nisi lucida habeant intervalla, vel in aliis materiis delirantes, in ista sapiant. Aliud est de mutis, & surdis, cum ex iis plures sint ingenii adeo perspicacis & multa difficillima intelligant. Nec Sponsalia valide contrahunt, qui circa personam, aut circa conditionem illius fervilem errant, quia talis error etiam Matrimonium dirimit. Probabilius etiam non valent Sponsalia ex gravi metu inique extorta, quia Sponsalia, & Matrimonium sunt secum connexa. Porro Matrimonium si gravi metu extorqueatur invalidum est. Ergo & Sponsalia gravi metu inique extorta invalida esse debent. Sed quia contrarium tenent graves Theologi, consultius est, ut pars metum gravem inique falsa, cum opus fuerit, dispensationem petat in impedimento publicæ honestatis, si nempe Matrimonium contrahendum sit cum consanguineo, vel consanguinea illius persona, cui ex gravi metu facta est futuri Matrimonii promissio.

4to: Debet istiusmodi promissio verbis, vel aliis signis declarari, quia Sponsalia sunt contractus qui mutuo constitui, & acceptari debet. Non potest vero alter alterius fidem, promissionemque acceptare, nisi sibi manifestetur. Non omnino autem verba requiruntur, quia alia etiam signa sufficiunt, unde & per nutus Sponsalia contrahi possunt.

5to: Tandem hæc futuri Matrimonii promissio debet esse inter personas ad contrahendum Matrimonium habiles.



les, scilicet tales, quæ Matrimonium inter se contrahere nullo jure prohibeantur.

Duplicia autem sunt Sponsalia, Ecclesiastica scilicet, & civilia. *Ecclesiastica*, quæ coram Parocho, & testibus celebrantur, qui mos in quibusdam Regionibus viget. *Civilia*, quæ sine Parocho, per mutuam nonnisi Partium appromissionem, perficiuntur, & talia in nostris Regionibus sunt in usu, quæ etiam pariunt impedimentum publicæ honestatis. Sunt etiam alia. *Conditionata*, quæ nonnisi adjecta aliqua conditione ineuntur, & *absoluta* quæ absolute, & sine ulla adjecta conditione perficiuntur.

*Quæres 5to: In qua ætate Sponsalia contrahi possint?*

*Resp:* Expleto septennio. Unde ante completum septennium contracta Sponsalia nulla sunt. Ita constituit Alexander 3. Cap: 13. de Sponsal: his verbis: *Pronuntiamus inter juvenem & puellam nec Matrimonium, nec Sponsalia fuisse contracta, cum constet puellam nondum ad septennium pervenisse*, quia septennio completo communiter incipit usus rationis, & libertatis, quæ ad Sponsalia contrahenda omnino necessaria sunt. Possunt autem Parentes loco Liberorum suorum, qui impuberes sunt, Sponsalia contrahere, at si ipsi sint septennio minores, nulla ex his Sponsalibus nascitur obligatio, nisi Liberi septennio majores eadem Sponsalia rata habeant. Quodsi post adeptum septennium illa ratihabeant, non possunt resilire ante pubertatem, bene vero post illam, modo statim contradicant. Ita disponit jus Cap: unico de Despons: impuberum in 6to. Jam vero tunc qui primo fit pubes, non tenetur expectare donec alter pubescat, sed potest statim à Sponsalibus resilire. Si vero pubes cum impubere Sponsalia contraxit, pubes resilire nequit, bene vero impubes, non quidem ante, sed post adeptam pubertatem. Illico autem post adeptam pubertatem, contra Sponsalia, reclamandum est. Illico vero fieri censetur, quod intra triduum fit. Ergo vel reclamandum est sine mora, vel ad minus declaranda est reclamandi intentio, nisi quis ignoret, se jam attigisse pubertatem, vel sibi competere jus resiliendi, quia non currit tempus ignorantis. Ceterum sicut verbis, ita & factis rata haberi possunt Sponsalia, ut si quis munera Sponsæ mittat, vel recipiat.

Multi Theologorum docent, posse post adeptam pubertatem à Sponsalibus resilire, quæ quis impubes contraxit, & juramento suo confirmavit. Quia cum



ea sit hujusmodi Sponsalium natura, ut post adeptam pubertatem dissolvi possint, idque in commune bonum à jure constitutum sit. juramentum hanc eorum conditionem sequi debet. Etsi vero propter imbecillitatem ætatis, cui succurrendum est, minores causæ ad dissolutionem hujusmodi Sponsalium requirantur, quam alias necessariae essent, non est tamen æquum, ut promissio gravis, & communiter de Parentum consensu facta, sine ulla causa dissolvatur.

Tutor vero, Socer, aut Frater impuberum, pro illis Sponsalia contrahere nequeunt. Quia hoc solis Parentibus à jure conceditur. Ergo ad alios extendi, istud non debet.

*Quæres 6to: An valeant Sponsalia contracta inter Personas habentes impedimentum aut dirimens, aut impediens futurum Matrimonium?*

*Resp:* Sponsalia contracta inter Personas habentes impedimentum, etiam solum futurum Matrimonium prohibens, quamvis fuerint jurata, irrita sunt, si istiusmodi impedimentum perpetuum sit, quia talia Sponsalia sunt promissio rei vel impossibilis, vel illicitæ. Porro promissio rei impossibilis, aut illicitæ nulla & irrita est. Unde tritum illud axioma: *Omne impedimentum perpetuum Matrimonii, etiam impediens tantum, respectu Sponsalium fit dirimens.* Si vero impedimentum futuri Matrimonii temporale sit, aut per dispensationem auferri valeat, & Sponsalia respiciant Matrimonium tunc contrahendum, quando id liberum ac licitum erit, valida illa, ac rata erunt, quia tunc non includunt promissionem rei impossibilis, aut illicitæ, quemadmodum in priori casu. Quare qui ad duos menses voto castitatis ligatus, spondet Matrimonium elapsis duobus Mensibus contrahendum, Sponsalia ejus tenent. Et qui habentes impedimentum futuri, quod cogitant, Matrimonii, Sponsalia ineunt sub ista conditione, si Papa vel Episcopus dispenseaverit in illo impedimento, debent expectare donec cum ipsis disponsetur, & neutri ante recusatam dispensationem, à Sponsalibus resilire licet, obtenta vero dispensatione, Sponsalia, quæ erant conditionata, transeunt in absoluta.

*Quæres 7mo: Quot modis Sponsalia contrahi possunt, & utrum quoquomodo inita valeant?*

*Resp:* Multis modis Sponsalia contrahi possunt, scilicet vel absolute, sive simpliciter, sive cum juramento, vel conditionate. Condicio autem vel esset de præterito, vel



de præsentī, vel de futuro, sive necessario sive contingente. Rursum conditio vel est honesta, ut si Petrus dicat Bærtæ, *ducam te in uxorem, si aureos mille in dotem attuleris*: vel turpis, eaque aut Matrimonii substantiæ adversatur, ut cum dicit Paulus Annæ, *ducam te in uxorem, si prolis generationem evites*: vel bonis moribus, non autem Matrimonii substantiæ contrariatur, ut si Petrus dicat Johannæ, *ducam et in uxorem, si me in furto adjuves*, vel tandem est impossibili, ut si dicat Paulus Annæ, *accipiam te in uxorem, si digito cælum attigeris*. Itaque 1<sup>mo</sup>: Sponsalia tum absoluta, tum ea, quæ fiunt sub conditione vel necessario futura, vel præsentī, quæ actu existat, vel præterita, quæ extiterit, statim valent, quia nec ullo jure irritantur, nec per appositionem conditionis, quæ iam impleta est, aut necessario implenda, suspenduntur. 2<sup>do</sup>: Sponsalia contracta sub conditione de futuro possibili, & honesta, vim suam habent statim ac impleta fuerit conditio, quis tunc transeunt in absoluta. Qui ergo sic Sponsalia sub conditione futura possibili, & honesta contraxerunt, tenentur conditionis eventum expectare. Quod si una pars consensum revocaverit, novo opus erit consensu, & ad id tenebitur, nisi etiam altera resilire malit. Imo si altera pars in suo proposito perseveret, hæc quæ suum consensum revocavit, eum de novo dare tenetur, etiam si cum alia sive absolute, sive conditionaliter Sponsalia contraxerit, & quamvis secundorum Sponsalium conditio citius quam priorum impleta esset, quia secunda Sponsalia jus prioris Sponsæ legitime partum subvertunt, vī enim priorum Sponsalium, conditionis eventum expectare tenebatur, cum ergo hæc iniqua sint, priora tenent. Contracta autem sub conditione impossibili, sunt irrita, invalida, quia contractus omnes, præter Matrimonium, & testamenta, per appositionem conditionis, ex natura, aut facto impossibilis, nulli sunt, ita statuit jns, Instr: de inutilit: stipul: *Si impossibilis conditio obligationibus adijciatur, nihil valet stipulatio*. Ergo eodem jure irrita quoque sunt Sponsalia, quibus adjecta est conditio impossibilis. 3<sup>tio</sup>: Sponsalia, quibus adijciatur conditio de futuro turpis, si sit substantiæ, finī, ac scopo Matrimonii contraria, ipso jure nulla sunt, si vero adjecta conditio non sit substantiæ ac finī Matrimonii contraria, impleta conditione valent Sponsalia. Unde si Petrus dicat Annæ, *ducam te in uxorem, si mecum forniceris*, sic à se Virginem sub spe futuri Matrimonii corruptam ducere obligatur.

Quæ-



*Quæres 8vo: An Sponsalibus addi possit, ut qui à Sponsalibus resiliit, vel aliquid amittat, vel aliquid solvat?*

*Resp:* Appositio pænæ positivæ, qua quis aliqua boni sui parte privatur, generatim & indistinctim facta, & imposita, sive juste quis à Sponsalibus resiliat, sive injuste, illicita est, & in foro conscientiæ non tenet. Quia talis appositio pænæ in jure Canonico reprobatur Cap: 29. de Sponsal: ubi sic statuitur: *Cum libera Matrimonia esse debeant, ideo talis stipulatio, propter pænæ interpositionem merito improbanda est.* Et merito sic statutum est, quia multi, ne pœnam, præcipue gravem, subirent, coacta, & intus ob supervenientes causas detestata contraherent Matrimonia. Ex his autem quot inter familias jurgia, inter Sponsos dissidia, nemo non videt. Et hoc verum est sive istiusmodi pœna Sponsalibus adjiciatur ab ipsis Sponsis, sive ab eorum Parentibus, consanguineis, amicis, semper enim talis pænæ adjectio, Matrimonii libertati obest. Neque hac in re factam stipulationem juramentum firmabit, quia juris dispositioni adversatur, latius tamen erit, ob divini nominis reverentiam dispensationem juramenti petere.

Quodsi appositæ pœna, non tam pœna sit, quam damni, ex iniqua Sponsi mutatione emergentis, compensatio, hæc juste exigi potest. Unde si Petrus cum Bathilde Sponsalia cum adjuncta pœna contrahat, ea lege, ut per plures annos expectet, donec illam in uxorem ducat, poterit illa titulo compensationis rem sibi traditam retinere. Idem est si graves ad Matrimonium, quo inique frustratur, sumptus quis fecerit, aut si ex Petri agendi ratione, futurum sit, ut Anna, ejusque familia probum & suspiciones incurrant. Licitum quoque est pacisci in contrahendis Sponsalibus de pœna ab eo solvenda, qui ab iis injuste resilierit, quia is etiam Censuris Ecclesiasticis, quæ gravius aliquid sunt, quam appositæ pœna, plecti potest, quod à contractis Sponsalibus injuste resiliat. Qui ergo à contractis Sponsalibus primus injuste resiliit, in conscientia tenetur pœnam constitutam ferre, quia alteri parti infert injuriam, propter quam, ex pacto pœnam promissione fundatam subire debet. Verum & illi, qui sine justa causa à Sponsalibus recedit, pœna constituta, æqua ratione, moderanda est, ne ipse adigatur ad contrahendas Nuptias, à quibus jam forte animo alienus est. Si vero juste à Sponsalibus resiliat, pœnam appositam ferre non tenetur. Quodsi quis nihilominus eam pœnam solverit,

tunc



tunc videndum est, an solverit ex errore, quia licetsi iusta de causa à Sponsalibus recesserit, tamen ad solvendam pœnam iis annexam putabat se teneri, vel solvit sciens se ad solvendum non esse obligatum, suumque pactum nullum esse. Si *amum*: quod solutum est non potest retineri, quia ex errore facta donatio nullum jus tribuit ad rem donatam. Si *z dum*: potest tuta conscientia id retineri, quod datum est, quia donans sciens & volens juri suo cedit, ac forte maiorem partis alterius ex sua agendi ratione conceptum lenire voluit. Quæ autem rationes ad dandum impulerint, ex circumstantiis personæ dijudicandum est. Facilius enim præsumuntur munificentia, & æquitas in homine divite, liberali, non imperito, quam in rudi, avaro, ignobili. In dubio res per amicos tractanda est, & multa pro ratione dubii partienda.

*Quæres qno: Utrum Sponsi suos sibi defectus mutuo aperire teneantur?*

*Resp:* Ex defectibus, quibus Sponsi laborare possunt, alii tales sunt, ut verisimiliter post contractum Matrimonium detegendi sint, & tunc cedent seu in opprobrium, seu in detrimentum alterius Sponsi, ut si Puella ex alieno facinore uterum gerat, si Sponsus lua venerea infectus sit, si ære alieno gravatus sit, si ab infimo plebis fœce ortus, gerat se pro nobili, & qua talis ambiat conjugium puellæ nobilis, si sit ex genere, vel delicto infamis. Alii vero defectus tales sunt, ut vel nunquam foras erumpere valeant, ut si quæ creditur Virgo à quopiam vitiata sit, qui jam mortuus est, vel etiam tales defectus sunt, qui licet post contractum Matrimonium necessario detegendi sunt, sed vel à comparte leniter, corrigi, vel patienter tollerari possunt, ut si quæ mitis, & lenis habebatur iræ impatiens, & proterva sit. Igitur *amo*: defectus primi generis, ab una parte, alteri detegi debent, quod si fieri nequeat, desistendum à Sponsalibus, & magis à Nuptiis, atque tali à Confelsario, nisi hæc præstet, detegenda est in Sacramento Pœnitentiæ, absolutio. Nemini siquidem licet commodum suum quærere, cum gravi alterius detrimento. Ergo sicut volenti emere ligna occulte cariosa in fabricam domus, tenetur venditor vitium hoc aperire, sic & magis quidem certis laborans defectibus, qui Matrimonium in societate conjugali, in susceptione, atque educatione prolis, denique in ipso convictu, periculosum efficiunt, eosdem defectus aperire teneatur. Quodsi una pars occultet suos defectus, & altera pari-



paribus, aut æquivalentibus laborat, tunc aliquando valere hic potest compensatio, ut si ignobilis, ignobili nubat, sed non semper valet, ob speciales personarum circumstantias. Unde si Sponsus & Sponsa cum aliis peccaverint, & futurum sit, ut Sponsus detecto Sponsæ scelere, in immania quæque erumpat, non modo à Sponsalibus, sed & his etiam contractis, à Matrimonio abstinendum est, quia licet aliqua forte sit compensatio in rebus, non tamen in rerum consecrariis.

2do: Si Sponsorum alter, occulto vitio laboret, quod alteri grave incommodum parere nequeat, & tamen justam si cognosceretur à Sponsalibus resiliendi præberet causam, ut si Sponsa ante, vel alteruter post Sponsalia cum alio peccaverit, ordinarie non tenetur illud suum vitium aperire. Quia onus turpitudinem suam revelandi, tam durum est, tam humanæ naturæ adversum, ut nemo illud erga se exequi teneatur, quando nulla hinc alteri probri, aut injustitiæ labes inuritur, prout fit, cum de occulto defectu celando agitur. Hæc tamen in duplici ad minus casu limitanda sunt, 1mo: cum periculum est, ne vitium, quod actu latet, postmodum foras erumpat, & graves pariat rixas, tunc enim aut aperiri debet, si apertum, vel nihil vel parum infamet, aut à Sponsalibus, qua meliori poterit via est recedendum. 2do: cum Puella ex alio concepit, etsi à Sponso, cujus etiam libidini obsecuta est, concepisse præsumi potest. Nam vel deteget Sponsus, ipsam ex alio concepisse, quia nimirum inter unam & alteram fornicationem multum effluxerat temporis, & tunc inter utrumque Sponsum æterna odia, rixæque, & exprobrationes nascentur, vel id non deteget, & Sponsus sese prolis patrem, licet falso, arbitrabitur, & tunc quamvis non suborientur rixæ inter Sponsos, sed alia gravissima subsequenter mala, videlicet quod futurus maritus prolem alterius alere & sustinere debebit, & quod spuria proles hæreditatis partem, sibi minime competentem consequetur. Tunc ergo vel admittitur crimen confitendum, Parocho, aut alteri discreto viro, si Sponsus Matrimonium urgeat, vel à Sponsalibus, & iis contractis à Nuptiis etiam recedendum est.

*Quæres 1mo: Quos effectus Sponsalia pariunt?*

*Resp:* Præcipuus Sponsalium effectus est obligatio quam inducit ad Matrimonium contrahendum. Et hæc obligatio gravis est. Quia promissio in Sponsalibus est mutua in re gravi, utrinque onerosa, gravem ergo pa-

rit



rit justitiæ obligationem. Est itaque Matrimonium contrahendum, si nihil obstat, tempore inter Sponsos constituto. Sicuti enim in ceteris contractibus, ita etiam in contractu Sponsalitis servari debet tempus de quo inter partes contrahentes conventum est. Excusatur tamen saltem à gravi, dilatio ad breve tempus. Unde dilatio ad unum, & alterum diem, vacat à mortali. An idem dicendum sit, si post præfixum tempus differatur Matrimonium ad unam, duasve hebdomadas, ex circumstantiis judicari debet, quia hæc mora quæ apponitur, aliquando nocere potest comparti, eamque incontinentiæ periculo exponere. Si vero in Sponsalibus, nullum sit ad contrahendum Matrimonium præfixum tempus, tunc Matrimonium contrahendum est, quam primum commode id fieri potest, quia in omnibus obligationibus in quibus dies non apponitur, quam primum illa impleri debet.

Hinc etiam vir nobilis, qui cum puella, conditionis longe inferioris, sibi bene nota, Sponsalia contraxit, eandem sub gravi ducere tenetur, etiamsi copulam ab ea injecta spe Matrimonii non extorserit, quia scienti, & volenti non fit injuria. Nisi tamen ex dispari conjugio merito timeantur rixæ, scandala, pœnitudo gravis ipsius mariti. Nemo quippe ad illiciti quidpiam obligari potest. Porro illicitum est, quod absque tantis malis adimpleri nequit. Si quid tamen sponsa hæc falsa fuerit damni, erit ipsi refundendum. Porro quicumque sine justa causa recusatur datam in Sponsalibus adimplere fidem, ille in conscientiæ foro, per denegationem Sacramentalis absolutionis compelli debet, ut stet suis promissis, quia absolvi nequit, qui gravis injustitiæ reus, eidem cum potest satisfacere, renuit. Potest etiam per legitima juris media, ad instantiam alterius partis à judice, post adhibita exhortationis remedia, ad Matrimonium compelli, nisi gravia hinc timeri debeant incommoda, veluti dissensiones capitales, fictus in Matrimonium consensus, & alia quam plurima mala.

Sed & is qui virginem, sub mendacii futuri Matrimonii promissione, seduxit, eamque constupravit, illam ducere tenetur, posito quod ablatum ei honor alio modo resarciri non possit, quia alias de mendacio suo, & alterius seductione fructum reportaret. Nisi tamen quæ seducta est, intelligere potuerit, nuptiarum promissionem, dolose, & mendaciter ad obtinendum crimen sibi factam esse, tunc enim nihil plus illi debetur, quam quod debetur



tur libenter in crimen consentienti. Sed plerumque qui parum, aut nihil debet puellæ, debet multum ejus Parentibus, qui ut virum ei paræ conditionis procurent, dotem augere coguntur.

Potest etiam unus Sponsorum de certa pecuniæ summa pæisci, ut ex Sponsalibus acquisitum jus, alteri remittat. Quia sine causa à Sponsalibus resiliens, gravem eamque prætio æstimabilem comparti innocenti infert injuriam, hæc ergo pecunia redimi potest. Et id verum est, non solum cum ex dissolutione Sponsalium damni aliquid una pars patitur, sive ob expensas, quas fecit, sive quia jam pares nuptias nonnisi ægre invenire potest, sed licetsi etiam nihil subeat damni. Si tamen pars innocens nihil, præter mærorem & quandam infamiam, detrimenti patitur, compensatio hæc moderata esse debet, non conquærentis, sed viri prudentis judicio, pro circumstantiarum, ac personarum diversitate taxanda.

*Quæres 11mo: Quid præterea Sponsalia efficiunt?*

*Resp:* Per Sponsalia corpora Sponsorum obligata & debita ad invicem manent, ut quamvis iis ante contractum Matrimonium uti nequeant, jus tamen ad illa reciprocum per contracta Sponsalia acquirunt, adeo ut si vel Sponsus cum alia, vel Sponsa cum alio fornicetur, vere non solum contra castitatem, sed etiam contra justitiam graviter peccent, quare in peccato carnis, circumstantia contractorum Sponsalium in Confessione est necessario aperienda. Et hoc verum est etiamsi cum extranea persona tactus solum, & obscena, ac liberiora oscula admissa à Sponsis fuerint.

*Quæres 12mo: An, & quæ fornicatio dissolvit Sponsalia?*

*Resp: 11mo:* Fornicatio Sponsæ, Sponsalia præcedens quæ fuit Sponso ignota, & nonnisi post Sponsalia innouit, justa est ea dissolvendi causa. Quia Sponsa cujus turpitudine tandem revelatur, & crimen detegitur, notabiliter vilior efficitur, & juste Sponsus vereri potest, ne quæ innupta transiliit pudoris limites, ex Matrimonii velo, quod crimen tegit, facilius delinquat. Probabilius autem est, quod Sponsa propter præcedentem Sponsi fornicationem, quam prius nesciebat, à Sponsalibus resilire nequeat, quia juxta communem opinionem, non ita est turpe, aut exitiosum faminae si nubat viro, qui aliam jam prius cognoverat, quam si vir mulierem jam ab alio corruptam ducat. Fatentur tamen omnes Theologi, posse Spon-



Sponsam resilire. rmo: Si Sponsus ante Sponsalia rem carnalem cum pluribus habuisse detegatur, ita ut prudenter conici possit, eum libidini mancipatum esse. Mitius tamen agendum est, si Sponsus serio respiciens, Sponsam præ ceteris mulieribus inhians, vere piam, spem melioris vitæ injiciat. 2do: si Sponsus licet semel tantum reus, prolem ex crimine habuerit. Id enim Matrimonii futuri consortium facit longe difficilius, præsertim ob prolis alimenta, ac graves inter Conjugatos discordias, quæ facile suboriri possent. 3tio: fornicatio Sponsalia subsequens tam Sponsæ, quam etiam Sponso justa est causa ab iis resiliendi. Et quidem de Sponso id certum est, ex Cap: 25. de jurejur: ubi Sponsalibus etiam juratis dicitur subintelligenda talis conditio, si nimirum sponsa *contra regulam desponsationis non venerit*, hoc est datam fidem non fregerit. Idem constat de Sponsa, quia de ea, non secus ac de Sponso verum est, quod frangenti fidem, non est servanda fides. Hæc tamen à Sponsalibus resiliendi libertas, soli competit innocenti, non reo, quia ex trita juris regula. *Nemo ex delicto meliorem conditionem suam facere potest*. Meliorem vero conditionem suam ex suo scelere faceret, si ei propter perpetratam à se fornicationem à Sponsalibus invita comparte resilire liceret. Quare si Sponsa, infidelem etiam Sponsum ad Nuptias urgeat, tenebitur obsequi ejus petitioni, aut. damnum, si quod patitur, compensare.

Imo liberiores etiam amplexus extranei, si à Sponsa non illubenter admittantur ad dissolutionem Sponsalium sufficiunt, quia Puella in his casibus liberior, justum sui horrorem injicit, & merito censetur impudica, ac libidinosa. Non poterit tamen Sponsus à Sponsalibus resilire ideo, quia sibi desponsatam facilem erga se expertus sit, quia suum, & suæ sponsæ lapsum sibi unice imputare debet. Resilire vero Sponsus à Sponsalibus poterit, si Sponsa ipsius ab extraneo etiam per vim oppressa fuerit. Quia mulier etiam per vim oppressa, longe vilior facta est. & raro tanta vis infertur mulieri, quin ejus saltem aliqualis non interveniat consensus, & adsit debita minor circumspexio, ac resistentia. Quodsi prorsus invita oppressa fuerit, aliter statuendum est, quia non est addenda afflictæ, & immeritæ, nova afflictio. Non est tamen Sponsus omnino ad contrahendas nuptias urgendus, quia non facile abijci potest horror mulieris etiam per vim defædatæ.

Si



Si vero & Sponsus, & Sponsa cum extraneis fornicati sunt, probabilius est, tunc Sponso licitum esse resilire, non autem Sponsæ, quia ex communi sensu, non est par utriusque crimen, sed longe gravius, & exitiosius Sponsæ, quam Sponsi, non ergo tunc compensatione delicta tolluntur. Unde licetsi in hoc casu Sponso resilire liceat, non tamen Sponsæ.

Et quia Apostasia à vera fide, atque hæresis, spiritualis est fornicatio, ideo propter Apostasiam ac hæresim partis alterius, licet à Sponsalibus resilire. Et certe gravis superveniens mutatio, sufficit ad dirimenda Sponsalia. Porro gravior nulla fingi potest mutatio, quam cum pars altera in hæresim, vel apostasiam prolabitur. Ergo propter illam à Sponsalibus resilire licitum erit.

*Quæres 23tio: Utriusque partis consensu, possuntne dissolvi Sponsalia?*

*Resp:* Ad dissolvenda Sponsalia sufficit utriusque partis consensus, licetsi sine causa à Sponsalibus resiliant, quia per quas causas res nascitur, per easdem dissolvitur. Verum cavendum est ne omnino sine causa resiliatur, quia id levitatis indicium est, & sæpe multarum obloctionum causa, quæ vitari debent. Satius tamen est, resilire, dum per tempus licet, quam pænitenda conjugia inire. Impuberes tamen, si antequam ad annos Matrimonio aptos pervenerint, etsi velint à contractis Sponsalibus resilire, non sunt tunc audiendi, sed anni pubertatis expectari debent, ne ætas inconstans frequentius consilium mutet. Quin si carnaliter secum coierint, non datur resilendi locus, quia qui potest coire, in jure non reputatur impubes.

Istiusmodi autem utriusque partis ad dissolvenda Sponsalia consensus, debet esse liber, proindeque à dolo & metu utrinque immunis, quia obligationis remissio, est species donationis, quæ libera esse debet. Unde non est in Conscientia tutus, qui consensum Sponsæ ad rescindenda Sponsalia per minas extorquet.

*Quæres 24to: Quibus de causis potest una pars altera etiam invita, à Sponsalibus resilire?*

*Resp:* Ad id sufficere mutationem rerum notabilem, quæ si ante Sponsalia extitisset, vel fuisset cognita, partem aliam à contrahendis Sponsalibus deteruisset, aut quæ Matrimonium longe difficilius, & magis injucundum efficere potest. Quia qui Sponsalia contrahunt, & futurum Matrimonium sibi appromittunt, id non aliter faciunt, quam



quam sub hac tacita conditione, *si res notabiliter non fuerint immutatae*. Ergo si ipso facto res notabiliter immutantur, licitum erit à Sponsalibus resilire etiam invita altera parte. Et hæc regula locum habet *1<sup>mo</sup>*: in Sponsalibus etiam juratis, quia juramentum includit omnes conditiones contractus cui adijcitur. *2<sup>do</sup>*: licet intervenierit inter Sponsos copula, hæc enim per se nullam addit vim Sponsalibus, quamquam efficit, ut non ita facile resiliri possit. *3<sup>tio</sup>*: etiamsi notabilis illa mutatio contigerit, postquam Sponsus in mora fuerit Matrimonium cum sibi desponsata contrahendi. Unde qui intra annum Mæviam in uxorem ducere appromiserat, & toto biennio nuptias distulit, eandem, si post parum tempus fornicata sit, ducere non tenetur, etsi ad compensanda, quæ moram hanc subsecuta sunt damna, obligetur.

Porro mutatio contingere potest, in bonis animi, corporis, & fortunæ. Et primo contigit mutatio in bonis animi. *1<sup>mo</sup>*: ratione erroris, & professionis impiæ, ut si Sponsus hæresim, aut aliquam impiam artem amplectatur. *2<sup>do</sup>*: ratione infamiæ juris, vel facti, ut si deprehendatur in furto, aut gravis criminis publice inousetur, si scortator, aleæ mancipatus, færox moribus, prolis spurix parentis, vel ipse spurius esse detegatur. Si puella quæ honestis moribus esse credebatur, ut corrupta diffametur. *3<sup>tio</sup>*: cum inter Sponsorum Parentes nascuntur rixæ, & jurgia, aut cum Sponsus cor à Sponsa induit penitus alienum, ita ut vix quidpiam, præter funestos successus à Matrimonio sperare liceat.

Etsi vero Sponsis in tali statu constitutis, exponere debeat Confelsarius, quam periculosum sit mutare fidem libere datam, si tamen advertat mentem à promisso conjugio ita alienam, ut flecti nequeat, absolutionis beneficium iis largiri non gravabitur, quia prudenter timebit, ne Matrimonium istud infanctos exitus sortiatur. Quin & sæpe minus delinquant Sponsi, quam Parentes, qui Sponsalibus autoritate sua formati, filios stare non patiuntur, quia ditior offertur puella, & cognatione illustrior, cum tamen istas exceptiones non admittant Sponsalia.

*Secundo*: Mutatio contingit in bonis corporis per gravem quæ alterutri supervenit deformitatem sive habitalem morbum, exg. lepram, veneream lœnem. Item si Sponsa ab oris venustate exciderit, præsertim si Sponsus, ex personæ elegantia mediocritatem fortunæ ejus compensare voluerit, quia vereri est, ne comparis horrore de

Spon-



Sponsa concepto, in alienis fœminis inquirat, quod in sua non inveniet.

*Tertio:* Mutatio laboritur in bonis fortunæ. *1mo:* cum Sponsa pactam dotem non offert, imo si dos fuerit Sponsalium conditio, illa deficiente, & hæc simul deficiente. *2do:* cum Sponsus etiam sine culpa vergit in gravem inopiam, aut gravissimam bonorum jacturam subit. Hic tamen multa ex parte Confelsariorum opus est cautela, præsertim cum Sponsi nec disparis sunt prosapiæ, nec multum disparis fortunæ. Duo enim certa sunt, scilicet licitum non esse Parentibus æqua filiorum conjugia prohibere, & graves, quæ sæpe injiciuntur minæ, paulatim mitescere.

Tria hic inquiruntur *1mo:* quid juris si dum sponsa in suo statu permanet, ex inopinata hæreditate insigniter crevit Sponsi fortuna. *2do:* an detur compensatio paupertatis unius cum paupertate alterius, ita ut si ambo è commoda fortuna ad gravem inopiam devenerint, neutri resilire licitum sit. *3tio:* an sponsus resilire possit eo, quod Sponsa non affert dotem, cum hujus nulla in contractu Sponsalitia facta fuerit mentio.

*Resp: ad 1mum:* Si par sit utriusque Sponsi conditio, & unius fortuna, licet jam alterius sortem superet, non tamen ingenti intervallo, hortanda, & urgenda est pars illa, ut stet promissis, at ubi mens ejus immota persistit, recordandum est, quod ut dicitur *Cap: 17. de Sponsal: Cum coactiones difficiles soleant exitus frequenter habere, monendus est potius quam cogendus*, qui in talibus circumstantiis à Sponsalibus vult resilire, interim hic certus compensationis modus est præscribendus.

*Ad 2dum:* communior docet opinio, tunc temporis licitum esse utrique resilire, quia per utriusque inopiam, longe durius redditur Matrimonii jugum, quam si eorum alter in calamitatem solus incideret. Ergo cum unius paupertas ad dissolvenda Sponsalia sufficiat, utriusque etiam sufficere debet. Si tamen Sponsus etiam æque pauperem ducere voluerit, jam primæ, cui per Sponsalia fidem fecit, adhærere tenebitur.

*Ad 3tium:* Vel Sponsa pro paupere habebatur à Sponso, vel non. Si *1mum:* non potest ob dotis defectum resilire, quia dotem non expectabat. Si *2dum:* tunc potest resilire, quia in omni Sponsalitia pactione, includitur dotis promissio, etsi non fuerit expressa, nisi aliud locali lege sancitum sit.



*Quæres 15to: Utrum extra propositos casus, contra Sponsalia reclamare liceat?*

*Resp:* Præter jam expressos casus, sunt & alii, in quibus contra Sponsalia reclamare licet, & quidem. 1mo: cum pars una ex metu gravi Sponsalia contraxit, aut contraxit ex dolo dante contractui causam, seu cum contrahendo Sponsalia ita erat affecta, ut si novisset hunc, vel illum alterius partis defectum, minime contraxisset. Quod si illa pars dubitet, qualiter dum contrexerat, fuerat affecta, potest in sui partem judicare, quando causa adeo gravis est, ut ejusdem conditionis homines à Matrimonio retrahere soleat. Secus si levis sit, nec ad resiliendum à Sponsalibus inducere soleat. Quodsi quis post cognitam resiliendi à Sponsalibus causam, illa ratificet, seu verbis, seu factis, & præcipue per carnalem copulam, jam ea rescindere non potest, quia juri suo renunciasse censetur. Secus si rescisis jam Sponsalibus copulam carnalem habuerit cum ea, quæ ipsi desponsata erat, quia jus extinctum non rati habetur per admissum scelus.

*Quæres 16to: An Sponsalia dissolvantur per moram, vel discessionem alterius partis?*

*Resp:* Quæcunque mora, aut per discessum absentia Sponsi, sufficiunt Sponsæ ad dissolvenda Sponsalia, eadem quoque mora, & absentia Sponsæ, satis sunt Sponso, ut contra Sponsalia reclamet, quia correlativorum eadem est ratio. Sponsus vero & Sponsa sunt correlativa.

Itaque 1mo: si Sponsus sine Sponsæ assensu domicilium in aliam Civitatem transferat, aut in Regionem distantem commigret, potest Sponsa alteri fidem dare, nisi spes subsit eum brevi reversurum esse, quia Sponsus Sponsam proprio Marte dimittens, & alio seu intra seu extra Provinciam se transferens censetur amicitiam illius spernere, ac juri suo in eam per Sponsalia acquisito renunciare. Et hæc responsio vera est. 2mo: cum etiam Sponsus animum habet revertendi sed nonnisi post longum tempus, quia dum Sponsa tamdiu, & in incertum expectabit, excidere potest occasio commodi Matrimonii, quæ forte nunquam redibit, & incontinentiæ periculum iis semper gravius incumbit, qui mentem spe proximi Matrimonii, & illius ideis refertam habent. 3do: cum Sponsus vel ex causa necessaria, vel ex causa voluntaria, licetsi utili diutius abesse cogitur, quia idem & hic subest incontinentiæ atque commodi Matrimonii amittendi periculum, quod & in superiori casu. Si tamen spes sit Sponsum brevi reditu-



diturum, tunc vel expectandus est, vel illi præfigendum tempus, ultra quod si permaneat, sponsa sibi aliter providebit.

2do: Si sponsalia absque termini præfixione contracta sint, neutra ex parte dissolvuntur, per communem temporis lapsum, quia Sponsalia sine temporis præfixione contracta, vim suam in omne tempus conservant, modo extraordinarie non prorogantur. Sed cum pars una, præsertim Sponsus, nimium differt Matrimonium contrahere, non erit à peccato immunis, imo si sit in mora longiori, censebitur juri suo renuntiare. Si vero una pars executionem Sponsalium urgeat, ei, altera recusante, liberum est confestim resilire. Quia qui, cum potest non stat suis promissis, quæ quam primum moraliter fieri potest, implere debet, iis renuntiare censetur, ac proinde ad minus tacite permittit alteri, ut sibi provideat. Non tamen id ex parte sua potest, qui moras nectit, quia mora sua cuique, non vero alteri noxia esse potest, & aliunde is ex dolo suo, qui in his casibus facillime accidere potest, luorum reportaret.

3tio: Si certum tempus per sponsalia determinatum sit, non ad finiendam obligationem ex Sponsalibus contractam, sed ad urgendam illius executionem, lapsu illius temporis non dissolvuntur Sponsalia. Quia in tali casu duplex est obligatio, altera adimplendi promissum, altera, tali tempore illud adimplendi. Ubi vero duplex adest obligatio, non desinit una, quia neglecta est altera. Unde si tempore præfixo non est contractum Matrimonium, quam primum contrahi debet. Si tamen pars altera nimium differat, cessat obligatio ex Sponsalibus contracta. Quia qui nimium est in mora, non solum juri suo renuntiare censetur, sed & fidem frangit, ad quam adimplendam, tempore jam completo, quod præfixum erat, sollicitabatur. Sed & in hoc casu non ille liber est ab obligatione Sponsalibus contracta, qui moram facit, quia mora, forte etiam de industria quæsita, ei prodesset non debet; verum ille, cui mora iniicitur, cui enim fides jam multum infringitur, is à data fide liber censeri debet.

Quodsi vero in Sponsalibus tempus præfixum sit, ad finiendam etiam obligationem contrahendi Matrimonii, tunc eo exacto, licitum est resilire ei, per quem non stat, quominus Conjugium celebretur, quia ubi sic contractus initus est, ut licitum sit post certum tempus à contractu resilire, non peccat qui jure suo utendo resilit. Non po-

test



test autem & tunc is resilire, qui est in mora, quia è delicto suo lucrum reportare non debet. Ergo si urgeat altera pars, datam fidem servare debet.

An vero resilire liceat, si mora sit plane inculpabilis? Res est ex circumstantiis definienda. Non enim resilire poterit Sponsa ideo, quia Sponsus ea die, qua Matrimonium erat contrahendum, Patrem morientem invisit. Neque etiam resilire poterit Sponsus, quia Sponsa Matrem suam, ut nuptiali cæremoniæ intersit, ad dies aliquot expectat. In his ergo ac similibus casibus non est permittendum ut partes resiliant, nisi persvæum sit, Sponsos mentem gerere à se invicem aversam, & ideo datam resiliendi occasionem, vel potius prætextum avidè arripere.

*Quæres 17mo: An Sponsalia per Religionis ingressum, aut Ordinis susceptionem dissolvantur?*

*Resp:* Certum est Sponsalia dirimi per Religiosam professionem, quia hæc etiam contractum, & nondum consummatum, dirimit Matrimonium. Si autem habitus nonnisi Religiosus susceptus sit, ille qui in Sæculo remanet, liber à Sponsalibus efficitur, quia Novitium ingrediens palam declarat se juri suo cedere, & partem in Sæculo manentem ab obligatione sibi data dimitti, Religionis etiam susceptio, & desertio, non minimam inducit mutationem & personam dehonestat, neque enim decorum est fæminæ, si Monacho, ut aiunt exuto, nubat, aut Viro, si nubat expulsæ Moniali. Ille vero, qui Religionem ingressus est, si non profiteatur, debet petente altera parte, datam fidem servare, quia jus Canonicum soli professioni Religiosæ hoc tribuit, quod Sponsalia, & Matrimonia etiam rata dirinat. Et vero si sola susceptio Religiosi habitus à Sponsalibus Novitium liberum faceret, aditus fraudibus pateret, cum cuicumque, ut à Sponsalium jugo liber efficeretur satis foret Religionis habitum induere, paulo post egredi, & cui voluerit nubere.

Quod vero attinet Ordines, tria certa sunt. 1mo: Non solvuntur Sponsalia ex parte viri per Minorum Ordinum susceptionem. Quia id nullo jure constitutum est, & facilitas suscipiendi minores Ordines, qui non ligant, facilem fraudi, ac dolo aditum, præberet. 2do: Potest tamen Sponsa, si Sponsus ipsa invita vel inscia minores suscepit Ordines, à Sponsalibus resilire, quia qui minores suscipit, censetur, ut fieri solet, ad Majores tendere ordines, sicque statum Matrimonio repugnantem eligere. 3tio:



Majorum vero Ordinum susceptio, Sponsalia dirimit, quia Ordines sacri ad continentiam obligant, quæ cum Matrimonio incompatibilis est.

An vero simplex votum sive Religionem ingrediendi, sive sacros suscipiendi Ordines, Sponsalia dirimat, disputant inter se Theologi. Alii negant, atque ejusmodi vota pro invalidis habent, quia sunt in præjudicium tertii facta, alii affirmant, quia in Sponsalibus subintelligitur hæc conditio: *Nisi contingat notabilis mutatio vite in melius*. Porro qui vovet vel ingredi Religionem, vel sacros suscipere Ordines, castitatemque servare, mutatur in melius. Ergo à Sponsalibus absolvitur. Verum licet prima opinio vero proximior sit, & gravioribus suffulta argumentis, atque in foro exteriori, dum res ad Judicium delata fuerit, sequenda, ne per istiusmodi vota, fraudibus & dolo via pandatur, nisi contrarium speciales quædam fradeant circumstantiæ, secunda tamen sententia in foro interno teneri ac sequi potest, ac proinde non debet ad Nuptias urgeri, qui post Sponsalia, interiori Dei voce sese ad castitatem in Religione profitendam, vel ad sacros Ordines trahi, non ore solum, sed & factis comprobant. Is tamen inconsulto Episcopo non posset ordinari, quia toto titulo de obligatis ad ratiocinia non ordinandis, prohibetur, ne quis obligatione aliqua adstrictus, in alterius præjudicium ordinetur.

*Quæres 18vo: An Sponsalia priora solvantur per posteriora?*

*Resp.* Certum est, Sponsalia priora, per sola posteriora non dirimi, quia fides posterius data, in præjudicium prioris, plane irrita est. Si tamen Sponsalibus secundis accedat coitus carnalis cum consanguinea in primo gradu prioris Sponsi, tunc neutra duci poterit. Non prior propter impedimentum affinitatis ex tali coitu exurgens. Non posterior ratione impedimenti publicæ honestatis, quæ ex prioribus validis Sponsalibus orta est.

At dubitatur *2mo*: An si priora Sponsalia dissolvantur exg. per prioris Sponsæ mortem, teneatur Sponsus posteriora exequi. *2do*: An si idem Sponsus cum posteriore Sponsa peccaverit, eam ducere teneatur. *3tio*: Quid juris si posteriora Sponsalia, non vero priora, juramento confirmata fuerint.

*Resp. ad 1mum*: Qui secunda Sponsalia contraxit, his, post priorum dissolutionem, non tenetur, quia secunda Sponsalia, & in illis facta promissio, non valuerunt.



cum promissio hæc fuerit rei illicitæ, quare etiam quæ voto Castitatis ligatus Sponsalia contraxit, etiamsi postea à voto dispensetur, ad ea adimplenda non tenetur, quia propter voti impedimentum nulla erant. Imo neque Sponsus posteriorem Sponsam ducere tenebitur, etsi prior sponte, juri suo in gratiam ipsius cesserit. Quia quod de jure nullum est, nullam parit obligationem. Unde qui ante ætatem invalide professus est, adeptæ ætate non tenetur denuo profiteri. Si quæ igitur hic subit secundorum Sponsalium obligatio, hæc ex necessitate vitandi scandalii, vel damnum resarciendi proveniet.

*Ad 2dum:* Qui posteriorem Sponsam corrumpit, si priorum Sponsalium conscia fuit non tenetur eam ducere, quia jus prioris Sponsæ non potuit auferri per injuriam quam ei altera intulerat, & cum ipsa priora Sponsalia sciret, vere potius decepit, quam decepta est, unde si quod patitur damnum, sibi imputare debet. Si vero priora Sponsalia nesciebat, Sponsus eam ex charitate ducere tenetur, cum prior juri suo cedit, sed an juri suo cedere teneatur, ex circumstantiis judicandum est. Si enim puella à crimine aliena, quæ à Noverca inhumaniter tractata, & incerta quo se vertat, tradiderit se amico, qui renitenti tandem persvaserit, unicum esse remedium has evadendi calamitates, si Petri libidini, Nuptias promittenti cedat. Certe miseratione quadam digna est, quæ in his casibus dolo celsit. Supponatur rursus priorem sponsam à pluribus ad Nuptias quæri, posteriorem vero, nisi à corruptore ducatur, à tota familia deserendam esse, ita ut se crimini dare cogatur. An non exiget charitas, ut prior Sponsa, cum mediocri suo detrimento, juri suo cedat, ut tanta mala avertat? Etsi igitur amasium suum stricto jure posteriori Sponsæ dimittere non teneatur, at jure charitatis in hisce circumstantiis illam dimittere consultius est. Hæc tamen hujus resolutionis moderatio non proderit iis, quæ non decipiuntur à Proco, quam à propria seducuntur libidine, unde his non ita indulgendum est, ut legitima sponsa à jure acquisito dimoveatur, imo aliquando charitas exigat, ut illæ iniquitatis suæ pondus sentiant, ad aliarum terrorem.

*Ad 3tium:* Sponsalia juramento non vestita, non dissolvuntur per posteriora etiam jurata. Quia juramentum illud, utpote in præjudicium tertii, fuit de re iniqua. Porro juramentum vinculum iniquitatis esse nequit. Prior



tamen Sponsa, quoniam contra fidem ipsi datam hæc posteriora Sponsalia inita sunt, resilire potest, quia frangenti fidem, fides non est servanda. Si tamen tunc, quando posteriora contracta fuerant, justa aderat causa à prioribus resiliendi, quia tunc, quo volebat sua desideria, convertere poterat, secunda Sponsalia contrahere valuit, ac proinde, si præterea illa juramento confirmaverat, illa tenent.

*Quæres xgro: Utrum subsequens Matrimonium actu contractum priora Sponsalia pro semper dissolvat?*

*Resp: amo:* Si Matrimonium valide contrahatur, priora Sponsalia dissolvit, unde pars quæ Matrimonio fraudata est, ad alia vota convolare potest. Quia Matrimonium etiam solum ratum, est vinculum, quacunque simplici desponsatione fortius. Graviter attamen peccat, qui post contracta Sponsalia cum una, cum alia Matrimonium contrahit. Si tamen hoc Matrimonium subsequens nullum sit, dissolvit Sponsalia ex parte illius, qui deseritur, quia Sponsus qui etiam Matrimonio invalido alteri conjungitur, à prius desponsata animo & corde recedit. Ergo ei etiam licitum est alio se convertere.

*2do:* Probabilius est priora Sponsalia non omnino solvi ex parte contrahentis Matrimonium, sed solum suspendi, quamdiu manet idem Matrimonium. Qui enim semel obligationem justitiæ contraxit, tamdiu ligatus manet, quamdiu eam aliquando adimplere potest, licetsi hic & nunc implere illam nequeat. Porro qui Sponsalia inivit, obligationem justitiæ contraxit, qua obstrictus est Matrimonium cum rite sibi desponsata contrahere. Ergo licet modo hoc adimplere nequeat, quia jam cum alia Matrimonium inivit, priori tamen obligationi satisfacere tenetur, cum id præstare poterit. Ac proinde quocunque modo dissoluto Matrimonio, priorem Sponsam in uxorem ducere debet. Si tamen hæc juri suo renuntiavit verbo, vel facto, puta alii nubendo, nihil jam in priorem Sponsam juris habet.

*Quæres 2omo: Quæ sunt aliæ dissolvendi Sponsalia causæ?*

*Resp:* Variæ præterea sunt: *amo:* superveniens impedimentum Matrimonium dirimens, exg. ex affinitate, quia jam inter tales, quoniam Matrimonium consistere nequeat, facta illius promissio tenere non potest. Qui tamen sua culpa tale impedimentum contraxit, dispensationem procurare tenetur, si pars innocens id exigat, non



non modo ratione imminentis damni, ut cum Virginem, aut honestam viduam, sub spe Matrimonii corruptit, aut utrique timenda est, boni, quod habent, nominis iactura, sed præscisso etiam pars alterius damno, & ea solum de causa, quod sua culpa impedimentum contraxerit. Quia qui culpa sua ponit Matrimonii impedimentum, jus alterius graviter violat, illud ergo resarcire tenetur, dispensationem petendo.

2do: Diffamatio alterius Sponsi, seu ab ipsis Sponsis, seu à voce publica facta, est justa causa à Sponsalibus resiliendi. Unde si palam sive falso, sive vere jactet se Sponsus, cum desponsata concubuisse, poterit virum hunc impudentem, ac imprudentem abijcere. Idem erit si fama publica renuntiet Sponsum impedimento dirimente adstrictum esse. Cavendum tamen ne vagi, & incerti rumores, ac malevoli animo sparsi, pro fama publica habeantur, vix enim ullum consistet Matrimonium, si rumoribus, vel potius calumniis, impiæ plebeculæ fides habeatur.

3tio: Sufficit etiam contradictio Parentum serio apposita, maxime si ex illa gravia mala, & infasti timeantur exitus. Verum peccant Parentes, quando legitime & juste contractis Sponsalibus, sine legitima, & justa causa resistunt.

*Quæres 2mo: Qua autoritate contracta Sponsalia dissolvenda sint?*

*Resp:* Cum in nostris Regionibus Sponsalia privatim, & sine Ecclesiasticis sollemnitatibus contrahantur, privatim etiam, sine Judicis Ecclesiastici sententia dissolvuntur. Si tamen publice contracta sint, & ex illorum rescissione aliquod timeatur scandalum, competens est, ut Episcopus consulatur. Cum etiam dubium occurrit, de sufficientia causæ ad illa dissolvenda, convenientissimum est, ut proprii Parochi requiratur judicium, aliquando etiam ad forum contentiosum causæ Sponsalium devolvuntur, ubi per sententiam Judicis Ecclesiastici Sponsalia aut dissolvuntur, aut corroborantur.

## A R T I C U L U S 3tius

### *De Bannorum promulgatione.*

*Quæres 1mo: Quid sit Bannorum promulgatio?*

*Resp:*



*Resp.* Bannorum promulgatio, est denuntiatio futuri, inter certas & nominatas personas, Matrimonii, coram frequenti populo, intra Missarum sollempnia facta, ut qui aliquod impedimentum inter prædictas personas esse cognoverit, illud Parocho quam primum denuntiet. Istiusmodi Bannorum promulgatio graviter est ab Ecclesia præcepta, ut patet ex Concilio Tridenti: Ses: 25. de Reformatione: Cap: 1. ubi Sancta Synodus, præcipit ut antequam Matrimonium contrahatur, ter à proprio contrahentium Parocho, tribus continuis diebus festivis in Ecclesia inter Missarum Solempnia publice denuntietur inter quos Matrimonium sit contrahendum, quibus denuntiationibus factis, si nullum legitimum opponatur impedimentum, ad celebrationem Matrimonii in facie Ecclesiæ procedatur. Et huic legi à Concilio Tridentino præscriptæ, omnes cujuscunque status, qualitatis, & conditionis existant, subesse debent, eximuntur tantum supremi Principes, quia eorum genus omnibus notum est. Quacunque autem urgente necessitate, etiamsi difficilis esset ad Episcopum recursus, non potest Parochus vel unius Banni promulgationem prætermittere.

*Quæres 2do:* Quo tempore Banna promulgari debeant?

*Resp.* Juxta præscriptum Concilii Tridentini. amo: tribus continuis diebus festivis, quod non ita accipiendum est, ut Banna promulgentur tribus, quæ proxime se contingunt diebus festis, prout olim erant festa Paschatis, & Pentecostes, quia è contra dies plena, sive inter primam & secundam, sive inter secundam & tertiam promulgationem, effluere debet, ne scilicet brevitate temporis eludantur, qui aliquod impedimentum denuntiare volunt. Dies autem festiva stricte hic sumi debet, pro illa die, quæ ex præcepto Ecclesiæ celebratur, unde Banna promulgari nequeunt iis diebus, in quibus ex devotione, aliqua solemnitas cum populi concursu peragitur, quia non sunt proprie dies festivi.

*2do:* Banna promulgari debent diebus festivis distinctis, ita ut uno die festivo bis Banna promulgari nequeant, quia Concilium Tridentinum ter, & tribus diebus Banna promulgari disponit, quare male faciunt, qui mane intra Missarum sollempnia facta secunda promulgatione, eodem die post vespere tertiam faciunt, & Matrimonium benedicunt.

*3tio:* promulgari debent Banna intra Missarum solle-



lemnia, hoc est tempore Missæ Parochialis. Unde Bannorum promulgationes non sunt faciendæ mane antequam populus conveniret ad Missam audiendam, neque tempore vespertinum, quia Concil: Trident: dicit: *inter Missarum solemniam*, id etiam habet Rituale Nostrum titulo de Sacram: Matrimonii, *intra Missarum solemniam publice denuntietur inter quos Matrimonium sit contrahendum.*

4to: Banna promulgari debent in Ecclesia, & id statuit Concilium Tridentinum, atque Rituale Romanum præscribit, quare extra Ecclesiam post celebrata Missarum solemniam, sive in aliqua Capella, aut Oratorio, Banna promulgari non debent, sed in Ecclesia, & intra Missarum solemniam Bannorum denuntiationes fieri debent.

Quæres 3tio: *Ubi, & à quo faciendæ sit Bannorum promulgatio?*

R-sp: Debet fieri in Ecclesia Parochiali, & à proprio Matrimonium contrahentium Parocho, sive ipsius Vicario. Ita habet Concilium Trident: & Rituale Romanum, *ter à proprio contrahentium Parocho tribus continuis diebus festivis in Ecclesia.* At non semper sufficit, ut in una tantum Parochia fiant Bannorum promulgationes. 1mo: enim si contrahentes sint à duplici Parochia, vel licet ex eadem sint, uterque Sponsus, vel alter, sufficienti carent domicilio, in utraque Parochia, Sponsi scilicet, & Sponsæ, ac pariter in prioris, & posterioris domicilii Parochia Banna promulgari debent. Ita Rituale Romanum titulo 1. Cap: 1. de Sacram: Matrim: *Si vir & mulier Parochiæ sint diversæ, in utraque Parochia fiant denuntiationes.* 2do: si Sponsi æquale in duobus locis domicilium habent, Banna in utroque domicilio denuntianda sunt nisi sat diu manserint in eo loco, ubi modo conjungendi sunt. 3tio: Domesticorum conjugia in Parochia Domini, cui ab uno saltem anno famulantur denuntiari debent. Imo, nisi aliunde noti sint, percunctandum tum in loco eorum originis, tum in eo, quem ante actualem famulatum incolabant, an liberi sint, sive à Sponsalium, sive à Matrimonii vinculo. 4to: Vagi, & alienigenæ denuntiari debent, non tantum in loco actualis domicilii, sed in loco nativitatis, aut ut minimum, ubi moram traxerunt longiorem. Conjugia quoque militum, in locis ubi ab anno degunt, atque in ipso nativitatis suæ loco denuntiari debent, qui etiam Præfecti sui afferre debent testimonium, quo de eorum constet libertate.

Non



Non longo autem intervallo Matrimonium à promulgatione Bannorum sejungi debet, ne novum aliquod inter Sponsos suboriatur impedimentum. Hinc Rituale Romanum titulo 7. Cap: x. de Sacramento Matrimonii sic statuit: *Si infra duos menses post factas denuntiationes Matrimonium non contrahatur, denuntiationes repetantur, nisi aliter Episcopo videatur.*

*Quæres 4to: Quæ circa Bannorum promulgationem, Parochus observare tenetur?*

*Resp:* Parochus circa Bannorum promulgationem sequentia observare tenetur. 1mo: modum, & formam hujusmodi Bannorum promulgationis, quæ in Nostro Rituali præscripta est, accurate, ac fideliter observare debet, fieri autem debent istæ promulgationes voce clara, sonora, & intelligibili, ut facile à quovis percipiantur. 2do: nunquam promulget Banna filiorum familias sine Parentum, aut Tutorum consensu. 3tio: pariter etiam Banna non promulgabit, nisi ad postulationem Nupturientium, & id statuit Rituale Romanum his verbis. *Has denuntiationes Parochus facere non aggrediatur, nisi prius de utriusque contrahentis libero consensu sibi bene constet.* 4to: si concedenda sit unius aut duplicis Banni dispensatio, de hac populum admonere debet, ut festinent revelare, qui aliquod norunt impedimentum futuri Matrimonii.

Rite autem absolutis tribus denuntiationibus, ut habet Rituale Romanum, *si nullum legitimum opponatur impedimentum, ad celebrationem Matrimonii procedatur. Sed si quid obstat, ultra Parochus non procedat.* Quare si Parochus aliquod impedimentum detexerit, præsertim vero dirimens, monebit Sponsos, licetsi illud ipsi ignorent. Sed præterea ab ipsis Sponsis, eorum Parentibus, Consanguineis inquiret, an Sponsi libere consentiant, an non aliquo Consanguinitatis, affinitatisque vinculo detineantur irretiti, an non aliis fidem Conjugii appromiserint, an Religionis Mysteria, Dei præcepta, & alia scitu Christianis necessaria calleant, quæ si ignorant, Matrimonio eorum nullatenus assistat, neque illud benedicat. Unde in Rituali Romano sic statuitur. *Parochus admonitus de aliquo Matrimonio in sua Parochia contrahendo, primo cognoscet ex his, ad quos spectat, qui, & quales sint, qui Matrimonium contrahere volunt. An inter eos sit aliquod Canonicum impedimentum. Utrum sponte, libere, & secundum honestatem Sacramenti, velint contrahere. Utrum int in ætate legitima, ut vir saltem quatuordecim, mul-*  
*lier*



*lier vero duodecim annos expleverint, & uterque sciat rudimenta fidei, cum ea deinde filios suos docere debeant. Quare si advertat Parochus Sponsos ignorare Fidei rudimenta, debet benedictionem Matrimonii illorum differre, donec ea didicerint, quæ scitu necessaria sunt.*

*Quæres 2to: Ex factis denuntiationibus, ad quæ fideles obligantur?*

*Resp: Ex factis denuntiationibus fideles omnes, ad impedimenti cujuscunque, etiam prohibentis, si quod subesse norunt, revelationem, graviter tenentur, nisi urgens quæpiam causa excuset. Neque ab hac obligatione alterius Parochiæ, aut Diæcesis incolæ, vel Consanguinei Sponsorum, vel eorundem amici, quibus impedimentum sub secreti lege commissum fuerit, eximuntur, sed illud revelare tenentur. Et hæc obligatio gravis est, quia agitur de valore, ac sanctitate Sacramenti Matrimonii, ne aut irritum sit propter dirimens impedimentum, vel propter prohibens profanetur. Sed ab istiusmodi obligatione excusat justa, ac gravis causa, ut si quis notum sibi impedimentum denunciare nequeat, sine pari, aut graviore suo, aliorumque detrimento. Unde à revelando immunes sunt. 1mo: qui impedimentum norunt, vel quia ab iis petitum est de eo consilium, ut Doctores, juris Advocati, quin & penitiores, ac intimi amici, quibus ad proprium sui regimen sua intima quæque panduntur, vel ratione professionis suæ, ut Medici, Chirurghi, Obstetrices. Hi enim si semel frangant fidem, consiliis petendis præcludere ut aditus, quia nemo erit, qui in arduis tuto liceat interrogare. 2do: qui sine propria infamia, vel alio gravi detrimento impedimentum detegere non possunt, ut mater, aut soror quæ cum filiæ, aut sororis amasio peccavit, ancilla quæ Dominiæ suæ crimen adjuvit, villicus, cui, si Herum prodatur, imminet gravis jactura. In dubio nihil prudentius, quam ut interrogetur prudens Confessarius. Ceterum revelatio hæc, ac impedimenti sibi noti denuntiatio, quam primum moraliter fieri debet. Detegendum vero, ac revelandum impedimentum est, Sponsis, aut eorum Parentibus, Consanguineis, si impedimentum publicum sit, ut cognatio, affinitas; sed consultius ut id fiat Parocho, à quo Matrimonium est benedicendum, vel qui Banna promulgaverat. Si vero impedimentum sit occultum, satius quidem foret, ut Sponsi privatim moneantur, verum quia monita hæc sæpius negliguntur, plures docent Theologi,*



logi, recte pergendum ad Parochum, ut meliori qua poterit via, malo occurrat.

*Quæres 6to: Quid faciendum est Parocho, cum ei aliquid denuntiatur impedimentum?*

*Resp:* Debet Matrimonii celebrationem ad tempus differre. Sic in Rituali Romano statutum est. *Si quid obstat, ultra Parochus non procedat.* In his autem sufficit testis unus fide dignus, quia agitur ad avertenda proximi mala, quæ ex Matrimonio nulliter contracto indubie sequuntur. Interim rem debet diligenter investigare, et si aliquod supersit dubium ad Episcopum recurrere. Si quis vero sine ullius impedimenti denuntiatione, Matrimonio se opponat, maxime propter temporale suum interesse, huiusmodi oppositionis rationem habere communiter non debet, nisi à Sponsorum Parentibus, vel Tutoribus oppositio fiat, nunquam enim sine illorum consensu Matrimonia filiorum familias benedici debent, aut nisi allegentur Sponsalia cum alio, aut alia contracta, fidesque alteri data, tunc enim mature rem examinare tenetur. Cum autem juridica intervenit oppositio, ab Episcopo affertur inhibitio, ad celebrandum Matrimonium Parochus procedere non debet. Verum tamen si Parochus, aut ipsius Vicarius contra Episcopi inhibitionem, Matrimonii Sacramentum administraverit, illud validum erit. Ita Bened: 14. de Synodo Diæc: libro 13. Cap: 23.

*Quæres 7mo: Quis in Bannorum promulgatione dispensare potest?*

*Resp:* Episcopus in Bannorum promulgatione dispensare potest. Ita Concil: Trident: Ses: 24. de Refor: Matrimonii Cap: 1. ubi Denuntiationum remissio Ordinarij prudentiæ, & iudicio relinquitur. Solus autem Episcopus, vel ejus Vicarius hanc dispensationem concedere potest, & quidem suis non nisi Diæcesanis, quare si Sponsi sint diversæ Diæceseos, quisque à suo Diæcesano Episcopo in promulgatione Bannorum dispensari debet. Et hæc dispensatio sine justa causa concedi nequit, alias Episcopus, sive illius Vicarius in Bannorum promulgatione dispensans mortaliter peccat, quia Bannorum promulgatio, justissimis, ac gravissimis de causis ab Ecclesia est instituta. Jam vero in materia gravi legis violatio peccatum grave est. Porro dispensatio in lege sine justa causa data, est ipsa legis violatio. Ac proinde peccatum.

Tres autem justæ sunt causæ propter quas in Bannorum promulgatione dispensatio conceditur, utilitas, ne-



cessitas, & prærogativa personæ. Itaque *1<sup>mo</sup>*: ratione utilitatis dispensari potest cum iis, qui gravi, & injusto ex denuntiationibus suffunderentur pudore ob nimiam inter Sponsos ætatis, conditionis, & fortunæ discrepantiam, aut cum grave imminet peccati periculum inter Nupturientes, seu dissidiorum inter familias. Cum prudenter timere est, ne Sponsorum alter vel ex innata levitate resiliat, vel per cujuspiam malitiam avertatur à Matrimonio quod contrahere tenetur. Denum cum urget tempus itineris, quod differri nequit, seu ipsius Sponsi, seu Patris, aut Matris Sponsæ vel Sponsi. Uno verbo: quoties imminet periculum Scandali, vel gravis damni, in bonis fortunæ, corporis, famæ, aut animæ, toties in Bannorum promulgatione dispensari potest.

*2<sup>do</sup>*: ratione necessitatis. Cum aliqui vitari nequit scandalum, ut si partes in Matrimonium jungendæ, quia pridem in concubinato vivunt, pro conjugatis toto in loco habentur, aut si occultum inter eos, qui olim palam contraxerant, detegatur impedimentum dirimens. Cum Matrimonium crimini finem imponet, ut si timendum sit, ne duo, qui in concubinato vivunt, peccare pergant, dum fient denuntiationes. Denique dum in articulo mortis constitutus vult ducere concubinam, ut prolem ex ea susceptam legitimet.

*3<sup>tio</sup>*: ratione conditionis dispensatur in promulgatione Bannorum cum Principibus Supremis, quia horum impedimentum, si subsunt, omnibus nota sunt.

*Quæres 8<sup>vo</sup>*: Quid de Matrimoniis secretis, quæ conscientie dicuntur intelligendum sit?

*Resp*: Matrimonia secreta seu conscientie illa sunt, quæ sine Bannorum promulgatione, privatim equidem sed coram Parocho, & testibus contrahuntur, hoc tamen pacto ut nunquam divulgentur, sed maneant secreta, & occulta. De iis hæc statuuntur. *1<sup>mo</sup>*: sunt quidem valida si inter Matrimonium contrahentes nullum dirimens interveniat impedimentum. *2<sup>do</sup>*: gravibus obnoxia sunt scandalis, quando illi conjugaliter secum vivere conspiciuntur, qui cum palam nunquam Matrimonium contraxerunt, pro veris Conjugibus non habentur. *3<sup>tio</sup>*: unde istiusmodi Matrimonia neque à Parocho, neque à Confessario toleranda sunt, aut permittenda, nisi id exigant gravissimæ causæ, quarum examen ad solum Episcopum spectat, sine cujus scitu, & consensu nihil fieri, & attentari potest. Quare Benedictus 14. in Bulla quæ incipit: *Satis vobis*



vobis compertum, circa istiusmodi secreta, atque occulta Matrimonia hæc habet. *amo*: monet Episcopos, ne facile & sine legitima ac urgente causa remittant publicationes Bannorum. *2do*: ut diligenter inquirent, num Personæ Matrimonium secreto contrahere petentes, ejus qualitatis, gradus, & conditionis sint, quæ id omnino exposcant, & ut ipsi enixe curent, quatenus priusquam contrahendi secreto Matrimonium facultatem fecerint, contrahentes clara, & indubia, & à quavis fraude immunia exhibeant documenta status sui liberi, ut polygamia vitetur periculum. *3tio*: ut hæc Matrimonia ex permissione Episcopi celebrentur coram proprio alterius ex contrahentibus Parocho, nec sine gravi urgente causa, extraneus Sacerdos ad id muneris deputetur. *4to*: Matrimonii secreto contracti documentum Episcopo exhiberi & in acta ingrossari, atque caute custodiri debet. *5to*: proles ex tali Matrimonio nata statim baptisetur, atque Episcopo denuntiatur, illiusque ortus describatur vel immediate per ipsos Parentes, vel per litteras eorum caractere consignatas, vel per Personam fide dignam, ab ipsis Parentibus designatam, & hæc in actis caute servantur.

## CAPUT SECUNDUM

*De effectibus Sacramenti Matrimonii, illiusque proprietatibus.*

### ARTICULUS I<sup>mus</sup>

*De effectibus Sacramenti Matrimonii.*

*Quæres amo: Qui sunt effectus Sacramenti Matrimonii?*

*Resp*: Præcipuus effectus Sacramenti Matrimonii est gratia, quam semper ii consequuntur, qui illud digne & pie suscipiunt. Eo namque Matrimonium in lege Evangelica veteribus præstat connubiis, quia gratiam confert, illamque conjugibus elargitur, ipsos siquidem, ut docet Concilium Trident: sanctificat, atque naturalem illorum per-



perficit amorem. Unde enixe satagendum est Conjugibus, ut Nuptias contracturi ad Matrimonii Sacramentum suscipiendum, & tempestive cum pietate se disponant, & sancte illud recipiant, ne aliqui & Sacramentali gratia priventur, & gravis sacrilegii rei efficiantur.

*Quæres 2do: Hæc gratia Sacramentalis quid efficit?*

*Resp:* Dum à Conjugibus non deperditur, sed studiose conservatur efficit. *1mo:* ut Conjuges casto amore se invicem prosequantur, concupiscentiam carnis debite moderentur ita, ut quemadmodum monet Apostolus 1. Thes. Cap: 4 *unusquisque sciat vas suum possidere in sanctificatione, & honore, non in passione desiderii, sicut & gentes quæ ignorant Deum.* 2do: ut mutuas suas infirmitates patienter, imo & alacriter ferrant, eosque obfirmat adversus calamitates, quæ Nuptias semper subsequuntur, iisque indivulse adhærent.

Cur autem tam rari sint hujus Matrimonialis gratiæ effectus, cum pleraque Connubia plena esse videantur iræ furoris Domini, id inde evenit. *1mo:* quod adeo pauci ad hoc Sacramentum accedunt congrue dispositi. Alii libidinem unice intendunt. Alii opulenti fæderis splendorem quærunt. Alii Parentum autoritate oppressi conjugium ineunt, quod animo detestantur. Nemo pene Deum interrogat. Porro qui Matrimonii Sacramentum male dispositi recipiunt, pro benedictione maledictionem sibi, suæque familiæ adsciscunt. 2do. quia plerique è Conjugibus, licet digne ad Matrimonii Sacramentum accesserint, gratiamque illius consecuti fuerint, brevi tamen illam per peccata sua deperdunt, hac autem amissa privantur etiam auxiliis opportunis ad Matrimonii onera salutariter sufferenda, suæque obligationes fructuose adimplendas, quam maxime necessariis.

*Quæres 3tio: Quid præterea præstat Matrimonii Sacramentum?*

*Resp:* Sacramentum Matrimonii præter gratiam habitalem, quæ ipsius est propria, eique annexa, tribuit Conjugibus jus ad gratias actuales suo tempore à Deo obtinendas, quibus Conjuges adjuti & status sui obligationibus prompte satisfacere, & onera Matrimonii hilariter perferre valeant.

Ut ergo hos præexcellentes Sacramenti Matrimonii effectus Conjuges consequantur *1mo:* ad illud digne recipiendum per Sacramentalem Confessionem, & Sacerdotis absolutionem conscientiam suam ab omni mortali noxa

præ-



prævie expurgare debent, ut mundi & puri hoc Sacramentum recipiant. 2do: Post Nuptias pie celebratas omnia sedulo peccatum cavere debent, & si quod grave admisserint, illud quam primum per pænitentiam diluant, quatenus virtus suscepti Sacramenti in iis operetur, & fortunatum eorum reddat connubium. Unde sapientissime monet Rituale Romanum titulo 7. Cap: 1. de Sacramento Matrim: *Conjuges antequam contrahent, sua peccata diligenter confiteantur, & ad Sanctissimam Eucharistiam, atque ad Matrimonii Sacramentum suscipiendum, pie accedint, & quomodo in eo recte & christiane conversari debeant, diligenter instruantur.*

## ARTICULUS 2dus

### *De proprietatibus Matrimonii.*

*Quæres 1mo: Quot sint proprietates Matrimonii?*

*Resp:* Duæ sunt præcipuæ Matrimonii proprietates, scilicet, unitas, & indissolubilitas. Unitas, quæ etiam *Monogamia* dicitur, & in eo posita est, quod Matrimonium sit conjunctio unius viri cum una uxore, quemadmodam Spiritu Dei prædixit Adam Genesis Cap: 2. *Erunt duo, in carne una.* Monogamiae opponitur Polygamia, quæ uxorum est pluralitas, quando vir unus duas, vel plures simul habet uxores. Et hæc in lege Evangelii jure divino severe prohibita est, sic enim expresse Christus pronuntiavit. Math: Cap: 19. *Quicumque dimiserit uxorem suam, & aliam duxerit, mæchatur, & qui dimissam duxerit mæchatur.* Et hæc divina prohibitio, qua Polygamia vetita est, etiam ad Infideles extenditur. Unde Pagani, Tartari, Judæi plures simul uxores habere nequeunt, neque una repudiata, alteram ducere valent, priore in vivis degente. Indissolubilitas vero Matrimonii in eo consistit, quod semel rite contractum dissolvi nequeat. Unde statuerat Christus Math: Cap: 10. *Quod Deus conjunxit, homo non separet.* Sunt tamen casus in quibus Matrimonium dissolvi potest, veluti per Religiosam professionem, Infidelium quoque Matrimonia non nunquam dissolvuntur.

*Quæres 2do: Utrum reipsa Infidelium Matrimonia dissolvi possint?*

*Resp:* Matrimonium Infidelium etiam consummatum dissolvi potest. Et id constat ex Paulo, qui 1. Corinth: Cap:



Cap: 7. sic statuit: *Si infidelis discedit, discedat, non enim servituti subjectus est frater, aut soror in huiusmodi:* Unde Innocentius 4. Cap: 7. de Divort: ita scribit: *Si alter Infidelium Conjugum ad fidem Catholicam convertitur, altero vel nullo modo, vel non sine blasphemia divini nominis, vel ut eum pertrahat in peccatum, ei cohabitare volente, qui relinquitur, ad secunda si voluerit, vota transibit. Et in hoc casu intelligimus quod ait Apostolus. Si infidelis discedit, discedat.* Sed hic duo præcipue advertenda, & bene annotanda sunt. 1mo: Certum est Matrimonium infidelis conversi non dissolvi ipso facto per ejus conversionem, aut Baptismi susceptionem, quia ut inquit Innocentius 3. de Divort: Cap: 8. *Per sacramentum Baptismi non solvuntur conjugia, sed crimina dimittuntur.* Licetsi enim pertinax Conjunx infidelis, & Christo injuriosus, justam converso fidei tribuat dissolvendi conjugii causam, tamen conjugale vinculum reip a per solam conversionem, aut baptismi susceptionem non abrupitur. Unde si manens in infidelitate, antequam conversus fidelis novas contraxerit nuptias, aliud ineat Matrimonium, illud nullum, & irritum est, quia privilegium vinculum conjugale dissolvendi in favorem fidei, non vero infidelitatis à Christo concessum est, & illud per solam conversionem, Baptismique susceptionem non abrupitur. 2do: Itaque Matrimonium infidelis conversi, non dissolvitur nisi per novum quod ipse contrahit Matrimonium, & cum ipso facto contrahitur novum, vetus dissolvitur, duo enim simul stare nequeunt.

*Quæres 3tio: Quando infidelis conversus, novum inire potest Matrimonium?*

*Resp:* Infidelis conversus, ac baptisatus novum potest inire Matrimonium quando altera pars in infidelitate relicta ipsi pacifice cohabitare recusat, aut nonnisi cum contumelia Creatoris cohabitare, cum eo intendit, aut demum conversum conjugem ad mortale quodpiam peccatum trahere nititur. Porro pacifice cohabitare recusat, qui à Converso recedit, eumque deserit. Cohabitare cum contumelia creatoris censetur, qui in verba blasphemiarum contra susceptam à Conjuge religionem, atque in varias injurias exprobrationes, cum despicientia illius prorumpit, eaque coram eo infidelitatis opera exercet, quæ fidem illius labefactare, eumque pervertere possint. Demum ad peccatum mortale trahere reputatur, qui facinus aliquod grave inspirat, suaque persvasione vehementi ad illud excitat,



citat, ad quod etiam attenta conversi fragilitate, eum facile pertrahere potest.

Hinc *amo*: antequam conversus baptisatus secundas, ineat nuptias, pars altera in infidelitate relicta monenda & interroganda est, an velit sine injuria creatoris cum converso habitare. Si consentiat, conversus fidelis alias nuptias contrahere nequit, aut enim Apostolus I. Corinth: Cep: 7. *Si quis frater uxorem habet infidelem, & hæc consentit habitare cum illo, non demittat illam.* Sed vix unquam pars infidelis censeri potest velle sine injuria creatoris cum fidei converso habitare, nisi ipsa pariter convertatur, at que si fidelis conversus habitet cum infideli conjuge semper est periculum subversionis ipsius, & ut plurimum id fieri non potest sine contumelia Creatoris, quare si pars in infidelitate pertinax, præmonita converti nolit, fidelis conversus, ad alias nuptias convolare potest. Hic tamen excipiendi sunt casus, in quibus valida apparerent argumenta futuræ conversionis partis infidelis, & variæ possunt occurrere circumstantiæ spem probabilem iniicientes, conjugem infidelem, etsi converti nolit posse cum fidei converso pacifice habitare. Quæ omnia dijudicare, ac decidere Episcopi est, cujus consilium, ac judicium his in rebus requiri debet.

*2do*: Si conjunx infidelis præmoneri & interpellari nequeat, quia latet, nec inveniri potest, aut nimis longe abest & adiri, ac requiri nequit: quamquam plerique Theologi censent interpellatione omissa posse fidelem conversum ad alias Nuptias convolare, at Benedictus 14. libro 6. de Synodo Diæces: Cap: 4. censet ad Romanum Pontificem tunc esse recurrendum, cujus est declarare, an in tali casu interpellatio, quæ jure divino videtur esse injuncta, sit omnino facienda. Verum cum difficile sit semper in talibus casibus Romam recurrere, saltem Episcopi judicium est omnino requirendum.

Si conjunx in infidelitate permanens à converso fidei interpellata, tempus ad deliberandum expostulet, erit illud expectandum, donec rem totam perpenderit. Quod si de die in diem moras de industria nectat, erit ei idoneum & certum tempus præfigendum, quo elapso, & nulla habita amplius ab ea reclamatione, fidelis conversus Matrimonium contrahere potest.

Quando pars in infidelitate pertinax, ordinate monita fuerat, & conversus fidelis alias contraxit nuptias, illa quoque à vinculo prioris Matrimonii libera manet, & aliud



& aliud contrahere valet, vinculum enim illud respectu utriusque legitime solutum est. Neque ad eam, quamvis postea ad fidem conversam, mortua illa, cum qua novas contraxit nuptias, in exilatu manentem, aut à viro cui iterum nupserrat, solutam, redire tenebitur, quia cum semel prius Matrimonium dissolutum sit, ille pro semper ab illius vinculo liber factus est.

3tio: Quando ambo Conjuges ad fidem catholicam convertuntur, eorum Matrimonium non dissolvitur, ac proinde ab eo resilire non valent, sed in ipso permanere debent. Quia indissolubilitas Matrimonii jure naturali, ac divino, cui omnes subjecti sunt, constituta est, dissolvi ergo, extra casus à Christo exemptos, nequit. Porro juxta doctrinam Pauli, ex Christi concessione, nonnisi fidei converso, si conjux infidelis discedit, licet ab ea discedere. Cum ergo ambo ab infidelitate convertuntur, unus ab alio discedere nequit, sed in eodem Matrimonii vinculo permanere debent.

Si autem vir in infidelitate plures uxores habuerit, post conversionem suam, ceteris repudiatis, quamvis omnes cum ipso convertantur, priori adhærere debet. Quia hæc tantummodo vera illius fuerat uxor. Ita S. Thomas Doctor in 4. distin: 39. ubi sic ait: *Non est verum Matrimonium infidelis nisi cum illa, cum qua primum contraxit, unde si ipse cum omnibus uxoribus suis convertatur, potest, cum prima habitare, & id facere debet, etiamsi hanc primam juxta legem suam repudiasset, quia repudium illud, utpote lege divina prohibitum, nullius est momenti. Quodsi illa quæ in infidelitate primo nupta fuit, nec converti, nec converso pacifice habitare velit, poterit is secundam retinere, ac cum ipsa coram Parocho, & testibus Matrimonium erit celebrandum.*

Quæres 4to: *Utrum Judæo ad Catholicam fidem converso, ut declinet ambages ab uxore sibi suscitandas, possit ei scribere libellum repudii?*

Resp: Benedictus Papa 14. in sua Constitutione, quæ incipit: *Apostolici Ministerii*, in vectum ab usum, quo Hebræus ad fidem Christianam conversus, libellum repudii juxta ritum Judaicum, ad uxorem suam in infidelitate persistentem transmittere solebat, & ejus libelli ope mulier hebræa ad alias Nuptias transibat, detestabilem vocat, eumque coarguit, atque severe prohibet, ne unquam, aut Judæus conversus, aut Judæa ad fidem Catholicam accedens, parti in infidelitate relictæ det libellum repudii.



Et vero istiusmodi libellus repudii in eo peccat, quod Matrimonii alterius licentiam concedit, quam nemo concedere potest, cum à Christo sit revocata, & libellus repudii severe interdictus, graviter ergo peccat, qui eum scribit, & concedit.

*Quæres 5to: Matrimonium an etiam dirimitur per Religiosam professionem?*

*Resp:* Matrimonium Christianorum ratum, sed non consummatum dissolvitur professione Religiosa. Et id decisum ac definitum est in Concilio Trident: Sess: 24. Can: 6. *Si quis dixerit Matrimonium ratum, & non consummatum, per solemnem Religionis professionem alterius Conjugum, non dirimi, anathema sit.* Licitum ergo est Conjugibus Christianis, post contractum Matrimonium per duos menses de amplectenda Religione deliberare, & per hoc tempus Conjux alteri etiam petenti & exigenti non tenetur debitum conjugale reddere, quo exacto tenetur debitum reddere, si exigatur. Attamen quamdiu Matrimonium non est consummatum, tamdiu liberum est Conjugibus Religionem ingredi, & in ea profiteri, uno autem proficiente, potest alter Conjux in seculo manens ad alias Nuptias convolare. Dum vero unus conjugum non nisi Religionem ingressus est, & neodum professus, alter in seculo manens adhuc nequit alias contrahere Nuptias, sed expectare debet donec ille professionem fecerit, qua facta alias Nuptias contrahere potest, quia Matrimonium non Religionis ingressu, sed ipsa Religiosa professione dissolvitur. Est autem Religiosa professio, cum Vota solemnia in Religione ab Ecclesia approbata emittuntur, unde per Vota simplicia, quæ in aliqua Congregatione etiam ab Ecclesia approbata fiunt, Matrimonium, licet non consummatum, non dissolvitur. Postquam vero Matrimonium consummatum fuerit, jam Religiosa professione dissolvi nequit. Consummatum vero Matrimonium per Carnalem copulam inter Conjuges habitam, etiamsi per vim extorta fuerit, aut primis duobus Mensibus, qui ad deliberandum Conjugibus conceduntur, habitam fuerit.

Posset nihilominus para quæ intra primum à contracto Matrimonio bimestri, vim passa est, & per vim oppressa, Religionem ingredi. Quia nemini vis & dolus patrocinari debet, nec culpa unius, bonum alterius impedire potest. Nisi tamen proles subsequuta sit, quæ sine Matris auxilio educari non possit. Quod autem modo dictum est de vi, illata, idem dicendum de metu gravi. Unde etiam



in hoc casu pars læsa Religionem ingredi potest, quia injuriam gravem passa est, nemo autem per injuriam alterius, jure suo privari debet. Verum in utroque casu, qui vim, vel metum gravem inculsit, in seculo manens alias Nuptias contrahere nequit, neque sine alterius partis licentia ingredi Religionem valet, quia ex parte ipsius Matrimonium voluntarie consummatum fuit.

Sed etiam si copula fornicaria Matrimonium præcelsisset, absque nova copula Matrimonium censetur esse consummatum, & jam amplius Religiosa professione dissolvi nequit. Si enim Matrimonium copulam illicitam subsequens vim habet legitimandæ proli, vim etiam habere debet efficiendi, ut actus, qui proli ortum dedit, habeatur tanquam Matrimonii consummatio, tale igitur Matrimonium Religiosa professione jam dissolvi nequit.

*Quæres 6to: Utrum post Matrimonii consummationem liceat Conjugibus Religionem profiteri?*

*Resp:* Ex mutuo, & libero consensu id Conjugibus licitum est, prout statuitur Cap: 1: de Conver: Conjugum. Verum tunc Matrimonium non dissolvitur quoad vinculum conjugale, quia parti, quæ in seculo manet, ad alias Nuptias convolare non licet, sed dissolvitur tantum quoad thorum, quia Conjuges à se invicem separantur. Unde ad talem separationem, ut unus Conjugum in Religione quapiam profiteri possit, necesse est 1mo: ut conjux alter & ipse Religionem profiteatur, si adhuc juvenis sit, vel senex quidem, sed non absque periculo incontinentiæ. 2do: Conjux in seculo remanens etiamsi senex sit, & ab omni incontinentiæ suspitione immunis, debet perpetuæ castitatis votummittere in manibus Episcopi & testium, qui de eo fidem facere possint.

Quodsi vir uxoris obtento consensu Religionem profiteatur, non servatis ab uxore ceteris conditionibus, quia ipsa juvenis Monasterium non est ingressa, vel senex castitatem non voverat, professio hæc illicita est, quia facta, contra sapienter à Jure præscriptas condiciones, valida tamen erit, quia nullibi à jure irritatur.

*Quæres 7mo: An per Adulterium Matrimonium dissolvatur?*

*Resp:* Matrimonium dissolvi potest, vel quoad vinculum, vel quoad thorum. Dissolvitur quoad vinculum, quando vinculum, quo per Matrimonium erant colligati, ita abrumptur, ut non solum quoad habitationem, & thorum à se separantur, sed etiam utrique, aut saltem uni eorum liceat



ad alias convolare Nuptias. Dissolvitur tantum quoad thorum, quando remanente Matrimonii vinculo, propter quod non licet Conjugibus ad alias convolare Nuptias, à se invicem quoad habitationem & thorum separantur. Per adulterium ergo Matrimonium quoad vinculum non dissolvitur, quia rotundis verbis dixit Christus nullam apponendo exceptionem. Marci Cap: 10. *Quicumque dimiserit uxorem suam, & aliam duxerit mœchatur. Et si uxor dimiserit virum suum, & alteri nupserit mœchatur.* quoad thorum vero Matrimonium sæpius per adulterium dissolvitur. Hinc Concilium Florentinum in suo Decreto ita habet: *Quamvis ex causa fornicationis liceat thori separationem facere, non tamen aliud Matrimonium contrahere fas est.* Et hoc non solum Latinos sed & omnes Græcos spectat. Unde Benedictus 14. Papa in sua Constitutione, quæ incipit. *Etsi pastoralis*, statuit, ac Episcopis mandat: *Matrimonia inter Conjuges græcos dirimi, seu divortia, quoad vinculum, fieri nullo modo permittant, aut patiantur, & si quæ de facto præcesserunt, nulla & irrita declarent.* Orthodoxa siquidem Ecclesiæ fides est, Matrimonii vinculum per subsequens Adulterium non dissolvi, quia hoc à Concilio Florentino generali in suo Decreto definitum fuit, cui etiam Græci interfuerant, & in Armenorum instructione expositum, ac tandem in Concilio Tridentino conclusum est. Orthodoxa autem fides omnes omnino Latinos & Græcos obstringit. Et certe si uxore adulterante, rescinderetur Matrimonii vinculum, gravissima inde sequerentur absurda. Etenim mulieres libidine æstuantes adulteria ideo perpetrarent, ut dimissæ suis prociis nubere possint. Similiter improbis Maritis daretur occasio pro legitima uxore introducendi adulteram. Inde vero quot calumniarum adversus innocentem uxorem ansæ, ut hæc tamquam adultera repudiata, altera exoptatio introducatur? Et liberi quibus incommodis non essent obnoxii? Loco matris adhuc viventis educandi essent à noverca. Matrem à qua geniti sunt conspicientes, novercam oderent, & vicissim odio haberentur ab illa. Si mulier innocenter dimissa, alteri nubat, cedit hoc in prioris mariti crimen, & dedecus. Si reipsa nocens, & adultera fuit, ex perpetrato scelere commodum capit. Tandem Matrimonium ad Sacramenti dignitatem evexit Christus, ut libidinem, & concupiscentiam coerceret, sobriosque, ac temperantes redderet conjuges, quod si per Adulterium solveretur Matrimonium, illud è contra intempe-

rantia-



rantiores, effrenatioresque efficeret Sponsos. Et cum quotidianæ epulæ vilescent, minusque sapiant, posito, quod adulterio dirimatur Matrimonium, continuæ erunt Conjugiorum vicissitudines cum incredibili familiarum, animarumque detrimento, atque pernicië.

## CAPUT TERTIUM

### *De impedimentis Matrimonii.*

Matrimonii impedimenta, alia sunt *dirimentia* quæ ita impediunt Matrimonii contractum, ut si nihilominus contrahatur, nullum ac irritum sit, alia *prohibentia*: quæ quidem impediunt ne Matrimonium contrahatur, si tamen contractum fuerit, illicitum est, quia qui cum tali impedimento contrahit, peccat, attamen validum est.

Impedimenta dirimentia sunt quindecim, & his exprimuntur versibus.

Error, conditio, votum, cognatio, crimen.

Cultus disparitas, vis, ordo, ligamen, honestas,

Amens, affinis, si clandestinus, & impos.

Si mulier sit rapta, loco non reddita tuto,

Hæc facienda vetant connubia, facta retractant.

Impedimenta autem prohibentia quatuor sunt sequenti versu expressa.

Ecclesiæ vetitum, feriæ, Sponsalia, votum.

## ARTICULUS I<sup>mus</sup>

*De impedimentis erroris, conditionis, voti, vis, ordinis, & ligaminis.*

*Quæres amo: Quotuplex error in contrahendo Matrimonio contingere potest?*

*Resp:* Quadruplex: *personæ*, *conditionis*, *qualitatis*, & *fortune*. *error personæ*, quando una persona sumitur pro alia, exg. Petrus pro Joanne, Anna pro Catharina. *Conditionis*, quo quis judicatur esse liber, cum sit servus, seu mancipium. *Qualitatis*: quando quis judicatur eas habere



re qualitates, quas de facto non habet, ut quando putatur esse bonus, qui malus est. *Fortunæ*: quando quis judicatur esse dives, cum sit pauper.

*Quæres 2do: Quinam error dirimit Matrimonium?*

*Resp:* Error personæ, quicumque ille sit, Matrimonium dirimit. Quia ad Matrimonium requiritur consensus in hanc personam, cum qua Matrimonium contrahitur. Porro ubi quis circa personam errat, consensus ipsius non ordinatur ad hanc personam, cum qua Matrimonium contrahit, sed ad aliam quam mente sibi representat & præsentem esse arbitratur. Nullum ergo tunc, propter personæ errorem, est Matrimonium. Aliud esset, si quis erraret non circa personam cum qua contrahit Matrimonium, sed circa nomen illius, putans Annam nominari, quæ Catharina dicitur, quia nihil facit error nominis, quando constat de persona.

Et istiusmodi personæ error Matrimonium dirimit, quicumque ille sit, sive invincibilis, sive vincibilis, & crassus, sive procedat ab ipso contrahente, sive ab alio, qui eum decipit, sive secluso errore adhuc Matrimonium contracturus fuisset, sive non: quia in variis hisce hypothesebus semper verum est eum, qui circa personam errat, reipsa non consentire in eam, quæ ipsi ad Matrimonium proponitur & sistitur, etsi forte, si illam esse sciret, libentius in eam consentiret, quam cui sese consentire existimat. Si quis tamen ita affectus actu esset, ut velit contrahere cum persona præsentem, quæcunque ea sit, valeret tunc matrimonium, quia sufficiens adesset consensus. Error autem *qualitatis*, aut *fortunæ*, etiamsi alterius contrahentis dolus ei causam dederit, communiter non dirimit Matrimonium, quia cum eo stat consensus in personam, cum qua Matrimonium contrahitur. Fieri tamen potest, ut error fortunæ, & qualitatis limitet consensum illius, qui Matrimonium contrahit. Idque præsertim contingit. *1mo*: cum error qualitatis transit in errorem personæ, prout fit, quoties qualitas circa quam erratur, determinat personam cum qua quis intendit contrahere, eamque distinguit ac secernit ab ea, quæ ad contrahendum Matrimonium præsens sistitur, ut si quis intendens contrahere cum filia primi Præsidis, contrahat cum illa, quæ se ejusdem Præsidis filiam esse mentitur. *2do*: cum quis explicite, vel implicite intendit non contrahere, si persona cum qua contrahit, tali careat qualitate, quia tunc reipsa



reipsa non intendit ducere in Conjugem personam, quæ illa qualitate destituta est.

Sed in hac materia adeo difficili advertendum est, eum, qui personam jam antea visu cognovit, eamque absolute ducere voluit, si decipiatur putans eam esse nobilem, vel primogenitam, cum talis non sit, valide tamen cum ea contrahere, etiamsi contrahere nollet, si hanc ignobilem esse cognosceret, quia non errat circa personam, sed circa accidentia. Unde cum vagus quidam, vulgo *Awanturik* cultiori vestitu, eleganti forma, jactitabat se ex illustri familia ortum esse, & eo titulo frequens erat in domo cujusdam viri nobilis, cui erat filia jam viro matura. Placuit utrique Advena, quare ei Nuptias sponderunt, si genus suum probaret. Protulit ille ficta documenta atque testimonia, & celebratæ sunt Nuptiæ. Posthac comperta est hominis illius fallacia, quæsitum tunc est, an valeret Matrimonium? & decisum fuit illud valuisse, quia deceptio tota fuit circa qualitates personæ, nulla circa personam, quæ Puellæ cognita fuit, & in quam ipsa consensit, licet secluso dolo minime consensisset.

Verum graviter peccant, qui ut puellas nobiles, ac opulentas, sive tales sint re, sive spe, in Matrimonium ducant, aut suis amicis ducendas procurent, eorum genus, fortunam, præclaras animi dotes mendaciter exaggerant, quare ad restituendum tenentur, quia misera hac fallacia nobili, & opulentæ puellæ præripiunt id, quod erat in spe, virum scilicet habere, cujus bona, & conditio, bonis & conditioni puellæ respondeant.

Porro impedimentum erroris circa personam, est indispensabile, neque Ecclesiæ auctoritate sic contractum Matrimonium revalidari potest, quia jure naturali irritum ac invalidum est, cum ipsi desit mutus contrahentium consensus, qui ex natura Matrimonialis Contractus omnino prærequiritur, quare detecto errore, nonnisi novo mutuo Contrahentium consensu renovari & convalidari potest.

*Quæres 2tio: Quando Conditio dirimit Matrimonium?*

*Resp:* Per Conditionem quæ dirimit Matrimonium intelligitur status servitutis striete sumptæ, qualis olim erat mancipiorum conditio. Servi itaque proprie tales, sunt illi, quorum Dominus & possessor absolutum habet jus, & dominium. Alii autem vocantur Servi lato sensu, qui vel ad annua aut menstrua obsequia sunt conducti,

ope-



operas suas Domino fundi locant, atque ad excolendum ipsius agrum sese obligant, & vi hujus vel annum censum solvere, vel aliqua diurna opera præstare tenentur. Hi glebæ adscripti, apud nos kmethones, vulgo *Chlopi, Rolcy*, appellantur. Servitus ergo stricte & proprie dicta, seu status Mancipii unius ex contrahentibus, Matrimonium, si ab altero ignoretur, dirimit. Et ita statuit Innocentius 3. Cap: 4. de Conjugio Servorum. Atque id merito constitutum fuit, est enim magna inæqualitas si persona libera, ex errore Matrimonium cum mancipio contraxerit, gravisque ei irrogatur injuria. Verum conditio, & status Nostrorum kmethonum Matrimonium non dirimit, eorum siquidem conditio non est proprie dicta servitus. Unde si Nobilis ex errore ducat in Uxorem ignobilem, & ex kmethonibus progenitam, aut nobilis Puella nabat kmethoni, qui se Nobilem esse finxerat, stat Matrimonium & validum est.

*Quæres 4to: Quale votum dirimit Matrimonium?*

*Resp:* Votum in præsentem est illud, quo quis Deo continentiam, castitatemque promisit. Porro istiusmodi votum duplex est, *simplex* scilicet, & *solemne*. *Simplex* est nuda castitatis promissio Deo facta. *Solemne* est consecratio sui ipsius divino cultui cum præscriptis solemnitatibus facta, & Dei ipsius nomine ab Ecclesia acceptata, quod fit tantum in susceptione Ordinis sacri, & professione, quæ in aliqua Religione ab Ecclesia approbata valide emittitur.

Igitur votum castitatis *simplex* impedit quidem Matrimonium contrahendum, sed contractum non dirimit. Ita definivit Cælestinus Papa 3. Cap: 6. *Qui Clerici etc.* Unde qui simplicia, sive privatim, sive in Communitatibus Sæcularibus, vota emiserunt, etsi Matrimonium contrahendo graviter peccent, valide tamen illud contrahunt. Jam vero votum solum sive in Religionis professione, sive in susceptione Ordinis sacri emissum, irritat Matrimonium contractum, illudque invalidum facit. Ita decrevit Concil: Trident: Ses: 24. Can: 9. ubi sic habetur. *Si quis dixerit, Clericos in sacris Ordinibus constitutos, vel Regulares castitatem solemniter professos, posse Matrimonium contrahere, contractumque validum esse anathema sit.*

Verum in impedimento voti solemnitis Papam posse dispensare, defendunt Theologi. Quia Ecclesia potest dispensare in eo, quod est juris Ecclesiastici. Porro solennitas



mnitas voti, & illius contra Matrimonium efficacia, quod illud dirimat, est solum juris Ecclesiastici. Ergo in eo Papa nomine Ecclesiæ, cuius caput est, dispensare potest. Certe durum est improbare praxim Romanæ Sedis, quæ semper maturo consilio operatur. Et hæc tamen non semel in votis solemnibus dispensavit.

*Quæres 5to: Quis Ordo Matrimonium dirimit?*

*Resp:* Quilibet Ordo sacer, quales sunt, Subdiaconatus, Diaconatus, Presbyteratus, & eo magis Episcopatus, dirimit Matrimonium. Unde qui in istiusmodi sacris Ordinibus constituti sunt, ad contrahendum Matrimonium inhabiles sunt.

Sed & impedimentum ex sacro Ordine proveniens, est dispensabile, quia cælibatus sacris Ordinibus annexus non est juris divini, sed juris Ecclesiastici. Potest ergo in eo Ecclesia dispensare. Et id aliquando fit, cum quis ex gravi metu injuste incusso Ordines Sacros recipit, nunquam tamen dispensatio istiusmodi ei conceditur, qui Sacri Ordinis functiones ter obierit, quia Ordinationem suam ratam habuisse censetur. Aliud esset si probaretur Ordinis executionem non minus coactam fuisse, quam ipsius susceptionem. Verum qui metu gravi injuste incusso sacrum suscepit Ordinem, contra eum reclamare debet, & ad Summum Pontificem recurrere. Possunt etiam & Regulares contra vota sua reclamare, sed hæc reclamatio intra quinquennium à die professionis fieri debet. Qui autem contra vota sua reclamat, habitum regularem in Claustro portare debet, donec res examinata, ac decisa fuerit.

*Quæres 6to: Quid, & quotuplex sit vis, metus?*

*Resp:* Vis est coactio alicui, contra ejus voluntatem, inclinationemque, illata. Hæc coactio si fuerit omnimoda, & personæ prorsus reluctanti illata, erit vis absoluta. Metus est trepidatio mentis ratione periculi instantis, vel futuri. Porro metus alius est gravis, alius levis. Metus etiam incuti potest, vel à causa naturali exg. morbo, naufragio, tempestate, vel ab agente libero. Si ab agente libero, tunc vel ab eo, cum quo Matrimonium contrahitur, vel ab alio; vel directe ad extorquendum Matrimonium, vel propter alium finem. Ut si Petro alium occisuro, quo illatam sibi injuriam ulciscatur, aliquis mortem declinando, filiam suam in Conjugem appromittat. Incutitur etiam metus, vel *juste*, cum is qui metum incutit, jus ad id habet, ut si Pater ei, qui filia ipsius abusus est, comminetur se illum ad Judicium citandum, nisi ipsam du-

eat,



cat, vel *injuste* ut si Pater filiae suae stupratori mortem à se inferendam minetur, nisi ipsam in uxorem ducat.

Itaque *1mo*: Matrimonium contractum ex metu levi, etiam injuste & ad extorquendum Matrimoniale consensum, inculso, validum est, quia ex Regula 18. ff. *vani, seu levis timoris justa excusatio non est.* & quemadmodum Religiosa professio, quae spirituale connubium est, ex levi metu facta valida est, ut patet ex Cap: 1. *De his quae vi.* ita etiam & carnale connubium ex eodem metu contractum valere debet.

*2do*: Valet quoque Matrimonium initum ex metu gravi juste tamen inculso, aut inculso à causa naturali, & non libera. Unde si iudex ei, qui data Matrimonii fide Puellam vitiavit, mortem, aut tetrum quid commineatur, nisi stet suis promissis, valebit Matrimonium. Idem est si Stuprator, aut concubinaris, metu seu mortis, seu gehennae Puellam, aut concubinam in Matrimonium ducat, quam alioqui ducturus non esset. Quia metus gravis non ideo irritat Matrimonium, quasi prorsus libertatem perimeret, sed quia talem impedit liberrimam electionem, qualem Ecclesia ad Matrimonium justis de causis expostulat. Porro cum metus vel juste incutitur, vel à causa naturali prodit, istiusmodi liberrima Matrimonii electio non minuitur. Validum ergo est Matrimonium. Verum aliquando videtur metus juste esse inculsus, qui tamen inique incutitur, ut si iudex mortis metu inducat illum ad ducendam Virginem, quam vitiaverat blanditiis, non autem futuri Matrimonii promissis, eam ad crimen inducendo, cum tamen juxta leges satis foret eam dotare, aut alio modo illatam ei compensare injuriam, non vero eam in Matrimonium ducere.

*3tio*: Matrimonium ex gravi metu, injuste ad illud extorquendum inculso, contractum, est ipso jure nullum, & irritum. Ita statutum habetur titulo de Sponsalibus. Et vero Matrimonium semel valide contractum amplius dissolvi non potest, debet ergo plena securitate, & omnimoda libertate gaudere, ne mali sequantur exitus, qui de invitis Nuptiis solent evenire. Nihil vero interest an metus gravis incutiatur ab eo, qui Matrimonium inhiat, an ab alio in ejus gratiam, quia jura non tam in odium illius, qui metum injuste incutit, quam in favorem libertatis Matrimonii, nullitatem istam statuerunt. Haec autem Matrimonii libertas non minus laeditur, cum ab alio metus incutitur, quam cum ab eo, qui sibi Matrimonium desi-



desiderat. Quod si vero metus ad alium finem incutiat, non ad extorquendum Matrimonium, tunc illud valebit, sive ex tali metu, aut ejus occasione contrahatur. Sic exg. si Petrus ut mortem sibi à furibus inferendam evitet, homini illuc transeunti, ut opem sibi ferat, nuptias cum ejus filia promiserit, stabit contractum Matrimonium. Pariter si Princeps obseſus offerat Matrimonium cum filia obsidentis, ut Urbis suæ excidium avertat, valebunt Nuptiæ, nisi obsidia eum in finem injuste parata fuerint. Idem dicendum est, si quis capite damnatus, ut evadat incolumis, ducat meretricem publicam, prout in quibusdam regionibus fieri solet. Nec enim illi injicitur timor mortis, ut meretricem in uxorem ducat, sed ipse sponte illud mortem evadendi medium eligit, aut ab alio oblatum amplectitur.

*Quæres 7mo: Quæ censentur metum gravem incutere?*

*Resp:* Metum gravem incutiunt. 1mo: timor mortis, mutilationis, gravis in corpore cruciatus, torturæ, gravium verberum. 2do: timor servitutis, captivitatis, gravis exilii, carceris diuturni cum atrocibus vinculis, secus si carcer brevis sit, timor amittendi status, ac conditionis suæ. 3tio: timor gravis infamiæ, aliquando pro metu gravi reputatur, horror amittendi omnia bona, majorem illorum partem, aut aliquod ex iis in se spectabile, metum gravem incutit. Tandem timor stupri. Iste siquidem metus apud fæminas honestas aliquando major est, quam timor mortis. Attamen, si mulier, virgo, aut vidua metu stupri, quod quis actu minabatur, Nuptias promisit, & postea Matrimonium contraxit, non semper ideo invalidum erit, quia ei, postquam è scelesti viri manibus evasit, liberum erat vim sibi illatam, Parocho, aut Parentibus suis indicare. Ad invaliditatem etiam Matrimonii perinde est, an metus inferatur personæ, quæ in Matrimonium ducenda est, an alicui ex illius propinquis, Patri exg. Matri, Patruo, aut Amitæ, Fratri, vel Sorori.

*Quæres 8vo: Quid de metu reverentiali sentiendum sit?*

*Resp:* Metus reverentialis in præsentibus, est formido mali, quod aliquis sibi veretur ab iis imminere, quorum legitimæ subjacet potestati, quosque revereri tenetur. Unde filius, & filia ex metu reverentiali contrahere dicuntur, cum animo repugnante consentiunt in Matrimonium sibi à Patre oblatum, non audendo contradicere, quia verentur ne offendendo Patrem, aut alios, quibus reverentiam



tiam debent, experiantur mala, quæ ex hac occasione pro-  
dire consueverunt, attenta Parentum indole, quæ pro ge-  
niorum diversitate, diversa est, & ex personarum circum-  
stantiis ponderari debet.

Igitur metus reverentialis, seclusus à gravi commi-  
natione, à verberibus, à cohabitatione admodum difficili,  
& morosa, pro levi metu reputandus est, ac proinde non  
irritat Matrimonium. Quia talis metus non is est, qui  
virum constantem terrere queat, ab eoque vere invito  
consensum extorqueat. Equum quoque est, ut filii, ac  
filix voluntatem suam, Parentum voluntati subiciant, cum  
Parentes in rebus liberorum suorum oculatiores esse con-  
sueverunt, quam ipsimet liberi, qui cæco nonnunquam cor-  
dis impetu in Nuptias deinde sibi intolerabiles feruntur.  
Quodsi, ut aliquando fit, reverentialis metus annexas ha-  
beat minas, verbera, tractationem asperam, tunc gravis  
metus esse censeretur, quia hæc etiam virum constantem,  
& magis illum, qui ab altero dependet, cominovere pos-  
sunt. Et vero homo sensatus, & honestus quilibet, hæc  
ita gravia æstimat, ut malit relicta patria, & paterna do-  
mo exul vivere, quam ista perpeti.

Advertendum tamen est. *1mo*: minas mali etiam gra-  
vis, aliquando graves non esse, ut si ab eo prodeant, qui  
multa minari solet, & nihil vel parum exequitur. *2do*: mi-  
nas graves absque verbis consistere posse, ut si is, cui de-  
betur reverentia, solitus sit favere cum voluntati ipsius  
resistitur, tunc enim minæ, quæ verbis non exprimuntur,  
re, & actu sentiuntur. *3tio*: indignationem Patris inter  
ea censi, quæ gravem metum iniiciant, præsertim re-  
spectu puellæ, cum indignatio hæc diuturna fore prævi-  
detur, grave enim semper est præ oculis Patrem, ali-  
umve, cum quo semper vivere necesse est, habere infen-  
sum, qui verbis, & ipso silentio inobedientiam exprobet.  
Aliud est, si bona Patris indoles reconciliationem brevi  
futuram appromittat. *4to*: ad metum gravem reduci etiam  
preces importunas, eas scilicet quæ instantissimæ sunt,  
& quæ sæpius inculcatæ, cum repetitis ingratitude ex-  
probationibus, animum audientis defatigant, & sensim ex-  
cruciant.

Ceterum metus reverentialis generatim loquendo,  
in iis occurrit, qui aliquo subjectionis titulo ab aliis de-  
pendent, quales sunt plebei respectu Dominorum suorum,  
à quibus pendent; filii, ac filix respectu Patrum, sive  
Matrum, cum istæ austeræ sunt, seu etiam Avorum,  
alio-



aliorumque majorum ascendentium, qui tamquam Patres coluntur. Fatendum tamen est, hæc multum pendere à circumstantiis, ex quibus fit, ut quod gravem metum incutit uni, levem solum alteri inferat. Verum qui in foro exteriori sese ex metu ad Matrimonium contrahendum adactum fuisse contendit, graves afferre debet probationes.

*Quæres qno: Matrimonium ex gravi metu invalidum, per quid revalidatur?*

*Resp:* Matrimonium ex metu gravi invalidum, revalidatur. *1mo:* per copulam sponte, & affectu maritali habitam, hoc est animo vivendi conjugaliter. Quia ad Matrimonium ille solum deerat consensus partis metum passæ, cum igitur virtualiter perseveret consensus alterius partis, quæ non est metum passæ, & illa eum ponit, atque per copulam maritali affectu exercitam illum manifestat, Matrimonii contracti suppletur defectus, illudque revalidatur. Si vero copula non libere, sed pariter gravi metu extorqueatur, qui eam exercent graviter peccant, quia reipsa fornicaria est, & per eam Matrimonium non revalidatur. Idem est in foro conscientiæ, si copula habeatur non animo conjugali, sed fornicario, quia illa non denotat consensum Conjugalem, qui ad revalidandum Matrimonium est omnino necessarius, cum ex illius defectu contractum Matrimonium irritum fuerit. *2do:* Matrimonium ratione metus invalidum, revalidatur per cohabitationem vere, & ex animo spontaneam, quamvis non subsequatur copula carnalis. Quia cohabitatio spontanea signum est consensus, qui solum ad Matrimonii validitatem desiderabatur. Sed ad id duo requiruntur. *1mo:* ut pars metum passæ sciat Matrimonium suum, quod contraxerat, fuisse invalidum, si enim ex errore, quo illud valere credit, cohabitaret, aut etiam copulam habeat, nunquam Conjugium ratificabitur. *2do:* ut alterius Conjugis, in Matrimonio contracto exhibitus consensus perseveret, si enim revocatus fuerit, non revalidabitur Matrimonium, amborum siquidem Conjugum consensus poni debet simul, simultate videlicet si non physica saltem morali.

*Quæres 1mo: Quid est impedimentum ligaminis?*

*Resp:* Impedimentum ligaminis est illud, quod oritur ex vinculo prioris Matrimonii, sive consummati, sive solum rati, sed valide contracti. Durante itaque priori Matrimonio, aliud valide non potest contrahi. Iis igitur qui ad secundas Nuptias convolare volunt, & magis illis, qui ees in Matrimonium conjuncturi sunt, Parochis sedulo pen-



sandum est id, quod jus præscribit, ut nullus ad secundas nuptias migrare præsumat, donec ei constet, quod ab hac vita migravit conjux ejus, aut donec certum nuntium recipiat de morte compartis. Talem vero nuntium non censetur recepisse, qui solum certi sunt, maritum vel ad extremas Orbis oras transiisse, vel lethali vulnere in prælio fuisse percussum, vel qui de eo per plures annos nihil audierunt, cum aliquando contigerat ut post quadraginta tres absentiae annos Maritus ad suam uxorem redierit. Quare ita præscribit Rituale Romanum titulo 7. Cap: 1. de Matrimonii Sacramento. *Caveat Parochus ne facile ad contrahendum Matrimonium admittat, vagos & peregrinos & qui incertas habent sedes, neque item eos qui antea conjugati fuerunt, ut sunt uxores militum, vel captivorum, vel aliorum, qui peregrinantur, nisi diligenter de iis omnibus facta inquisitione, & re ad Ordinarium delata. ab eoque habita de ejusmodi Matrimonii celebrandi licentia.* Id ipsum mandat Concil: Trid: Ses: 24. de Refor: Matr: Cap: 7. Itaque ut viduus, vidua ad alias Nuptias admittantur communiter exigendum est, scriptum testimonium Parochi illius loci, in quo corpus defuncti Mariti sive uxoris, est sepultum, quod aliquando, si è Regione satis remota adferatur, ab Episcopo recognosci debet. Quodsi Miles ex eo in loco, vel eo mortis genere defunctus fuerit, in quo nec christianæ sepulturæ mandari potuerit, nec mortuorum registris inscribi, requirendum est testimonium Capitanei, vel inferioris Officiarii, si Capitaneus perierit. Neque vero testi uni, etiam oculato, & aliunde probo, mortem alterius conjugis renuntianti credendum est; cur enim in materia tanti momenti sufficere debeat testis unus, cum in alia quacunque pro nullo reputetur? Si ergo haberi nullo modo possit authenticum testimonium de morte prioris Conjugis, ex Regestris mortuorum desumptum, duo ad minus exiguntur testes, omnino probi, & fide digni, qui plenam certitudinem facere possint, sed si aliquod super fuerit dubium, quod & tunc semper subest, hoc etiam in casu, nihil proprio Marte agendum, verum judicium Episcopi exquirendum est, & mandatum ipsius exequendum. Hinc mulier quæ secundas Nuptias bona etiam fide contraxit, & certo postea discit priorem maritum suum superesse in vivis, debet ab hoc secundo viro etiam ex eo prolem suscepit, recedere & ad priorem reverti. Non censetur autem Mulier certo rescire priorem maritum suum superesse in vivis, quia id discit ex rumore solum



Solum publico, qui ut vera, sic & falsa sapius spargit, vel id accepit à testibus ignotæ fidei. Si tamen miles ex acie reversus, & qui vir bonæ indolis habetur dicat Mulieri se Maritum ejus vidisse in tali loco, debet hæc ex nunc consulto prudenti Confessario, conjugalis debiti petitionem suspendere, donec pleniorē rei notitiam acquirit, quia licet ex jure Cap: 28. de testibus, testis unus, quautacunque fuerit autoritate, plenam fidem non faciat, dubiam tamen facere videtur, & propterea debitum conjugale petere non debet. Unde cum mulier de prioris mariti vita incerta est & dubia, tunc ex decisione Innocentii 3. Cap: 44. de Sentent: Excom: distinguendum est, *utrum habeat conscientiam hujusmodi dubiam ex credulitate levi, & temeraria, an probabili, & discreta. Si animus, conscientia levis, & temerariæ credulitatis explosa, ad sui Pastoris judicium, mulier licite potest non solum redire, sed exigere debitum conjugale. Si 2dum: debitum quidem reddere potest, sed postulare non debet, ne in alterutro vel contra legem conjugii, vel contra judicium conscientiae committat offensam.* Et id merito constitutum est, quia in hoc casu dubii, mulier debitum conjugale reddendo, prudenter ex duobus malis minus eligit, Maritus siquidem quem nunc mulier habet, jus habet debitum conjugale exigendi, eo ipsum privare majus est malum, quam copula cum illo, obsequendo ejus exigentiæ, habita, quæ si peccatum fuerit propter bonam fidem, quæ tunc intervenit, materiale solum erit, non formale. Et hoc verum est, cum etiam facta sufficienti veritatis inquisitione idem perseverat dubium, quod prius erat, quia inquisitio quæ nullam affert lucem, non tollit dubium, in quo quis antea versabatur. Abstinere vero mulier in tali dubio à petendo debito conjugali debet, quia abstinendo omne devitat peccatum, debitum exigendo, voluntarie se exponit periculo peccandi. Quod si mulier suas dubitandi rationes præsentī marito suo communicaverit, ut aliquando id facere possit & debeat, cum nullum inde imminet periculum, & is pariter dubitare incipiat, vel dubitare debeat, quamvis nolit, tunc neuter potest reddere, vel petere conjugale debitum, quia neuter jus ad illud pacifice retinet. Idem à fortiori dicendum est, si uterque Conjux dubia fide Matrimonium contraxerit, possessio siquidem juris Matrimonialis, sicut & alterius cujusvis, neque mala, neque dubia fide inchoari potest.

ARTI-



## ARTICULUS 2dus

*De impedimentis cognationis, affinitatis, atque publicæ honestatis.*

*Quæres 1mo: Quotuplex cognatio?*

*Resp:* Cognatio triplex est, *carnalis* quæ dicitur consanguinitas, quasi sanguinis unitas, *spiritualis* quæ *com-paternitas* vocatur, & *legalis* quæ adoptio nuncupatur.

Cognatio carnalis, est vinculum personarum, quarum una ab alia, vel ambæ ab eodem ut à communi, ac propinquo stipite per carnalem generationem descendunt. Sic filius, filia sunt Patri, & Matri consanguinei, quia ab iis generantur, frater, soror sunt sibi quoque consanguinei, quia ab iisdem Parentibus, per carnalem generationem descendunt. Sicut autem in arbore truncus, est id, in quo rami coadunantur, ita & in consanguinitate persona, à qua aliæ descendunt, veluti filii, nepotes, est veluti stipes, in quo hi omnes unum esse censentur. Porro in consanguinitate, prout illa Matrimonium dirimit, stipes propinquus, in quo descendentes conveniunt, attenditur, non vero remotus, alioqui omnes homines essent consanguinei, cum ab uno Adam & Eva omnes procedant. Quidquid igitur ultra quartum est, id amplius non attenditur. Consanguinitas autem per carnalem generationem extenditur, sive hæc licite in legitimo Matrimonio fiat, sive extra illud illicite, opere fornicario, quia ergo illi, qui illicite procreantur, vere eundem ab ipsis sanguinem hauriunt, à quibus procreantur, vere illi consanguinei sunt. Jam vero qui ab eodem descendunt Patre *cognati*, qui ab eadem matre *agnati* dicuntur.

*Quæres 2do: Quæ in consanguinitate attendenda sunt?*

*Resp:* Ut bene intelligatur quando consanguinitas Matrimonium dirimit, tria in ea sunt consideranda, & bene secernenda, videlicet *stipes*, *linea*, & *gradus*. Et quidem *stipes* est illa persona, à qua aliæ consanguineæ originem trahunt, sive filiorum stipes est Pater, nepotum Avus. Potest autem stipes esse vel solus Pater, vel sola Mater, cum à diversis connubiis nati sunt, vel simul Pater, & Mater conjunctim, cum filii, aut filiæ ex eodem connubio progeniti sunt, nam vir & uxor cum sint una caro, unum, eundemque constituunt stipitem. *Linea* est series, seu ordo personarum, ab eodem stipite descende-



descendentium. Hæc autem linea, vel est recta, vel transversa, seu collateralis.

Linea *recta* est ordo personarum, quarum una genita est ab alia, vel immediate ut filius à Patre, vel mediate, ut nepos ab Avo. Linea *recta* alia est *ascendentium*, quando progredimur à genitis ad genitores inquirendo eorum stipitem communem, exg. Patrem, Avum, Proavum. Alia *descendentium*: cum à genitoribus regredimur ad genitos, scilicet à Patre ad filium, nepotem, pronepotem.

Linea *collateralis*, seu indirecta est series, & ordo personarum, quæ descendunt quidem ab uno communi stipite, sed à se invicem non descendunt, sic duo fratres ambo sunt ab eodem Patre, & duo consobrini, ambo sunt ab eodem avo, nec tamen à se invicem descendunt. Hæc autem collateralis linea vel est *æqualis*: cum ii, quorum cognatio inquiretur, æqualiter distant à communi stipite, ut duo fratres, vel *inæqualis*, quæ etiam *mixta* dicitur, quando consanguineorum alter minus distat à communi stipite, alter vero magis, ut frater, & alterius fratris filius.

Gradus est distantia consanguineorum tum à se invicem, tum à communi stipite. Ut vero computentur consanguinitatis gradus, tres assignantur regulæ, quarum prior spectat lineam rectam, duæ posteriores lineam transversam.

Regula *1<sup>a</sup>*: In linea recta ascendentium & descendentium, tot sunt gradus, quot personæ, dempto & non computato stipite, à quo personæ illæ immediate, vel mediate descendunt, unde quia Pater & filius duæ sunt personæ, si stipitem, qui est Pater, demas, pater & filius erunt in primo gradu consanguinitatis, quia nimirum dempto stipite una solum superest persona. Similiter avus, & nepos sunt in secundo gradu consanguinitatis, pronepos, in tertio est gradu cum proavo, & abnepos cum abavo in quarto. Idem dicendum de Matre respectu filii, vel filiæ, nepotis, vel neptis. Ratio autem hujus regulæ hæc est, quia tot sunt gradus consanguinitatis, quot generationes, quoniam unaquæque generatio removet à stipite. Porro tot sunt generationes, quot sunt personæ genitæ, dempto stipite. Stipes enim non potest gradum facere, quia & à semetipso non distat, & in consanguinitatis arbore consideratur quasi truncus, seu prima totius prosapiæ origo.

Regula *2<sup>a</sup>*: In linea collateralis, & æquali, personæ

T. II. M.

T

tot



tot gradibus distant ab invicem, quot gradibus distant à communi stipite. Sic duo fratres uno tantum gradu à se invicem distant, quia uno solum gradu distant à communi stipite, sic quoque filius unius fratris, & filia alterius fratris, quia duobus gradibus distant à communi stipite, duobus etiam gradibus distant ab invicem. Ratio est, quia Stipes communis, tota est ratio unionis sive fratrum, sive eorum, qui à fratribus originem trahunt. Ergo ii nec plus, nec minus à se invicem distare possunt, quam à communi stipite distant.

*Regula 3tia:* In linea collateralis, & inæquali, consanguinei tot gradibus distant inter se, quot gradibus distat ille eorum, qui remotior est à stipite communi. Sic: si Petrus filios habeat Joannem, & Marcum. Marcus vero filium habeat Barnabam, & Barnabas filium Simonem. Simon tribus gradibus distat à Joanne, quia totidem gradibus distat à Petro Abavo suo, qui est totius hujus consanguinitatis stipes. Ratio autem, cur in linea collateralis inæquali computentur gradus ab eo, qui remotior est à stipite, hæc afferri solet, quod illi, qui sunt in gradu à stipite remotiori, non possunt propinquiores esse ulli à collateralibus suis, quam stipiti, à quo originem ducunt, quia stipes tota est propinquitatis ratio. Porro si gradus computarentur ab eo, qui propinquior est stipiti, jam illi, qui sunt à stipite remotiores, magis essent propinqui collateralibus suis, quam ipsimet stipiti. Sic in exemplo allato, Simon tribus gradibus distaret à Petro, & uno tantum gradu à Joanne, quia Joannes ipse, uno tantum gradu, distat ab eodem Petro. Hinc Pius 5. Papa in Bulla, quæ incipit: *Sanctissimus*. anno 1596. data, *statuit, quod de cetero in quibuscumque dispensationibus consanguinitatis & affinitatis (excepto tantum primo gradu) sufficiat remotiorem solum gradum exprimere.* Vide figuram Nro 1.

Verum circa hæc notanda sunt sequentia. Imo: Regula, quæ statuit, ut in linea transversa inæquali, gradus remotior ad se trahat propinquiorem, quasdam patitur exceptiones. Si enim gradus propinquior sit gradus primus, gradus vero remotior non procedat ultra quartum gradum, subreptitia erit dispensatio obtenta sine gradus propinquioris mentione, cum in eo primo gradu Papa nunquam dispensare intendat, ut tradit Pius 5. in mox citata Bulla. Imo, ut omnis dematur scrupuli causa, solliciti esse debent, qui in gradu mixto dispensationes petunt, ut gradus propinquior semper exprimat.



2do: In gradu inæquali, cum gradum primum attingit, exprimendum semper est, qui sexus sit in gradu primo, an vir, an mulier, quia longe difficilius conceditur, ut filius Sororis vel fratris ducat in uxorem Amitam, vel Materteram, quam Patruus, vel Avunculus, Sororis vel Fratris filiam in uxorem accipiat. Quia ordini repugnare videtur, ut Amita, quæ quasi alia mater certam in Fratris sui filium, auctoritatem habere debet, eidem utpote Marito suo subiiciatur, quæ ordinis inversio locum non habet, cum Patruus, fratris, vel Sororis filiam ducit in uxorem, quia hæc inferior manet, sicut antea fuit.

3tio: In exprimendo gradu mixto semper incipiendum esse à gradu masculi, sive is sit propinquior, sive remotior. Sic relatio Materteræ ad filium fratris, dicitur à secundo ad primum, relatione vero Patruï ad filiam Sororis vel fratris, dicitur à primo ad secundum.

Porro qui circa consanguinitatem consuluntur, ne in materia tanti momenti aberrant, debent in Charta arborem consanguinitatis sibi delineare, ibique exscribere, primo stipitem communem, à quo descendunt personæ, de quibus agitur, & deinceps hinc, & inde generationes, & nomina personarum, usque ad eos, de quibus quæritur, an in gradu prohibito consanguineæ sint. Sic enim multo tutius ex regulis supra recensitis, judicari poterit, an & qua indigeant dispensatione? Ne autem moram iniiciant nomina quibus consanguineos Theologi exprimere solent, quædam minus obvia, hic apponuntur lingua vernacula, cum graduum designatione.

Itaque in primo lineæ rectæ ascendentium gradu, sunt Pater & Mater illorum, quorum consanguinitatis gradus inquiritur.

In secundo sunt: *Avus, Dziad. Avia, Baba.*

In tertio *Proavus, Pradziad, Proavia, Prababa.*

In quarto *Abavus, Prapradziad, Abavia, Praprababa.*

In primo vero ejusdem lineæ rectæ descendentium gradu, sunt filius, & filia eorum, de quorum consanguinitate agitur.

In secundo *Nepos, Wnuk, Neptis, Wnuczka.*

In tertio *Pronepos, Prawnuk, Proneptis, Prawnuczka.*

In quarto *Abnepos, Praprawnuk, Abneptis, Praprawnuczka.*

Sed & alia hic describenda sunt nomina, ne illorum significatio aliquam difficultatem ingerat. Igitur *Levir, Dziewierz, Gener, Zięć*, dicitur Maritus Filie. *Synowa*,



uxor filii, Privignus *Pasierzb* filius uxoris ex alio Matrimonio progeniti. Patruus *Stryi* Frater Patris. Matertera, *Ciotka po Matce*, est Soror Matris. Avunculus *Wuy*, frater Matris, Patruelis *Stryieczny Brat*, Filius vel filia Patruis, & filius vel filia Avunculi, *Wuieczny Brat*. Amitta *Ciotka po Oycu*. Soror Patris, Amittinus, vel Amittina, Filius, vel Filia Amittæ. Consobrinus *Wuieczny Brat*, vel Consobrina, Filius vel Filia Materteræ. Sacer, Pater Uxoris, Socrus Mater Uxoris, Vietricus *Oyczym*, Noverca *Macocha*. *Szwagier*, co *ma Siostrę Zony*.

Ex his autem personis unaquæque alias parit collaterales, personas scilicet: à Patre Petri fluunt frater & soror illius, in primo gradu ipsi collaterales, qui germani dicuntur, si sint ab eodem Patre, & Matre, consanguinei, si sint ab eodem Patre, sed à diversa Matre, uterini vero si sint ab eadem Matre, & à diverso Patre. Ab Avo sunt Patruus *Stryi*, & Amitta *Stryienka*, item Avunculus *Wuy*, & Matertera *Ciotka*, in secundo gradu Petro collaterales. A Proavo sunt Patruus magnus, & magna Amitta, Avunculus magnus, & Matertera magna, in tertio gradu collaterales. Demum ab Abavo sunt Propatruus, & Proamitta, Proavunculus, & Promatertera in quarto gradu collaterales. Jam vero à Patruo veniunt Patruelis *Stryieczny Brat*. Ab Avunculo, Sobrinus *Cioteczny Brat*.

*Quæres 3tio: Quæ Consanguineorum Matrimonia irrita, & invalida sunt?*

*Resp: amo:* Matrimonia consanguineorum in linea recta, in quolibet gradu irrita sunt, & nulla. Et id constat ex responsione Nicolai 1. Papæ ad Consulta Bulgarorum, ubi sic statuit: *Inter personas, quæ parentum, liberorumque locum inter se obtinent, nuptiæ contrahi non possunt, veluti inter patrem & filiam, vel avum, & nepotem, & usque in infinitum.* Et certe conjugia Liberorum cum Parentibus, adversantur naturali pudori, & ordinem naturæ invertunt. Is enim exigit ut Liberi semper Parentibus omni modo subjecti sint. Porro si filii matrem, vel aviam, filiæ patrem, vel avum in conjuges ducerent, iis post Matrimonium minus subjecti essent, quam antea erant, quia cum iisdem una caro effecti, eadem pene jura haberent. Unde etiam gentes omnes rationem naturalem sequentes, concubitus carnalem inter Ascendentem, & Descendentem ut valde indecentem, & nefandum reputarunt, ut patet ex *L. ult. 9. de tit. Nuptiarum ubi*

*dicitar*



dicitur: *Jure gentium incestum committit, qui ex gradu ascendentium, vel descendantium uxorem duxerit.*

Et præterea certum & indubitatum est, Matrimonia Consanguineorum, in omni gradu lineæ rectæ nulla & irrita esse jure Ecclesiastico, sed utrum etiam nulla sint jure naturali, disputant inter se Theologi. In primo quidem lineæ rectæ gradu, contractum Matrimonium jure naturali nullum esse omnes consentiunt, veluti inter Patrem & filiam, inter Matrem & filium, unde S. Ambrosius Epist: 66. ad Pater: sic præclare scribit: *Ne pater filiam suam accipiat uxorem interdictum est, iure naturæ, interdictum est lege, quæ est in cordibus singulorum, interdictum est inviolabili lege pietatis, titulo necessitatis.* Verum & in aliis posterioribus ejusdem lineæ gradibus Matrimonium jure naturali nullum esse multi ex Theologis affirmant, alii tamen id negant. Sed hoc definire parum interest, cum jure Ecclesiastico illa irrita esse indubitatum sit.

2do: Matrimonia consanguineorum in linea collateralis usque ad quartum gradum inclusive, jure Ecclesiastico nulla, & irrita sunt. Ita statutum est in Concilio Lateranensi 4to: Can 50. ubi, cum antea consanguinitas & affinitas ad septimum usque gradum extenderetur, ad quartum gradum restricta fuit: *Prohibitio copulæ conjugalis, quantum consanguinitatis, & affinitatis gradum de cetero non excedat.* An vero Matrimonia hæc in primo gradu, veluti fratris cum sorore, jure etiam naturali, vel divino invalida sint, ambigitur. Probabilius est, quod non. Quia Matrimonium fratris cum sorore initio mundi contrahébatur. Nemo autem cogitare potest Deum sic genus humanum instituisse, ut statim primi homines naturæ leges violare coacti sint. Verum nusquam Ecclesia dispensavit in istiusmodi primo collateralis consanguinitatis gradu, nec dispensabit, quia talia Matrimonia semper indecentia, ac incompetencia sunt, & vix ulla reperitur natio, quæ illa non prohibeat. Vide figuram Nro 4to.

Hic caute notandum est, posse aliquando inter easdem personas duplicem esse Consanguinitatem, & id contingit. imo Quando ex duobus Stipitibus procedunt personæ, quæ vellent inter se Matrimonium contrahere, ut si duo fratres inter se germani, cum duabus Sororibus Matrimonium contraxerint, tunc liberi ex his duobus Conjugiis nati, duplici consanguinitate erunt ligati, ex Patre scilicet & Matre seorsim, atque possunt esse in  
secun-



secundo gradu Consanguinitatis ex Patribus profluentis, & in tertio gradu consanguinitatis ex Matribus provenientis, & dicentur esse consanguinei ex duobus Stipitibus. Vide figuram Nro 2do.

2do: Quando ab uno stipite descendentes, cum prævia dispensatione inter se Matrimonium contraxerunt, ex his ergo progeniti liberi dupliciter erunt consanguinei, sic exg. Petrus, Paulus, & Joannes, fratres inter se germani ex Jacobo progeniti, ex his Paulus habita dispensatione duxit in Uxorem Neptem Joannis, Mariam, filius ex ipsis natus Franciscus, erit Annæ filiæ Petri in secundo gradu consanguinitatis ex Patre provenientis, jam vero in consanguinitate ex Matre profluente, erit in secundo & quarto gradu. Vide figuram Nro 3tio. Quando vero duplex intervenit consanguinitas, duplex etiam occurrit impedimentum, quod exprimi debet, si dispensatio petatur.

*Quæres 4to: Quid sit cognatio spiritualis?*

*Resp:* Cognatio spiritualis est conjunctio, quæ contrahitur ratione Sacramentorum Baptismi, & Confirmationis. Cum enim Baptismus sit nova quædam generatio, in qua baptisans & susceptores vicem Patrum gerunt, indecens est, ut qui baptisati sunt, aut à sacro fonte suscepti, eos in matrimonium ducant, à quibus baptisati, vel suscepti sunt. Hinc Romanus Pontifex in hoc cognationis Spiritualis impedimento difficiliter dispensat, quam in impedimento cognationis carnalis. Idem servata proportionem dicendum est, de Confirmatione, quæ quoddam est Baptismi complementum, & perfectio.

Jure antiquo late diffundebatur cognatio spiritualis, sed Tridentina Synodus volens incommodis inde emergentibus providere, Sess: 24. Cap: 4. *Statuit ut unus tantum, sive vir, sive mulier, vel ad summum unus & una, baptisatum de baptismo suscipiant, inter quos ac baptisatum ipsum, & illius patrem, ac matrem, nec non inter baptisantem, & baptisatum, baptisatque patrem, & matrem tantum, spiritualis cognatio contrahatur. Ea quoque cognatio, quæ ex Confirmatione contrahitur, confirmantem, & confirmatum, illiusque patrem, & matrem, ac tenentem, non egrediatur.* Quare ibidem sapientissime sic monet eadem sacra Synodus: *Parochus antequam ad baptismum conferendum accedat, diligenter ab iis, ad quos spectabit, sciscitetur, quem, vel quos elegerint, ut baptisatum de sacro fonte suscipiant, & eum, vel eos tantum ad illum susci-*  
pien-



piendum admittat, & in libro eorum nomina describat, doceatque eos, quam cognationem contraxerint, ne ignorantia ulla excusari valeant. Quodsi alii ultra designatos, baptisatum tetigerint, cognationem spirituales nullo pacto contrahant. Quare qui in levando de sacro fonte infante, Patrinum, aut Matrinam adjuvant, licet infantem physice tangant, nullam tamen hinc cognationem contrahunt, nisi ipsi etiam vere Patrini sint, unde ad contrahendam spirituales ex Baptismate cognationem neque requiritur, neque sufficit contactus infantis baptisati physicus. Quodsi tamen imperitus, aut timidus Parochus plures admiserit Patrinos ad tenendum unum in Baptismate infantem, omnes spirituales contrahunt cognationem, quia etsi id vetitum sit, quia omnes illi eodem modo infantem in Baptismo tanquam Patrini levant, & tenent, omnes spirituales contrahunt cognationem. Si vero à pluribus, per baptisandi Parentes, designatis, Parochus unum dumtaxat, vel unam admiserit, illi soli cognationem spirituales contrahent, quia cum ex Concilio Tridentino penes Parochum sit, illos in Patrinos admittere, quos voluerit, respiciat ii Patrini non erunt, quos ille rejecerit.

Ceterum error facti impedit, ne impedimentum cognationis spiritualis contrahatur. Quare si Pater, aut Mater propriam esse prolem ex Baptismo susceperit, ignorans propriam esse prolem, cognationem spirituales ex tali Baptismo non contrahunt. Sic statuit Alexander 3. Papa Cap: 2. de Cognat: Spirit: ubi sic ait: *Si vir, vel mulier ex ignorantia filium suum de sacro fonte susceperit, eos ignorantia excusare videtur.* Pariter qui per errorem levat de sacro fonte filium Petri, putans se levare filium Joannis, nullam contrahit spirituales cognationem, quia non intendit fungi munere Patrini, respectu filii Petri, nequit ergo ex hoc munere, aliquod cum iis contrahere vinculum. Aliud est de eo, qui baptisat filium Pauli, putans ex errore se baptisare filium Andreæ, quia baptisans tenetur velle baptisare infantem præsentem, quisque ille sit, licet ergo erret in accidente baptisati, putans esse filium Andreæ, cum sit filius Pauli, non errat tamen in substantia personæ, volens ac intendens præsentem baptisare, quicumque ille sit. Hinc etiam qui de sacro fonte suscipit Petri filium, ex errore putans filium esse Joannis, & simul ita dispositus est, quod velit levare de sacro fonte infantem indiscriminatim quicumque ille sit, spirituales contrahit cognationem. Ex quo facile intelligi-



telligitur, ad contrahendam à Patrinis spirituales cognationem, non sufficere præsentiam physicam, ut materialiter tantum Baptismo adstent, sed videtur necessaria esse præsentia moralis, ut intelligenter & humano modo Patrinorum officio perfungantur. Qua propter nec plene ebrins, nec puer minorennis materialiter solum baptismo, sine perceptione rei, præsens, spirituales non contrahet cognationem. Vide Figuram Nro 5to,

Hinc 1mo: qui infanti jam domi baptisato nomen imponunt, cum Baptismi Ceremoniæ suppleantur, nullam contrahunt cognationem spirituales, quia tunc non suscipiunt infantem de sacro fonte. Imo nec prædictam cognationem spirituales contrahunt cum baptisato Patrini illi, qui infantem de sacro fonte suscipiunt in privato baptismo extra Baptismum solemnem, quia tunc non sunt vere Patrini. Baptisans tamen etiam privatim, cum baptisato prædictam contrahit cognationem. Unde qui Baptismi Instrumenta, seu testimonia conficit, exprimere debet, infantem jam antea domi baptisatum fuisse, ut intelligatur eos, qui honoris causa eidem nomen imposuerunt, sive cum solemnitates Baptismi in Ecclesia supplebantur, adstiterunt, spirituales cognationem non contraxisse.

2do: Tutius est, ut qui infantem sub conditione baptisatum de sacro fonte susceperunt, prædictam cognationem spirituales contraxisse reputentur, quia, licetsi ad contrahendam spirituales cognationem necesse sit, ut Baptismus verus, ac validus sit, sed quia dum sub conditione confertur, de ipsius validitate dubium est, in dubio vero pars tutior tenenda est, ideo tutius, ut qui in tali baptismo infantem, veluti Patrini tenuerunt, hanc cognationem contraxisse reputentur. Idem dicendum est de iis, qui per Procuratorem infantem de sacro fonte levaverunt. Quia in Jure, qui per alium facit, per seipsum facere censetur, & ex Concilio Tridentino cognationem spirituales is contrahit, qui ad levandum de sacro fonte infantem, est destinatus. Porro non Procurator ad id est destinatus, sed ille, cujus is vices gerit. Ergo ille solum, non vero ipsius Procurator cognationem spirituales contrahit. Unde sequitur, quod si Civitas quædam infantem de sacro fonte per aliquem à se deputatum levaret, tunc singuli, qui ejusdem Civitatis corpus constituunt, cognationem spirituales contraherent. Hæc tamen opinio licet vera & communior, non est tamen indubia.



3tio: Qui in casu necessitatis infantem baptizat, veram cum eo cognationem spirituales contrahit, quia vere baptizat, & jus non distinguit inter baptisantem ex necessitate, & baptisantem sine necessitate. Si tamen Pater in casu necessitatis prolem propriam, & modo tamen legitimam baptisaret, nullam cum uxore sua cognationem contraheret. Quodsi id faceret sine necessitate, & ex malitia, ut à conjugii thoro abstinere, teneretur eidem ut antea debitum conjugale reddere, ne ex sua fraude & malitia commodum reportaret, sed idem debitum conjugale ipse ab uxore sua exigere non posset. At vero Pater, qui etiam in necessitatis casu propriam prolem ex concubina, vel alia extranea muliere susceptam baptizat, cum ea contrahit vinculum cognationis spiritualis, illamque sine dispensatione in uxorem ducere nequit, quia jus canonicum, illos solum à contrahenda ex baptismo spirituali cognatione liberos esse declarat, qui propriam legitimam prolem in casu necessitatis baptisant.

4to: hanc spirituales cognationem contrahunt ii omnes baptisati, qui Patrinorum munere in Baptismi collatione perfunguntur, quamvis ad hoc officium ex Juris dispositione admitti non deberent, veluti Religiosi, ac etiam Hæretici si baptisent, aut baptisatum de sacro fonte suscipiant, quia & ipsi Hæretici subjacent Ecclesie legibus. Si vero infidelis quispiam infantem in casu necessitatis baptiset, aut baptisatum de sacro fonte suscipiat, nullam contrahet cognationem. Idem est si fidelis baptiset filium faminae infidelis, aut de sacro fonte eum suscipiat, quare hanc, si conversa fuerit ducere poterit in uxorem sine ulla dispensatione.

5to: ultimo tandem, quoniam ex dispositione Concilii Tridentini cognatio spiritualis ex ratione Baptismi non contrahitur nisi inter Patrinos, baptisatum, baptisatque patrem, atque matrem, nec non inter baptisantem, & baptisatum, illiusque patrem, ac matrem, evidens est, inter ipsos Patrinos nullam intervenire cognationem, unde Patrinus, Matrinam in uxorem ducere potest, quia nulla inter eos ex ratione Baptismi intervenit cognatio. Verum tamen uxor, & Maritus, simul Patrini esse non debent, quod & jure canonico cautum est.

Quod autem dictum est de cognatione spirituali proveniente ex Baptismo, idem dicendum est de cognatione profluente ex Confirmationis Sacramento.

*Quæres 5to: Quid sit cognatio legalis?*

*Resp:*



*Resp:* Cognatio legalis, est ea, quæ oritur ex adoptione juxta patrias leges facta. Adoptio autem est extraneæ personæ in filium, vel nepotem, filiam, vel nepotem, assumptio, atque electio, ut sit hæres adoptantis. Potest ergo & persona consanguinea adoptari, quæ scilicet multis gradibus ab adoptante distat, tunc autem assumitur, atque eligitur, ut adoptanti facta proximior, hæres illius fiat. Adoptatus autem transit in adoptantis potestatem, instar filii naturalis, atque hæres ipsius efficitur.

Porro cognatio legalis Matrimonium dirimit. *1mo:* inter adoptantem, & adoptatum, adoptatique posteros usque ad quartum gradum inclusive. *2do:* inter adoptatum, seu adoptatam, & filios, seu filias adoptantis, sed usque dum liberi stant à potestate patria per mortem adoptantis, vel per emancipationem ab eo factam. Verum adoptio legalem cognationem pariens, jam nullibi viget. Vide fig: Nro 6to.

*Quæres 6to: Cognationis spiritualis, & legalis impedimentum estne dispensabile?*

*Resp:* Ecclesia impedimentum tum spiritualis, tum legalis cognationis relaxare potest. Quia impedimentum cognationis spiritualis, jure solum Ecclesiastico constitutum est, ab Ecclesia aliquando extendebatur, aliquando restringebatur. Justas etiam Principum circa adoptionem, atque profluentem cognationem leges, Ecclesia confirmavit. In utraque ergo cognatione spirituali, & legali Ecclesia dispensare potest. Qui autem carnaliter cognovit personam, cum qua spirituali cognatione junctus erat, si, ad illam in Uxorem ducendam, dispensationem obtinere velit, non cognationem modo, sed & admissum crimen in petitione exprimere debet.

*Quæres 7mo: Quid sit affinitas?*

*Resp:* Affinitas, est propinquitas inter certas personas orta ex copula carnali. Affinitas ergo. *1mo:* est inter certas tantummodo personas, scilicet inter Conjugatum solum, & consanguineos conjugatæ, & vicissim inter conjugatam solum, & consanguineos conjugati. Unde si Titius copulam carnalem habeat cum Bertha, ipse & quidem solus sit affinis consanguineis Berthæ, adeo: ut defuncta Bertha, non possit in Uxorem ducere matrem, filiam, neptem, imo nec cognatas Berthæ usque ad quartum gradum inclusive, si copula intra Matrimonium habita sit. Idem dicendum de Bertha respectu consanguineorum Titii. At vero consanguinei Titii, Berthæ con-



consanguineas in uxores ducere poterunt, quia ut tritum fert adagium. *Affinitas non parit affinitatem*, cujus sensus est, Titium per suam cum Berthæ carnalem copulam, sic fieri affinem consanguineis Berthæ, ut ejusdem Titii consanguinei, per hoc prædictis Berthæ consanguineis affines non reddantur. Unde Pater & filius, matrem, & filiam, duo fratres, duas sorores, vel eorum unus Matrem, alter filiam in uxores ducere possunt. Item duo consanguinei, duas inter se consanguineas ducere possunt. Hac item de causa Titius etsi Berthæ consanguineas ducere non possit, ejus tamen affines vg. Uxorem fratris Berthæ defuncti, post Berthæ mortem ducere poterit.

2do: hæc affinitas oritur ex quacunque carnali copula, in debito muliebri vase consummata, sive ex illicita quæ habetur per fornicationem, adulterium, incestum, aut sacrilegium, etiamsi hæc invitæ, vel dormienti inferatur, sive ex licita, quæ habetur in legitimi Matrimonii usu, cum hoc tamen discrimine, quod affinitas ex copula licita proveniens dirimat Matrimonium usque ad quartum gradum inclusive, quæ vero ex illicita quavis carnali copula oritur, non dirimit Matrimonium nisi ad secundum gradum inclusive, unde qui fornicarie puellam cognovit, consanguineam ejus in tertio gradu, valide & licite in uxorem ducere potest.

Quodsi Matrimonium in quo carnalis habita est copula fuerit invalidum, tunc inspicendum est, an fuerit invalidum ex mala illud contrahentium fide, quia nimirum scienter cum impedimento dirimente Matrimonium contraxerunt, vel invalidum ex inculpata illorum ignorantia. Si 1um: affinitas inde exorta, utpote quæ sit ex copula illicita non videtur transgredi secundum gradum, contraheretur tamen impedimentum publicæ honestatis ad quartum usque pertingens gradum. Si 2dum: cum affinitas illa prodierit ex copula, quæ propter bonam fidem, sine peccato exercita fuit, videtur ad quartum usque gradum extendi debere.

Ad contrahendam autem istam affinitatem requiritur copula carnalis completa, ea scilicet in qua penetratur vas muliebre, cum effusione seminis virilis intra illud. Unde non contrahit affinitatem qui licet claustra pudoris frangat, sic tamen se retrahit, ut extra vas muliebre semen suum effundat. Quoties tamen constat de habita copula, toties in exteriori foro præsumitur debita seminis effusio. Et is qui vel leviter suspicatur se peccasse cum  
fæmi-



fœmina, cujus Sororem duxit, aut ducere intendit, indiget dispensatione, quam nisi obtinuerit filii ejus pro illegitimis in foro Ecclesiæ reputantur. Ceterum ad contrahendam affinitatem nihil interest, an habita carnalis copula occulta sit, an notoria, ex utraque enim impedimentum affinitatis exurgit.

*Quæres 8vo: Ut sciatur quo in gradu sit affinitas, quæ advertenda sunt?*

*Resp:* Ut cognoscatur quo in gradu duæ personæ sibi sint affines, in affinitate pariter, sicut & in consanguinitate tria distingui debent, stipes, linea, & gradus. *Stipes* sunt duæ personæ, quæ se carnaliter cognoverunt, quæque cum una caro per carnalem copulam evaserint, principium sunt affinitatis, sicut Pater, & Mater sunt principium consanguinitatis. *Linea* est series personarum, quæ sibi sunt affines. Et hæc, sicut in consanguinitate, ita & in affinitate duplex est, recta scilicet, & transversa. Affines in linea recta ii sunt, qui in eadem linea consanguinei sunt uni ex personis, quæ copulam secum carnalem habuerunt. Affines vero in linea transversa dicuntur, qui in linea transversa iisdem personis consanguinei sunt. Unde Petro, qui Bertham duxit, affinis est in primo Ascendentium gradu Mater Berthæ, in primo vero descendentium gradu filia ejusdem Berthæ, ex alio Matrimonio progenita. In linea vero transversa affines Petro sunt, tum soror Berthæ, ejusdemque Sororis filia, tum aliæ ejusdem consanguineæ. Hæc ergo regula tenenda est: *Persona quælibet in eo gradu est affinis ei, qui copulam habuit, cum consanguinea illius, in quo ipsa huic consanguinea est, seu. Quo gradu aliquis est consanguineus uni copulatorum, eodem gradu est affinis alteri.* Sic consanguinea uxoris in primo & secundo gradu, & vicissim consanguineus mariti in primo, vel secundo gradu affinis est uxori, vel marito in iisdem gradibus. Hinc Petrus qui Bertham in uxorem duxit, affinis est in primo gradu Matri, & Sorori ejus, quia Mater, & Soror Berthæ, sunt ei consanguineæ in primo gradu, in secundo autem gradu affines sunt eidem Petro, filia Sororis Berthæ, item consobrina ipsius in tertio gradu, quia in iisdem gradibus sunt consanguineæ Berthæ.

Porro sicut in Consanguinitate gradus mixtus ex primo & quinto, non inducit impedimentum, sic nec inducit in affinitate orta ex copula licita. Unde etiam affinitas ex copula illicita proveniens, nihil efficit in gradu pri-



primo & tertio, quia in hisce materiis gradus prohibitus non computatur, cum dicit ordinem ad gradum minime prohibitum. Vide fig: Nro 7mo & 8vo.

*Quæres 9no: Quos effectus parit affinitas, Matrimonio jam contracto superveniens, ut si Titius peccet cum Sorore, aut Nepte uxoris suæ?*

*Resp:* Per talem supervenientem affinitatem non dissolvitur Matrimonium, quod cum legitime contractum, consummatum fuerit, sola morte solvitur, sed ex ea id consequitur, ut qui peccavit cum uxoris suæ consanguinea in primo, vel secundo gradu, licet eidem uxori, quæ jure suo privari non meruit, debitum conjugale reddere debeat, non tamen illud exigere possit, nisi obtenta dispensatione. Quodsi uterque conjux, cum alterius consanguineis peccaverit, vel alter de alterius consensu id fecerit, jam neuter habet jus exigendi debiti conjugalis, quia leges jus illud parti solum innocenti conservant, in hoc vero casu neutra pars est innocens. Si tamen uterque Conjux ex intentione cum affinibus suis coeat, ut alterum Conjugem debito conjugali defraudet, tenebitur debitum hoc alteri petenti reddere, non vero petere, quia cum nemini fraus sua prodelse possit, neminem etiam à prædicto onere reddendi conjugalis debiti, eximere potest.

Porro ille solus incestus privat jure petendi conjugalis debiti, qui formalis, hoc est vere peccaminosus fuerit, non vero ille qui materialis solum exstitit, & sine peccato contigit. Unde qui ratus ad uxorem suam se accedere, ad ejus consanguineam accessit, & rem carnalem cum ea habuit, non privatur suo jure quod habet ad suam uxorem, quia incestus illius non fuit formaliter peccaminosus. Non desinit tamen contrahere affinitatem, quæ tunc in eo nihil efficit. Idem dicendum de muliere per vim ab affine suo oppressa, secus si libidini ejus ex gravi etiam mortis metu cesserit, quia mori potius debuit, quam inique sædari, & ideo poterit ei maritus debitum conjugale negare.

*Quæres 10mo: Quo jure affinitas dirimit Matrimonium?*

*Resp:* Affinitas ex copula sive licita, sive illicita proveniens, nequidem in primo gradu lineæ rectæ Matrimonium jure naturali dirimit, sed solum jure Ecclesiastico. Unde si infideles ante baptismum in tali affinitatis gradu Matrimonium contraxerint, & postea ad fidem catholicam convertantur, non sunt ab invicem separandi: Nunquam



quam tamen conceditur dispensatio in primo affinitatis gradu ex copula licita provenientis, non defectu potestatis, sed defectu justæ causæ id exigentis, ad id enim requiruntur tam graves causæ, ut nunquam occurrant. Quia vero minus urgentes sufficiunt ad dispensandum, dum eadem affinitas exoritur ex copula illicita, etiam in primo talis affinitatis gradu non nunquam dispensationes conceduntur.

Magis autem affinitas in omni lineæ transversæ gradu, non jure naturali sed Ecclesiastico solum Matrimonium dirimit, unde est dispensabile. Et reipsa multi Romani Pontifices his in gradibus dispensarunt.

*Dices amo:* S. Joannes Baptista Herodem increpavit, quod haberet uxorem fratris sui Philippi. *zdo:* Paulus Apostolus I. Corinth: Cap: 5. ait, habere uxorem patris sui, esse crimen quale neq inter Gentes extiterit, ac proinde juri naturali contrarium erat?

*Resp: ad amum:* Lege Moysaica tantum erat, ne frater, uxorem fratris sui defuncti, si ipse liberos post se reliquisset, duceret. Herodes vero licetsi alienigena, Judaicam tamen religionem profitebatur, ejusque legibus subiectus erat, cumque Philippus Herodis frater liberos de uxore sua Herodiade suscepisset, ac imprimis illam salatricem, cujus petulantia concelsum fuerat caput Joannis Baptistæ, etsi Philippus supponatur mortuus fuisse, non poterat Herodes juxta Moysaicas leges superstitem ipsius ducere uxorem. Non ergo hic jus naturale impedimento erat, sed lex tantum Moysis, hæc autem cum jam abrogata sit, nullam vim habet. Verum pene omnes post Josephum Antiquitatum Judaicarum Scriptorem, & S. Hieronymum affirmant, Philippum tunc adhuc vixisse, eo igitur vivente, non poterat Herodes uxorem ipsius apud se habere, quod & nunc verum est, cum id jus naturæ & divinum prohibeat.

*Ad zdum:* Flagitiosus Corinthius incestui adulterium inauditum miscuit. Patris siquidem sui adhuc viventis uxorem habebat, atque cum ea impudice copulabatur. Ita pene omnes sentiunt Sacræ Scripturæ interpretes. Certe Apostolorum etiam tempore moris erat apud Gentes, ut filius mortuo Patre, suam Novercam in Matrimonium duceret. Non ergo hoc dicit Apostolus crimen fuisse inter Gentes inauditum, sed hoc quod Patris sui viventis uxori, filius sceleste copulabatur.

*Quæ*



*Quæres xmo: Quid sit impedimentum publicæ honestatis?*

*Resp:* Est propinquitas apparens certas inter personas orta, sive ex Matrimonio solum rato, & non consummato, sive ex Sponsalibus. Quia qui Sponsalia, aut Matrimonium cum aliquâ persona contrahit, eo ipso, etiam ante illius consummationem, certam contrahit connexionem cum ipsius consanguineis, vi cuius indecens videtur, ut eisdem quasi plane extraneos in Matrimonium ducat. Oritur ergo hoc impedimentum tum ex Matrimonio etiam solum rato, & non consummato, tum ex Sponsalibus.

Porro impedimentum publicæ honestatis inter certas tantummodo personas contrahitur. Namque *xmo:* publica honestas ad consanguineos solum extenditur, non ad affines. Unde desponsatus vulgo (Zareczony) post desponsatæ Berthæ mortem, posset ducere, nec quidem Berthæ Sororem etiam spuriam, quæ eidem consanguineæ sunt, sed viduam fratris Berthæ, quia hæc ipsi affinis solum est, non autem consanguinea. *zdo:* nec extenditur ad consanguineos omnes, sed ad eos tantum, qui sunt in lineæ rectæ primo gradu, si sit ex Sponsalibus, & ad quartum utriusque lineæ gradum, si sit ex Matrimonio. Unde si quis postquam Sponsalia contraxit cum Mathilde, Matrimonium contrahat cum ejus Matre, aut Sorore, aut filia, invalide contrahet. At valide contrahet cum Mathildis Avia, aut cum filia filiæ, vel sororis ejus, & à fortiori cum ceteris ejusdem consanguineis, nisi Sponsalia hæc, Matrimonium subsecutum fuerit. Vide Fig: Nro 9no & 10mo.

*Quæres xmo: Qualia debent esse Sponsalia, ut ex illis impedimentum publicæ honestatis oriatur?*

*Resp:* Ut ex Sponsalibus oriatur impedimentum publicæ honestatis, Sponsalia debent esse. *xmo:* valida, ubi vero Sponsalia, quacunque ratione, valida non fuerint, impedimentum publicæ honestatis ex iis non exurgit. Ita statuit Concil: Trident: Ses: 24. de Refor: Matrim: Cap: 3. Hinc si aliquis quocunque impedimento perpetuo Matrimonium dirimente, vel impediante constrictus, Sponsalia contrahat, mulier illa, rei veritate detecta, poterit ejus consanguineis nubere, quia illa Sponsalia nulla fuerunt. Et hoc verum est, licetsi impedimentum istud occultum sit exg. votum perpetuæ castitatis, nec in foro exteriori probari possit, unde Sponsalia exterius videbuntur valida, interius reipsa invalida. Cum enim Concilium

Tri-



Tridentinum statuerit ex Sponsalibus quacunque ratione invalidis, impedimentum publicæ honestatis non oriri, Sponsalia istiusmodi licet exterius appareant esse valida, reipsa tamen, & interius propter impedimentum occultum, nulla & invalida sunt. Non ergo pariunt impedimentum publicæ honestatis. Ex validis itaque tantummodo Sponsalibus istiusmodi exoritur impedimentum. Quare si Joannes Sponsalia valida contraxerit cum Bertha, & postea vel alia Sponsalia, vel etiam Matrimonium contrahat cum Maria ejus Sorore, ante secundi hujus Matrimonii consummationem, poterit prius desponsatam ducere Bertham, quia nec secunda Sponsalia, cum Maria inita, utpote invalida, possunt parere impedimentum publicæ honestatis, & Matrimonium cum prædicta Maria contractum, quod propter impedimentum publicæ honestatis, ex primis cum Bertha initis Sponsalibus, nullum est, impedire nequit, quin Joannes promissionem Berthæ factam adimplere teneatur. Si tamen Joannes cum Maria licet invalide contractum inique consummaverit Matrimonium, tunc neutram ducere poterit. Non Mariam ob publicæ honestatis impedimentum. Non Bertham ob impedimentum affinitatis consurgens ex carnali copula, quam habuit sub prætextu Matrimonii cum Sorore illius Maria. Unde affinitas agit retro, & præcedentia Sponsalia dissolvit, ipsa vero Sponsalia, & contractum etiam, sed nulliter Matrimonium, sine subsequente illius consummatione non retro agunt, nec valent ad dissolvenda præcedentia Sponsalia. Quare si Titius contraxerit Sponsalia cum fæmina, quam duxit frater ipsius, sed illam maritaliter non cognovit, Titius ipsam ducere poterit, quia Matrimonium à fratre ipsius cum ea initum irritum est, ac proinde præviis Titii Sponsalibus præjudicare non poterit. Pari de causa si Titius ante Sponsalia, quæ cum Catharina contraxit ejus Sororem carnaliter cognovisset, posset istam ducere, quia Sponsalia cum Catharina invalida fuerunt, ob affinitatem ex prævia carnali copula cum ipsius Sorore habita, non posset vero ob eandem affinitatem cum Catharina ipsa contrahere.

2do: Sponsalia hæc debent esse absoluta. Unde, qui Sponsalia cum muliere sub conditione contraxit, si ante conditionis eventum, cum alia prioris consanguinea Matrimonium ipsum inierit, cum secunda remanere debebit. Ita decrevit Bonifacius 8. Cap: Unico de Sponsal: si tamen Petrus exg. post contracta conditionate Sponsalia cum

Ber-



Bertha, alia item Sponsalia, sed absolute cum ejus Sorore ineat, debet is Bertham ducere, non ejus Sororem. Posteriora enim Sponsalia non possunt inducere obligationem inique agendi, inique autem ageret, qui Matrimonium cum Sorore Berthæ contraheret, quia priora Sponsalia cum ipsa contracta, obligant ad expectandum conditionis eventum, ante quem non licet sponso à facta promissione se retrahere. Verum si nihilominus prædictus Petrus, rejecta Bertha, cum ipsius Sorore Matrimonium inierit, illud valebit, quia ex Bonifacii statuto, Sponsalia sub conditione contracta, tunc solum publicæ honestatis impedimentum inducunt, cum purificate conditione, è conditionatis fiunt absoluta.

*3tio:* non tamen debent esse publica, coram testibus contracta, aut à Parocho benedicta, ut in quibusdam Regionibus in usu positum est, sed ad inducendum impedimentum publicæ honestatis, sufficiunt Sponsalia privatim, & clandestine contracta, quia ante Concilium Tridentinum istiusmodi Sponsalia, & ipsa etiam Matrimonia clandestina valebant. Porro circa Sponsalia nihil prædictum Concilium innovavit. Ergo sicut antea clandestina Sponsalia valebant; atque impedimentum honestatis inducebant, ita & nunc. Atque sic decrevit Congregatio Concilii Tridentini: interpretes. Et quamvis in nonnullis Diocesisibus, sicut apud nos in Kijoviensi statutum sit, ut Sponsalia coram testibus contrahantur, & à Sacerdote benedicantur, nihilominus si privatim & clandestine contrahantur, valida sunt, & impedimentum publicæ honestatis inducunt. Unde si quis solus puellæ alicui reciprocam futuri Matrimonii dedisset fidem, & postea Sororem ipsius in Uxorem duxisset, dispensationem petere debet.

Est autem perpetuum istiusmodi publicæ honestatis impedimentum, quamvis ex solis etiam oriatur Sponsalibus. Unde si Sponsa, vel Sponsus moriatur, Religionem ingrediatur, manet hoc impedimentum, & Sponsus consanguineas Sponsæ ducere nequit, nec Sponsa consanguineis Sponsi nubere valet. Idem est si Sponsalia, sive mutuo Partium consensu, sive per Judicis Ecclesiastici sententiam, dissolvantur. Quia ex semel valide contractis Sponsalibus proveniens publicæ honestatis impedimentum, perpetuum est, & sola tollitur dispensatione.

*Quæres 4tio:* Unde præterea oritur impedimentum publicæ honestatis?

*Resp:* Impedimentum publicæ honestatis oritur partem  
T. II. M. U tere.



terea, ex Matrimonio rato, quamvis consummatum non fuerit. Idque definitum est Cap: 4. & 8. de Sponsalibus. Et vero si Sponsalia sola, quæ sunt nonnisi præparatio ad Matrimonium, inducunt impedimentum honestatis, multo magis illud inducit ipsum contractum Matrimonium, quamvis non fuerit consummatum.

Hic tamen notanda sunt *xmo*: impedimentum publicæ honestatis ex Matrimonio rato proveniens extendi ad quartum usque gradum inclusive utriusque lineæ, rectæ scilicet, & collateralis. Ita declaravit Pius 5. Papa anno 1588. in Bulla quæ incipit *Ad Romanum*. *zdo*: Licet ex Sponsalibus invalidis non exurgat impedimentum publicæ honestatis, illud tamen exurgere ex Matrimonio invalido, modo invalidum non sit ex defectu consensus, quale esset si quis ex gravi metu coactus Matrimonium iniret. Sic decrevit Bonifacius 8. Hinc si Matrimonium Titii cum Bertha invalidum fuerit, propter aliquod aliud impedimentum dirimens, etiam ipsis incognitum, Titius nullam ex consanguineis Berthæ, intra quartum gradum ducere, poterit in uxorem.

Duo autem præterea addi debent. *xmo*: Cum impedimentum publicæ honestatis solo jure Ecclesiastico introductum sit, & est ab Ecclesia dispensabile & Infideles eidem non subjacent. *zdo*: Qui cum impedimento consanguinitatis, affinitatis, aut etiam publicæ honestatis: intra gradus prohibitos, scienter Matrimonium contrahere præsumpserit, separetur ab ea quam duxit, & spe consequendæ dispensationis careat, idque in eo multo magis locum habeat, qui non tantum matrimonium contrahere, sed etiam consummare ausus fuerit. Quod si ignoranter id fecerit, si quidem solemnitates requisitas in contrahendo Matrimonio neglexerit, eisdem subijciatur pænis. Si vero solemnitatibus adhibitis, impedimentum aliquod postea subesse cognoscatur, cujus ille probabilem ignorantiam habuit, tunc facilius cum eo dispensari poterit. In contrahendis autem Matrimoniis, vel nulla omnino detur dispensatio, vel raro, idque ex causa, & gratis concedatur. In secundo gradu nunquam dispensetur, nisi inter magnos Principes, & ob publicam causam.



ARTICULUS 3<sup>tius</sup>*De reliquis Matrimonium dirimentibus impedimentis.**Quæres amo: Quid sit impedimentum criminis?*

*Resp:* Per impedimentum criminis illud hic intelligitur, quod nascitur ex adulterii, aut homicidii criminibus, vel seorsim sumptis vel ex utroque conjunctim, ac denique ex Matrimonio nulliter attentato. Ratio autem hujus impedimenti hæc est, ne scilicet, propter futuri Matrimonii conceptam epem, adulteria multiplicentur, & audentandæ conjugum mortis, præbeatur. Hæc vero crimina in quatuor casibus Matrimonium dirimunt. Et quidem primo cum quis adulterium committit, & adulteræ promittit se ipsam post mortem mariti ipsius in uxorem ducturum esse. Ita Innocentius 3. Papa Cap: 6. *De eo qui duxit, quam polluit.* Unde neque sola Matrimonii promissio impedimentum criminis parit, nisi accedat adulterium, neque solum adulterium, nisi accedat futuri matrimonii promissio. Istiusmodi autem promissio irrita est, quia præbet locum, & facit exoptare mortem alterius.

Ut autem futuri Matrimonii promissio adulterio conjuncta, impedimentum dirimens inducat, quatuor requiruntur *amo:* ut ab altero complice acceptetur saltem implicite, id est, si non per verba, saltem per exteriora signa; quia promissio sine acceptatione nullius est momenti, & censetur mera esse pollicitatio. *2do:* Ut promissio etiam acceptata ante adulterium non revocetur, quia promissio revocata non magis valet, quam si facta non fuisset. *3tio:* Ut adulterium cui adjungitur promissio, sit ex utraque parte formale, hoc est ut uterque adulter, & suum, & alterius noverit conjugium, unde non sufficit, ut uterque sciat se Matrimonii vinculo esse ligatum, si neuter alterius Matrimoniale statum cognoscat, putans illum esse liberum. Unde qui vivente Uxore, quam bona fide credit esse mortuam, fæminæ, quæ vel libera est, vel libera existimatur, nuptias spondet, sub spe obtinendi ab ipsa carnalis coitus, nihil contrahit impedimenti. Ast ea solum ignorantia in præsentem excusat, quæ in aliis materiis excusaret, id est, quæ crassa non fuerit. *4to:* Ut adulterium sit consummatum. Sed ut adulterium sit consummatum sufficit sola, citra seminis effusionem, fæminæ vasis penetratio, quia per novum extra muliebrem vas effundendi



dendi seminis peccatum, facile eluderentur Ecclesiæ Canonēs.

Verum ut eadem Matrimonii promissio adulterio juncta, pariat criminis impedimentum, non est necesse *amo*: ut sit sincera, quia sufficit etiam ficta, quæ seria existimatur, æque enim & ipsa ad committendum adulterium, aut etiam ad perpetrandum Conjugis homicidium impellit, ac si vera esset.

*zdo*: Neque etiam requiritur ut sit absoluta, sed sufficit conditionalis. Unde si quis commisso cum Bertha adulterio, eidem post mortem ipsius mariti Matrimonium sponderit, ea tamen conditione, ut Bertha mille aureos in dotem secum adferat, ex hac promissione quantumvis conditionata, nascetur impedimentum dirimens, sive Bertha conditionem impleat, sive non, quia ut talis promissio Matrimonium dirimat, non est necesse ut valida sit, cum nunquam valida esse possit, aliunde vero ipsa vel ad mortem Conjugis, vel ad iterandum adulterium potenter excitat, hoc autem Leges cavere voluerunt, cum istud impedimentum constituerunt. Imo etiam si adjecta promissioni conditio esset impossibilis, aut contra Matrimonii substantiam, nihilominus hoc contraheretur impedimentum. Secus dicendum est, si alter adulter, ex ipsa conditionis appositione, sentiret & perspiceret, promissionem non serio, sed mendaciter fieri.

*ztio*: Nihil etiam refert, an promissio adulterium præcedat, an sequatur. Ex meliori tamen Theologorum sententia, debent adulterium, & promissio futuri Matrimonii, concurrere durante eodem conjugio, & tunc exurgit impedimentum criminis, etiamsi vir & legitima ipsius uxor separatim quoad thorum ex divortio vivant, vel nunquam etiam secum cohabitaverint, ac proinde ratum nonnisi, non vero consummatum eorum fuerit Matrimonium.

*Secundo*: impedimentum criminis exurgit inter eos, qui legitimo Matrimonio nunc adhuc conjuncti, novum scienter contrahere attentant. Ii enim neque secum invicem habitare possunt, quia posterius Matrimonium nullum est, neque etiam post legitimi conjugis mortem simul coniungi possunt, ut patet ex totius Ecclesiæ consensu. Sed ad hoc impedimentum contrahendum necesse est. *amo*: Ut secundum hoc attentatum Matrimonium vivente legitime Coniuge, consummatum fuerit, aut illud adulterium formale præcedat. Si enim vel nunquam, vel nonnisi post  
legi-



legitimæ uxoris mortem consummatum sit, neque adulterium illud præcelsit, quamvis utrique pænitentia gravis injungenda sit, non est tamen Matrimonium dirimendum, quod post mortem legitimi Conjugis secum contraxerunt. 2do: Necesse est, ut quæ tale Matrimonium cum adultero contrahere attentaverat, illius statum Matrimoniale sciatur, alioqui enim si eum Matrimonio ligatum esse ignoravit, cum eo, postquam morte conjugis suæ solutus fuerit, contrahere potest. Ita definit Innocentius 3. Cap: 7. *De eo, qui duxit, quam polluit.* Imo non solum inter eos verum deinceps potest consistere Matrimonium, sed & adulter talis, post suæ legitimæ uxoris mortem illam ducere tenetur, quam sui status matrimonialis insciam carnaliter cognovit, si ei Matrimonium sponderit, aut etiam contrahere attentaverit. Si tamen quæ bona fide cum adultero contraxerat, rescito illius conjugali statu, cum eodem maritaliter vivere pergat, jam impedimentum criminis contrahit, & cum ipso deinceps legitimo Matrimonio conjungi nequit. 3tio: Necesse est, ut prius Matrimonium validum fuerit, quia alias non interveniet verum adulterium. Nihil autem interest an secundum hoc Matrimonium, quod attentatum est, in facie Ecclesiæ contractum fuerit, aut clandestine initum, cum videlicet, ut per hujusmodi Matrimonium impedimentum criminis contrahatur, non requiritur, ut sit validum, quia propter impedimentum ligaminis nunquam valere potest.

Hinc satis frequens resolvitur casus. Petrus à Matrimonii vinculo liber, Catharinam maritaliter abduxit, cum ea turpiter conversatus, tandem longe profectus cum ea Matrimonium iniiit, & maritaliter vixit. Is postea rescivit legitimum Catharinæ Maritum mortuum esse, talis sine dispensatione nec licite, nec valide potest cum prædicta Catharina Matrimonium contrahere, quia inter eos adest impedimentum criminis, Matrimonium dirimens. Pariter Paulus uxoratus, qui relicta legitima uxore sua, Annam, hujus rei consciam, secum duxit, & peregre profectus, ac turpiter conversatus, Matrimonium cum ea contraxit; is neque cum illa vivere, neque post mortem suæ Conjugis eam in uxorem ducere poterit. Hic enim intervenit impedimentum criminis, propter quod, inter eos Matrimonium subsistere nequit. Quodsi etiam Petrus, & Paulus in prædictis casibus Matrimonium contrahere non tentaverint, si inter ipsos, & abductas mulieres,



res, ut vulgo dicitur, *na wierze żyje* promissio futuri Matrimonii intervenerat, quam intervenisse omnino supponendum est, cum spe futuri Matrimonii illæ abductæ sint, ex perpetratis adulteriis, & facta futuri Matrimonii appromissione, iterum exurgit impedimentum Criminis, propter quod, etiam demortuis legitimis Conjugibus, simul jungi nequeunt.

*Tertio:* impedimentum criminis contrahitur per conjugicidium, aliquando sine adulterio, aliquando nonnisi cum adulterio.

Ut vero conjugicidium sine adulterio impedimentum criminis inducat, requiritur, ut homicidium vel ab utroque eorum, qui Matrimonium inter se contrahere conspirant, vel saltem ab uno, de alterius consensu peractum fuerit, & quidem cum intentione saltem in uno, ducendi in Conjugem complicem suum. Ut vero conjugicidium adulterio adjunctum, idem impedimentum pariat, sufficit, ut adulterorum alter vel propriam uxorem, vel mulieris quam intendit ducere maritum interficiat, etiam absque partis alterius adulterantis ulla participatione. Id colligitur ex toto titulo: *De eo qui ducit in Matrimonium eam, quam polluit.*

Hic tamen multa sunt annotanda. Et quidem *1mo:* ut impedimentum ex conjugicidio contrahatur, non requiritur vel futuri matrimonii promissio, vel ut utraque pars sit Christiana, quare si mulier christiana occidat Virum suum, ut Judæo, vel Gentili ad fidem convertendo nubat, irritum erit matrimonium. Neque etiam necesse est, ut vir uxorem physice occidat, sed satis est, ut moraliter, consilio nempe, mandato mortem ipsius procuret. Haud tamen sufficeret rati habitio, illa enim impedimentum non induceret. Quod si etiam quis consilio, vel mandato suo nihil influxerit in conjugis mortem, puta quia ille cui consilium, aut mandatum dedit, jam ex se satis ad inferendam ei necem determinatus erat, nihil ille contrahet impedimenti. Idem dicendum: si mors de facto subsecuta non fuerit, aut nonnisi ex medici, vel Chirurgi incertia subsecuta est. Nihil quoque interest, sive uxor virum, sive vir uxorem necet, quia in jure irritum dicitur Matrimonium, cum alteruter Conjugum occiditur, sive vir ab uxore, sive uxor à marito.

*2do:* Ex solo homicidio, cum sine conspiratione paritum contrahere secum volentium, peractum est, non contrahitur impedimentum criminis, nisi adulterium præcedat



dat mortem alterius Conjugis. Unde si Petrus ut ducat Bertam, cum qua nondum peccavit, lentum uxori suæ venenum propinavit, & nonnisi post mortem illius, Berham carnaliter cognovit, nihil inter utrumque erit impedimenti, posito quod Bertha, in mortem uxoris Petri non conspiraverit, quia tunc deesset adulterium, quod, cum deest mutua in mortem Conjugis conspiratio, ad inducendum ex homicidio impedimentum, requiritur. Et id verum est, etiamsi Bertha eidem Petro Nuptias promississet, quia nullus est juris textus, qui solam matrimonii promissionem, cum machinatione unius tantum, absque adulterio, ad inducendum criminis impedimentum sufficere statuatur.

3tio: Ad inducendum criminis impedimentum, requiritur, ut qui Sponsi alterius mortem procurat, velit Matrimonium cum altero superstite Conjuge contrahere, & hac intentione scelus illud perpetret, quia impedimentum hoc ideo inductum fuit, ne conjux conjugem enecet, quatenus sic soluto Matrimonio, novas cum persona, quam omnino concupiscit, Nuptias contrahat, hæc autem ratio locum non habet, quoties conjugis occisio non eo tendit, neque eo animo perpetrata est, ut Matrimonium cum superstite Conjuge contrahatur. Unde nullus est huic impedimento locus, si Conjux & adulter communi consilio alium conjugem interficiant, non ut Matrimonium inter se ineant, sed ut liberius libidini vacent, vel ut mortem alterutri, à viro adulterii impatiente inferendam, præveniant, vel tandem ut ineant Matrimonium, at non cum complice adulterii, sed cum alia persona. Sufficit tamen ut eorum, qui mortem alterius conjugis procurant, unus matrimonium intendat cum superstite Conjuge, quia committitur conjugicidium cum animo contrahendi nuptias, Nullibi vero in jure decernitur necessariam hic esse istam, in utroque complice intentionem.

4to: Quando unus solum conjugis mortem machinatus est, adulterium tunc non parit impedimentum dirimens, nisi utrique Nuptias contracturo notum fuerat, quia tunc non est adulterium utrinque formale, quale esse debet, ut istud inducat impedimentum. Qua etiam de causa, secluso adulterio homicidium alterius conjugis, utroque Nuptias contracturo notum, & acceptum esse debet. Quare si Petrus absque prævio adulterio interficiat maritum alterius mulieris, ut eam in uxorem ducat, vali-



validum inter utrumque iniri poterit matrimonium, quia illud nullibi legibus prohibetur.

5to: Denique impedimentum criminis contrahitur, etiam si adulteri, aut conjugicidæ ignorent illud ex tali crimine pullulare. Quia ut impedimenta matrimonium dirimentia, aut etiam prohibentia, ab Ecclesia constituta, contrahantur, nullibi in jure notitia eorum requiritur.

Ut vero hæc omnia facilius memoria retineantur, paucis contrahuntur.

1mo: Itaque impedimentum criminis quadrupliciter contrahitur, scilicet ex adulterio sine matrimonio attentato, ex adulterio una cum pseudomatrimonio, ex solo homicidio, ex homicidio cum adulterio,

2do: Ut impedimentum criminis contrahatur ex adulterio sine attentatione matrimonii, requiritur, ut adulterio formali jungatur, sive ante, sive post carnalem coitum, promissio acceptata de matrimonio cum parte adultera ineundo, post mortem ejus Conjugis, & hic promissio sufficit etiam ficta, etiam conditionata, etiam turpis.

3tio: Ut ex adulterio, quod pseudomatrimonio conjunctum est, nascatur impedimentum criminis, requiritur, & sufficit ut sciatur priorem legitimum Conjugem vivere.

4to: Ut impedimentum exurgat ex homicidio solo, requiritur machinatio utriusque, vel saltem unius cum consensu alterius. Sufficit vero ut mors de facto sequatur ex actione physica, vel morali conspirantium.

5to: Ut impedimentum criminis ex conjugicidio simul & adulterio exurgat, non requiritur ut ambæ partes ad homicidium illud concurrant, sed sufficit ut earum una homicidium physice, aut moraliter efficiat eo fine, ut cum adultero & superstite Coniuge matrimonium contrahat.

Quoniam vero istud impedimentum criminis, tum ad consulendum vitæ Conjugum, tum ad avertenda nefaria adulteria, ab Ecclesia constitutum fuerit, evidens est, illud ab Ecclesia quoque dispensari posse, & reipsa justis id exostulantibus causis in eo Ecclesia dispensat.

Quæres 2do: Quando occurrit impedimentum ex disparitate cultus proveniens?

Resp. Impedimentum disparitatis cultus, ex diversa contrahentium religione oritur. Hic vero dispar Religio non illa est, quæ reperitur inter Catholicum & Hæreticum,



ticum, sed ea dumtaxat quæ inter baptisatum & non baptisatum intervenit. Unde infidelis hic stricte sumitur, pro eo, qui nusquam fuit baptisatus, quales sunt Judæi, Turcæ, Tartari.

Certum itaque est, Matrimonia baptisatorum cum non baptisatis jure Ecclesiastico esse invalida. Non sunt tamen ex se ipsis peccaminosa, quia & in veteri Testamento Jacob, Joseph, & ipse Moyses Mulieres infideles Uxores duxerunt, & in nova lege S. Cæcilia nupsit Valeriano Ethnico, S. Monica Patricio viro Gentili, & S. Clotildis Clodovæo Franciæ Regi, cujus ope totum Regnum cum ipso Rege ad fidem Christianam postea conversum est. Quare ex Ecclesiæ permissione talia Matrimonia nonnunquam & valida, & licita esse possunt.

Matrimonia vero Catholicorum cum Hæreticis, quamquam graviter ab Ecclesia prohibita sint, sunt tamen valida, si debito ritu celebrentur, quia nulla lex Ecclesiæ extat, qua irritentur.

*Quæres 3tio: Utrum amentes Matrimonium contrahere possint?*

*Resp:* Sub amentium denominatione omnes hic comprehenduntur, qui liberum rationis usum non habent, quales sunt furiosi, mente imbecilles, ratione destituti. Omnes isti jure naturali inhabiles sunt ad contrahendum Matrimonium, quia illud multam requirit libertatem, qua carent illi, qui furiosi sunt, & plane mente imbecilles, rationeque destituti. Amentes tamen, qui lucida habent rationis intervalla, iisque durantibus Matrimonium contrahunt, illud valde contrahunt, quia tunc libere præbent suum Matrimonio assensum. Idem dicendum est de iis, qui debile quidem habent ingenium, sed non eo usque imbecille, ut ratio, & libertas ex toto deficiat. Hujusmodi tamen homines à Nuptiis, si fieri potest, avertendi sunt. tum ob funestos recurrentis amentis, vel debilitatis, ac deficientis ingenii effectus, tum quia præcipuus est Matrimonii finis, debita proles educatio, quæ ab iis hominibus in tam misero statu degentibus, expectari vix potest. Quod si aliqua necessitas urgeat, Parochus, ne gravibus sese exponat incommodis, Episcopum consulere debet. Qui vero à natura surdi, & muti sunt, si intellectum ita perspicacem habeant, ut possint signis edoceri, quid sit Matrimonium, & consensum suum indicare valeant, valide contrahere possunt.

*Quæres 4to: Quid sit clandestinitas Matrimonii?*

*Resp:*



*Resp:* Matrimonium censetur esse clandestinum, quando vel non contrahitur coram proprio Parocho, aut alio de ipsius, vel Episcopi licentia Sacerdote, vel licet contrahatur coram proprio Parocho, sed sine requisitis à jure testibus. Ut ergo Matrimonium non sit Clandestinum debet *xmo.* contrahi coram proprio Parocho. *2do:* Coram tribus aut saltem duobus testibus. Sive ergo proprius desit Parochus, sive duo saltem defuerint testes, quamvis unus adsit, Matrimonium erit clandestinum, & ideo irritum, atque nullum. Sic statuit Concilium Trident: Sess: 24. de Refor: Matrim: Cap: 1. *Qui aliter quam præsentem (proprio contrahentium) Parocho, vel alio Sacerdote de ipsius Parochi, seu Ordinarii, licentiâ, & duobus vel tribus testibus Matrimonium contrahere attentabunt, eos Sancta Synodus ad sic contrahendum, omnino inhabiles reddit, & hujusmodi contractus irritos, & nullos esse decernit.*

*Quæres 5to: Quis sit iste Parochus cujus præsentia exigitur ad Matrimonii celebrationem?*

*R:sp:* Est proprius Contrahentium Parochus. Is enim ex Concilio Tridentino, tribus continuis diebus intra Missarum solemnità publice denunciare debet eos, inter quos Matrimonium est contrahendum, & si nullum apponatur impedimentum ad celebrationem Matrimonii in facie Ecclesiæ procedere. Perinde autem est sive Sponsi, sive Sponsæ sit Parochus, quia Concilium Tridentinum ad celebrationem Matrimonii requirens præsentiam Parochi, non exprimit an viri, an mulieris desponsatæ Parochus esse debeat, liberam ergo censetur relinquere electionem, sive hujus, sive alterius præsentiam advocare, & ab eo benedictionem Matrimonii recipere. Sed mos ubique invaluit, & constans ac universalis fert consuetudo, quæ vim legis habet, ut Matrimonium contrahatur coram Parocho Sponsæ, cum scitu Parochi Sponsi, si ex diversis fuerint Parochiis, quod fit, cum attestatum accipitur, de facta ibi Bannorum promulgatione. Peccaret autem Parochus Sponsæ, qui Matrimonium benediceret, non accepto à Parocho Sponsi attestato de facta Bannorum promulgatione, & peracta à Sponso Sacramentali Confessione.

Verum licet si Matrimonium benedici debeat à Parocho Sponsæ, si tamen aliter fieret, & Parochus Sponsi, inscio Parocho Sponsæ Matrimonio assisteret, validum foret Matrimonium. Cum enim Concilium Tridentinum liberum reliquerit sive Sponsi, sive Sponsæ Parochum ad

Ma-



Matrimonii celebrationem adhibere, consuetudo, & lex, quæ constitutum est, ut Parochus Sponsæ Matrimonium benedicat, non potest efficere ut nullum sit Matrimonium à Parocho Sponsi benedictum. Nemo siquidem impedimentum Matrimonium dirimentia statuere potest, nisi aut Papa, aut Concilium generale. Unde toties à Sacra Congregatione Concilii Tridenti interprete resolutum fuit, valere Matrimonium à Parocho alterutrius Sponsi benedictum.

Proprius vero Sponsorum Parochus, cujus præsentia ad contrahendum Matrimonium expostulatur, est Parochus domicilii, scilicet Parochus loci, in quo Sponsi habitant. Non ergo requiritur Parochus originis, seu loci, in quo quis natus est, quia Parochus domicilii est proprius Parochus, à quo recipi possunt, & debent Sacramenta. Imo juxta multos Theologos ad valide contrahendum Matrimonium sufficit præsentia Parochi etiam quasi domicilii, quare Milites in Præsidiiis, Opifices, & Famuli, qui majore anni parte alicubi habitant, vel illuc habitaturi venerunt, coram Parocho illius loci possunt Matrimonium contrahere, quia ibi contrahunt domicilium parochiale, vi cujus possunt ibi Sacramenta suscipere, Confiteri, Sacro Viatico refici, Extrema unctione inungi, ac proinde etiam ibi Matrimonium contrahere valent. At Vagorum, qui scilicet nullibi certas sedes habent, Matrimonium benedicere potest Parochus loci, in quo actu versantur, cum Matrimonium contrahere volunt. Quia nullus alius est ipsorum Parochus. Sed antequam illorum Matrimonium Parochus loci benedixerit, diligentem inquisitionem facere debet, num scilicet à vinculo Matrimonii liberi, & ad nubendum idonei sint, quia ut inquit Concilium Tridenti Sess: 24. Cap: 7. *hoc hominum genus, ita improbi sunt ingenii, ut prima uxore relicta, aliam & plerumque plures, illa vivente, diversis in locis ducant.* Cautissime itaque cum iis Parocho loci agendum est, & quemadmodum idem Concilium disponit, re ad Ordinarium delata, ab eo licentiam obtineat illorum Matrimonium benedicendi.

Cum vero Episcopus supremus sit in tota sua Diœcesi Parochus, potest ipse sive per se, sive per alium Sacerdotem à se deputatum, Matrimoniis assistere, illaque benedicere. Idem dicendum est, de Vicario Episcopi generali, nam unam, & eandem, cum Episcopo jurisdictionem habet. Unde si Episcopus mandet alicui Sacerdoti ut assistat Matrimonio, reputans hunc esse verum Parochum alterutrius ex contrahentibus Matrimonium, & si

postea



postea reperiatur vere non esse illorum Parochum, adhuc tamen mandatum Episcopi valet, & illud stabit Matrimonium. Et ita semel atque iterum decissum à Sacra Congregatione refert Bened: 14. Instit: Eccles: 88. Non est autem necesse, ut in propria Parochia Matrimonium contrahatur, dummodo coram proprio Parocho, licetsi in aliena Parochia celebretur. Potest ergo Parochus etiam in aliena Parochia suorum Parochianorum Matrimonium benedicere, quia benedictio Matrimonii est actus jurisdictionis non contentiosæ, qui in omni loco exerceri potest. Postulat tamen Ordo, ut Parochus, in aliena Parochia, etiam suorum Parochianorum Matrimonium non benedicat, nisi cum scitu, & licentia Parochi illius loci, in quo Matrimonium est benedicendum.

*Quæres 6to: Quæ requiruntur, ut domicilium, aut quasi domicilium ad contrahendum Matrimonium sufficiens, habeatur?*

*Resp:* Domicilium est locus in quo quis sedem, la-remque, ac summam rerum suarum ponit. Ita habetur Lege 7. Cod: de Incolis. Itaque ad domicilium habendum duo concurrere debent, scilicet habitatio in loco realis, atque actualis, & voluntas ibidem perpetuo manendi. Igitur si quis in certo loco perpetuo manere velit, ibidem acquirit domicilium. quamvis modo primum ad illum locum pervenerit, vel etiamsi nonnisi uno die in eo habitaverit, ibi ergo Matrimonium, in præsentia Parochi, contrahere potest. Ad habendum autem quasi domicilium sufficit actualis in loco habitatio, cum animo per notabile tempus inidem permanendi, hoc est per majorem, aut fere æqualem anni partem, & post vel ad sua revertendi, vel alibi migrandi. Unde in Universitatibus studiosi, in Oppidis aut Urbibus oppificiorum tirones, non domicilium, sed quasi domicilium acquirunt. Igitur qui fixam in Civitate habet mansionem, & alio pergit ad breve tempus negotiorum exg. causa, cum animo postea redeundi, neque quasi domicilium contrahit, non potest ergo Matrimonium coram Parocho illius loci contrahere. Qui vero venerat ad Villam, Oppidum, animo ibidem per majorem, aut pene æqualem anni partem inhabitandi, potest Matrimonium contrahere coram Parocho illius Villæ, aut Oppidi etiamsi per breve tempus primo cæpit habitare, quia per solam inhabitationem conducta domo cum animo in ea per tempus notabile manendi, acquiritur quasi domicilium. Si quis autem in duabus successive domibus, quas



quas in diversis habet locis, habitet, quasi æqualiter plus minusve, exg. unam partem anni in Urbe, alteram in villa transgat, is duo habet domicilia, ac proinde coram alterutro Matrimonium contrahere poterit, quia habitatio constituens domicilium, vere sufficit ad constituendum parochianum. Ast nunquam à Parocho loci, Matrimonio illi jungi debent, qui ipsi ignoti sunt, licetsi in ejus Parochia domicilium, aut quasi domicilium fixerint, nisi prius facta sit promulgatio Bannorum in Parochia ex qua exierunt, & obtenta hac de re attestazione à priori illorum Parocho, & id tamquam tutius omnino servandum est respectu eorum, qui nonnisi quasi domicilium constituerunt, ut sine scitu, & consensu prioris illorum Parochi, ubi habitabant, Matrimonio non jungantur.

*Quæres 2mo: Utrum valeat Matrimonium coram proprio Parocho celebratum, si ille non fuerit Sacerdos, sed simplex Clericus?*

*Resp:* In praxi consultius est, ut Parochus qui nondum est Sacerdos, officium benedicendi Matrimonium Sacerdoti alicui committat. Quia, si Sacerdos est Minister Sacramenti Matrimonii, forma vero verba, quibus contractum inter Sponsos Matrimonium ratificat, quod probabilissimum est, Parochus qui non est Sacerdos, nihil efficiet, Matrimonium benedicendo. Id vero indubitatum est, Parochum imo & Episcopum non posse Clerico concedere facultatem, ut loco ipsius Parochi Matrimonium benedicat, sed si ipse illud benedicere nequeat, omnino Sacerdotem substituere debet, quia Concilium Tridentinum expresse requirit, ut Matrimonium celebretur coram proprio Parocho, *vel alio Sacerdote de ipsius Parochi, seu Ordinarii licentia.* Valet vero Matrimonium coram proprio Parocho celebratum, etiamsi is fuerit, suspensus, irregularis, aut etiam excommunicatus, dummodo neque Beneficio suo privatus sit, neque sit denunciatus, quia si Beneficio sit actu privatus, desinit esse Parochus, si vero censura quam incurrerat, excommunicationis, suspensionis, denunciata, ac proclamata sit, hæc quia Beneficio, officio, ac jurisdictione privat, ad minimum dubium erit Matrimonium sive spectetur ut Sacramentum, sive consideretur ut Contractus. Sed etiamsi Parochus foret intrusus, habeat tamen titulum Beneficii saltem coloratum, & ex communi errore reputetur verus Parochus, valebit coram ipso contractum Matrimonium, quia error communis cum titulo colorato, jus tribuit, & Ecclesia in his casibus sufficien-



ficientem, ac necessariam ad omnia Parochi munia obeunda confert jurisdictionem.

*Quæres 7mo: Quot, & quales requiruntur testes ad valide celebrandum Matrimonium?*

*Resp:* Ex præscripto Concilii Tridentini ad celebrationem Matrimonii requiruntur tres, vel ad minimum duo testes, quare si unus nonnisi adsit testis, Matrimonium nullum erit. Omnes autem ratione utentes pro testibus in celebratione Matrimonii adhiberi possunt. Nam Concilium Tridentinum nullos hic excipit, omnes ergo qui de celebrato Matrimonio fidem facere, & testari valent, in testes assumi possunt.

*Quæres 8vo: Qualis testium & Parochi requiritur præsentia?*

*Resp:* Ad valide, & licite celebrandum Matrimonium requiritur Parochi & Testium præsentia moralis, atque humana, ut scilicet physice præsentem intelligant, & adverbant, quid agatur, & scientes atque volentes tali actui assistant. Unde si Parochus invitus, ac per vim adductus fuerit, & coram eo omnino repugnante Matrimonium contrahatur, nullum, ac irritum erit. Concilium siquidem Tridentinum ad celebrationem Matrimonii præsentiam Parochi exigit, ut publici Ecclesiæ Ministri, unde ei præcipit, ut explorato viri, & mulieris consensu, dicat, *Ego vos in Matrimonium conjungo, in nomine Patris, & Filii, & Spiritus Sancti.* Quomodo autem Parochus plane invitus, & per vim adductus publici Ecclesiæ Ministri personam geret? quomodo sibi injuncta, ac demandata perficiet? Necesse est ergo ut Parochus cum libertate, & rationis advertentia Matrimonio assistat. Pariter si ebrius, aut omnino nesciens quid agatur, Matrimonii celebrationi præsens sit, pro teste accipi, ac reputari nequit. Testes enim ad celebrationem Matrimonii exiguntur, ut de eo plenam fidem facere possint, ebrius autem aut omnino nesciens, nec advertens quid agatur, licetsi physice præsens sit, fidem de celebrato Matrimonio facere non potest, pro teste ergo haberi nequit.

*Quæres 9no: An non aliquando valeat Matrimonium clandestine contractum?*

*Resp: 1mo:* Ubiunque non fuit promulgatum, & usu receptum Concilium Tridentinum, ibi valent Matrimonia clandestine contracta, quia Concilium Tridentinum statuens Matrimonia clandestina nulla, ac irrita esse, voluit at hoc suum Decretum robur haberet nonnisi post tri-



ginta dies ab illius publicatione, quare in illis Regionibus, in quibus nunquam prædictum Concilii Tridentini Decretum publicatum, neque usu receptum fuit, Matrimonia clandestine contracta valida sunt. Et hoc verum est non solum de incolis illarum Regionum, ibidem progenitis, sed etiam de iis qui è locis ubi promulgatum est Concilium veniunt, & illas Regiones inhabitant, ibique domicilium, aut quasi domicilium sibi constituunt, atque istiusmodi Advenis ut in prædictis locis Matrimonium clandestine contrahere possint, non plus habitationis necessum est, quam opus sit, ut quis ibidem domicilium, aut quasi domicilium obtineat. Si tamen quis eo unice animo perrexerit ad locum ubi Concilium Tridentinum promulgatum non fuit, ut ibi contracto quasi domicilio Matrimonium clandestine contrahat, & ad sua revertatur, istiusmodi Matrimonium, licetsi jam ipse contrahens quasi domicilium acquisierit, ad minus valde dubium, & suspectum erit, quia etsi ipsi suffragetur jus quasi domicilii ibidem acquisiti, sed dolus, & fraus nemini patrocinari potest, ut his sanctissimæ Ecclesiæ leges eludantur. Cautè itaque curandum est, ut istiusmodi Matrimonium omni meliori modo, quo fieri poterit, renovetur, & consolidetur, quia insignes Theologi illud plane irritum esse, decernere non audent. A contrario vero qui è locis ubi non est promulgatum Concilium Tridentinum veniunt ad loca, ubi illud promulgatum fuit, debent Matrimonium contrahere juxta formam à Concilio Tridentino præscriptam, alias nullum erit, quia ipsi etiam peregrini, locorum legibus subjacent, adeoque ubicunque contrahere Matrimonium volunt, juxta locorum leges illud contrahere debent.

2do: in Regionibus infidelium vg. Turcarum, Tartarorum, aut etiam Hæreticorum, quamvis ibi aliquando Concilium Tridentinum promulgatum fuisset, cum nullus ibi reperitur Parochus, valide sine illo Matrimonium contrahi potest, quia in hoc casu Decretum Concilii Tridentini non tenet, neque enim ipsum voluit ut perpetuam continentiam servent, qui in tali loco constituti sunt, in quo ad celebrandum Matrimonium Parochum habere nequeunt. Attamen curare debent, ut si aliquem Sacerdotem invenire possint coram eo, si invenire ipsum nequeant, saltem coram duobus testibus Matrimonium contrahant, ut sic pro posse modum ac formam à Concilio Tridentino ad celebranda Matrimonia præscriptas, servent.

Quæ-



*Quæres xomo: An etiam Hæretici in contrahendis Matrimoniis formam, & modum à Concilio Tridentino præscriptum servare teneantur?*

*Resp:* Certum est, Hæreticos legibus Ecclesiasticis ligari, quia Ecclesiæ potestati per Baptismum subiecti sunt. Unde ubi Concilium Tridentinum promulgatum, & usui receptum est, Hæretici qui ibidem Catholicis permixti vivunt, debent coram Parocho illius loci, & testibus Matrimonia contrahere. Quodsi habeant Paræcias à Catholicis distinctas, & suæ Religionis Ministros, publicamque illius exercitium, Matrimonia eorum coram suæ Religionis Ministris contracta, ex permissione, & indulgentia Ecclesiæ, videntur esse valida, quia illorum Matrimonia tollerat Ecclesia, & dum ad fidem catholicam convertuntur, non permittit ut à se invicem separentur. Censetur ergo Ecclesia illorum Matrimonia approbare, alias & gravissima sequeretur incommoda, & nulla ex Ecclesiæ resistentia sequeretur utilitas. Quæ namque sperari potest utilitas ex lege, cujus observantia moraliter est impossibilis? Quodsi ex iis qui Matrimonium contrahere volunt, una pars sit Catholica, altera Hæretica, curandum omnino est, ut illud Matrimonium celebretur coram proprio catholicæ partis Parocho, aut saltem coram ipso deinceps renovetur, ut sic certo validitati ipsius consulatur. Tale siquidem Matrimonium maxime dubium, quia Ecclesia benignior esse potest, erga Matrimonia Hæreticorum inter se, quam erga Matrimonia Catholicorum cum Hæreticis,

*Quæres ximo: Quid sit impotentie impedimentum?*

*Resp:* Impotentia, quæ impedimentum ponit ne validum sit Matrimonium, est incapacitas consummandi Matrimonium, seu inhabilitas ad habendam completam conjugalem copulam, ad quam necessaria est per virile membrum vasis fæminei penetratio, & intra ipsum seminis effusio. Unde valet Matrimonium inter senes, steriles, ac inter eos, qui unum tantum habent testiculum, & altero carent, quia hi & vas fæmineum virili membro penetrare, & humanum semen intra illud effundere possunt. Et steriles, atque Senes possunt perficere copulam per se generationi aptam, quamvis hæc per accidens, ex aliquo accidentali defectu non sequatur. Non valet autem Matrimonium inter eos qui licet membro virili valeant, utroque tamen carent testiculo, vel etiam utrumque attritum habent.



bent. Quare Eunuchorum Matrimonia invalida esse declaravit Sixtus 5. Papa.

Est autem impotentia *1mo*: alia *antecedens*, quæ scilicet Matrimonium præcedit, alia *subsequens*, quæ Matrimonio jam contracto supervenit. *2do*: alia *perpetua*, quæ nullo remedio naturali, ac licito tolli potest, alia *temporalis*, quæ per remedia curari valet. *3tio*: alia est *perpetua*, simul & *absoluta*, quæ viri coitum cum quacunque fæmina impossibilem facit, alia *respectiva*, quæ carnalem copulam impedit cum una, non vero cum aliis. *4to*: alia est, quæ oritur ex solo naturæ defectu, alia quæ oritur ex maleficio.

Est ergo perpetua impotentia, quæ vel sine miraculo, vel sine peccato, aut vitæ periculo tolli nequit. Quæ vero sine peccato & absque vitæ periculo tolli potest, mediis ordinariis, sive naturalibus. sive supernaturalibus, veluti precibus, contra maleficia exorcismis, temporalis est.

Oritur autem impotentia vel ex maleficio, vel ex natura, & quidem in fæmina, ex arctitudine vasis muliebris, in viro autem vel ex nimia naturæ frigiditate, ex testiculorum carentia, vel illorum attritione, aut etiam ex complexionis debilitate, unde fit, ut non possit à viro semen prolificum intra vas mulieris effundi.

*Quæres 1do: Quæ impotentia dirimit Matrimonium?*

*Resp: 1mo*: Per impotentiam subsequentem non dirimitur Matrimonium, quamvis hæc præcedat illius consummationem. Matrimonium semel valide contractum, semper validum est, neque per superveniens impedimentum dissolvitur. Attamen si contracto valide Matrimonio, aliquod suboriatur obstaculum, quod conjugalem coitum certo impediat, tunc nequidem licitum est Sponsis illum attentare. Idem est si Maritus utroque testiculo orbatus sit, licetsi copulam perficere possit, quia semen virile effundere intra vas fæmineum nequit. In dubio an impotentia Matrimonium præcelsit, non præsumitur præcelsisse, si pars altera nonnisi longo post contractum Matrimonium tempore reclamaverit, nisi validis rationibus contrarium probetur. Impotentia tamen naturalis, facile præsumitur Matrimonium antecelsisse.

*2do*: Impotentia temporalis non dirimit Matrimonium. Et ita definivit Innocentius 3. Papa Cap: 6. de frigidis. Et certe quamvis ad Matrimonii validitatem non requiratur actualis illius usus, attamen necessaria est potentia ad eum, hanc vero habet, qui licet hic & nunc, ob



morbum exg. conjugaliter copulari nequeat, id deinceps amoto obstaculo poterit. Ergo illius Matrimonium valet. Qui tamen cum impotentia aliquandiu duratura Matrimonium contrahit, nec de ea alterum Sponsum præmonet, sæpe graviter peccat, ob gravem injuriam quam comparti infert, & quia eam gravi incontinentiæ periculo exponit.

*3tio:* Impotentia antecedens, & perpetua Matrimonium nullum efficit, illudque irritat. Sic in jure constitutum est, titulo de *Frigidis*. Et vero cum procreatio prolis sit principalis Matrimonii finis, quamvis actus carnalis copulæ non sit de essentia Matrimonii, attamen potentia, & habilitas ad ipsum, est de essentia illius. Ergo qui ad actum carnalis copulæ impotens est, ac propterea ad procreandam prolem inhabilis, Matrimonium valide contrahere nequit. Et id verum est, quamvis impotentia sit unius tantum Conjugum, ac respectiva solum, hoc est respectu hujus tantummodo mulieris, in utroque siquidem casu, Conjuges illi cum inhabiles sint ad procreandum liberos, inhabiles etiam sunt ad contrahendum inter se Matrimonium.

Qui ergo cum impotentia Matrimonium contraxerunt, debent à se invicem separari. Sed istiusmodi separatio cum fieri debeat quoad thorum, & cohabitationem judicis Ecclesiasticis sententia, non autem sola Conjugum voluntate fieri debet, alias facile fieri posset, ut alter Conjugum, aut uterque eorum, mutux cohabitationis pertæsi, fictitiæ impotentix labem sibi imponant. Viro autem ac muliere ex impotentix causa per sententiam Judicis à se invicem separatis, potest pars Copulæ conjugalit idonea, aliud contrahere Matrimonium, non autem illa, quæ est impotens, nisi impotentia illius sit solum respectiva, tunc enim potest & hæc Matrimonium contrahere cum alia persona, ad quam potens esse præsumitur.

*Quæres 4tio:* Quid agendum est quando dubium est, utrum impotentia, quæ Matrimonium præcelserrat, perpetua sit?

*Resp:* Quando certo constat, impotentiam, quæ Matrimonium præcelserrat, esse perpetuam, atque veram, sine ulla ulteriori probatione, neque Judicis expectata sententia, quoad thorum à se invicem separari debent, nisi caste secum, tamquam frater, & soror habitare velint, & nullum adsit incontinentiæ inter ipsos periculum, quod abesse difficillime potest præsumi, nisi ii Conjuges exi-

miam



miam pietatem colant, abstinere siquidem illi debent non solum ab opere conjugali, & illius conatu, sed etiam ab omnibus impuris tactibus, osculis, atque ab iis omnibus quæ extra verum conjugium prohibita sunt.

Si vero dubium est, an istiusmodi impotentia perpetua sit, permittit Ecclesia ut Conjuges per triennium experiantur, an possint Matrimonium consummare, & per hoc tempus licitum est iis, quidquid veris Conjugibus permixtum est, quodsi pollutio hinc sequatur, prout quandoque contingere potest, id per accidens, & præter eorum voluntatem evenire reputatur. Elapso vero triennio, si impotentia perduret, & Matrimonium inveniat non esse consummatum, per sententiam Judicis Ecclesiastici dissolvitur, & Conjuges quoad thoram & cohabitationem à se invicem separantur. Quodsi vir qui judicatus fuerat impotens, in alio Matrimonio quod contraxit, inveniat potens, prius Matrimonium reintegratur, etsi illius conjux alteri nupserit, quæ ad priorem Maritum suum reverti debet, quia cum illa impotentia temporalis solum fuerit, illud Matrimonium validum fuit, nisi Viri illius impotentia respectu illius mulieris perpetua fuerit, non vero respectu alterius, quia sicut impotentia perpetua absoluta, Matrimonium omne dirimit, & vir, qui ea laborat, nullam Mulierem valide ducere potest, ita etiam impotentia perpetua respectiva, tale matrimonium, cum hac muliere contractum dirimit, cum alia vero, ad quam vir ille potens est, non dirimet.

Porro triennium probationis, quod Ecclesia in dubio impotentia Conjugibus concedit, communior sententia Theologorum censet inchoandum esse à die contracti Matrimonii, alii tamen arbitrantur illud inchoandum esse, à lata Judicis Ecclesiastici sententia. Si ergo post octodecim menses contracti matrimonii causa in judicio de valore matrimonii ex ratione impotentia mota fuerit, juxta priorem sententiam, nonnisi alii octodecim menses ad experiendum conjugibus concedi debent. Interim debent Conjuges omnia adhibere media possibilia, & licita, ad tollendam impotentiam idonea.

*Quæres 14to: Si impotentia oriatur ex maleficio, quid tunc agendum est?*

*Resp:* Sæpe impotentia quæ ex maleficio orta esse putatur, oritur ex causis naturalibus, scilicet ex verecundia, nimio pudore, aut ex nimio sive amore, sive odio Spousæ, quam vir aut ipse invitus, aut illam invitam du-



xerat. Sed etiamsi reipsa ex maleficio impotentia orta fuerit. Conjugibus in hoc miserrimo degentibus statu triennium conceditur ad experiendum, quo tempore debent illi corde contrito, & humiliato, integram prudenti Sacerdoti peccatorum suorum facere Confessionem, profusis lachrymis, & largis eleemosynis, ac orationibus, jejuniisque, Dei opem exorare, atque per exorcismos ceteraque medicinae spiritualis remedia, vim potestatemque Dæmonis à se repellere. Illicitum vero est maleficium, alio maleficio, sive quacunque alia superstitiosa actione tollere. Quodsi tamen non attenta peccati gravitate maleficium, maleficio, aut alio quovis facinore sublatum fuerit, & exinde impotentia celsaverit, non restaurabitur matrimonium, quia illud propter impotentiam perpetuam nullum erat, impotentia enim quæ sine miraculo, aut sine peccato tolli nequit, perpetua esse censetur. Ita S. Antoninus, & omnes cum eo Theologi.

Hic autem tria notanda sunt. 1<sup>mo</sup>: impotentiam ex maleficio proveniente, communiter respectivam esse, unde qui cum secunda uxore facile Matrimonium consummavit, circa præcedens matrimonium, quod propter respectivam impotentiam invalidum erat, sollicitus esse non debet. 2<sup>do</sup>: in dubio an impotentia ex maleficio orta, perpetua sit, an temporalis, post triennem probationem præsumi debet perpetua, ne pars quæ ad conjugalem coitum potens est, in perpetuum expectare cogatur. 3<sup>tio</sup>: impedimentum, quod ex impotentia perpetua oritur, ab Ecclesia dispensatione, tolli non posse, quia qui impotentia perpetua laborant, ex natura ipsa ad contrahendum Matrimonium inhabiles sunt.

*Quæres 15<sup>to</sup>: Quid de impuberum, & hermaphroditorum Matrimonio sentiendum est?*

*Resp:* Impuberum matrimonia jure Ecclesiastico nulla sunt, ut patet ex toto Cap: 14. de desponsat: impuberum. Id autem merito constitutum est, tum quia impuberes ad consummandum matrimonium necdum potentes sunt, tum quia carent ea maturitate judici, quæ in re tanti momenti omnino necessaria est. Igitur ad valide contrahendum matrimonium debent esse completi anni pubertatis, qui in feminis sunt quatuordecim anni, in masculis octodecim. Aliquando tamen malitia supplet ætatem, cum scilicet quis ante adeptos pubertatis annos habilis est ad generandum. Unde valet matrimonium inter eos qui pubertati sunt proximi, & tum sufficiens ha-

bent



bent rationis iudicium, quo statum matrimonii discernere possunt, tum eos ad generandum habiles ac potentes esse compertum est. Et id constat ex jure Cap: 9. de desponsat: impuberum.

Hermaphroditi, hoc est illi, qui utrumque sexum virilem scilicet & fæmineum habent, valide Matrimonium contrahere possunt, quia & ad perficiendam conjugalem copulam, & ad generandum habiles & capaces sunt. Sed si Matrimonium contrahere voluerint, debent illud contrahere secundum sexum qui in ipsis prævalet, quia secundum hunc sexum sunt ad consummandum matrimonium aptiores. Si uterque sexus in illis fuerit æqualis, alterum eligere debent, & secundum illum matrimonium contrahere possunt. Sed facta semel electione unius sexus, aliud matrimonium secundum alium sexum contrahere non debent, si tamen id fecerint, validum erit matrimonium.

*Quæres abto: Unde oritur impedimentum Raptus?*

*Resp:* Impedimentum Raptus oritur ex rapto virginis, aut cujusvis alterius fæminæ, quæ à loco tuto abducitur, sive ad explendam libidinem, sive ad contrahendum cum ea matrimonium, de eo sic statuit Concilium Trident: Sess: 24. Cap: 4. *Decernit Sancta Synodus inter raptorem, & raptam, quamdiu ipsa in raptoris potestate manserit, nullum posse consistere Matrimonium. Quod si rapta à raptore separata, & in loco tuto, ac libero constituta, illum in virum habere consenserit, eam raptor in uxorem habeat, & nihilominus raptor ipse, & omnes illi consilium, auxilium, & favorem præbentes, sint ipso jure excommunicati, & perpetuo infames. Itaque raptus, ex quo istiusmodi impedimentum exoritur, est Crimen quo fæmina à loco tuto extrahitur, & transfertur in locum, ubi raptoris potestati subest, idque vel libidinis explendæ, vel Matrimonii contrahendi causa. Perinde autem est, sive virgo, sive corrupta fuerit, sive vidua, sive conjugata per vim abducatur. Quin etiamsi propria desponsata invita rapiatur, censent nonnulli Theologi, impedimentum raptus oriri, etiamsi rapta nullam habeat à Sponsalibus resiliendi causam. Et talia siquidem raptus multum in se continet injuriæ, cum puella ad executionem Sponsalium cogitur. Sive autem fæmina extrahatur à loco tuto physice per injectionem manuum, sive moraliter per graves minas, aut gravem metum, sive per ipsum raptorem, sive per personas ab eo subordinatas,*



tas, semper erit crimen raptus, & exinde emergens impedimentum. Locus vero tutus ex quo mulier extrahitur, censetur esse Parentum, aut Tutorum domus, aut etiam monasterium in quo ipsa secure degit. Denique ex raptu orietur impedimentum, sive mulier transferatur in locum ipsius raptoris, sive amicorum illius, sive aliorum apud quos ipsa rapta manens, vim pati, & in potestate raptoris existere merito censetur. Est quoque verus raptus Matrimonium annullans, cum mulier è loco tuto abducitur vel libidinis explendæ, vel matrimonii contrahendi causa. Quod si mulier rapta sit, intuitu solius libidinis explendæ, an tunc etiam sit verus raptus matrimonium dirimens, disputant Theologi. Opinio affirmans tutior est, & æque probabilis ac opposita, quia raptus sive fiat libidinis, aut matrimonii causa, perinde officit matrimonii libertati, ac proinde impedimentum inducit. Pariter si puella minorennis, de Parentum, aut Tutorum suorum consensu, non vero de suo, ac proinde invita abducatur, & verus erit raptus, & puellæ illata vis, ac proinde ex duplici capite nullum foret matrimonium, si cum illa à raptore contrahatur.

Porro duplex est raptus, *violentix*: quando mulier ipsa invita, & reluctans abducitur è loco tuto, & *seductionis* cum mulier blanditiis, persvasionibus, aut quocunque alio motivo seducta, invitis iis, à quibus pendet, raptorem volens sequitur.

*Quæres 17mo: Qualis raptus inducit impedimentum Matrimonium dirimens?*

*Resp:* Certum est raptum violentiæ matrimonium dirimere, eo namque libertas, sine qua validum esse nequit matrimonium, aufertur. Et hoc verum est, sive mulier à Viro, sive vir ætate minorennis à muliere præpotente per vim abducatur, quia Concilium Tridentinum hoc impedimentum constituit, ut matrimonii libertati consuleret. Libertas autem hæc perinde aufertur, sive puella, sive juvenis per vim abducatur. Ergo in utroque casu, raptus matrimonium dirimit.

Sed & tutior est opinio, quæ docet raptum etiam *seductionis*, sive *subornationis* matrimonium dirimere, estque ad minus æque probabilis ac illi opposita, ac proinde in praxi tenenda. Quia Concilium Tridentinum ut magis libertati, matrimoniorum consuleret, in raptu novum constituit impedimentum. Porro violentia semper & ante Concilium Tridentinum matrimonium dirimebat, quo-



quoniam ergo raptus est novum impedimentum à Concilio Tridentino specialiter constitutum, non solum raptus violentiæ, sed & seductionis matrimonium dirimere censendus est.

Et certe seductio, subornatio, libertati, qualis vel maxime ad matrimonium exigitur, sapius longe plus nocet, quam vis aperte illata, cum enim ipsa cor vim patientis semper abalienet, atque avertat ab eo, qui vim infert, multo facilius violentiæ resistitur, quam insidiosis persvasionibus, blanditiis, iisque odiosis artibus, quibus sensim frangitur virtus junioris personæ, plusque illis ligatur, quam si metu devincta esset, neque satis sui compos relinquitur, ut serio perpendat gravitatem matrimonialis contractus, ad quem ineundum dolose pertrahitur. Si itaque raptus violentiæ dirimit matrimonium, quia ipsius libertatem perimit, pariter & raptus seductionis matrimonium irritat, quia illius etiam libertati obstat.

Ceterum raptus seductionis locum non habet, nisi in iis qui minores sunt, seu necdum annos viginti quinque assecuti, non vero in illis qui jam majores sunt, neque amplius Patriæ potestati subijciuntur, sed sui juris sunt. In illis enim seductio, & subornatio non supponitur quidquam virum habere. Præterea ut seductionis raptus matrimonium dirimat, necesse est, ut puella seducta, è loco tuto reipsa extrahatur. Quodsi etiam mulier blanditiis, ac persvasionibus illecta, corruptis sit moribus, non censebitur seducta, sed à sua libidine ad matrimonium pertracta.

*Quæres 18vo: Impedimentum raptus estne dispensabile?*

*Resp:* Impedimentum raptus dispensatione non tollitur, non est tamen perpetuum, sed juxta Concilii Tridentini dispositionem, cum mulier rapta, à raptore separata, & in loco tuto ac libero constituta, illum in virum habere consenserit, matrimonium inter eos contrahi potest, quamdiu vero ipsa in raptoris manet potestate, etiamsi consentiat ipsum suum habere maritum, validum matrimonium inter eos esse non potest. Sed & muliere in loco tuto constituta prius raptor ab excommunicatione absolvendus est, quæ reservata non est, antequam cum ipsa volente, & libere consentiente matrimonium contrahat.



## ARTICULUS 4tus

*De impedimentis Matrimonium impredientibus.*

*Quæres 1mo: Quid, & quæ sunt impedimenta Matrimonium impediunt?*

*Resp:* Impedimenta Matrimonium tantum impediunt illa, quæ id nonnisi efficiunt, ut matrimonium illicite, attamen valide contrahatur. Quatuor istiusmodi numerantur impedimenta, quæ sequenti versu exprimantur.

*Ecclesiæ vetitum, feriæ, sponsalia, votum.*

*Quæres 2do: Quid per Ecclesiæ vetitum intelligitur?*

*Resp:* Per *Ecclesiæ vetitum* intelligitur amor prohibitio ab Episcopo, aut à proprio Parocho facta, ne matrimonium contrahatur, ac benedicatur propter justas occurrentes causas, maxime propter subortum dubium, num aliquod interveniat impedimentum inter personas matrimonium contrahere volentes, donec res discussa, examinata, ac recognita fuerit, & id constat Cap: 2. de matrim: contract: & Cap: ult: de Clandest: dispensat. Quare si Parochus ab Episcopo, aut ab ipsius Officiali inhibitionem receperit, ne matrimonium benedicat, ab eo benedicendo abstinere debet, si tamen benedixerit, validum erit matrimonium, istiusmodi siquidem inhibitiō impedit solum & prohibet ne matrimonium benedicatur, sed illud dirimere nequit, quia propter istiusmodi ab Episcopo factam inhibitionem, Parochus non desinit vere esse Parochus, valide ergo fungitur suo officio. Pariter si Episcopus tantum vetet Vicario Parochi ne assistat matrimonio, & ille contra mandatum Episcopi assistat validum erit matrimonium. Ita ex decisione Sacræ Congregationis, Bened: 14. de Synodo Diac: libro 13. Cap: 23. 2do: Per *Ecclesiæ vetitum* designatur prohibitio, qua à Concilio Tridentino cautum est, ne matrimonium benedicatur nisi præmissis tribus denuntiationibus.

*Quæres 3tio: Quæ feriæ Matrimonii celebrationem impediunt?*

*Resp:* Feriæ, quibus ab Ecclesia prohibitum est Nuptias celebrare, illæ sunt, quæ decurrunt à Dominica prima Adventus usque ad Epiphaniam Domini, & à feria quarta Cinerum, usque ad octavam Paschæ inclusive. Ita statuit Concilium Trident: Sess: 24. Cap: 10. Et verò mens Ecclesiæ est, ut temporibus Adventus, & quadre-

simæ



simæ fideles, à voluptatibus abstracti orationibus, ac penitentiae intenti sint, Nuptiarum autem novitas, ad voluptatem animos excitat. Merito itaque prædictis temporibus prohibentur.

*Quæres 4to: Qua ratione Sponsalia Matrimonium impediunt?*

*Resp:* Ex ea ratione Sponsalia Matrimonium impediunt, quia post factam uni futuri matrimonii promissionem, hac relicta non licet cum altera matrimonium contrahere, data siquidem fides, maxime in re magni momenti, servari debet. Si tamen legitimæ adsint causæ ab initis Sponsalibus resiliendi, tunc Sponsalia non impediunt matrimonium cum altera contrahendum, dummodo illa non sit prioris Sponsæ consanguinea.

*Quæres 5to: Quale votum impedit Matrimonium contrahendum?*

*Resp:* Votum simplex sive castitatem in sæculo servandi, aut non nubendi, sive Religionem aliquam ingrediendi, aut Ordinem sacrum suscipiendi, quamvis Matrimonium, si contrahatur non dirimat, illud tamen contrahendum impedit, unde qui cum tali voto Matrimonium contrahit, graviter peccat, quia promissio Deo facta, adimpleri debet. Qui cum simplici voto castitatis servandæ, aut Religionem ingrediendi Matrimonium contraxit, non potest debitum conjugale exigere, priusquam dispensationem à suo voto obtinuerit, reddere vero illud exigenti tenetur, quia votum alterius juri præjudicare nequit, peccat tamen etiam reddendo prima vice, quia ante consummationem Matrimonii liberum ei est Religionem aliquam ingredi, atque in ea promissam Deo castitatem servare, neque alter Conjugum eo tempore stricto jure debitum conjugale ab eo exigere valet.

## CAPUT QUARTUM

*De impedimentorum Matrimonii dispensationibus, illiusque renovatione.*

Scitu maxime necessarium est, à quo, & quomodo petenda sit dispensatio, cum aliquod occurrit Matrimonii impe-



impedimentum sive dirimens, sive impediens tantum: Sed & multa advertentia, atque cautela opus est, cum agitur de renovando, & convalidando Matrimonio, quod propter impedimentum dirimens, nulliter contractum fuit.

## ARTICULUS I. mus

### *De impedimentorum Matrimonii dispensationibus.*

*Quæres 1. mo: Quis potest dispensare in impedimentis Matrimonium impediens?*

*Resp:* Si impedimentum Matrimonium impediens sit ex Ecclesiæ vetito, aut ex tempore feriarum, in quibus prohibitum est Nuptias celebrare, potest Episcopus dispensare. Et id constat tum ex communi praxi, tum quia nullibi injure id prohibitum est Episcopis. Si impedimentum sit ex Sponsalibus legitime contractis, nemo in eo dispensare potest, neque Papa, neque Episcopus, quia hic occurrit obligatio justitiæ, à qua nemo neminem proprio arbitratu eximere potest. Sponsalia enim legitime contracta, cum contineant promissionem alteri factam, & ab eo acceptatam, sine illius præjudicio, & injuria violari, & rescindi nequeunt. Porro neque Episcopus, neque Papa sua dispensatione permittere valet, ut præjudicium, ac injuria tertio inferatur. Ergo impedimentum ex Sponsalibus proveniens, dispensatione tolli nequit, sed aufertur cum vel partes quæ Sponsalia contraxerunt libere à se invicem resiliunt, vel una ex iis justas habet ab altera resiliendi causas: Hic tamen de iis Sponsalibus sermo est, ex quibus non oritur impedimentum publicæ honestatis, quod etiam Matrimonium dirimit. Si enim ex Sponsalibus exurgat impedimentum publicæ honestatis, & adsint justæ causæ ab iis resiliendi Romanus Pontifex in eo dispensare potest.

Quodsi tandem impedimentum Matrimonium impediens, sit vel ex voto castitatis perpetuæ, vel ex voto ingrediendi Religionem, quoniam in istiusmodi votis Episcopi dispensare nequeunt, sed solus Papa dispensat, ideo hoc impedimentum non ab Episcopo, sed à Papa tantum potest tolli, & relaxari. Attamen potest Episcopus dispensare in voto castitatis Papæ etiam reservato, & exinde proveniens tollere impedimentum, quando quædam circumstantia celeriolem exigit dispensationem, quam quæ  
à Pa-



à Papa obtineri possit, ut si timeatur ne juvenis, qui sub spe futuri Matrimonii abusus est puella voto perpetuæ castitatis obstricta, & quam nunc in uxorem ducere vult, postea ab ea avertatur, nisi Matrimonium illico, & sine mora contrahatur. Idem est si ex una parte grave incontinentiæ, vel scandali immineat periculum, quod accelerationem dispensationis expostulet, ex altera vero parte paupertas personæ, & distantia locorum, difficultatem obtinendæ Romanæ dispensationis, faciat. Rarissime tamen occurrunt casus tam urgentes, ut Romam usque pro obtinenda dispensatione recurri nequeat.

*Quæres 2do: In impedimentis Matrimonium dirimentibus, quis dispensare potest?*

*Resp: amo:* In omnibus impedimentis Matrimonium dirimentibus, quæ jure solum Ecclesiastico constituta sunt, Romanus Pontifex dispensare potest, quia cum sit Caput Ecclesiæ, in universa Ecclesia jurisdictionem habet, ac proinde in omnibus, quæ legibus Ecclesiasticis constituta sunt, dispensare valet. In illis vero impedimentis, quæ jure naturali, aut divino constituta sunt, Papa dispensare nequit, quia in iis, quæ sunt juris naturalis, ac divini, nullam ille potestatem habet. Quare potest Papa dispensare in impedimentis cognationis Spiritualis, legalis, tum etiam carnalis, excepta linea recta, & primo lineæ transversæ gradu, in quo sive possit Ecclesia dispensare, sive non possit, Theologi controvertunt, certum tamen est, quod in prædicto gradu nec unquam dispensavit, nec aliquando dispensabit. Dispensare etiam potest Papa in impedimentis Affinitatis, Criminis, Disparitatis cultus, publicæ honestatis, quia hæc impedimenta jure tantummodo Ecclesiastico constituta sunt. Non potest autem dispensare in impedimentis Vis, Erroris, Ligamini, Amentię, atquæ Impotentię, quia hæc jure naturali, ac divino Matrimonium dirimunt,

*2do:* Episcopi, in impedimentis Matrimonium dirimentibus etiam solo jure Ecclesiastico constitutis, ordinarie dispensare nequeunt, quia Episcopi in iis quæ ab universa Ecclesia constituta sunt, potestatem non habent, nisi ipsis ab Ecclesia concessa fuerit, inferior siquidem in lege superioris nihil potest, nisi ei ab illo permisum fuerit. Cum itaque impedimenta quam plurima Matrimonium dirimentia ab universa Ecclesia constituta, & acceptata, atque communi observantia firmata sint, & nullibi ab

Eccle-



Ecclesia concessa sit facultas Episcopis in iis dispensandi. Ordinarie ergo in illis dispensare nequeunt.

3tio: Attamen post Matrimonium contractum & consummatum, possunt Episcopi in impedimentis Matrimonii dirimentibus dispensare, quando sequentia concurrunt. 1mo: Ut impedimentum sit occultum, Matrimonium vero publicum, & in facie Ecclesiæ contractum. 2do: Ut matrimonium sit contractum bona fide saltem ex parte unius contrahentis, hoc est, sine prævia impedimenti notitia, & ex illius ignorantia. 3tio: Ut matrimonium sit consummatum. 4to: Ut partes sine verisimili periculo scandali, aut gravi damno à se invicem separari nequeant. 5to: Ut ad Papam difficilis sit recursus, vel ob imminens probabile incontinentiæ periculum, dispensatio Romana expectari non possit. 6to: Ut tale sit impedimentum, in quo Papa dispensare consuevit. His concurrentibus potest Episcopus in impedimentis Matrimonii dirimentibus dispensare. Id enim exigit bonum Ecclesiæ, & salus animarum. Si vero aliquid ex prædictis defuerit, Romam pro obtinenda dispensatione recurrendum est.

Quodsi post Matrimonium legitime contractum, superveniat impedimentum, quo adimitur jus petendi debitum conjugale, qualis est cognatio Spiritualis ex Baptismo, aut Confirmatione orta, & affinitas ex commissio incestu proveniens, in eo impedimento semper Episcopi dispensare, & prædictum amissum jus restituere valent.

Jam vero ad Matrimonium contrahendum in impedimentis dirimentibus sed occultis, Episcopi dispensare possunt in duplici casu, & quidem 1mo: in casu dubii. Unde si is, qui Matrimonium contrahere intendit cum Catharina, dubitet an non commercium carnale habuerit cum ipsius Sorore, poterit, & tenetur ad Episcopum recurrere, ut ab ipso dispensationem obtineat. Idem est, si in casu aliquo ex occurrentibus circumstantiis, aut ex saniorum Theologorum judicio, dubium sit, an adsit, & subsistat impedimentum Matrimonium dirimens, quia Causa dubii, ex eo quod vere dubii sint, Papæ non reservantur, sed sunt Episcopales. Quodsi non præcise dubia, sed multo probabilior foret impedimenti existentia, non sufficeret Episcopi dispensatio, sed si stante dubio Episcopus in impedimento dirimente dispensaverit, & postea certo constiterit, impedimentum adfuisse, non est necesse



ad Papam recurrere, quia illud semel absolute sublatum est, proindeque non indiget, ut iterum auferatur.

2do: In casu magnæ, & urgentis necessitatis, ut si rebus omnibus ad celebrandum Matrimonium paratis, invitato Parentum, & Amicorum cæta, puella, aut Sponsus in Confessione inveniatur impedimento Matrimonium dirimente ligatus, & nulla, præter Episcopi dispensationem pateat via, qua periculum gravis scandali, suspicionis, infamiæ, atque etiam inimicitiarum, removeri possit, quia reservatio Papæ in casu tunc urgenti, non esset in ædificationem, sed potius in perniciem animarum. Censent aliqui in tali casu consulendum esse Puellæ, ut ad aliquod tempus Votum castitatis emitat, & ideo Matrimonium differat. Hæc quidem ars valere potest, cum Episcopus longe distat, à quo obtinenda est dispensatio, cum à Papa haberi nequit. Si autem Matrimonium contracturi è diversis sint Diæcesibus, & dispensatione in aliquo impedimento indigeant, unusquisque à proprio Episcopo cui subest, debet dispensari, quia unus Episcopus in alterius Episcopi subjectum, jurisdictionem non habet. Si tamen dispensatio concessa fuerit à Romano Pontifice, hæc exequi potest, licetsi partes contrahentes diversarum sint Diæcesum, quia in utrumque ille potestatem habet. Idem dicendum est si Episcopus vi Papalis indulti, in aliquo impedimento dispenset.

*Quæres 2do: Ubi dispensatio Papalis obtineri debet?*

*Resp:* Cum impedimenta Matrimonii publica sunt, dispensatio Papalis in Dataria obtineri debet, quando vero occulta sunt, recurrendum est ad sacram Pænitentiarum. Exceptis autem impedimentis consanguinitatis, affinitatis ex copula licita, & cognationis spiritualis, in quibus quantumcumque occulta sint, nunquam dispensat Pænitentia ad contrahendum Matrimonium, sed aliquando dispensat in Matrimonio jam contracto. Porro impedimentum censetur esse occultum, cum vel omnino secretum est, ita ut nulla ratione probari valeat, vel si cognoscitur à tribus aut quatuor, nullum tamen est periculum ne ulterius divulgetur. Dum vero à Sacra Pænitentia dispensatio petitur, non exprimuntur vera dispensandorum Nomina, sed ficta solum & assumpta exg. Caius, Bertha, neque ullæ ibidem solvuntur taxæ, sed omnia gratis expediuntur.

Itaque pro foro interno à Pænitentia postulantur dispensationes, maxime ad revalidanda Matrimonia nulliter con-

con-



contracta. Cum ergo agitur de Matrimonio revalidando, quod nulliter contractum fuit, Pœnitentia dispensat in ceteris præter primum & secundum consanguinitatis gradibus, modo occulti sint, imo si publici sint, potest Pœnitentia matrimonia cum iis nulliter contracta revalidare, quando nullitas dispensationis super iis à Dataria obtentæ provenit ex causa subreptionis aut obreptionis occultæ, præterquam si falsitas consistat in narratione præcedentis copulæ, quæ tamen non præcesserat. Non dispensat etiam Pœnitentia in gradibus mixtis ex primo & quocunque alio gradu consanguinitatis vel affinitatis, ex copula licita. Dispensat vero in omni linea & gradu affinitatis profectæ ex copula illicita, & occulta.

Jam vero à Dataria petuntur dispensationes pro foro externo. Ibi autem vera Dispensandorum nomina, & eorum Diœcesis exprimi debent. Insuper, nisi dispensatio obtineatur in forma pauperum, solvendæ sunt expensæ. Qui ergo Romæ dispensationem petere volunt, sedulo considerare debent. *1mo*: An impedimentum sit è numero illorum, in quo Papa dispensare solet. *2do*: Videndum an à Dataria, an à Pœnitentia peti debeat dispensatio, & exprimendum id omne, & solum, quod uniuscujusque Tribunalis praxis, & stylus exprimi volunt.

*Quæres 3tio: Quæ observanda sunt ut bona, & legitima obtineatur dispensatio, & illa non sit subreptitia, aut obreptitia?*

*Resp*: Dispensatio subreptitia ea est, quæ obtinetur per reticentiam veritatis exprimendæ, seu per suppressionem eorum quæ juxta stylum Curia Romanæ, & jus exprimi debent in petitione dispensationis. Obreptitia est quæ obtinetur per expressionem falsitatis, qua cognita, non fuisset data dispensatio. Ut ergo non sit subreptitia, aut obreptitia dispensatio, in illius petitione hæc exprimi debent, cum agitur de Matrimonio contrahendo.

*1mo*: Impedimentum, super quo petitur dispensatio, rite, & in sua specie proponi debet, non unum pro alio, etiam majus pro minori exg. consanguinitas pro affinitate, quia in dispensatione non valet argumentum à minori ad majus.

*2do*: Exprimi simul debent in una eademque supplicatione omnia impedimenta ad idem matrimonium relativa, quibus tenentur illi, qui contrahere volunt. Quod si unum impedimentum, vg. consanguinitatis publicum sit, aliud vero, puta Criminis occultum, tunc impedimentum



mentum publicum in Dataria proponi debet, ad impetrandam pro foro externo dispensationem, utrumque vero tam publicum, quam occultum Pænitentiarie aperiiri debet, ut examinet, an & qua conditione dispensare debeat. Etsi vero non interest an prius pro foro exteriori in Dataria petatur dispensatio, an pro foro interiori à Pænitentiarie, si tamen dispensatio obtentu difficilis videatur, melius est, ut prius ad Pænitentiarie recurratur, ne inutiliter, & non sine multo sumptu obtineatur dispensatio à Datarie.

*3tio:* Si copula carnalis in dispensationis causam allegetur, exprimendum est, an ab utroque, vel ab uno habita fuerit, sub spe facilius dispensationis obtinendæ, quod merito tantum est, ne quis ex peccato commodum reportet.

Cum autem dispensatio petitur post matrimonium jam actu, licet invalide contractum, quatuor necessario sunt exprimenda. *1mo:* an partes, vel earum una, bona vel mala fide contraxerint, nempe cum notitia non quidem criminis admisi, sed ex eo profluentis impedimenti, unde qui noverat se è sacro fonte levare filiam Annæ, sed ignorabat exinde profluere impedimentum matrimonium cum Anna dñrimens, si cum ea matrimonium contraxit, bona fide contraxit. *2do:* an contraxerint ex spe facilius impetrandæ dispensationis. *3tio:* an etiam matrimonium consummaverint. *4to:* an partes impedimenti nesciæ clandestine, vel sine præmissis denuntiationibus contraxerint, iis enim qui in hoc casu versantur, dispensatio multo difficilius conceditur.

*Quæres 4to:* Quæ præterea circa unumquodque impedimentum in particulari exprimenda sunt?

*Resp:* Præter generalia, quæ in petitione dispensationis exprimi debent, hæc in particulari circa unumquodque impedimentum exprimi debent. Et quidem *1mo:* circa consanguinitatem exprimi debet. *1mo:* an sit in linea recta, an in transversa, & quoto utriusque gradu. *2do:* an partes duplici consanguinitatis vinculo conjunctæ sint, puta quia fratres duo, duas sorores in matrimonium duxerunt, & à fortiori an non plura diversæ rationis habeant impedimenta. *3tio:* exprimendus est incestus seu copula carnalis cum consanguinea ante matrimonium habita, quæ notoria est, & utrum cum, vel sine spe dispensationis facilius obtinendæ habita fuerit, etiamsi alia legitima dispensationis obtinendæ causa allegetur. Quodsi copula hæc, remanserit occulta, erit hæc simul cum consanguinitate-



mitate, vel affinitate aperienda in Pœnitentiaria. Quodsi post dispensationem Romæ obtentam, commercium carnale inter se primum habuerint, illico corrumpitur dispensatio à Dataria obtenta, unde iterum obtinendæ sunt Romanæ litteræ quas vocant, *perinde valere*. Sed cum partes ante dispensationis petitionem, carnalem inter se copulam habuerint, & illam in petitione expresserunt, ac in idem sceus relabuntur, valebit semper dispensatio sive relabatur ante fulminationem dispensationis, sive post dispensationis fulminationem, quia non est necesse ut commissum crimen exponatur quoad numerum. Et hoc locum habet erga affines, & alios, qui in petitione dispensationis commissum incestum exprimere tenentur.

2do: Circa affinitatem exprimi debent. 1mo: gradus illius. 2do: impedimenti multiplicitas, si adsit, puta si quis cum duabus illius, quam in uxorem vult ducere consanguineis, carnaliter peccaverit, & hæc in eadem petitione exprimenda sunt. 3tio: etiam gradus propinquior, si inæqualis sit, gradumque distantia, quia quod in consanguinitate servatur, idem etiam in affinitate servari debet. 4to: exprimi etiam debet, an affinitas ex copula licita, an ex illicita oriatur, quando dispensatio petitur super primo, vel secundo gradu, quia difficilius dispensatur super affinitate ex copula licita, quam ex illicita proveniente, & id necessarium est, ut intelligatur, an cum affinitate concurrat impedimentum publicæ honestatis, an non? Hæc enim cum semper annexa sit copulæ licitæ tacite exponitur, & tacite dispensatur eo ipso, quod exprimitur affinitatem ex copula licita ortam fuisse. 5to: exprimendum etiam est, an affinitas sit in linea recta, an in transversa, saltem cum affinitas oritur ex copula licita.

3tio: Circa impedimentum publicæ honestatis, exprimendum est, an illud oriatur ex Sponsalibus, an ex Matrimonio, & quo in gradu sint, qui contrahere matrimonium volunt.

4to: Circa cognationem spirituales exprimendum est. 1mo: an ea sit paternitas vel maternitas ex una parte, & proinde filiatio ex altera, an sit solum compaternitas, vel commaternitas. Multo enim indecentius est matrimonium inter patrem, & filiam spirituales, quam inter compatrem, & matrem ejusdem filiæ. 2do: an cognatio spiritualis sit duplex, puta an qui Petri filiam à sacro fonte levavit, fratrem in Confirmatione tenuerit, an non item Petrus levavit filios illius, qui filios ipsius à sacro



à sacro fonte suscepit. Sed necesse non est exprimere, an quis plures ejusdem Petri filios in Baptismo, vel in Confirmatione suscepit, quia cognatio Spiritualis non censetur hinc multiplicata, prout declaravit Clemens 8vus. Censent etiam plures necessum non esse ut exprimatur, an cognatio spiritualis ex Baptismo, an ex Confirmatione oriatur, quia hæc nihil, vel parum rem immutat.

5to: Circa criminis impedimentum exprimi debet an sit ex machinatione conjugis, an ex adulterio solo sine machinatione, an ex utroque simul, quia si sit ex machinatione, nunquam dispensat Papæ pro foro exteriori, raro autem pro interiori.

Quæres 5to: Quæ sunt causæ propter quas Romanus Pontifex dispensare solet in consanguinitate, & affinitate?

Resp: Causæ, propter quas Romanus Pontifex in impedimentis consanguinitatis, & affinitatis dispensare solet, duplicis sunt generis, aliæ sunt honestæ, quæ nullum probum petentibus afferunt, aliæ infamantes quæ aliquod probum dispensationem postulanti ingerunt.

Causæ honestæ octo præcipuæ recensentur, quarum una est *angustia loci*: cum locus originis adeo angustus est, ut mulier nullum in eo reperire possit paris secum conditionis, cui nubat, nisi consanguineum vel affinem. Sed hæc causa solitarie sumpta vix aliquando prodest, & si allegetur conditio personæ dispensationem petentis, & status ac ratio loci explicanda sunt.

2da: est *incompetentia dotis* mulieris, quæ vel indotata manebit, vel saltem fortunam statui suo convenientem, non inveniet, nisi consanguineo, vel affini nubat. Hæc causa admodum justa est, ne puella, si innupta manserit, incontinentiæ periculum lubeat, si autem viro inæquali nupserit, misere vivat, cum inæqualia conjugia, tristes effectus parere soleant. Idem est si mulier dotem quidem habeat, sed litibus adeo involutam, ut sine studio viri solertis, eam recuperare, & tueri non possit, ad hæc vero mulieris consanguineus, aut affinis se offerat, & præter eum, nullus alius reperiatur. Ceterum non censetur carere dote, quæ parentes habet divites, nisi hi multa prole graventur, vel competente ad dandam dotem, bonorum parte spoliare se non valeant.

3tia: est *bonum pacis*, sive inter regna, sive etiam inter privatas familias, gravibus odiis disscitas, vel prope diem disurgendas, restaurandæ vel confirmandæ.

¶ II. M.

X

4ta:



*4ta:* est *ætas puellæ*, annum vigesimum quartum excedentis. Hæc vero causa per se solam non sufficit, si agatur de dispensatione in secundo, vel in primo & secundo consanguinitatis, vel affinitatis gradu, sufficit autem in aliis, idque eo magis, quo plus recessit puella ab ætate annorum duodecim, qua nubilis esse incepit. Quia timere est, ne puella diu marito destituta, in suum corpus peccet, aut sine Parentum consensu nubat.

*5ta:* causa est *conservatio bonorum in eadem familia*, quia ampla unius familiæ bona ad aliam transferri non solent sine magno totius familiæ dispendio. Hæc tamen causa, si petatur dispensatio in gradu secundo, vel in secundo & tertio consanguinitatis & affinitatis, non admittitur, sine maximis favoribus. Huic autem causæ affinis est, *conservatio illustris familiæ*, quia illustres familiæ communi bono multum inserviunt, unde rationi maxime consonum est, ut conserventur.

*6ta:* Causa est *excellencia meritorum*: eos enim qui de Ecclesia bene meriti sunt, ab Ecclesia remunerari omnino conveniens est.

*7ma:* Causa est, cum mulier dispensationem petens liberis ex alio marito procreatis gravata est, & eorum curam susceptrum se spondet affinis, aut consanguineus illius. Hæc causa facile non admittitur sola, & nunquam admittitur, nisi postquam petens dispensationem sufficienter cavit se prædictis liberis alimenta præstiturum.

*8va:* Causa est, cum Matrimonium contrahere volentes, ex certis, & rationabilibus causis moventur ad secum contrahendum. Et hæc dispensationis species vocatur *sine causa*, non quia datur sine justa causa, sed quia nulla in particulari exprimitur. Qui talem dispensationem exequitur, causarum illarum verificationem exigere non debet, quamvis in dispensationis instrumento ista appositæ sit clausula, *diligenter informes*.

Causæ vero infamantes tres sunt. *1ma:* cum partes ob nimiam in tota sua agendi ratione familiaritatem, seclusa tamen carnali copula, scandalum vicinis dederint adeo, ut nisi ambæ jungantur, neminem puella inveniat cui nubat.

*2da:* cum partium prædicta familiaritas ad procreandam usque prolem increvit, ita: ut non aliter, quam per utriusque conjunctionem, scandalum occurrere possit.

*3tia:* cum partes licet consanguineæ, vel affines Ma-

tri-



trimonium contraxerunt, nec jam sine gravi scandalo, aut dispendio separari possunt.

*Quæres 6to: Quid ergo requiritur ut valida sit dispensatio?*

*Resp:* Ut valida sit dispensatio requiritur, ut causa finalis, propter quam conceditur, vera sit, & reipsa subsistat, cum dispensatio conceditur. Præterea ut in petitione dispensationis, nihil omittatur eorum, quæ exprimi debent, nihilque reticeatur veri, ratione cujus dispensatio aut nullo modo, aut nonnisi cum certa conditione, vel limitatione daretur, alioqui enim dispensatio esset obreptitia, vel subreptitia, adeoque nulla.

*Quæres 7mo: Quomodo scribendum sit Romam pro obtinenda dispensatione?*

*Resp:* Scribendum est stylo simplici & sine ullo verborum apparatu, alioqui enim petitio dilaceratur, communiter, communiter autem latino sermone scribendum est. Porro aliter inscribendæ sunt litteræ, quibus à Pœnitentiaria, aliter illæ quibus à Dataria petitur dispensatio.

Quando itaque dispensatio petitur à Dataria supplices litteræ diriguntur ad ipsam Papam, unde Epistola exterius sic inscribitur. *Sanctissimo Domino Nostro Pio VII Summo Pontifici. Romam.* intus vero ab his incipit verbis *Beatissime Pater.* Hujus Epistolæ exemplum tale est.

*Beatissime Pater.*

*Vilnensis.*

*Exponitur humiliter Sanctitati vestræ pro parte devotorum illius oratorum Patri Kwiatkowski Diœcesis Vilnensis, & Margarittæ Dukszynska ejusdem Diœcesis ex Oppido Polany, quod cum dicta oratrix dotem habeat minus competentem, juxta status sui conditionem, cum qua, ubi & propter angustiam dicti loci virum non consanguineum, (vel non affinem) paris conditionis cui nubere possit, invenire nequeat, & dictus orator qui in memorato oppido domicilium fixit, cum dicta minus competente dote oratricem in uxorem ducere intendat, & si extra dictum locum nubere cogeretur, dos, quam ipsa habet, non esset competens, neque sufficiens, ut virum paris conditionis invenire valeat. Quia vero tertio & quarto gradu consanguinitatis conjuncti desiderium suum in hac parte adimplere non possunt, humiliter supplicant Sanctitati vestræ, quatenus cum iisdem Oratoribus, quod impedimento tertii & quarti*



consanguinitatis gradus hujusmodi non obstante, Matrimonium inter se servata forma Concilii Tridentini contrahere, illudque in facie Ecclesiae solemnizare, & in eo post modum remanere libere, & licite valeant, dispensare, distantiam vero tertii, & quarti gradus praedicti eis non obstare declarare, prolemque suscipiendum exinde legitimam declarare dignemini de speciali gratia, non obstantibus praemissis, ac Constitutionibus, & Ordinationibus Apostolicis, ceterisque contrariis quibuscunque cum clausulis opportunitis. Loco autem hujus causae quae in hac supplicatione opponitur insufficientia dotis, & angustia loci, alia quaecunque, modo vera, & ad obtinendam dispensationem sufficiens causa allegari potest, exg. devotio infamiae, & scandali, dignitas Personarum, nec unquam suppressi debet copula carnalis, si notoria sit, cum hujus expressio necessaria omnino sit, sive habita fuerit sub spe dispensationis facilius obtinendae, sive etiam habita sit sine tali nefaria intentione. Debet etiam exprimi in supplicatione impedimentum in specie, quale reipsa adest, consanguinitatis, vel affinitatis, & unum pro alio non ponatur, tum etiam alia simul adjungenda sunt impedimenta, si quae occurrunt, cum omnibus circumstantiis necessario exprimendis.

Si autem partes in forma pauperum dispensationem petant, Parochus eorum paupertatis fidem facere debet apud Episcopum, aut ipsius Vicarium generalem, qui eam ad Apostolicam sedem simul cum petitione dispensationis transmittat.

Ad obtinendam vero pro foro interno dispensationem litterae supplicationis diriguntur ad Majorem Penitentiarium, qui unus est à Cardinalibus S. R. E. atque sic inscribuntur exterius.

*Eminentissimo & Reverendissimo Domino, Domino Cardinali Majori Penitentiario. Romae.*

Intus vero Epistola, seu supplicatio his incipit verbis.

*Eminentissime, ac Reverendissime Domine.*

*Exponitur humiliter Eminentiae vestrae pro parte devoti illius oratoris Titii, quod postquam idem orator carnaliter cognovit Fabiam, postea ignarus impedimenti bona fide tractatum habuit de contrahendo Matrimonio cum Sorore di-*  
cta.



etæ Fabiæ, cum autem dictum impedimentum occultum sit, tractatus vero publicus sit, & nisi ad effectum deducatur scandala exinde verisimiliter exoritura sint, cupit orator ad vitanda scandala, & pro conscientie suæ quiete, de præmissis, de quibus summe dolet, absolvi, & secum dispensari. Quare Eminentie vestræ humiliter supplicat, ut super his de opportuno remedio autoritate Apostolica providere dignetur.

*Dignetur Eminentia vestra responsum dirigere N. ad me infra scriptum.* Hic autem exprimendum est Nomen, & Cognomen illius, ad quem rescribendum est, item nomen Oppidi, aut Civitatis, ad quam, & per quam rescribendum est, & hæc quidem vulgari lingua, vel etiam latina, si ea facile denotari istiusmodi loca valeant.

Ne autem, dispensationis executio committatur Doctori in Theologia, vel Jure Canonico, debet petitionem scribens præcari, ut sibi committatur dispensationis executio, his similibus verbis. *Et quia in oratoris loco non facile reperitur Confessarius in Theologia Magister, vel Canonum Doctor, vel alius ad exequendum privilegiatus, dignetur Eminentia vestra providere, & disponere ut etiam alius exequi valeat.* Quamquam modo Brevia Sacræ Pænitentiarie non diriguntur ad solos Doctores

Quodsi petens dispensationem, impedimenti conscius tractatum habuit de contrahendo Matrimonio, scribendum est, *consciis impedimenti.*

Alia, & quidem brevior supplicationis forma hæc est:

*Eminentissime, ac Reverentissime Domine Titius conscius (vel ignarus) impedimenti contraxit in facie Ecclesie Matrimonium cum muliere cujus Matrem (vel filiam, aut sororem) prius carnaliter cognovit, quare cum absque scandalo separari non possint, & impedimentum sit occultum, humillime supplicat pro absolutionis, & dispensationis remedio. Dignetur &c.* Istiusmodi autem formulæ aliis etiam impedimentis facile adoptari possunt, cum in iis dispensatio postulatur.

*Quæres 8vo: Quomodo concessa dispensatio executioni mandari debeat?*

*Resp:* Dispensatio vel datur à sacra Pænitentiarie, vel ex Dataria expeditur. Prima executores habet eos, ad quos dirigitur, maxime Confessarios eorum, pro quibus obtinetur. Secunda Episcopum, ejusque Vicarium generalem ad quos dirigitur. Sed præstat hic prius ponere formam dispensationis, quæ à sacra Pænitentiarie concedi



di conſuevit ut facilins intelligantur clauſulæ ibidem appoſitæ, quas Confeſſarius in executione Reſcripti diſpenſationis obſervare tenetur. Aliud vero datur Reſcriptum diſpenſationis ad contrahendum Matrimonium, aliud ad remanendum in Matrimonio jam contracto. Prius ſic ſe habet, atque exterius hoc modo inſcribitur. *Discreto viro N. Confeſſario, Theologiæ Magiſtro, vel Decretorum Doctore, & approbatiſ ab Ordinario, per latorem præſentium Pœnitentem eligendo, ad infra ſcripta ſpecialiter deputato.* Sic quidem Reſcriptum inſcribitur, quando ipſe, qui diſpenſatione indiget, illud obtinuit. Interius vero ſe ſonat: *Lucius miſeratione diuina S. R. E. Cardinalis, Diſcreto viro Confeſſori. Salutem in Domino. Ex parte Latoris præſentium nobis oblata petitio continebat, quod ipſe de Matrimonio contrahendo tractauit cum muliere, quam & cujus matrem carnaliter cognouit. Cum autem, ſicut eadem petitio ſubjungebat, dicta carnalis cognitio cum præſata mulieris Matre ſit occulta, & niſi lator cum dicta Muliere Matrimonium contrahat, periculum immineat ſcandalorum, ideo ad dicta ſcandala euitanda, & pro ſuæ conſcientiæ quiete, cupit per Sedem Apoſtolicam abſolui, ſecumque diſpensari. Nos diſcretionis tuæ committimus, quatenus, ſi eſt ita, dictum latorem, audita prius ejus ſacramentali confeſſione, ac ſublata occasione amplius peccandi cum dicta mulieris matre, ab inceſtu, & exceſſibus hujusmodi abſolvas hac vice in forma Eccleſiæ conſueſta, injuncta ei pro tam enormis libidinis exceſſu, graui pœnitentia ſalutari, & aliis quæ de jure fuerint injungenda. Demum, dummodo impedimentum ex præmiſſis proueniens occultum ſit, & aliud Canonicum non obſtet, cum eodem latore, quod præmiſſis non obſtantibus, Matrimonium cum dicta muliere, & uterque inter ſe publice, ſeruata forma Concilii Tridenti: contrahere, & in eo poſtmodum remanere licite valeant, miſericorditer diſpenses, prolem ſuſcipiendam exinde legitimam pronuntiando in foro conſcientiæ, & in ipſo actu ſacramentalis confeſſionis tantum, & non aliter, neque ullo alio modo, ita quod hujusmodi abſolutio in foro judiciario nullatenus ſuffragetur, nullis ſuper hiſ teſtibus adhibitis, aut litteris datis, ſeu proceſſibus confeſtis, ſed præſentibus laceratis, quas ſub pœna excommunicationis latæ ſententiæ lacerare tenearis, neque eas alteri reſtituas, quodſi reſtitueris, nihil ei præſentes litteræ ſuffragentur. Datum Romæ.*

Poſte-



Posterius vero Rescriptum ad remanendum in contracto Matrimonio, sic communiter conficitur.

*Lucius miseratione divina S. R. E. Cardinalis, Discreto viro Confessori salutem in Domino. Ex parte viri latoris præsentium nobis oblata petitio continebat, quod ipse alias Matrimonium publice in facie Ecclesiæ contraxit, & successive consummavit cum muliere cujus sororem antea carnaliter cognoverat. Cum autem, sicut eadem petitio subjungebat, dictus lator ob impedimentum ex præmissis proveniens, quod occultum est, in dicto Matrimonio remanere nequeat, absque Sedis Apostolicæ dispensatione, ad evitanda scandala, quæ, si divortium fieret inter se, & prædictam mulierem, exorirentur. cupit à præmissis, de quibus plurimum dolet, absolvi, secumque desuper dispensari. Nos igitur discretionis tuæ committimus, quatenus, si ita est, dictum latorem audita prius sacramentali confessione, a quibusvis sententiis, censuris & pœnis Ecclesiasticis, quas propter præmissa quomodolibet incurrit, incestu, & excessibus hujusmodi absolvas injuncta ei protam enormis libidinis excessu, gravi pœnitentia salutari, ac confessione Sacramentali semel quotibet Mense, per tempus arbitrio tuo statuendum, & aliis injunctis quæ de jure fuerint injungenda. Demum, dummodo impedimentum præfatum occultum sit, separatio inter latorem & dictam mulierem fieri non possit absque scandalo, & ex cohabitatione de incontinentia probabiliter timendum sit, aliudque canonicum non obstat, cum eodem latore, ut dicta muliere de nullitate prioris consensus, certiorata, sed ita caute, ut latoris delictum nusquam detegatur, Matrimonium cum eadem muliere, & uterque inter se, de novo secrete ad evitanda scandala, prædictis non obstantibus contrahere, & in eo postmodum remanere, licite valeat, misericorditer dispenses, prolem susceptam si quæ sit, & suscipiendam exinde legitimam decernendo, in foro conscientiæ, & in ipso actu sacramentalis confessionis tantum.*

In dispensationibus vero aut commutationibus Votorum simplicium castitatis, aut ingrediendæ Religionis, quæ quis vel transgrederetur, vel jam transgressus est, Matrimonium contrahendo, peculiare quædam clausulæ adduntur, in hunc modum.

*Nos discretionis tuæ committimus, quatenus si ita est, dictum latorem absolvas, injuncta ei pœnitentia salutari, sibi votum præfatum ad hoc tantum ut Matrimonium legitime contrahere, & in eo debitum conjugale exi-*

*gere,*



gere, & reddere licite valeat, in sacramentalem confessionem, semel quolibet mense & in alia pœnitentiæ opera perpetua per te injungenda, inter quæ sint etiam aliqua Religionis, quam ingressurus fuisset, quæ quotidie facere teneatur ad eum finem, ut ea adimplens meminisse semper possit obligationis, quæ hujusmodi voto adstringebatur, prout secundum Deum ipsius animæ salutem expedire judicaveris dispensando commutes, in foro conscientie tantum?

Quæres 9no: Quomodo intelligendæ sunt clausulæ, quæ in dispensationibus ponuntur?

Resp: In dispensationibus variæ ponuntur clausulæ, quæ à Confessariis in executione dispensationum observari debent, & breviter hic enucleantur. Et quidem prima est. *Discreto viro, Doctori*: qui ergo Dispensationem exequitur, Magister Theologiæ, aut Juris Canonici Doctor esse debet. Laurea istiusmodi in aliqua universitate obtenta, alioqui dispensatio suo frustraretur effectu. Sed etiam simplices Confessarii dispensationem exequi possunt, etsi non sunt Doctores formales, si dispensationis executionem ad se dirigi postulaverint, & id obtinuerint. Religiosi quoque Mendicantes, & qui cum ipsis in eorum Privilegiis participant, possunt Dispensationes Romanas exequi, quamvis non sint Doctores. Sed jam modo Rescripta Saceræ Pœnitentiariæ non ad solos Doctores diriguntur.

2da: *ex approbatis ab Ordinario*, unde qui approbatus ad audiendas fidelium confessiones non est, licetsi Doctor sit, dispensationem exequi non potest. Debet autem approbatus esse hic & nunc, atque in loco, ubi dispensatio exequitur, quare non sufficit quod alibi approbatus fuerit. Si Rescriptum sit in favorem Religiosi, sufficit ut Confessarius ab eo eligendus, sit approbatus à Superiore Ordinis sui. Si agatur de Moniali, debet hæc eligere Confessarium ex iis, qui pro Monialibus sunt approbati.

3tia: hæc est, *quatenus si ita est*. Tenetur itaque Confessarius sub gravi peccato scrutari, an impedimentum, quod Pœnitentiariæ propositum est, reipsa occultum sit, & an ex dispensationis denegatione oritura sint incommoda, quæ alioqui oritura petens dispensationem declaravit. Uno verbo inquirere debet, an expositæ preces veritate nitantur, & ntrum à parte rei subsistat causa finalis, quæ Pœnitentiarium movet ad dispensandum, & qua seclusa, ipsa non dispensaret. Non enim semper suffi-



ficiunt, quæ prima fronte sufficere videntur, unde ei, qui ut à castitatis voto liberaretur, exposuit se stimulis carnis adeo agitari, ut se continenter vivere posse non speret, non sufficit sola tentatio, nisi adeo gravis sit, ut immineat probabile lapsus periculum. Hic tamen annotanda sunt. 1mo: si facti veritas Confessario nota sit, non est opus examine. Si vero Confessarius veritatis nescius, sine prævio examine dispenset, graviter quidem peccat, quia super hoc conscientia ipsius oneratur, nihilominus, si preces veritate nituntur, et res ita se habeant, sicuti in petitione dispensationis sunt expositæ, valebit dispensatio. At non est muneris Confessarii ut expendat, an expositio Papæ facta vere sufficiat ad obtinendam dispensationem, sed tantum an res eo modo se habeant, quo expositæ sunt. 2do: credendum est Pœnitentis assertioni, cum in foro pœnitentiæ testes adhiberi non possint, nec ullus confici processus judicialis. Quodsi Confessarius aliunde noverit rem non ita esse, ut exposita est, non debet dispensationem exequi, quidquid in contrarium Pœnitens asserat, nisi forte id, quod novit Confessarius, ex alterius Confessione sciatur.

4ta: clausula hæc est, *audita prius ejus sacramentali confessione*, unde necesse est, ut ille, cum quo dispensandum est, peccata sua confiteatur Confessario, qui dispensationem executurus est, idque verum est, etiamsi dispensatio concederetur in materia, quæ nullum Pœnitentis delictum supponeret. Hand tamen necesse est, ut confiteatur ea, etiam mortalia, quæ commisit in materia, circa quam dispensatio versatur, si hæc jam apud alium, vel apud eundem Confessarium deposuerat, qui enim sola venialia habens, hæc confitetur, prædictam clausulam adimplet.

Quinta clausula est, *sublata peccandi occasione*, quæ verba ostendunt, non ante Pœnitentem absolvendum esse, vel cum eo dispensandum, quam à se removerit peccandi occasionem, voluntariam scilicet ipso facto, eam vero quæ involuntaria est, atque necessario adhæret, animo, & corde.

Sexta clausula est, *injuncta ei gravi pœnitentia*, quæ quamvis à Confessarii discretionem, & personarum statu dependeat, posset tamen esse jejunium exg. per sex menses semel in qualibet hebdomada, recitatio tertiæ partis Rosarii ter qualibet Hebdomada per tres Menses, vel etiam aliud pietatis opus arbitrio Confessarii imponendum.



dum, frequens præsertim Confessio, eleemosyna, Missæ auditio, consideratis semper statu, & sexu pœnitentis, & hoc advertendo, ut pœnitentia talis imponatur, quæ nusquam Pœnitentis delictum detegat. Si pœnitens in aliis Confessionibus rite peractis, pœnitentiam criminari, propter quod dispensari vult, parem impleverit, erit huius præviæ satisfactionis ratio habenda, unde Confessarius pœnitentias Brevi Romano præscriptas temperare poterit, sic tamen ut modum temperans, substantiam servet.

*Septima* clausula præcedenti similis est, illique cum agitur de relaxatione voti, hanc sacra Pœnitentia subjungit, *votum præfatum ad hoc tantum dispenses ut Matrimonium legitime contrahere, & in eo debitum conjugale exigere, & reddere licite valeat.* Porro circa hanc clausulam hæc notanda sunt. *amo:* monendi sunt Pœnitentes voti dispensationem nonnisi ad contrahendi Matrimonii usum concedi, unde eo usque illo voto tenetur, quoad usque Matrimonium contraxerit. Quapropter si in gravi incontinentiæ periculo versentur, hortandi sunt, ut Matrimonium ineant, quam primum poterunt, ne interim multiplicentur voti transgressiones. Quodsi post Nuptias contra castitatem conjugalem peccent, voti transgressores erunt, quod nonnisi in ordine ad usum Matrimonii, relaxationem fuit. *2do:* cum voti dispensationi à Pœnitentia concessæ, annexa sit quædam commutationis species in Sacramentalem confessionem quolibet Mense faciendam, hoc menstruæ Confessionis onus à Confessario pœnitenti erit omnino imponendum. *3tio:* & cum præterea additur commutationem voti faciendam esse in alia insuper pœnitentiæ opera, necessum est, ut Confessarius præter menstruam Confessionem, alia Pœnitenti imponat pœnitentiæ opera, puta jejunium, septem Psalmos pœnitentiales & similia. Cum autem hæc pœnitentiæ opera plurali numero exprimantur, debent esse ad minus duo, & duo reipsa sufficiunt, ne gravetur pœnitens. Porro hæc pœnitentiæ opera tandiu durare debent, quamdiu prædictæ commutationi locus erit. Unde obligatio prædictorum pœnitentiæ operum ab eo solum die incipit, quo Matrimonium contrahitur, & consummatur, quia non ante dispensatio effectum obtinet. Sublato quoque per mortem alterius conjugis, commutationis usu, cessant etiam singula illius pœnitentiæ opera, quia reviviscit voti obligatio. Id tamen locum non habet in dispensatione voti ingrediendæ Religionis, quia votum castitatis dissoluto Conjugio reviviscit,  
non



non autem votum ingrediendæ religionis, cujus proinde relaxationi, utpote perpetuæ, perpetua respondere debet pænitentia. 4to: tandem, cum adhuc in dispensatione voti præcipiatur, ut inter opera pietatis quædam sint etiam, quæ Pænitens quotidie facere teneatur, ut semper primævæ voti sui obligationis meminerit, inde evidens est, præter exposita pietatis opera, alia imponi debere, quæ singulis diebus impleantur. Hæc autem & faciliora, & utiliora præscribi debent exg. lectio quotidiana brevis libri spiritualis, conscientiæ examen, oratio mentalis ad minus per quadrantem, aliquod charitatis opus erga proximum. Cum vero hæc imponet Confessarius, monebit pænitentem, ut dum ea exequetur, meminerit vinculi à quo dispensatus est. Quodsi vero dispensatio detur in voto ingrediendi Religionem, tunc inter pænitentia opera à Confessario præscribenda, quædam esse debent Religionis illius, quam Pænitens ingressurus erat, & quæ quotidie facere tenetur in sui voti memoriam. In hoc autem operum ordine sunt gestatio chordulæ illius Ordinis, Litanæ quæ in dicto Ordine recitari consueverunt. Si dispensatio fiat cum eo, qui in Sacris Ordinibus existit, habenda est ratio officii divini ad quod tenetur, unde imponi ei potest commemoratio Sancti Institutoris Religionis quam voverat.

*Quæ* clausula aliis injunctis quæ de jure fuerint injungenda, & hæc clausula subauditur, etiamsi non fuerit expressa. Ejus vero scopus est, ut si Pænitens in foro pænitentia dispensandus, alio Confessario peccata declararet, ex quibus ad restitutionem alieni boni, denigratæ famæ reparationem, aliave similia, teneatur, hæc ei à Confessario præcipiantur.

*Quæ* clausula est, dummodo impedimentum occultum sit, & hæc est conditio, sine qua non dispensat Pænitentia, quæque semper est punctualiter observanda. Unde si Confessarius ex Pænitentis examine agnoscat factum esse famosum, vel manifestum, vel notorium juris, aut facti notorietate, ulterius ad dispensationis executionem procedere non debet, neque potest, & interim Pænitentem monere, ut à Dataria dispensationem sibi procuret.

*Roma:* clausula est, aliudque canonicum impedimentum non obstat. Quare si partes Matrimonium contrahere volentes, alio impedimento sive occulto, sive publico ligatæ sint, rursus ad sacram pænitentiarum recurrendum erit, pro occulto quidem ut ejus dispensatio, nova prioris impe-



impedimenti mentione facta, ab eadem Pœnitentiaria impetretur, pro publico teneri, ut significetur eidem partes hoc impedimento teneri, à quo per Datarium dispensari fatagent, exigit enim Pœnitentiaria ut publicum, quo partes vincuntur, impedimentum, sibi patefiat, neque enim aliter judicare potest an non satius sit spem quamcunque dispensationis adimere.

*1<sup>a</sup>ma:* est, *præmissis non obstantibus*, quibus indicatur Confessarium non obstante præfato impedimento, & aliis quæ Pœnitentiariæ exposita sunt, ad dispensationis executionem devenire posse, atque Pœnitentem Matrimonium servata forma Concilii Tridentini contrahere posse, hoc est præviis, vel omisis de licentia Episcopi denuntiationibus coram proprio Parocho, & testibus.

*2<sup>a</sup>ma:* clausula hæc est, *in foro conscientiæ, & in ipso actu Sacramentalis Confessionis tantum*, quæ verba demonstrant forum conscientiæ, de quo hic agitur, esse ipsum Pœnitentiæ sacrum tribunal, extra quod dispensatio à Confessario executioni demandari nequit. Deinde in dispensatione subiungitur, & demandatur. *1<sup>o</sup>mo:* ut data absolutio, ac concessa dispensatio in foro judiciali nullatenus suffragetur. Unde si forte impedimentum ex occulto publicum fiat, & in iudicium deducatur, dispensatio à Pœnitentiaria concessa non proderit in foro externo, adeoque tunc ad Datarium recurrendum erit. Quamquam si dispensati maritali jure sine scandalo uterentur, non peccarent, quia vere coram Deo dispensati sunt, cum sacra Pœnitentiaria dispensare & potuerit, & voluerit eo tempore, quo impedimentum occultum erat. *2<sup>do</sup>:* ut rescriptum dispensationis post illius executionem laceretur, neque Pœnitenti restitatur. Scilicet quam primum moraliter fieri poterit, laceretur, ita tamen caute, ut nec Rescriptum, nec delictum Pœnitentis dignosci aliquando possit. Quodsi vero Confessarius Rescriptum dispensationis Pœnitenti, ab eo etiam obtentum, & sibi ad exequendum allatum restituerit, incurrit quidem excommunicationem in eodem Rescripto latam, executio tamen dispensationis semel facta, valet & permanet immobilis.

Eandem clausulæ, & iisdem fere verbis ponuntur in Rescriptis, quæ dantur ad permanendum in Matrimonio contracto cum quibusdam tamen differentiis, quæ hic breviter exponuntur.

*3<sup>a</sup>ma:* clausula est, *à quibusvis sententiis, censuris, & pœnis absolvas*, quas scilicet Pœnitens, sive de jure com-



communi, sive ex speciali locorum lege ob incestus crimen incurrit, aut incurrrere potuit.

2da: est, *injuncta ei Sacramentali confessione quolibet mense*. Per sex autem, vel ad minus per tres menses prædicta Confessio facienda, injungi Pœnitenti debet.

3tia: clausula est, *& separatio fieri non possit absque scandalo, & ex cohabitatione de incontinentia timendum sit*. Harum autem clausularum verificatio Confessarium torquere non debet, cum evidens sit personas, quæ palam pro legitimis Conjugibus habentur, nec posse separari sine scandalo, nec secum invicem, absque gravi incontinentiæ periculo habitare.

4ta: est, *dicta muliere de nullitate prioris consensus certiorata*, quia renovatio contractus Matrimonialis, & ipsius ratificatio ex errore facta, putando illum validum fuisse, ac etiamnum subsistere, nihil efficit, neque Matrimonium præcedens revalidare potest, unde necesse est ut pars impedimentum ignorans, propter quod irritum fuit Matrimonium, de illius invaliditate admoneatur, caute tamen, & quam prudentissime. Non tamen nullitatis hujus causa est declaranda, præsertim si fundetur in delicto alterius Conjugis.

5ta: est, *Matrimonium de novo inter se secrete contrahere*, secrete inquam, idest sine Parocho & testibus, adeo tamen ut Pœnitens non prius in debiti conjugalitatis redimensionem consentiat, quam præviam, eo quo poterit meliori modo, consensus Matrimonialis renovationem à parte impediendi nescia, de nullitate tamen Matrimonii præmonita, obtinuerit, alioqui concubitus ille foret fornicarius.

Quæres xomo: *His omnibus clausulis expensis, & verificatis, quid tandem restat Confessario ad agendum?*

Resp: In forma solita dare debet absolutionem à Censuris, & peccatis, & tandem dispensationem sequenti exequatur forma, mutatis mutandis, pro impedimenti, à quo concessa est dispensatio, varietate dicens: *Et insuper auctoritate Apostolica, mihi specialiter delegata, dispenso tecum super impedimento primi gradus affinitatis ex copula illicita à te habita cum sorore mulieris cum qua contrahere intendis proveniente, ut præfato impedimento non obstante, Matrimonium cum dicta Muliere contrahere, consummare, & in eo remanere licite possis, & valeas. In nomine Patris, & Filii, & Spiritus Sancti. Amen. Deinde subjungit.*

*Insuper eadem auctoritate Apostolica prolem quam*



ex Matrimonio susceperis legitimam fore declaro. In nomine Patris &c.

Si dispensatio detur ad remanendum in Matrimonio contracto, sequens erit dispensationis forma.

Et insuper autoritate Apostolica mihi specialiter delegata, dispenso tecum super impedimento primi affinitatis gradus ex copula illicita quam cum sorore tuæ putatæ conjugis antea habuisti, ut illo non obstante renovato consensu cum præfata Coniuge, Matrimonium cum illa contrahere valeas. Et pariter eadem autoritate Apostolica prolem si quam suscepisti, & susceperis, legitimam fore discerno, & declaro.

Si dispensatio sit à voto castitatis, dicitur. Insuper autoritate Apostolica mihi specialiter delegata, tibi votum castitatis quod emisisti, ad effectum ut Matrimonium contrahere, & debitum conjugale reddere, & exigere licite possis, in opera quæ tibi præscripsi dispensando commuto. In nomine Patris &c.

Eadem pene forma est dispensationis à voto ingrediendæ religionis, in ordine ad Matrimonium contrahendum. Quod si quis dispensetur tantum ut extra Religionem cælibem vitam ducat, non dicuntur illa verba ad effectum contrahendi Matrimonium: sed hæc sequentia, ad effectum remanendi in sæculo in vita cælibe.

Quodsi quis non obstante castitatis voto, Matrimonium inierit, dicitur. Item te non obstante castitatis voto, quod emisisti, & transgressus fuisti, in dicto Matrimonio remanere, & debitum conjugale reddere posse, & debere declaro, & ut idem debitum etiam exigere licite possis, & valeas, tecum eadem Apostolica autoritate dispenso. In nomine Patris &c.

## ARTICULUS 2dus

### De Matrimonii revalidatione.

Quæres 1mo: Quid facto opus sit, cum detegitur Matrimonium contractum nullum ac irritum esse?

Resp: Matrimonium contractum nullum ac irritum esse potest vel ex defectu consensus, ut si fidei Matrimonium contractum fuerit, vel ex aliquo impedimento dirimente, quod illud irritum, & nullum reddit. Ex quacunque autem causa irritum & nullum fuisse Matrimonium advertitur, post obtentam impedimenti dispensationem, aut si per se impedimentum cessaverit, ut si metus gravis ad extorquendum Matrimonium inculsus desierit, vel



vel qui fide nupserat, jam sincere in Matrimonio permanere velit, consensus Matrimonialis renovari debet, & quidem *zmo*: exterius: nam interior consensus sicut ad contrahendum Matrimonium non sufficit, ita etiam ad illud revalidandum sufficere nequit, debet ergo exterius sive per verba, sive per signa de novo alteri parti manifestari, ut ab illa tacite saltem acceptetur. *2do*: debet hic consensus renovari, & Matrimonialis contractus iterum celebrari coram proprio Parocho & testibus, si invaliditas Matrimonii publica, & notoria fuerit, privatim vero si invaliditas illius occulta sit, & in facie Ecclesiae juxta *scriptum* Concilii Tridentini jam contractum fuit. *3tio*: semper pars quae invaliditatis Matrimonii ignara est, de hoc praemoneri debet, ut sciens & volens consensum Matrimonialem renovet.

*Quaeres 2do: Qua ratione pars invaliditatis Matrimonii ignara, de hoc praemoneri possit?*

*Resp.* Id saepius funestos habere exitus, ac proinde Confessarius qui in hoc versatur casu, precibus auxilium Dei implorare debet, ut cognoscat qua sibi gradiendum sit via, tum mature perpensis Conjugum genio, moribus, indole, amore, vel odio, quo se invicem prosequuntur, varios qui a doctioribus Theologis ad hoc proponuntur modos rimabitur, & quem adhibere debeat, apud se constituet. Quinque autem sunt, ex multis aliis selecti.

*Primus est:* ut conscius impimenti & nullitatis contracti Matrimonii, dicat alteri se a principio initi Matrimonii invalide consensum suum praestitisse, & praedicto Matrimonio non assensisse, ut par erat, sive defectu debita instructionis, sive propter aliquam cordis alienationem, propterea ex consilio Confessarii oportere, ut pro securitate conscientiae, ambo invicem se amplectantur, & consensum Matrimonialem renovent. Quapropter ipse quidem libentissime iterum consentit & vult de novo accipere illam in uxorem, & optat ut ipsa etiam consentiat, & velit de novo habere eum in suum maritum, & tunc siquidem & ipsa suum praestet consensum, reintegrabitur Matrimonium.

*Secundus:* ut pars nullitatis Matrimonii conscia, generatim alteri parti indicet prioris Matrimonialis contractus nullitatem, & novum exigat, dicendo: *Suspicio te non esse meam conjugem, & hoc ita est, ideo precor te, ut ad conscientiae meae pacem, nos denuo pro Conjugibus acceptemus, & habeamus.*

*Tertius est:* ut a parte impimenti nescia novus ob-

tinea-



tineatur Matrimonialis consensus sine expressa quidem, at non sine æquivalenti nullitatis Matrimonii insinuatione, puta si conjux alter alterum his verbis amice compellet: *Ira tibi afficior, ut si non esset inter nos Matrimonium, nihilominus acciperem te in Uxorem. & jam de facto ita te accipio in meam, numquid & tu similiter accipies me in tuum Maritum.* Si respondeat *Accipio*, vel eo affectu maritaliter copulentur, Matrimonium convalescit. Quia ignarus impedimenti non solum in Matrimonio prius contracto vult permanere, sed & novum intendit inire, si prius non valuerit.

*Quartus* modus est, qui cum Conjugibus tractari difficillibus adhiberi debet, scilicet mulier absque eo quod parti insciæ aperiat Matrimonii contracti defectum, caute curet, ut utriusque consensus Matrimonialis renoveatur, puta dissimulante petendo à Marito ut pro sua consolatione ipsam habeat pro sua conjuge, & de novo det illi dextram suam. Ipsa vero similiter dicat, manum suam illi dando. *Et ego te in meum Maritum semper habere volo.*

*Quintus* denique modus, ad quem recurritur, cum ceteri adhiberi nequeunt, & instat scandali, gravis infamiae, aut divortii timor, is est, ut obtenta dispensatione habeatur copula maritali affectu ex parte illius, quæ impedimenti est conscia, quia pars altera, quæ impedimentum ignorat, eo affectu commercium conjugale continuat, ac proinde simul tunc concurrunt utriusque Matrimonialis consensus, quo Matrimonium renovatur.

Verum ex his quinque Matrimonii revalidandi modis, nullus est præter primum, & forte tertium qui omnino tutus videatur, unde satius est, ut Confessarius, de licentia partis, quæ impedimentum novit, in se istud suscipiat negotium, & utrique Conjugi exaggeret, quam necessaria ipsis sit gratia hujus Sacramenti, ad onera Matrimonii supportanda, quæ tamen non confertur, si Matrimonium nulliter contrahitur, quod facile evenire potest, etiam inculpate propter aliquod interveniens impedimentum. His expositis svadeat Conjugibus, ut inter se de novo contrahant coram ipso, sub conditione dicente uno. *Si ex aliqua causa Matrimonium nostrum non esset validum, volo tecum ex nunc de novo Matrimonium contrahere*, alio vero respondente. *Volo pariter & ego tecum Matrimonium contrahere.* Sic Matrimonium revalidabitur. Et hæc methodus inservire aliquando potest, & licet in ea non sit formalis certioratio de invaliditate Matrimonii, partis id nescientis, sed tamen est æquivalentis.

TRA:



# TRACTATUS

DE

INDULGENTIIS, BENEFICIIS, & SIMONIA.

## CAPUT PRIMUM

*De Indulgentiis.*

Indulgentias quidem negarunt multi Hæretici, eorum errorem damnavit Concilium Tridentinum, atque Indulgentiarum usum laudabilem esse definivit, quæcunque ergo hunc laudabilem Indulgentiarum usum respiciunt, hic exponenda sunt.

## ARTICULUS I. mus

*De Indulgentiarum natura, divisione, atque illarum effectu.*

*Quæres 1mo: Quid sit Indulgentia?*

*Resp:* Indulgentia, est remissio pænæ temporalis, quæ post culpæ, & pænæ æternæ condonationem luenda superest, ab Ecclesia concessa, per applicationem superabundantium satisfactionum Christi, & Sanctorum. Dimisso siquidem peccato, non semper tollitur omnis pæna, quæ pro peccato luenda est, in satisfactionem scilicet divinæ justitiæ. Omnis namque culpa, etiam mortalis, & pæna æterna illis debita per Sacramentum Pœnitentiæ remittitur, temporalis vero pæna remanet, & hæc per Indulgentias ab Ecclesia concessas tollitur, dum nimirum superabundantes Christi, & Sanctorum satisfactiones nobis applicantur, quibus pænæ temporalis divinæ justitiæ à nobis contracta debita exsolvantur.

*Quæres 2do: Quotuplex est Indulgentia?*

*Resp:* Indulgentia multiplex est. Et quidem 1mo: alia est plenaria, quæ totam pænam temporalem peccatis

T. II. M.

X

tis



tis nostris debitam remittit, alia *partialis* quæ solum hujus pænæ partem remittit, unde est modo *quadrigena* modo *septena*, prout tot remittit pænas, quot per pœnitentiam, antiquis sæculis in Ecclesia usitatum, & ejusdem temporis decursu, scilicet quadraginta, aut septem dierum, peractam, remissæ fuissent.

2do: Indulgentia modo est *temporalis*: quæ ad certum tempus, puta ad Septennium concessa est, modo *indefinita*: quæ absque temporis determinatione conceditur, modo *perpetua*: quæ in perpetuum conceditur. Indulgentia sine determinatione temporis concessa, eandem habet vim, ac illa, quæ in perpetuum datur, & durat donec revocetur.

3tio: Indulgentia est *localis, realis, & personalis*. Indulgentia *localis* est illa, quam lucrantur, qui certum locum visitant, & in eo præscriptas ad eam obtinendam conditiones adimplent. Circa hanc indulgentiam sequentia notanda sunt. 1mo: una ac eadem Ecclesia non potest simul duas indulgentias habere, licet piæ Confraternitates specialem, in loco communi jam indulgentia donato, indulgentiam obtinere possint. 2do: non perit Indulgentia, si Ecclesia per partes tantum destruat, atque reedificetur, secus si omnino concidat, nec reedificetur. Etsi vero censent aliqui ex Theologis, subsistere indulgentiam, si Ecclesia in eodem loco reedificetur, multo tamen tutius est, ut novæ indulgentiæ obtineantur. 3tio: ad lucrandam Indulgentiam localem sufficere, ut quis oret præ foribus Ecclesiæ, quam ingredi non potest, nisi requiratur actio, quæ sine hoc ingressu fieri nequit, exg. communionem in hac Ecclesia, aut visitationem altarium illius. Hæc autem visitatio altarium cum debeat esse sensibilis, aliam quam ad illa requirit corporis, aut faciei conversionem.

Indulgentia *realis* est ea, quæ annexa est quibusdam rebus piis, puta crucibus, medallis, rosariis. Conceditur autem Fidelibus, qui res easdem devote gestant, aut apud se retinent, veluti Imagines, Cruces, sub præscriptis Conditionibus. Circa hanc Indulgentiam sequentia notanda sunt. 1mo: re, cui annexa est indulgentia, ita destructa, ut nec eandem formam gerat, nec eadem res esse communi sensu reputetur, perit indulgentia. 2do: si vero priorem formam retineat, adeo, ut pro eadem re moraliter censeatur, indulgentia manet. Unde qui funiculum funiculo, vel pauca grana deperditis substituit in minori numero, non amittit indulgentiam. 3tio: ad lucrandam indulgentiam realem sæpius necesse est, ut res, cui

anne-



annexa est indulgentia secum deferatur. 4to: nemo potest lucrari indulgentiam utendo re alteri ad acquirendam indulgentiam concessa, quia indulgentia licet realis, ad personas refertur, quibus res sacræ conceduntur. Unde istiusmodi res sacræ nec donari, nec commodari, multo minus vendi possunt, quasi indulgentiam ipsis annexam in alium transfundendo. Indulgentia *personalis* ea est, quæ conceditur immediate ipsis personis, seu in particulari, seu in communi, non tamen omnibus generatim, sed tali exg. Sodalitio, vel Confraternitati adscriptis, & hi omnes ubicunque fuerint, indulgentiam per opera præscripta, seu sani, seu in articulo mortis lucrari possunt.

*Quæres 3tio: Qui sunt indulgentiarum effectus?*

*Resp: amo:* Certum est per indulgentiam non remitti peccata, quia indulgentiæ conceduntur nonnisi contritis, & confessis, ut ergo effectum habeant necesse est, ut peccata jam sint remissa, & à Deo condonata.

2do: effectus igitur indulgentiarum principalis hic est, quod pœnam temporalem peccatis debitam, quæ sive in hac, sive in futura vita pœnitentibus luenda superest, remittat. Sed quoto in gradu, & quantum, omnino incertum est, & hac in re inscrutabilia sunt iudicia Dei. Hoc unum indubitatum est apud omnes, eo plus pœnæ temporalis per indulgentiam remitti, quo major fuerit pœnitentia atque devotio indulgentiam lucrantis.

*Quæres 4to: Utrum indulgentiæ eximunt à consuetis pœnitentiæ operibus?*

*Resp:* Indulgentiæ imprimis non eximunt ab iis pœnitentiæ operibus, quæ ad lucrandas indulgentias præscribuntur, sine his namque indulgentiam nemo consequi potest. Neque etiam eximunt ab iis pœnitentiæ operibus, quæ in Confessione sacramentali iuncta, ac imposita sunt, quia hæc cum sint pars integralis Sacramenti Pœnitentiæ, omnino implenda sunt, ne mutilum sit Sacramentum. Sed denique indulgentiæ non eximunt ab iis laboriosæ pœnitentiæ operibus, quæ quilibet perficere debet, ut cum Deo reconcilietur, & iustitiæ ipsius pro suis delictis satisfaciat. Siquidem ex Christi præcepto debemus dignos pœnitentiæ fructus facere, à quo Ecclesia per indulgentiarum concessionem neminem eximere potest, unde Concilium Tridentinum generaliter docet, Christianorum pœnitentiam præter contritionem, confessionem, habere debere satisfactionem congruam per jejunia, eleemosynas, orationes, & alia pia opera Deo exhibitam. Certe si per indul-



gentiam plenariam, persolutis paucis quibusdam operibus, à tota pro multis & gravibus etiam peccatis præstanda satisfactione, peccator eximeretur, enervaretur, & fere tolleretur Spiritus pœnitentiæ, quo tota vita Christiani hominis vivificari debet. Indulgentiæ torporem, ac ignaviam Fidelium foverent, ac peccatorum horrorem minuerent. Indulgentiæ ergo inservire debent ad supplendam tantum nostram infirmitatem, ut dum propriis nostris operibus divinæ justitiæ totum, pro nostris delictis, exsolvere debitum non possumus, lucrando indulgentias, per superabundantes Christi ac Sanctorum ejus satisfactiones, reliquum exolvamus. Merito itaque saniores docent Theologi, ad indulgentiam integre consequendam requiri seriam voluntatem, atque effectuosam sollicitudinem, per laboriose pœnitentiæ opera congrue Deo pro commissis peccatis satisfaciendi, quare proportionem hujus sollicitudinis, tamquam dispositionis ad lucrandas indulgentias omnino necessariam, major etiam vel minor percipitur indulgentiarum fructus.

*Quæres 4to: Quis indulgentias concedere potest?*

*Resp:* Indulgentias plenarias, in tota Ecclesia, atque omnibus, & singulis Christianis potest concedere Romanus Pontifex, quia est supremus Christi in terris Vicarius, Caput visibile totius Ecclesiæ, ac omnium Christianorum Pastor. Possunt etiam Episcopi indulgentias concedere, sed nonnisi in sua Diœcesi, Archi-Episcopi vero in tota sua Provincia, & suis nonnisi Subditis, etiam extra Diœcesim commorantibus. Majores autem indulgentias Episcopi concedere nequeunt, quam Indulgentiam unius anni in Dedicatione Ecclesiæ, & in anniversario illius, vel alia quacunque ex causa indulgentiam quadraginta dierum. Et id constat ex Concilio Lateranensi 4to cap: 62. Tales vero dierum Quadraginta indulgentias, etiam in perpetuum duraturas Episcopi concedere valent. Sed ut etiam Defunctis prosint, indulgere nequeunt.

*Quæres 5to: Quæ requiruntur ut valeat concessa indulgentia?*

*Resp:* Ut valide & licite concedatur indulgentia, necesse est. 1mo: ut is, qui indulgentiam concedit, ad illam concedendam potestatem habeat. Quia indulgentiarum largitio est actus jurisdictionis, per eam siquidem reus à pœna subeunda absolvitur, requirit ergo ad id competentem potestatem, atque facultatem. 2do: necessaria est justa causa illam concedendi, & quidem proportionata concessæ indulgentiæ. Quia potestas indulgentiarum, in



ædificationem Ecclesiæ à Christo concessa est, non in destructionem. Porro indulgentiæ sine causa, & nulla ratione illas exigente concessæ, in destructionem, & grave Ecclesiæ detrimentum vergerent. Sicuti enim declaravit Innocentius 3<sup>tius</sup> in Concilio Later, *per indiscretas, & superfluas indulgentias, & claves Ecclesiæ contemnuntur, & poenitentialis satisfactio enervatur.* Hinc juxta edicta Romanorum Pontificum potestas concedendi indulgentias *ex justis & rationabilibus causis* exerceri debet. Porro causa justa, ac rationabilis ea est, quæ cum indulgentiarum distributione proportionem habet. Unde æque dissonum rationi est, pro modica causa indulgentiam magnam largiri, quam etiam modicam sine ulla causa concedere. Justæ vero ac rationabiles indulgentiarum causæ sunt, Ecclesiarum constructio, atque illarum consecratio. Infidelium conversio. Hæresum extirpatio. Pacis publicæ atque procurandæ inter Principes concordia ratio. Belli, pestis extinctio. Christianæ plebis erga Sanctos pia devotio. Denique publica quævis spiritualis, aut temporalis necessitas, utilitasque. Verum quotiescunque indulgentia conceditur, semper pie credendum est, adesse justam ac rationabilem illius concedendæ causam.

*Quæres 6to: Quando cessant indulgentiæ?*

*Resp:* Indulgentia cessat. 1<sup>mo</sup>: per revocationem ejus, qui illam concessit, aut ipsius Successoris, Superiorisque. Verum indulgentia subsistit, donec revocatio ipsius pervenerit ad locum, pro quo concessa fuit. 2<sup>do</sup>: cessat, cum effluxit tempus, ad ejus decursum data fuit, exg. decennium, septennium. Si etiam indulgentia concessa fuerit, ut ad beneplacitum concadentis, perduraret, desinit ipsa per mortem illius, qui eam concessit. Quodsi à Sede Apostolica ad illius beneplacitum concessa fuerit, hæc morte Romani Pontificis, qui ipsam largitus est, non desinit, quia Sedes Apostolica non moritur. 3<sup>tio</sup>: indulgentia, quæ rei alicui annexa fuerat, cessat per ejus destructionem. Solet tamen indulgentia concedi cum hoc adjuncto, ut si amittatur, aut frangatur res illa, vg. imago, granumve, talem habens indulgentiam, possit aliud granum, vel alia imago in locum prioris cum eadem indulgentiâ substitui. 4<sup>to</sup>: cessant quandoque indulgentiæ, seu potius suspenduntur ad tempus, propter concursum alterius indulgentiæ celebrioris, uti contigit tempore Jubilæi. Porro indulgentia pro certa die concessa, exg. pro tali festo, semel tantum una, eademque die obtineri potest. Quæ  
vero



vera concessa est pro tota festi alicujus octava, singulis illius diebus lucrari potest. Hoc autem hic annotandum est, quod ex Decreto sacrae Congregationis Indulgentiarum, *Translato festo, in cujus die conceditur indulgentia, non transfertur etiam indulgentia, nisi ex concessione speciali, id fuerit permixtum.*

*Quæres 2mo: Quibus conceduntur indulgentiæ?*

*Resp:* Indulgentiæ ab Ecclesia conceduntur. 1mo: viventibus fidelibus, Ecclesiæ & Christo per charitatem conjunctis. Unde ab Ecclesia præcisi Hæretici, Excommunicati, tum etiam gravibus peccatis onerati, indulgentiarum participes non sunt, quia priores, in bonis Ecclesiæ, à qua sejuncti sunt, nullam habent partem, posteriores vero extra statum gratiæ positi sunt, qui ad lucrandam indulgentiam omnino requiruntur, non enim potest remitti pœna peccato debita, ipso peccato remanente.

2do: Mortuis fidelibus, quibus in Purgatorio aliquid expiandum superest, iis scilicet indulgentias ab Ecclesia concessas applicando. Verum illæ solum indulgentiæ defunctis applicari possunt, in quarum concessione hoc est additum, quod per modum suffragii etiam Defunctis applicari possint. Licet enim quilibet fidelis opus bonum à se peractum pro Defunctis Deo offerre, & sic pro illis satisfacere valeat, nemo tamen indulgentiam, cujus distributio penes Ecclesiam est, applicare potest, sine concessione & indulto ipsius Ecclesiæ.

## ARTICULUS 2dus

*De iis quæ ad indulgentiarum consecutionem requiruntur.*

*Quæres 1mo: Quæ requiruntur ut quis concessam indulgentiam consequatur?*

*Resp:* Ad lucrandam indulgentiam, ut ea quis potest, requiritur. 1mo: status gratiæ. Quia indulgentia est remissio pœnæ temporalis peccato debita. Porro pœna peccato debita remitti nequit, quamdiu ipsum manet peccatum. Hinc in Bullis indulgentiarum, hoc ponitur, quod scilicet ipsæ concedantur *contritis, & confessis, aut vere pœnitentibus.* Verum ut quis indulgentiam consequatur, necesse non est ut omnia ad illam assequendam præscripta opera, in statu gratiæ exequatur. Sufficit ergo & requiritur ut ea adimpleat animo vere pœnitenti, & ut



& ut sit in statu gratiæ, cum ultimum ex præscriptis operibus exequatur. Nullum enim opus movere potest Deum, ad condonandam promeritam pœnam, nisi vel in gratia fiat, vel saltem animo vere pœnitente perficiatur. Certe quis cogitare potest hominem in affectu ad peccatum perseverantem, promereri apud Deum posse remissionem pœnæ istiusmodi peccato debitæ? Plenius tamen indulgentiam lucrantur, qui in statu gratiæ omnia præscripta exequuntur opera. Omnino autem necessarium est, ut saltem ultimum præscriptum opus in statu gratiæ perficiatur. Nam requiritur status gratiæ cum actu indulgentia applicatur. Porro indulgentia eo tempore applicatur, quo ultima conditio impletur, seu eo instanti, quo præscripta opera consummantur. Eo igitur instanti in statu gratiæ esse debet, qui vult assequi indulgentiam. Ex his autem hæc sequuntur. *1mo*: eum, qui quædam ad consequendam indulgentiam præscripta opera cum affectu peccati mortalis perfecerat, indulgentiam non lucrari, nisi eadem repetat, vel purgata per Confessionem conscientia, vel saltem animo vere contrito, pie, ac religiose ea iterum adimpleat. Quodsi jam repeti nequeant, in alia pia opera à Confessario mutanda sunt. *2do*: & quoniam vix contingit, ut quis omnem ad certas veniales culpas affectum, exuat, rarissimum etiam est, ut ita lucretur plenariam indulgentiam, quatenus ab omni luenda pœna immunis evadat. Non tamen ideo indulgentias negligere debent illi, qui se in via virtutis languidos esse advertunt, quia quas ex integro non lucrantur indulgentias, ex parte saltem percipiunt, quæ pars longe superat opera, quæ vel ad lucrandam indulgentiam ex præscripto impleverunt, vel proprio etiam nutu perfecissent.

*2do*: opera ad lucrandam indulgentiam præscripta, adimpleri, & perfici debent, quia præscribuntur ut conditio, sine qua indulgentiæ lucrari nequeunt. Debent vero istiusmodi præscripta opera perfici. *1mo*: integre & totaliter, quia pro omnibus iis operibus plene, & integre adimpletis indulgentia conceditur, non vero pro parte illorum. Unde qui solum partem ex præscriptis operibus adimplet, neque partem indulgentiæ lucratur, nisi cuilibet operi divisim assignata sit indulgentia. Hinc sequitur quod, qui opus aliquod injunctum, vel ejus notabilem partem omittit, & non adimplet, quamvis ex ignorantia, & oblivione, aut impotentia, nihil consequitur, quia non implet conditionem, sub cuius onere concessa est indulgentia,

&



& concessio atque indultum ultra intentionem concedentis non operantur. Si tamen omīsa operis injuncti pars, esset quid minimum, vg. in Rosario omīsam est unum *Pater* aut *Ave Maria*, non propterea quis indulgentiam privaretur. 2do: perfici debent per eum, qui indulgentiam consequi desiderat, per aliam vero si impleantur, indulgentia non ab illo, sed ab hoc obtinetur. Quia Bulla concedens indulgentiam, iis, qui ipsam consequi volunt, præscribit ut jejunent, orent, qui vero efficit ut alius jejunet, oret, ipse non jejunat, non orat. Ergo etiam indulgentiam non consequitur. Qui tamen per aliam præscriptam eleemosynam tribuit, opus præscriptum adimplet, quia qui per aliam de suo pauperi benefacit, ipse eleemosynam dare censetur. 3tio: perfici debent tempore, loco, & ordine designato, quia sic fieri mandantur iis, qui indulgentiam consequi volunt. Unde si jejunium, aut aliud quodpiam opus certæ diei affixum sit, in aliam diem transferri nequit. Si oratio iungatur in hac Ecclesia, ubi solemnitas celebratur, in ea necessario fieri debet. Quodsi vero opera præscripta non sunt certæ diei affixa, & jam adimpleri nequeant, tunc à prudenti Confessario commutari, vel etiam in aliud tempus differri possunt. 4to: si in Bulla, qua indulgentia conceditur expressa est intentio, qua præscripta opera perfici debent, exg. ut oretur pro concordia Principum, extirpatione Hæresum, curandum est, ut istiusmodi opera saltem generaliter juxta intentionem Ecclesiæ adimpleantur.

Unum hic addendum est, videlicet, dum juxta tenorem Bullæ indulgentia conceditur *contritis*, & *confessis*, non requiri confessionem Sacramentalem iis, qui nullam mortalis peccati conscientiam habent, nisi expressæ Confessio requiratur ut opus sejunctim imperatum. Quia dum generatim nonnisi Confessio iungitur iis, qui indulgentiam adipisci volunt, ut medium ad consequendum statum gratiæ iungitur, sine quo indulgentia haberi nequit. Porro qui nullam mortalis peccati conscientiam habent, supponuntur esse in statu gratiæ. Iis ergo ad lucrandam indulgentiam Confessio Sacramentalis non omnino necessaria est. Quodsi Confessio Sacramentalis specialiter apposta sit, & veluti singulare opus, inter cetera ad consequendam indulgentiam assignetur, sicuti alia præscripta opera, ita & Confessio Sacramentalis perfici debet. Tutius attamen est, ut semper Confessio Sacramentalis fiat ab iis, qui indulgentias lucrari volunt, quia vix discerni potest quan-



quando Confessio præscribitur ut opus singulare ad consequendam indulgentiam prærequisitum, quando vero non nisi ut medium ad comparandum statum gratiæ, & sæpius qui arbitrantur se à peccato mortali immunes esse, eo vel maxime onusti sunt. Ergo semper tutius, & securius est, ut qui indulgentiam consequi volunt, per Sacramentalem Confessionem emundent conscientias suas. Et id confirmatur Decreto Congregationis indulgentiarum 1759. lato, in quo annuente postea Summo Pontifice decisum fuit, Confessionem Sacramentalem, quando in Brevis indulgentiarum apponitur, peragi omnino debere etiam ab illis, qui sibi lethalia peccati conscii non sunt, à qua tamen obligatione per posterius Decretum 1763. emanatum illi exempti sunt, qui frequenti Confessione, animam à peccatis expiare studentes, semel saltem in hebdomada ad Sacramentum Pænitentiae accedere consueverunt, & nullius mortalis culpæ post ultimam Confessionem admiscere sibi conscii sunt, ii enim omnes quascunque indulgentias sine actuali Confessione lucrari possunt.

*Quæres 2do: Qualia debeant esse istiusmodi ad consequendam Indulgentiam præscripta opera?*

*R sp:* Cum præscribitur oratio, hæc debet esse vocalis, pia, ac religiosa, nec valet si fiat cum distractione voluntaria, aut cordis obduratione. Fieri etiam debet tempore, loco, & ex intentione, designatis. Si jejunium injungatur, illud servandum est eo modo, quo alia observantur jejunia secundum morem, & usum loci. Si elemosyna præcipiatur, hæc fieri debet juxta regulas prudentiæ, ita ut non detur quid minimum, spectata facultate dantis. Demum si injuncta fuerit sacra Communio, hæc debet esse omni ex parte digna, ac devota, sacrilega non sufficit, & detestabilis est. Hæc vero omnia opera debent esse supererogatoria, quare non satisfit præscripto Bullæ, si fiant opera ad quæ quis jam alias tenebatur ex justitia videlicet, aut ex imposita sibi in Confessione pænitentia perficere.

*Quæres 3tio: Quæ necessaria sunt, ut Indulgentiæ Defunctis prosint?*

*Resp:* Sequentia necessaria sunt. 1mo: Ut pro Defunctis concessæ sint. Si enim Indulgentiæ simpliciter *Fidelibus* concessæ sunt, Defunctis applicari nequeunt, quia per *Fideles* simpliciter nominatos, fideles vivi denotantur. Necesse est ergo, ut in Bulla, qua indulgentia conceditur scribatur *Fidelibus vivis & defunctis*, tunc enim



concessæ Indulgentiæ etiam ad Defunctos extenduntur, iisque applicari possunt. 2do: Ut vivens omnia ad consequendam Indulgentiam præscripta opera fideliter perficiat, & quidem ex intentione ut illa Defunctis prosint, ea ipsis applicando, ac tandem si non singula illa opera in statu gratiæ adimpleat, saltem ultimum illorum.

*Quæres 4to. Quando incipiunt, & quando desinunt Indulgentiæ certis diebus affixæ?*

*Resp:* Inspici debet concessionis tenor: Unde quando conceditur Indulgentia à primis vespere ad solis occasum, ut concedi solet pro festis, hæc incipit hora, qua communiter vespere in iis locis decantari solent, & finitur postridie quando sol infra horisontem illius, aut vicini loci, descendit. Si vero Indulgentia concessa sit simpliciter pro certa aliqua die, exg. pro Feria 2da, vel 3tia ante Cineres, illa secundum communem usum incipit à media nocte illius diei, & similiter media nocte subsequente desinit.

*Quæres 5to: Quæ circa Indulgentiarum usum, & illarum abusum scienda & annotanda sunt?*

*Resp:* 1mo: Indulgentia eadem, certæ diei affixa, semel tantum obtineri potest, non autem pluries, quamvis opera ad illam lucrandam præscripta iterentur. Ita decisum est à Congrégatione Indulg: 1678. approbante Innocentio 11. Pariter etiam uno, eodem opere non possunt plures licetsi diversi generis ab eodem obtineri Indulgentiæ, sic exg. si quis habuerit duo Medalla, diversis Indulgentiis affecta, & uni sit annexa Indulgentia quadraginta dierum, alteri Indulgentia centum dierum obtinenda à recitantibus unum *Pater & Ave*, per unicam huiusmodi recitationem non lucrabitur utramque Indulgentiam, sed debet duplicare talem recitationem, quia ad utramque illam Indulgentiam requiritur seorsiva, & iterata recitatio.

2do: Nullæ Indulgentiæ, etiam à Romano Pontifice concessæ publicari, & Populo fidelium proponi possunt, nisi ab Episcopo recognitæ, & admittæ fuerint. Sic statutum est in Concilio Tridentino Sess: 21. Cap: 9. Semper igitur obtentæ Indulgentiæ prius Episcopo præsentari debent, & nonnisi habita illius facultate, & admittione, Fidelibus annuntiari possunt.

3tio: Graviter peccant qui annuntiant Indulgentias quæ vel nusquam concessæ fuerunt, vel quamvis aliquando concessæ fuerint, verum lapsu temporis desierunt, aut

jam



jam revocatæ sunt. Sed & illi graviter peccant, qui Indulgentias quasi venales faciunt, & earum occasione turpes quæstus faciunt.

*Quæres 6to: Quæ sunt Indulgentiæ omnibus Fidelibus concessæ?*

*Resp:* Sunt sequentes. *1ma:* Qui alios salutant, dicendo sive vulgari, sive latino sermone. *Laudetur Jesus Christus* & qui respondent: *In sæcula sæculorum*, vel *Amen* aut *semper*, lucrantur singulis vicibus Indulgentiam centum dierum. Pariter devote, ac reverenter, nominantes Jesu, vel Mariæ nomen singulis vicibus consequuntur Indulgentiam Viginti quinque dierum. Qui vero talem piam retinent consuetudinem, & in articulo Mortis ore vel corde eadem sanctissima Nomina repetunt, indulgentiam plenariam consequuntur. *2da:* Qui recitent Litanias de Sanctissimo nomine Jesu, lucrantur Indulgentias trecentorum dierum. Recitantes vero Litanias B. V. Mariæ, lucrantur Indulgentiam ducentorum dierum. *3tia:* Qui ad Campanæ pulsum, devote, ac flexis genibus (exceptis toto tempore Paschali, & singulis totius anni diebus Dominicis à Vesperis Sabbati) mane, meridie, & vespere recitaverint, *Angelus Domini*, singulis vicibus lucrantur Indulgentiam centum dierum, & quolibet Mense, die ab ipsis eligendo, si contriti, confessi, sacram Communionem suscepierint, plenariam obtinent indulgentiam. Gratiam hanc confirmavit Benedictus 14. Papa: sed iussit ut Paschali tempore, loco *Angelus Domini*: diceretur: *Regina Cæl:* cum versu & oratione consvetis, atque simul concessit, quod etiam à Benedicto 13. indultum erat, omnibus Religiosis Domibus, ut in iis commorantes prædictam Salutationem Angelicam differre possint post absolutos actus Religiosæ Communitatis, si cum in ipsis reperiuntur, contingat hora, et pulsus Campanæ pro istiusmodi recitatione. *4ta:* Illi qui sub horam noctis ad pulsum Campanæ recitant flexis genibus Psalmum *De profundis*, vel semel Orationem in Dominicam, & Salutationem Angelicam cum versiculo *Requiem æternam:* in suffragium Animarum in Purgatorio degentium, singulis vicibus lucrantur Indulgentiam centum dierum, & qui per annum præmissa peregerint, in uno die cujuslibet anni per unumquemque Christi fidelem ad sui beneplacitum eligendo, si confessi, & sacra Communione refecti fuerint, indulgentiam plenariam consequuntur. *5ta* Concessa est Indulgentia centum dierum, pro singulis vicibus iis omnibus, qui sin-

gulis.



gulis feriis sextis, hora tertia post meridiem, flexis genibus recitaverint, quinquies Orationem Dominicam & quinquies Salutationem Angelicam in memoriam Passionis & Agoniæ Christi Domini, pro qua recitatione ut Campana pulsetur, mandavit Benedictus 14. Papa. 6ta. Indulgentia plenaria à Clemente 13. 1765. anno concessa est omnibus Orbis Catholici Ecclesiis pro triduo expositionis SSmi Sacramenti in hebdomada sive Septuagesimæ, sive Sexagesimæ, sive Quinquagesimæ, sive in singulis prædictis hebdomadis, vel in sola feria quinta infra hebdomadam Sexagesimæ.

## CAPUT SECUNDUM

### *De Beneficiis Ecclesiasticis.*

Hic ea tantum de Beneficiis explanantur, quæ conscientiarum regimen, ac forum internum tangunt, iis omnibus prætermittis quæ forum externum respiciunt.

## ARTICULUS I. mus

*De natura, divisione Beneficiorum Ecclesiasticorum, & de illa possidenda requisitis dotibus.*

*Quæres 1mo: Quid sit Beneficium Ecclesiasticum, & quotuplex?*

*Resp:* Beneficium Ecclesiasticum est: *Jus perpetuum ac legitimum percipiendi fructus ex bonis Deo dicatis, Clerico propter officium aliquod spirituale competens.* Beneficiarius ergo jus habet ad percipiendos fructus ex bonis Ecclesiæ, sed non ad ipsa bona, quæ disperdere, alienare nequit. Hos vero de bonis Ecclesiæ fructus percipiendi Beneficiarius jus habet propter Officium quod ei annexum est, videlicet: Horas Canonicas recitandi, Missas celebrandi, Sacramenta administrandi, verbum Dei prædicandi, aliasque functiones Spirituales perficiendi. Ut enim docet Concilium Tridentinum Sess. 21. Cap. 3. omne Beneficium propter aliquod officium



officium institutum est, & Cap. 15. de Rescript: in 6to dicitur: *Beneficium Ecclesiasticum datur propter officium.* Qui ergo officium non implet, ad percipiendos ex bonis Ecclesiæ fructus, jus nullum habet. Dividuntur autem Beneficia Ecclesiastica xmo: in Sæcularia, & Regularia. *Sæcularia* illa sunt, quæ clericis sæcularibus competunt. *Regularia* quæ addicta sunt Religiosis, iis videlicet: qui in aliquo Ordine vota solemniter emittunt, illiusque Regulam professi sunt. Beneficium præsumitur Sæculare, nisi probetur esse regulare. Probatur autem Beneficium esse Regulare vel ex Litteris foundationis illius, vel ex continua, ac pacifica ipsius per Religiosos possessione. Ex iisdem à fortiori probatur Beneficium esse Sæculare, nisi tamen Beneficium ex sua foundatione Regulare datum sit Clerico Sæculari per Commendam, hæc enim statum antiquum Beneficii non mutat, sed conservat.

2do: Dividuntur Beneficia in duplicia, & simplicia: Beneficia *duplicia* illa sunt, quibus annexa est cura animarum, vel spiritualis jurisdictio in foro exteriori, vel aliqua præ eminentia, vel denique administratio rerum Ecclesiasticarum. Talia sunt Episcopatus, Parochiale Beneficium. Beneficia *simplicia* illa sunt, quæ nihil horum adjunctum habent, scilicet neque curam animarum, neque aliquam jurisdictionem, aut præ eminentiam, sed solum Breviarii recitationem vel Missarum celebrationem adjunctam habent. Talis est Canonicatus, Capellania, & alia multa.

3tio: Beneficia dividuntur in collativa, patronata, & electiva. Beneficia *collativa* illa sunt, quæ conferuntur per absolutam ac liberam Prælati, veluti Episcopi, voluntatem sine prævia alterius nominatione, sive præsentatione, & qui sic Beneficia conferunt, proprie, ac rigore *Collatores* dicuntur. *Patronata* ea sunt, quæ ad Patroni, qui apud nos vulgari lingua *Kollatorowie* nuncupantur, sive Laici, sive Ecclesiastici nominationem, præsentationemque ab Episcopo conferuntur, & nominati ab eo ab ipso instituuntur. *Electiva* sunt, quæ per suffragia canonicis electis conferuntur.

4to: Denique dividuntur Beneficia in compatiblea, & incompatiblea. Beneficia *compatiblea* ea sunt, quæ possunt simul teneri, & duo etiam simul possideri, atque istiusmodi sunt Beneficia, quæ personalem Beneficiarii residentiam non exigunt, nec idem onus, ac officium eodem tempore persolvendum annexum habent: *Incompatiblea* illa



illa sunt: quæ simul ab eodem possideri nequeunt. Et talia sunt Beneficia Curata, seu Parochialia, tum illa, quæ personalem requirunt Beneficiarii residentiam, quemadmodum Episcopatus, aut denique, quæ in eadem Ecclesia instituta sunt ad eundem finem, habentque idem onus ac officium eodem tempore persolvendum sibi annexum, ut duo Canonici in eadem Ecclesia.

*Quæres 2do: Ad Beneficia Ecclesiastica possidenda, quæ requiruntur dotes, ac qualitates?*

*Resp:* Ut aliquis capax, ac idoneus sit ad possidendum Beneficium, decem usque dotes, qualitatesque requiruntur. Hæc hic breviter explanantur. Et quidem imo legitimitas thori: Nam illegitimè nati, sive naturales sint, sive spurii, sunt incapaces Beneficii propter irregularitatem, à qua solus Romanus Pontifex dispensare potest ad omnes Ordines suscipiendos, & ad omnia Beneficia. Episcopus vero nonnisi ad primam tonsuram, minores Ordines, & ad Beneficium simplex capessendum. Id constat ex Cap: 2. de filiis præbyt: in 6to.

2do: Clericatus, seu prima Tonsura, sine qua irrita est cujusvis Beneficii collatio. Quia Beneficium fundatur in officio spirituali, & propter illud confertur, cujus quidem officii incapax est Laicus. Si vero Beneficium ex sua fundatione, aut ex Jure requirit certum sacrum Ordinem, carens illo Ordine est ad illud inhabilis, ex Cap: 22. de electione. Attamen ex consuetudine satis est, ut intra annum ille Ordo suscipiatur, sed ultra differri non potest. Ita Concilium Trident: Sess: 22. Cap: 4.

3tio: Ætas idonea, alioqui collatio est nulla. Hæc autem ætas varia requiritur pro varietate Beneficiorum. Ad Episcopatum requiruntur triginta anni completi. Ad Dignitates, & parochialia Beneficia annus vigesimus quintus inchoatus exigitur. Attamen ad Dignitates, quæ non habent annexam curam animarum, sufficit annus Vigésimus secundus completus. Ad Beneficia simplicia annus Decimus quartus inchoatus. Id constat ex Concilio Trident: Sess: 24. & 23. Ad Canonatum Ecclesiæ Cathedralis jure novo requiritur annus Vigésimus primus.

4to: Calibatus ita: ut si Clericus Minorum Ordinum ineat Matrimonium, ipso jure amittit Beneficium si quod habet. Et conjugatus ad Beneficia admitti non debet, nisi forte castitatem poveret perpetuam, & qui unicam virginem habuisset uxorem Cap: 2. de Clericis Conjug:

5to: Immunitas à Censura & irregularitate etiam oculi.



occulta, ita: ut nulla sit, non solum collatio Beneficii facta excommunicato, suspenso, vel irregulari, sed etiam ejusdem electio, præsentatio, resignatio in ejus favorem facta: Id constat ex Cap: 7. de Clericis excom: Cap: 8. de ætate & Cap: 18. de Sentent: Excom: in 6to. Neophyti quoque seu recens ad fidem conversi inhabiles sunt ad Beneficia capessenda. Post biennium tamen ex Romani Pontificis, aut Episcopi dispensatione, si probatæ vitæ fuerint, poterunt ad Ordines & Beneficia promoveri.

6to: Morum probitas. Ratio namque ipsa dictat, Dei & Ecclesiæ Ministros maxime debere esse virtutibus præditos, cum alios monitis, & exemplis ad pietatem inflammare debeant.

7mo. Scientia, illa scilicet, quæ ad omnia munia Beneficio annexa rite obeunda requiritur, & sufficit.

8vo: Corporis aptitudo, ea nempe, quæ ad officium decenter præstandum necessaria est. Hinc cæcus, mutus, sunt incapaces Beneficii. Cæcitas tamen superveniens non privat Beneficio, prius acquisito.

9no: Vocatio divina. Nam ad Deum pertinet sua vocatione Ministros sibi eligere, alioquin qui sine divina vocatione Ministeria, & Ecclesiastica Beneficia arripiunt, periculo damnationis æternæ se exponunt. Cum Beneficiatorum status multis, ac gravissimis obligationibus sit oneratus.

10mo. Intentio perseverandi in statu Ecclesiastico, & suscipiendi Ordinem muneri suo necessarium, nisi postea occurrat justa causa, quæ alium statum sydeat. Nam Ecclesiæ Beneficia pro iis dumtaxat instituta sunt, qui Ministerio Ecclesiæ se mancipare voluerint, & qui hanc voluntatem non habent, sine tali proposito Beneficia suscipiunt, in re gravissima Ecclesiam decipiunt, & Beneficiorum Fundatores defraudant. Quare qui Beneficium aliquod accipit animo ejus redditibus fruendi, donec studia absolverit, aut uxorem cum bona dote invenerit, mortaliter peccat, nec est absolvendus, nisi vel animum mutet, vel Beneficium dimittat. Pariter & illi graviter peccant, qui Beneficium arripiunt, ut illud cum alio permutent, aut ex eo pensionem sibi reservent.

Imo qui Beneficia parochialia & curata accipiunt sine animo intra annum Sacerdotium recipiendi, sed ea nonnisi voluntate illa acceptant, ut fructus ex illis per annum percipiant, & postmodum dimittant, non solum graviter peccant, sed & ad restitutionem fructuum, quos ex tali

Bene-



Beneficio perceperunt, obligantur. Quod constat ex Cap: 35. de Elect: in 6to. Quare Beneficium curatum adeptus, debet intra annum Sacerdotium suscipere, alioquin, nisi justa causa impeditus fuerit, Beneficio illo ipso facto privatur, propterea, qui sine tali animo Beneficium parochiale acceptat, ante omnem sententiam Judicis fructus illius restituere tenetur, nisi mutata voluntate Sacerdotium susceperit. Pariter qui Beneficium etiam simplex recipit requirens sacrum ordinem, & animus non habet illum recipiendi, peccat mortaliter. Nihil enim absurdius est, quam Ecclesiasticum recipere Beneficium, quod divino obsequio est destinatum, illius fructus percipere, & interim, neque velle, neque curare ut ad illud perficiendum aptus efficiatur, sed suis tantummodo terrenis servire emolumentis. Et hæc ratio probat, quod etiamsi Beneficium simplex nullum sacrum requirat Ordinem, qui illud fraudulentum suscipit animo, sine vera & sincera voluntate Deo, & Ecclesiæ debitum exhibendi famulatum, graviter peccare. Quia hic turpis intervenit fraus & dolus, qui à peccato gravi immunis non est.

## ARTICULUS 2dus

### *De variis acquirendi Beneficia modis.*

*Quæres 1mo; Quot modis Beneficia Ecclesiastica acquiruntur?*

*Resp:* Beneficia Ecclesiastica sex modis acquiri possunt, scilicet. 1mo: Patroni præsentatione, & subsequente institutione. 2do: Electione, ac electi confirmatione. 3tio: Postulatione, & confirmatione. 4to: Libera collatione. 5to: Permutatione. 6to: Resignatione cum subsequente collatione.

*Quæres 2do: Quid sit Præsentatio?*

*Resp:* Præsentatio est personæ idoneæ nominatio, vel Episcopo, vel alteri, ad quem institutio ad Beneficium spectat, legitime facta per Patronum, qui ad id jus legitimum habet, quod jus patronatus vocitari solet, & sic definitur: *Potestas nominandi Clericum ad Beneficium sive per mortem, sive per cessionem vacans possidendum.* Nominatio siquidem, seu præsentatio ad Beneficium quod nondum vacat, irrita est, & nulla ex Cap: 2. de Consec: Præbendæ: hæc enim præbet occasionem desiderandæ mortis Beneficium possidentis & ob hanc causam prohibita est

etiam



etiam promissio Beneficii antequam vacet. Quod si tamen fiat: nulla est talis promissio, & inde subsecuta Provisio.

Jus autem Patronatus duplex est, Ecclesiasticum; & Laicale: Jus patronatus *Ecclesiasticum* est illud, quod competit personæ Ecclesiasticæ vel ratione Beneficii, sive Dignitatis, quam habet, vel quia ex bonis Ecclesiasticis; fructibusve eorum Ecclesiam fundavit, extruxit; aut dotavit. *Laicale* est illud, quod competit personæ Laicæ, aut instar Laicæ se habentis, quæ scilicet ex bonis sæcularibus Beneficium erexit, Ecclesiamve fundavit: Unde Ecclesiasticus potest jus Patronatus Laicale habere; si vel ipse; vel ejus Prædecessores ex bonis Patrimonialibus Beneficium, aut Ecclesiam fundaverit. His additur Patronatus *mixtus*, qui competit Communitati, aut Confraternitati ex personis Ecclesiasticis, & Laicis; compositæ.

Duo autem sunt utriusque Patronatus discrimina. 1mo: Patronus Laicus ad præsentandum habet tempus quadrimestre duntaxat. Ita statutum est. Cap: unico de jure patron: in 6to. Ecclesiasticus vero sex habet menses; Mixtus pariter sex Menses: Et hoc tempus, juxta plurimos Canonistas currit non à die vacationis Beneficii, sed à die habitæ notitiæ de obitu Beneficiati, aut quæ haberi potuerit. Quodsi intra id tempus Patroni non præsentaverint, potest Episcopus cui voluerit Beneficium conferre. Non currit tamen istud tempus 1mo: si lis sit inter Episcopum, & Patronum de jure præsentandi. 2do Si lis sit inter præsentatos, quia nimirum plures sunt præsentati. Quando vero lis est inter ipsos Patronos, & tempus currit, & si elapsum fuerit, collatio Beneficii devolvitur ad Episcopum, qui tamen illud tempus prorogare potest.

2do: Patronus Laicus variare potest, hoc est vel plures simul, è quibus Episcopus unum pro libitu suo eliget; vel unum post alterum præsentare valet. Sed non valet variare nisi semel, neque excludere potest eum, quem prius præsentaverat. Tunc ergo Episcopus potest cuicunque ex præsentatis Beneficium conferre. Postquam vero semel data est institutio ad Beneficium, jam Patronus variare non potest. Si vero Patronus Laicus scienter indignum præsentaverit, variare non potest, sed pro hac vice excidit à jure præsentandi. Si nesciens incapacem, indignum præsentavit, potest vel alium dignum, veletundem; nondum finito quadrimestri de novo præsentare, si inca-



pacitas ipsius celsaverit. Patronus autem Ecclesiasticus unica præsentatione Episcopo notificata jus suum totum exhaurit, neque variare potest, unde si indignum scienter, vel ignoranter præsentaverit, alium præsentare non potest. Nominatio autem ad Beneficium, etiam subscripto Instrumento facta, non tam præsentatione, quam pro præsentandi proposito reputatur, quamdiu Episcopo rite non est notificata. Unde præsentatio, quæ rite Episcopo non est notificata, non obstat, quominus Episcopus elapso tempore Patronis ad præsentandum concessis, pleno jure conferat Beneficium cui voluerit. Et Patronus Ecclesiasticus, qui indigno instrumentum præsentationis subscripsit, cum illud Episcopo rite non est notificatum, post alium deinceps, qui dignus est præsentare, illiusque institutionem urgere. Præterea si præsentatus præsentationem acceptare nolit, aut ante institutionem moriatur, Patronus Ecclesiasticus alium nominare potest.

His sequentia addenda sunt. *1mo*: Si duo, pluresve Patroni, diversas personas ad idem Beneficium nominaverint, & sint æqualia illorum suffragia, potest Episcopus cui voluerit, semper tamen digniori, Beneficium conferre. Cum vero numero plures Patroni in unam personam consentiunt, aliis licet dissentientibus, præfertur ille, pro quo stat maior Patronorum pars. Ita statutum est Cap: 3. *de jure Patronatus*. *2do*: Patronus non potest seipsum ad Beneficium præsentare ex Cap: 25. *de jure patron*: sed potest filium suum nominare, si idoneus sit, modo non sic, ut filius immediate Patri succedat, Episcopus autem motu proprio potest Beneficium illius Patrono conferre. Cum etiam multi sunt Patroni, unus alium præsentare potest, modo capacem, quia tunc præsentatio, est veluti electio quædam, in qua aliqui, qui eligere possunt, possunt etiam eligi. *3tio*: Beneficium à Patrono Laico pendens, nec in favorem alterius resignari, nec permutari, neque pensionem gravari potest, sine ipsius consensu, quod aliter factum fuerit, caret robore.

*Quæres 3tio: Quomodo acquiritur jus Patronatus?*

*Resp*: Patronum faciunt, dos, ædificatio, fundus. Et quidem *Dos*, assignatis Ecclesiæ sufficientibus redditibus. *Ædificatio* seu Ecclesiæ constructio. *Fundus*, hoc est donatio solii seu areæ ad ædificandam Ecclesiam. Quamquam probabilior opinio teneat, per solius Areæ concessionem non acquiri jus Patronatus. Si tamen tres simul ad Ecclesiæ foundationem concurrant, primus ipsam cons-  
truen-



struendo, secundus dotando, tertius Aream ad eam ædificandam concedendo, ii omnes in solidum Patroni efficiuntur. Non acquiritur tamen jus patronatus, nisi Ecclesia dotetur, quia nulla Ecclesia, nullum Beneficium sine redditibus subsistere potest. Sed & aliis modis potest acquiri jus Patronatus, scilicet præscriptione, & cessione. Et quidem *præscriptione*, cum quis per tempus immemorabile ad aliquod Beneficium præsentaverit, & præsentationes ejus admissæ fuerint. *Cessione*, potest enim Patronus, vel suo Compatrono, vel alicui Communitati, vel cuivis alteri jus suum, non quidem vendere, quod Simoniacum foret, sed cedere, modo accedat consensus Episcopi. Transit quoque Jus patronatus jure hæreditario, ac donatione cum re vendita. Ipsum enim in seipso spectatum venditioni non subjacet. Non potest autem Patroni successor mutare naturam seu conditiones Beneficii, quia ultima voluntas Fundatoris modis omnibus observari debet. Imo nequidem ipse Fundator, si jam perfecta sit fundatio, quidquam in deterius mutare valet. Potest tamen vel ipse, vel ejus successor, novas apponere conditiones, quæ Ecclesiæ utiles sint, modo accedat consensus Episcopi.

*Quæres 5to: Quæ sunt jura, & onera Patronorum?*

*Resp:* Jura Patronorum hæc sunt. *Honor:* quia primum locum in Ecclesia habere debet. *Jus præsentandi*, quia ipse nominat dignum ad possidendum Beneficium. *Utilitas:* si quidem ad egestatem pervenerit, alii debet, & adjuvari ex Ecclesiæ bonis, secundum qualitatem suam, & collata ab eo beneficia. *Onera vero sunt.* 1mo: Debet Ecclesiam tueri, ac defendere. 2do: De dignis Ministris Ecclesiæ providere. Porro ille dignus Ecclesiæ Minister censeri debet, qui cum omnibus corporis, animi, & gratiæ necessariis dotibus præditus sit, ardenti gloriæ Dei, suæ, & aliorum salutis zelo accensus est. Indignus vero est, qui ad Ecclesiasticas functiones præstandas propter pravam vitam, ignorantiam, animi, aut corporis morbos, aliaque id genus impedimenta, ineptus est. Sed & ille pro indigno censendus est, qui bona inhiat temporalia, multo maiore in familiæ suæ augmentum, quam in Domus Dei decorem zelo movetur, ludis indulget, & epulis, periculosis, ac perniciosis conversationibus se immiscet, vitamque tepidam, ac otiosam ducit.

*Quæres 6to: An semper digniores ad Beneficia Ecclesiastica præsentari, & eligi debeant?*

Zz

*Resp:*



*Resp: amo: Qui Beneficium etiam simplex confert indigno, eumque præsentat, aut eligit, peccat mortaliter, quia ex malis, & indignis Ministris, omnia Ecclesiæ mala proveniunt, divini scilicet cultus negligentia, reddituum Ecclesiasticorum dissipatio, Ecclesiarum ruina, ac totalis desolatio. Certe Beneficium datur propter officium. Si ergo ad officia sæcularia indignos assumere peccatum est, à fortiori grave est peccatum ad Officia Ecclesiastica indignos promovere. Unde Concilium Lateran: 4. sic habet: *Grave nimis & absurdum est, quod quidam Ecclesiarum Prælati, cum possint viros idoneos ad Ecclesiastica Beneficia promovere, assumere non verentur indignos, quibus neque morum honestas, neque litterarum scientia suffragatur, unde quanta Ecclesiis damna proveniant nemo sanæ mentis ignorat.* Unde ibidem sic mandatur: *Præcipimus ut prætermisis indignis, idoneos assumant, qui Deo, & Ecclesiæ velint, & valeant gratum impendere famulatum.* & Concilium Trident: Sess: 7. Cap: 3. statuit. *Beneficia Ecclesiastica, præsertim curam animarum habentia, personis dignis & habilibus conferantur. Aliter autem facta collatio, sive provisio omnino irritetur.**

Hinc mortaliter peccant imo: Episcopus si indignum etiam à Patrono præsentatum instituat, quia eum repudiare potest, & debet. 2do: Patronus qui viro sibi ignoto ad Beneficium præsentationem tribuit, non enim sufficit, ut nihil mali de præsentato noverit, sed requiritur ut moralem de illius idoneitate certitudinem habeat. Quare Episcopus conferens Beneficium, Patronus, Elector, cui jus competit ad Beneficium eligendi, debent positivè scire eum, cui Beneficium dandum est, reipsa illo dignum esse, & tenentur diligenter inquirere num sit ad illud idoneus, alioqui se exponunt periculo præsentandi, aut eligendi indignum ac incapacem.

2do: Peccat mortaliter qui omisso digniore, præsentat, eligit, etiam dignum ad Beneficium annexam habens curam animarum, vel jurisdictionem, vel magni momenti functionem, ut docendi, prædicandi. Quia Patroni, Electores, atque Beneficiorum Collatores qui ad eam instituunt, graviter tenentur tum ex officio, tum ex fide Ecclesiæ sic distribuere, quemadmodum bonum Ecclesiæ, & animarum, ad quod instituta sunt, exigit, atque utilitatem Ecclesiæ, Beneficiorum commodum, cultus divini augmentum quantum possunt, promovere obligantur. Hoc autem non præstant, dum minus dignos eligunt, præsen-



tant. Nam notabili fructu per digniores præstando, Ecclesies defraudant. Imo dant causam gravi spiritali damno, ac ne detrimento, quod semper sequitur ex prælatione minus digni. Et hoc ita decisum est à Concilio Trident: Sess: 24. Cap: 1. de Refor: his verbis: *Omnes, & singulos, qui ad promotionem præficiendorum, quodcunque jus habent, alienis peccatis communicando mortaliter peccare, nisi quos digniores, & Ecclesie magis utiles ipsi judicaverint, & quos vita, ætate, doctrina, atque aliis omnibus quantitatibus præditos sciant, præfici curaverint.* & Cap: 18. de Parochis eligendis hæc mandat: *Episcopus ex dignis eligat digniorem.* Cum vero quidam Casuistæ per digniores à Concilio Trident: nominatos, intelligi vellent simpliciter dignos, eorum doctrinam veluti scandalosam, & in praxi perniciosam, damnavit Innocentius primus.

*Quæres 7mo: Sed quid si quis Beneficium Simplex conferat simpliciter digno, prætermisso digniore?*

*Resp:* In casu etiam Beneficii simplicis peccat mortaliter, qui digniorem prætermittit. Quia omnes Beneficiati sunt Ecclesie Ministri, ad functiones sacras perficiendas assumpti. Jam vero in Ministros Ecclesie semper digniores assumi debent, & sacre functiones per minus dignos deteriore modo peraguntur. Ad quodcunque igitur Beneficium semper digniores, & aptiores assumi debent.

Sunt tamen casus, in quibus sine peccato Beneficium simplex minus digno conferri potest. Quando nimirum id postulat charitas, vel alia justa causa ad majus bonum Ecclesie spectans, & in illius commodum redundans. Et quidem 1mo: si alimenta subministranda sunt Parocho infirmo, qui utpote officio jam impar ab animarum cura removeri debet. Pariter si quis Sacerdos aut Clericus non aliter ex inopia relevari possit, quam si ei conferatur aliquod Beneficium simplex, quia Beneficia etiam instituta sunt ad pauperum sustentationem. & tunc paupertas Clerici in partem causæ transit, propter quam ei Beneficium confertur.

2do: potest Episcopus instituere dignum, qui sibi à Patrono præsentatur, licet alios noverit illo digniores, qui prætermisi sunt, quia non potest eum, qui à Patrono præsentatur, rejicere, modo dignus sit. Idem dicendum est si electio fieri debeat ex personis certæ Communitatis, tunc enim quamvis extra prædictam Communitatem digniores reperiantur, ex hac etiam minus dignus assumi potest, cum in ea dignior non reperitur. Pariter si electio



ctio prorsus indigni aliter impediri nequit, nisi per assumptionem hujus, licet aliis minus dignus sit. Quia utilior est Ecclesiæ dignus, licet minus, quam prorsus indignus. Ex his sequitur illum quoque, qui suum Beneficium resignat in favorem alterius, aut illud permutat cum alio, digniorem omnino eligere debere. Quia se habet instar Patroni, cum id sua resignatione permutatione efficiat, quod Patronus præstat, scilicet ut huic & non alteri Beneficium conferatur, unde est causa omnium malorum, quæ ex collatione Beneficii minus digno consequuntur, atque propterea peccat, istiusque peccati omnes quoque rei sunt, qui talem resignationem, aut permutationem, procurant, eamque promonent.

*Quæres 8vo: Utrum ad restitutionem teneatur, qui indignos ad Beneficia promonent, vel dignos præferunt dignioribus?*

*Resp. amo:* Equaliter ad restitutionem tenetur, promovens, & promotus. Quia uterque est vera causa omnium malorum quæ inde patitur Ecclesia. Hinc promotus, qui officium suum implere nequit, debet & perceptos Beneficii fructus restituere, & ipsum Beneficium dimittere.

*zdo:* Si Beneficium ex concursu dari debeat, quod in nostris Regionibus vix practicatur, restitutio fieri debet digniori, qui prætermisus est. Posito namque concursu, is jus strictum habuit ad Beneficium obtinendum. Ergo qui ei Beneficium negat, injuriam ei facit, quam reparare tenetur. Si vero Beneficium ex concursu dari non consuevit, sed detur ex præsentatione, electione, restitutio facienda est, non ei, qui licet dignior prætermisus est, quia jus strictum ad Beneficium non habuit, sed Ecclesiæ, cui, ad Beneficium promotus præficitur; ei siquidem injuria fit, & ipsa non modicum læditur. Hæc vero restitutio fiet, ei idonei minus digno ad Beneficium promotu accerseantur Adjutores, qui diligentia sua compensent id, quod ex locordia, & minori idoneitate Promoti, mali evenire potest.

*Quæres 9no: Quid sit electio ad Beneficium?*

*Resp.* Electio est per datum suffragium designatio personæ ad vacans Beneficium obtinendum. Per electionem acquiritur jus ad rem, hoc est ad capessendum Beneficium, jus vero in re, hoc est in ipso Beneficio, acquiritur sola confirmatione, quæ electionem consequitur. Quare si quis absque confirmatione immisceat se administrationi Beneficii, censetur intrusus, & amittit jus, quod per electionem



etionem adquisierat. Ita statutum est Cap: 5. de Election: in 6to.

Confirmatio vero est concessio juris in Beneficio facta à Superiore, veluti ab Episcopo, ei, qui electus est. Porro electus, secluso impedimento, debet intra tres Menses à notificata, & acceptata electione, Confirmationem petere, alioqui electio est irrita. Sic habetur Cap: 6. de Elect: in 6to.

*Quæres xmo: Quid sit Resignatio, & permutatio Beneficii?*

*Resp:* Resignatio, est juris sui celsio, sive libera, ac spontanea Beneficii dimissio facta coram legitimo Superiore eam acceptante, scilicet Papa, vel Episcopo. Libera autem ac spontanea esse debet, quæ enim foret per injuriam extorta, nulla est, aut certe annullanda. Hæc autem Beneficii celsio vel fit *tacite*, cum Beneficiatus, exg. minor clericus, uxorem ducit, aut militiæ adscribitur, & ter monitus nolit arma deponere, vel *expresse*, disertis scilicet verbis, & hæc duplex est, *pura*, quæ fit sine conditione, & *conditionalis*, seu in favorem alterius, quæ scilicet fit ea conditione ut Beneficium à Resignante designato conferatur, eaque vel est *simplex*, cum fit absque reservatione, vel *qualificata*, quando fit reservato sibi jure regressus ad idem Beneficium, vel reservata pensione ex eodem Beneficio sibi solvenda, sive certis illius fructibus retentis, sive denique causa permutationis.

Permutatio est Beneficii unius cum alio commutatio, sive similia, & conformia sint, sive non. Permutatio Beneficiorum tunc tantum legitima, & licita est, cum primarius illius finis intenditur, & præ oculis habetur, scilicet Ecclesiæ bonum, atque utilitas.

*Quæres xmo: Quæ circa Resignationem Beneficiorum observanda sunt?*

*Resp:* Sequentia observari debent. xmo: Resignatio pura, sine ullo onere, & absque ulla apposita conditione fieri potest coram Episcopo, in manus ejus Beneficium dimittendo. Qui sic Beneficium resignat, non potest in instrumento suæ dimissionis nominare eum, quem sibi successorem dari exoptat, quamvis non uteretur clausula, *non alias, non aliter, non alio modo*, potest tamen Episcopum rogare, ut tali conferat Beneficium, sed illæ preces nullam imponunt necessitatem, ut huic potius quam alteri conferatur Beneficium. Resignationes vero in favorem tertii aut cum reservatione pensionis, aut quocunque modo

con-



conditionatas, & onerosas Episcopus acceptare nequit, sed solus Romanus Pontifex.

2do: Ut resignatio etiam simplex sit licita, debet fieri ex justa causa, bonum Ecclesiæ, vel spirituale Resignantis utilitatem spectante. Has Pius 5. Papa in sua Constitutione anno 1568. emanata enumerat, suntque sequentes. 1mo: si Beneficiarius sit senex, septuagenario proximus vel major. 2do: si sit valetudinarius. 3tio: si est corpore impeditus, paralyticus, apoplecticus, mutus, surdus. 4to: si plura Beneficia obtinuerit incompatibilia. 5to: si aliquem Ordinem Religiosum ingressus sit. Duas autem conditiones in istiusmodi Resignationibus idem Pontifex observandas esse decernit ne Beneficia resignata quocunque modo, aut circuitione conferantur consanguineis, affinibus Resignantium. 2do: ne promissio, aut conventio aliqua interveniat inter Resignantes, & Collatores, vel Præsentatores.

3tio: Ut resignatio in favorem tertii vel sub onere pensionis sit valida, requiritur. 1mo: ut Beneficium sit Resignantis. Nam resignatio est cessio sui juris. Quod si Resignans commiserit delictum, ob quod certo privabitur suo Beneficio, modo non teneatur illud dimittere ante sententiam Judicis. Resignatio ante illam facta valebit, sed potest irritari. 2do: ut in manus Papæ fiat. Nam Resignationes in favorem, & omnes pactiones in Beneficiis Jure communi fieri prohibentur. Cum itaque in his solus Romanus Pontifex dispensare valeat, tantummodo in manus illius tales Resignationes fieri, & ab ipso solo acceptari possunt. Debet itaque istiusmodi Resignatio acceptari à Papâ, quodsi non acceptetur, Resignans non perdit jus suum. Debet quoque Resignatio acceptari ab eo, in cujus favorem resignatio fit, alioqui Resignans non amittit jus suum, quia non resignat nisi sub conditione si acceptetur.

4to: Resignatio Beneficii cum reservatione pensionis ut licita sit, requiritur quoque justa causa, quæ est indigentia Resignantis, neque alia esse potest. Reditus siquidem Beneficii, ita sunt Beneficio annexi, ut corpus animæ, ideoque natura sua pertinent ad eum, qui Beneficium possidet, ut possit ex eis honestè vivere pro suo ordine, simulque sustinere queat impensas pro divino cultu, & Templi, sacrarumque ædium reparatione necessarias. Hinc ipsa Resignatio Beneficii, non est justa causa pensionis exigendæ, quia jus percipiendi fructus Beneficii fundatur



in Officio, quod resignans dimittit, & in alium transfert. Ratione autem Officii præteriti, nihil potest exigere, cum propter illud redditus jam perceperit.

5to: Benedictus 14. Papa Const. quæ incipit: *In sublimi*: Resignationes Beneficiorum cum reservatione pensionis, & pacto eam cassandi per anticipatas, vel anticipandas solutiones, damnat, & annullat, adjecta pæna privationis Beneficii, & inhabilitatis ad alia assequenda, & restitutionis pecuniæ pro cassatione pensionis perceptæ, atque irritantur istiusmodi cassationes & extinctiones pensionum, ac pensionis commodi pensionis exigendæ.

Quæres 12mo: Quæ præterea circa Resignationes scienda. & annotanda sunt?

Resp: Præter illa, quæ jam adducta sunt, hæc circa Beneficiorum Resignationes scienda, & annotanda sunt. 1mo: Post resignationem etiam in favorem tertii factam, Beneficium neque à Papa conferri posse sine scitu, & consensu Patroni, si Beneficium habeat Patronum laicum. 2do: Beneficium in favorem tertii resignatum, ei, in cujus favorem resignatum est, conferri debere, non alteri, alioqui collatio Beneficii non valebit, quia resignans sub hac conditione resignare censetur, ut huic conferatur, & non alteri. 3tio: si Beneficium resignans sit infirmus, debet supervivere viginti dies post factam resignationem, alias censetur Beneficium vacare per obitum, non per resignationem, ac proinde vigore illius facta Beneficii collatio irrita est, & nulla. Insuper ex iure communi non licet infirmo, in periculo mortis constituto suum resignare Beneficium sub conditione regressus ad illud, si convalescat. Quod & Pius 5. Papa in sua Bulla confirmavit. 4to: tandem in Curia Romana non acceptatur resignatio Beneficii curati, nisi Resignans per tres annos illi inser-  
vierit.

Quæres 13tio: Quomodo permutatio Beneficiorum fieri debeat?

Resp: Permutatio Beneficiorum, valde affinis est Resignationi in favorem tertii factæ: Permutatio enim est quædam mutua, & reciproca beneficiorum resignatio, quæ adinvicem inter permutantes fit. 1mo: igitur in facienda permutatione observare necesse est, ut nunquam sine justa causa fiat. Multæ vero possunt esse permutationis causæ, veluti loci intemperies, unde Beneficiario graves obveniunt infirmitates, inimicitie graves sive cum Patrono Ecclesiæ, sive cum incolis loci; damna spiritualia,

vel



vel etiam temporalia gravia ratione talis Beneficii immunitatis. Ex his autem omnibus ad cohonestandam permutationem, una exurgere debet causa quæ sola sufficere potest, scilicet major Ecclesiæ utilitas.

*2do:* permutatio Beneficiorum propria autoritate fieri nequit, sed vel à Papa, vel ab Episcopo admitti, & recognosci debet, neque permutationes Beneficiorum quæ Juri patronatus subsunt, sine scitu, & consensu Patroni fieri possunt.

*3tio:* si permutatio fiat sine ullo adjecto onere, hæc ab Episcopo admitti potest: Si autem permutatio fiat cum adjectione oneris, vel pensionis, requiritur autoritas Romani Pontificis, quia Beneficia conferri debent sine diminutione reddituum, & sine onere quod iis de jure non inest. Quod si beneficia sint inæqualia, quoad dignitatem, jurisdictionem, simonia erit hanc inæqualitatem per aliquid temporale compensare, quia hæc dignitas, aut jurisdictio est quid spirituale, & tunc res spiritualis æstimaretur, & compensaretur re temporali, quod aperte simoniacum est. Si vero inæqualia sint quoad redditus, & fructus, Papa potest ad inæqualitatem compensandam imponere pensionem Beneficio pinguiori tamquam conditionem ut alter inde annis servetur.

## A R T I C U L U S 3<sup>tus</sup>

### *De vacatione Beneficiorum.*

*Quæres 1<sup>mo</sup>: Quotupliciter Beneficium vacare censetur?*

*Resp:* Beneficium vacare dicitur, cum jam ab eo possideri nequit à quo antea possidebatur. Aliquando autem Beneficium vacat *ipso facto*: aliquando *ipso jure*: & hæc duo plurimum inter se differunt, cum enim Beneficium vacat *solo jure*, potest adhuc Beneficiarius ipsi renuntiare, sive simpliciter, sive in favorem tertii, re adhuc integra, idest si nemo alius à Papa, vel ab Episcopo idem Beneficium definitive impetraverit, sed cum Beneficium vacat *ipso facto*, non relinquitur renuntiationi locus. Unde Beneficium hoc statim dimittendum est, nisi obtineatur ejusdem retinendi dispensatio, aut circumstantiæ non patiantur illud statim dimitti, quod sæpius evenire potest, ut si vg. Parochus cedere Beneficio nequit sine gravi



gravi populorum scandalo, qui ex ejus renuntiatione colligent eum grave aliquod commisisse crimen, cujus jam suspectus est, & propter quod præsumi poterit Beneficio privari.

*Quæres 2do: Quando Beneficium vacare censetur?*

*Resp:* Beneficia quatuor modis amittuntur, atque vacare censentur. 1mo: per naturalem mortem Beneficiati. 2do: libera resignatione, à Superiore, Papa scilicet, vel Episcopo facta, & acceptata. 3tio: per sententiam Judicis propter crimen quod juxta Canones tali privatione puniendum est. 4to: per alterius Beneficii cum priore incompatibilis consecutione, nisi obtineatur à Papa Breve retentionis. 5to: per Religiosam Professionem. 6to: per Matrimonium etiam nulliter attentatum, exg. à Sacerdote. 7mo: per commissum crimen cui ipso jure annexa est Beneficii privatio, qualia sunt hæresis, simonia, sodomia, homicidium per pretio conductum siccarium perpetratum. Attamen reus istiusmodi Criminum, non tenetur statim ante sententiam Judicis declaratoriam Criminiis, Beneficium suum dimittere, nisi hoc expresse habeatur in Jure constitutum. Sed tunc sententia Judicis declaratoria retrahitur ad diem commissi criminis, ita ut non solum omnes Beneficii fructus ab illo die percepti amittantur, sed etiam resignatio vel permutatio illius post admissum crimen facta, rescindi possit.

*Quæres 3tio: Quid sit. & utrum licitus sit regressus?*

*Resp:* Regressus est reditus ad Beneficium ante habitum, atque legitime possessum, quod quis resignavit, permutatione, vel alio quovis modo amiserat. Regressus ad Beneficium est omnino à Concilio Tridentino prohibitus Sess: 25. Cap: 7. his verbis: *Cum in Beneficiis Ecclesiasticis ea, quæ hæreditariæ successione imaginem referunt, sacris Constitutionibus sint odiosa, nemini in posterum accessus, aut regressus, etiam de consensu ad Beneficium Ecclesiasticum, cujuscunque qualitatis concedatur.* Id ipsum etiam vetitum est à S. Pio 5. Papa in Bulla quæ incipit. *Romani Pontificis.* Hinc ei qui ex gravi morbo in periculo mortis versatur, non licet resignare Beneficium sub conditione etiam tacita regressus, si convalescat. Sed ideo Resignans manet in possessione, & administratione Beneficii, donec Resignatarius Beneficii possessionem ceperit.



## CAPUT TERTIUM

*De Simonia.*

Peccatum Simoniae sic dictum est, à Simone Mago, qui primus, quemadmodum habetur Actorum Cap: 8. Apostolis obtulit pecuniam, ut ab eis acciperet potestatem communicandi cuicumque vellet dona Spiritus Sancti. Peccatum in se grave, & Ecclesiae valde perniciosum.

ARTICULUS I<sup>us</sup>*De natura, & multiplici Simoniae divisione.*

*Quæres 1<sup>mo</sup>: Quid sit Simonia?*

*Resp:* Simonia est: *Studiosa voluntas emendi, aut vendendi pretio temporali aliquid spirituale, vel spirituali annexum.* Porro per emptionem, ac venditionem intelligitur hic quilibet contractus onerosus. Sicut enim Simoniacus est qui ex parte dat alicui Beneficium, ut ille ipsi det equum, ita pariter Simoniacus est, qui convenit cum aliquo ut ipse eligatur in Decanum, & ille ab eo in Præpositum. Quamquam vero Simonia ut plurimum committatur cum aliquid pretio æstimabile detur pro spirituali, committitur tamen etiam Simonia quolibet contractu minime gratuito. Imo etiam vera Simonia est, si quis post collatum spirituale, vel spirituali annexum, nullo etiam præcedente pacto dat vel exigit aliquid temporale tamquam debitum, vel ut pretium, mercedem, sive compensationem. Nam tunc facto ipso, temporale æquiparatur spirituali, quasi esset illius pretium, & ideo Ss. Patres Giezi servum Elizei Prophetæ Simoniae arguunt, quod pecuniam pro curatione lepræ miraculose facta petierit, & acceperit. Pariter Simonia est, quando quis intendit pervenire aut pervenit ad spirituale, vel spirituali annexum contra Ecclesiae leges. Per spirituale autem id omne denotatur quod est supernaturale ad cultum Dei, & animarum salutem ordinatum, qualia sunt Sacramenta, Sanctorum Reliquiæ, omnis item potestas spiritualis, & illius



illius usus, veluti actus Ordinis & jurisdictionis Ecclesiasticæ. Quædam etiam temporalia sunt, quæ adeo spirituali annexa sunt, ut hæc vendi non possint, quin illud etiam vendatur. Sic vendi nequit, quod est in Beneficio temporale, quin etiam vendatur quod est spirituale.

Hinc ergo dupliciter Simonia committitur. *amo:* Cum res ipsa spiritualis emitur, venditur. Res vero spiritualis, atque supernaturalis, vel est *formaliter*, ac per essentiam talis, veluti gratiæ divinæ, character, per Sacramenta animæ impressus, vel est *causaliter*, ratione spiritualis effectus quem producit, quo sensu Sacramenta, & Sacramentalia, sacræ Conciones, & alia quæ gratiam pariunt, spiritualia, ac supernaturalia dicuntur, vel est *effective*, prout est effectus à causa supernaturali proveniens, sic actus prophetandi, spiritualis est, quia nascitur ex causa spirituali, & ad salutem fidelium, ad ædificationem Ecclesiæ ordinatur. Tales etiam sunt, Benedictiones, Consecrationes, usus Ecclesiasticæ jurisdictionis, veluti Dispensationes, Absolutiones.

*2do:* Committitur Simonia quando emitur, venditur, res temporalis, rei spirituali annexa. Porro annexum spirituali illud est, quod licet in se sacrum non sit, sit tamen aliquatenus sacrum, per suam cum rebus sacris connexionem. Hoc temporale spirituali annexum triplex distinguitur, aliud enim est annexum *antecedenter*, quod scilicet prius est in se, quam spirituale fiat per suam cum spirituali connexionem. Talis est fundus, cui advenit jus Patronatus, quod est spirituale, item Vas, Lapis, Balsamum, vestes, quæ postea consecrari, aut benedici contingit. Aliud est annexum spirituali *concomitanter*, quod nec antecedit, nec sequitur, sed comitatur ipsum spirituale, ut labor corporis in celebrandis Missis, & is quidem labor vel annectitur extrinsece, ut si Missa in loco remoto, aut arduo celebranda sit, vel intrinsece, ut labor qui Missam communem comitatur. Aliud est annexum *consequenter* quod præsupponit rem sacram, & per suam ab ea dependentiam, spirituale reputatur. Sic temporales Beneficii redditus, spirituale quid censentur esse, quia pendent à causa spirituali, nempe à spiritualibus Beneficiarii officiis, propter quæ ipsa Beneficia instituta sunt, & ex ipsius redditibus retribuantur.

Quotiescunque ergo spirituale pro temporali emitur, venditur, semper est Simonia jure naturali, & divino vetita. Sed etiam sæpius Simonia est, quando res tem-



poralis, spirituali annexa pretio temporali comparatur,

*Quæres 2do: Quotuplex est Simonia?*

*Resp:* Simonia *imo* triplex est, mentalis, conventionalis, & realis. Simonia *mentalis* hic non ea dicitur, quæ in sola mente consummatur, neque transit ad opus externum, sed illa est, qua quis dat temporale pro spirituali, aut spirituale pro temporali, sine ullo quidem pacto tacito, vel expresso exterius manifestato, sed hæc tamen interna mentis intentione, ut alium moveat ad dandum sibi spirituale pro suo temporali, aut vicissim. Hæc Simoniæ species aliquando ab uno solum, quandoque ab utroque committitur. Ab uno quidem, ut si Episcopo, Patrono, eorumve amicis, pro nulla, aut levi mercede serviat aliquis ea mentali prorsus intentione, ut ab iis Canonicatum accipiat. Ab utroque vero, ut si Prælati Beneficium quod exterius gratis conferre videtur, ea intentione Titio conferat, ut ia Secretarii, aut Capellani munus apud se gerat, & is eodem interiori animo illud acceptet. Quodsi eorum unus aliquid exterius agat, aut dicat, unde alter in notitiam perversæ hujus intentionis deveniat, jam Simonia quæ initio mentalis fuerat, transibit in conventionalem, quin & in realem effectum subsecuto.

Simonia *conventionalis* est venditio, vel emptio rei spiritualis cum pacto tacito, vel expresso, sed reali executione nondum utrinque completa. Si conventio solum peracta sit, nihilque prorsus traditum sit, aut receptum, Simonia erit *pure conventionalis*; si vero ex una parte aliquid datum sit, puta si pretium solum sit temporale, sed nondum tradita sit res spiritualis, aut vicissim, erit Simonia *conventionalis mixta*, sive etiam *semirealis*. Neque hæc vera esse simonia desinet, etiamsi qui promissit temporale se daturum, nunquam habeat intentionem solvendi, quod promiserat, quia qui promittit etiam fidei, mediante temporali, promissione scilicet, pervenit ad spirituale, quod simoniacum est. Haud tamen erit Simonia vere realis donec utrinque conventio peracta, ac completa, sive ex integro sive ex parte solum compleri cæpta fuerit.

Simonia *realis* est pactum pretii temporalis utrinque completum saltem ex parte, ut si datum sit Beneficium pro centum aureis nummis, ex toto, sive ex parte tantum persolutis, sed persolutis realiter, non vero dato chirographo, quia Chirographum spondet rem temporalem.



poralem, & pretio æstimabilem, sed non magis ea traditur scripto, quam verbis. Traditio ergo chirographi non inducit Simoniam in sensu Canonum realem, quæ nimirum Canonicis pænis subjaceat. Quare etiam, si duo sibi scripto promississent, ille pecuniam, iste Beneficium, & neuter pactum executus esset, erit Simonia pure conventionalis.

1do: Simonia alia est quæ adversatur juri tum naturali, tum divino, alia quæ solum juri Ecclesiastico opponitur, alia denique dicitur confidentialis. Simonia quæ adversatur juri naturali, & divino, est ipsa venditio rei spiritualis, quæ sacra est, ut si Chrisma majori pretio venderetur, quia consecratum est. Et talis Simonia ab intrinseco mala est, atque ideo prohibita, quia mala. Simonia quæ opponitur juri tantummodo Ecclesiastico, est quævis ratio comparandi spirituale, Ecclesiæ tantum legibus reprobata propter reverentiam rei sacre, & multa mala inde emergentia, ut cum quis Beneficium permutat propria sua autoritate. Et hæc Simonia mala est, quia justis de causis ab Ecclesia prohibita fuit. Simonia *confidentialis* est Simonia *conventionalis mixta*, qua quis procurat Beneficium alteri cum pacto tacito, vel expresso, quod iste illud idem postea resignaturus sit, seu ipsimet procuranti, seu alteri cuilibet ad nutum procurantis, aut ex eo vel fructus, vel pensionem aliquam sine legitima auctoritate constitutam solutus sit. Et quidem 1mo: simonia *conventionalis mixta*, quia ut confidentialia subjaceat pænis per Canones constitutis, prærequiritur partium conventio saltem tacita, & ex parte saltem adimpleta, pura enim conventio nulla ex parte adimpleta, non inducit juris pænas, conventio itaque istiusmodi saltem ex parte adimpleri debet, nempe Beneficii traditione, & ex tunc pænæ Ecclesiasticæ incurruntur. 2do: simonia autem hæc confidentialis reperiri potest, non in præsentationibus solum aut collationibus Beneficiorum, sed & in resignationibus & electionibus. Non tamen habet locum nisi in Beneficiis. Unde reus Simonie confidentialis non est qui vel pensionem recipit sub pacto futuræ retrocessionis, vel consentit ut Beneficio, quod olim canonicè recepit, pensio imponatur, præmisso pacto quod Pensionarius post aliquot annos, vg. absoluto studiorum curriculo illam transferat in tertium. Quia Pensio non intelligitur nomine Beneficii in materia Simonie confidentialis. Qui tamen ut Beneficium recipiant, pensionem spondent, qui item Benefi-



beneficium dando, pensionem exigunt, rei sunt Simonia confidentialis, illiusque pœnis subjacent. Simonia ergo confidentialis est, quando quis alteri Beneficium procurat, eligendo, præsentando, postulando, commutatione, commendatione, vel alia ratione, cum confidentia, hoc est; cum pacto expresso vel tacito, ut is cui Beneficium procuratur illud aliquando resignet procuranti, vel alteri; aut ut pensionem, vel fructus aliquos ex eo præstet. Hæc graviter, & sub gravissimis pœnis prohibita est, præcipue à Pio 4. Bulla 85. & à S. Pio 5. Bulla quæ incipit *Intolerabilis*. Dicitur autem hæc Simonia confidentialis, quia procuratio Beneficii tota nititur confidentiæ pactionis, vi cuius Beneficium ipsum, vel fructus illius pensione expectatur, atque obtinetur. Jam vero ad istiusmodi Simoniam confidentialem requiritur. *amo:* pactum, sublato siquidem pacto, vel nulla occurreret Simonia, vel non erit confidentialis. Hinc simonia confidentialis non erit reus, qui sine ullo pacto dat Beneficium Titio, confidens Titium eodem Beneficio in favorem tertii renunciaturum esse; si forte ad Episcopatum promoventur. Pariter ab hac Simonia, immunis est, qui Beneficium quod ante possederat; abdicat, & Patronum precatur ut illud Nepoti suo conferat. Preces siquidem, si bona fide fiant; pactum nullum involvunt, & plenam Patrono relinquunt libertatem præsentandi ad Beneficium quem voluerit.

*2do:* Istud pactum quod ad Simoniam confidentialem prærequiritur, est de resignando eodem ipso Beneficio. Quare Simonia confidentialis non committitur nisi in duobus casibus. *amo:* cum procuratur alicui Beneficium eo pacto ut illud ipsum vel procuranti, vel alteri aliquando renuntiet. *2do:* cum procuratur alicui Beneficium cum reservatione pensionis, aut fructuum ex eodem Beneficio sive ab ipso procurante, sive ab alio, quem ipse designaverit, percipiendorum.

*Quæres 3tio: Quot modis Simonia confidentialis committitur?*

*Resp:* Simonia confidentialis quatuor modis committitur, scilicet accessu, ingressu, regressu, & stipulatione pensionis. Et quidem *amo:* *accessu*, quando is qui ad obtinendum Beneficium concurret, confidit ex inito pacto idem Beneficium sibi vel alteri resignaturum iri, cum sublata impedimenta fuerint, propter quæ, Beneficium illud actu, & de facto ab eo obtineri, vel ab alio possideri nequit, & ideo confidentialis hæc Simonia dicitur committi

per



per accessum, quia per eum quispiam accedit ad Beneficium, quod non possidebat. Et sic exg. Episcopus volens alicui, per aetatem ad possidendum Beneficium inhabili, gratiam præstare, si illud alteri conferat ea conditione, ut quamprimum ille ad annos competentes pervenerit, ipsum ei cedat, Simonia confidentialis reus est, sicut & ille, qui hoc modo ad Beneficium pervenit.

2do: *ingressu*: cum quis Beneficium sibi collatum, sed cujus possessionem nondum capit, alteri resignat, servato sibi jure possessionem illius capiendi posita certa quadam conditione: puta si Resignatarius præmoriatur, aut pingvius Beneficium obtineat.

3to: *regressu*: cum quis eo pacto Beneficium resignat, cujus jam possessionem asecutus est, ut jus habeat ad illud regrediendi, si exg. Resignatarius aliud recipiat incompatible, aut si pensionem statutam non solvat.

4to: denique *stipulatione pensionis*, cum quis, ut Beneficium recipiat, spondet se ex ejusdem redditibus soluturum esse pensionem conferenti, resignanti, aut alteri ex eorum voluntate,

Hinc non erit Simonia confidentialis, sed tantum conventionalis, quando quis resignat, aut permutat Beneficium unum, ea conditione ut Resignatarius, aut Compermutatorius suum Beneficium, quod possidet, dimittat in favorem tertii. Quia ad Simoniam confidentialem requiritur ut accessus, ingressus, regressus, sit ad idem Beneficium, in hoc vero casu, non est accessus ad idem Beneficium, sed ad aliud. Bene autem omnia ponderanda sunt: quando, & in quibus se immiscet Simonia confidentialis, quia pænæ contra eam graviores latæ sunt à Romanis Pontificibus, maxime Pio 4. & 5to. quam contra ceteras Simonia species, non quod ipsa gravius foret peccatum, sed quia per ipsam plura in Ecclesiam invecta sunt mala.

*Quæres 4to: Simonia quale est peccatum?*

*Resp:* Simonia est gravissimum peccatum. Quia ex Actibus Apost: Cap: 8. constat, quod statim, ac Simon Magus suam de comparandis pecunia donis Spiritus Sancti intentionem Apostolis manifestavit, illico à S. Petro his percussus est verbis: *Pecunia tua tecum sit in perditionem, quoniam donum Dei existimasti pecunia possideri.* Hinc Gelasius Papa sic inquit: *Dantem, & accipientem damnatio Simonis involvit.* Paschalis quoque Rom: Pontifex ait: *Omnia crimina ad comparationem Simoniacæ he-*

*T. II. M.*

*Aa*

*resis*



resis, quasi pro nihilo reputantur, & Canones Ecclesiastici Simoniam vocant, *execrabile flagitium, flagitium particulare*. Et vero per Simoniam gravis irrogatur irreverentia rei sacræ, ac per consequens ipsi Deo, qui rerum sacrarum est author, ac institutor, dum scilicet res sacra, sive illi indivulse adhærens, tamquam vilis, & profana tractatur, & cum sit inæstimabilis, atque invendibilis, pretio temporali æstimatur, atque comparatur, tamquam venalis tractatur, & per hoc deprimitur. Unde Simonia omni jure naturali, divino, & Ecclesiastico severissime prohibita est.

Neque Simonia potest esse veniale peccatum ex ratione parvitatæ materiæ. Quia quo vilius offertur pretium pro re spirituali, eo magis contemni & vilipendi ipsa censetur, & res spiritualis quæcunque ea sit, etiam minima tantæ est dignitatis, & tam alti ordinis, ut indigna ipsius contrectatio & gravis sit, & gravem Deo inferat injuriam. Ut vero gravissimum Simonia contrahatur peccatum, non est necesse, ut quis det, vel accipiat temporale, tamquam pretium rei spiritualis, sed sufficit ut dando temporale, illo utatur tamquam motivo, ac medio ad spirituale obtinendum. Certe nullus inveniri potest tam rudis, ac hebes, ut pretium rei temporalis arbitretur æquivalere pretio rei spiritualis, nemo igitur eo usque delirabit, ut temporale tamquam pretium pro re spirituali offerat, sed ipsa utitur tamquam medio ad alsequenda spiritualia, ipsa offert, dat, ut moveat, excitet, alicat ad sibi spiritualia conferenda, atque hoc faciens, moraliter ac communi hominum sensu censetur re temporali, spirituale emere, & comparare. Sane qui dat munera Judici, ut iis ipsum attrahat ad proferendam iniquam in sui gratiam sententiam, & ille dicitur iniquitatem emissee, & Judex justitiam vendidisse reputatur, quia nempe dat unum pro altero, iniquam sententiam pro acceptis muneribus. Ita pariter rem spiritualem pro temporali ille censetur emere, qui munera offert, ut iis sive Patronus, sive Collator permotus, Beneficium sibi conferat, atque spirituale accipit pro temporali. Ille quoque vere reputatur pro temporali spirituale vendere, qui collatis sibi muneribus excitatus, Beneficium confert, quia pro temporali, re ipsa dat spirituale. Hinc Innocentius Papa xi. sequentem damnavit propositionem: *Dare temporale pro spirituali non est Simonia, quando temporale non datur tamquam pretium, sed duntaxat tamquam motum conferendi.*



*di, vel efficiendi spirituale, vel etiam quando per temporale fit solum gratuita compensatio pro spirituali, aut e contra.*

*Quæres 5to: Utrum committatur Simonice peccatum, si ematur, aut vendatur res temporalis, spirituali annexa?*

*Resp: amo:* Quod est quovis modo annexum spirituali, nunquam potest sine Simonia emi, aut vendi ratione rei spiritualis cui annexa est. Nam tunc ipsa res spiritualis pretio æstimaretur, & venderetur. Hinc non licet calicem pluris vendere quia consecratus est, quam venderetur si non esset consecratus, neque fundum plus æstimare, quia annexum habet jus Patronatus.

*2do:* Temporale antecedenter annexum spirituali, seu temporale, cui postea spirituale advenit, veluti fundus, cui postea accedit jus Patronatus, vas quod postea consecratum est, licite emi, & vendi potest, ratione ipsius temporalis materiæ, artificii, modo non vendatur majori pretio ob spirituale ei annexum, quam sine illo valeat. Quia res illa temporalis retinet suum valorem intrinsecum, nec ita dependet a re spirituali, ut ea vendita, hæc quoque vendi censeatur. Sic vendi possunt Calices consecrati, ad subveniendum necessitatibus Pauperum, & fundus cui annexum est jus Patronatus, quod tunc concomitanter transferretur cum fundo, sed ipsum non venditur, cum pretium soli fundo respondeat. Verum sunt quædam res sacræ, quæ vendi omnino prohibentur, quales sunt Ecclesiæ.

*3tio:* Vendi nequeunt temporalia, quæ concomitanter spirituali annexa, & ei intrinseca sunt, seu per se ipsi conjuncta. Sic labor & alia opera necessaria ad exercendam functionem sacram, veluti Missam celebrandam, Concionem habendam. exg. illius præparatio, studium. Quia labor, & opera istiusmodi cum sint intrinseca actioni spirituali & ab ea inseparabilia, vendi non possunt, quin ipsa actio spiritualis vendatur, & labor & opera necessaria ad actionem spirituales perficiendam coalescunt cum ea in unum opus morale, & sic conditionem, & rationem ipsius induunt, neque æstimationem, aut utilitatem habent, nisi ratione operis principalis ad quod ordinantur. Secus ergo ab actione spirituali pretio æstimari nequeunt, nec proinde vendi possunt. Secus si labor, fatigatio, vel alia opera, sint actioni spirituali extrinseca, & per accedens ipsi adiaceant, ut fatigatio longioris itineris ad celebrandam Missam in loco disito, illa enim & per se pretio æstimabilia sunt, & ratione sui vendi, ac emi possunt.



Nam hæc nihil habent in se spirituale, & ab actione spirituali sunt separabilia.

4to: denique temporale consequenter annexum spirituali, scilicet temporale, quod præsupponit rem spiritua-lem, & ab illa dependet, sine simonia vendi non potest, quia non potest acquiri nisi ratione rei spiritualis, nec vendi nisi vendatur spirituale præsuppositum. Præterea, quod consequenter est annexum spirituali, ipsum spiritua-le supponit, & se habet velut ejus accessorium. Accessorium autem naturam principalis sequitur. Ergo cum principale sine Simonia vendi nequeat, neque etiam ipsius accessorium poterit vendi. Unde Simonia erit vendere, vel emere redditus Beneficio Ecclesiastico annexos, aut ex officio spirituali provenientes.

*Quæres 6to: Quale datum temporale pro spirituali oblatum, efficit Simoniam?*

*Resp:* Datum temporale pro spirituali, *munus Simoniacum* vocatur, & juxta S. Gregorium Magnum triplex est, scilicet: *munus ab obsequio, munus à manu, munus à lingua.*

*Munus ab obsequio*, est quodlibet opus indebitum & temporale præstitum, aut præstandum in commodum & utilitatem alterius sub pacto expresse, vel implicite, aut cum intentione interius habita acquirendi rem aliquam spiritualem. Hinc Simoniaci sunt. 1mo: Qui Magnatum negotia gerunt, aut Liberos ipsorum in litteris instruunt, ut eorum favore Beneficium consequantur. 2do: Pariter Simoniacus est, qui aliqua munia penes Episcopum exerceat ut Canonicatum, aut Prælaturam aliquam obtineat. 3tio: Qui dat Beneficium alicui cum pacto, vel ex ea intentione ut exinde suis consanguineis, vel aliis pauperibus provideat. 4to: Qui confert alicui Beneficium ut extinguatur stipendium, quod alioqui solvere teneretur. 5to: Qui ad Beneficium aliquem præsentant cum pacto, ut vel tot Missas pro iis celebret, vel quæ in fundatione præscribuntur, pro illorum commodo, certo die, & tali hora, aut loco celebret, cum ex fundatione Beneficii locus & tempus celebrandi prædictas Missas Beneficiarii libertati, ac voluntati permisa sint. Quia in his omnibus casibus, promittitur, datur, exigitur aliquid pretio æstimabile, aut imponitur obligatio, quæ & ipsa pretium habet. Si tamen exigatur debitum spirituale, exg. obsequium Beneficio annexum, non erit Simonia.

*Munus à manu*, pecunia est. Porro per pecuniam intelli-



telligitur res quælibet externa, cujus pretium potest pecunia æstimari, sive res illa sit mobilis, sive immobilis, sive corporalis, sive incorporalis, atque etiam ipsius privatio, sive tandem imposita obligatio, factaque promissio. Hinc munus à manu dare, vel polliceri censetur. *1mo:* Qui Patrono, aut Collatori Beneficium sibi conferenti remittit pensionem, aut debitum præsens, vel futurum, qui enim remittit id, quod sibi debetur, moraliter illud donat. Ideo non solum qui debita sibi, sed etiam qui debita Ecclesiæ remittere appromittit, Simoniacus est, quia munus temporale offert, licet ex re aliena. Pariter Simoniacus est, qui bona tradit Capitulo Ecclesiæ cum pacto, ut in ea pro Canonico recipiatur, qui Capellam fundat ea intentione, ut ipsa sibi conferatur, denique simoniacus est Episcopus, qui aliquem ordinat accepta promissione, quod nihil ab eo in locum tituli petiturus sit, & qui in bonis suis titulum pro ordinatione alicui constituunt, accepta ab eo promissione nihil unquam exigendi. *2do:* Munus à manu dare, & polliceri censetur, qui Beneficium accipiunt sub conditione locandi domum suam, aut fundum prætio minori quam valeat, desistendi à lite juste inchoata, à repetitione pecuniæ mutuo datæ. *3tio:* Eiusdem sceleris rei sunt, qui solvunt expensas à Resignante Beneficium in ejus asecutione factas, qui suscipiunt in se onus restaurandi Ecclesiam, Domum Plebanalem, quam ille restaurare tenebatur, qui ex pacto emunt suppellectilem Resignantis, ei jam inutilem, vel debita ipsius ex eodem pacto solvunt. Quia hæc omnia prætio sunt æstimabilia, adeoque si ex pacto fiant, à simoniaca labe excusari nequeunt.

*Munus à lingua* est favor, sive laus, commendatio, adulatio, preces, & similia, quæ ex vi pacti expressi, vel taciti lingua exerceri solent in favorem illius, qui rem spirituales, vel dat, vel asequi intendit. Hinc Simoniaci sunt, qui dant Beneficium alteri, ut ejus pater apud Principem de se bene loquatur, qui obsequia spiritualia Magnatibus præstat, ut inde aliquod emolumentum temporale capiat, qui ad preces Magnatum Beneficia conferunt, ut eos sibi devinctos habeant. In his tamen si desit pactum, non alia erit simonia, quam mentalis.

*Quæres 7mo: Estne simoniacus qui precibus sibi pro aliquo alio porrectis permotus, Beneficium ei confert?*

*Resp:* Qui ad preces sibi ab aliquo porrectas ut eum sibi obliget, confert, aut promittit se alicui Beneficium



cium collaturum esse, Simoniacus est. quia Collator per Beneficii hujus promissionem, collationem, negotiatur, atque temporalem favorem alterius querit, eumque sibi obligatum vult habere, qui vero hac via intendit Beneficium obtinere, efficit ut is, qui pro eo preces porrigit, Beneficium conferenti subjectus, atque obligatus sit, quæ omnia pretio æstimabilia sunt. Seclusa autem hac memorata intentione, aut simili motivo, qui ad alicujus preces Beneficium confert non est Simoniacus, potissimum si digno & capaci illud concedat. Quia preces sumptæ ut nuda petitio, non impediunt ne gratis illud Beneficium detur, & qui pro digno, ac bene merito preces porrigit, ut ei Beneficium conferatur, opus bonum, & Ecclesiæ utile præstat. Quodsi preces pro indigno, & incapaci fiant, eique Beneficium conferatur, erit Simonia præsumpta. Quia cum tunc Collator non moveatur dignitate illius, cui dat Beneficium, præsumitur moveri favore humano, receptione, vel spe alicujus lucri temporalis, quod reipsa simoniacum est. Verum si hoc pessimum desit intentum, Simonia non erit, sed aliud erit peccatum grave, quia indigno, & incapaci dat Beneficium.

Ex his facile inferri potest, quid sentiendum sit de eo, qui donis, obsequiis, agit apud familiares Episcopi, Magnatis, qui plurium Ecclesiarum Patronus est, ut ii pro se apud ipsos agent, quatenus aliquod Beneficium obtineat. Is siquidem si hoc unum intendat, ut liberior ipsi pateat ad Episcopum, Magnatem, accessus, nihil hic erit Simonia. Si vero id querat, ut eorum commendationibus Beneficium obtineat, utique Simoniacus erit. Si demum ut illi simpliciter merita, habilitatem, dignitatemque ipsius exponant, potest id quidem absolute à Simonia vacare, sed ob periculum, vix, & forte nunquam in praxi id fieri debet, quia raro evenit, ut, qui hac via querit Beneficium, non intendat aliorum precibus, & commendationibus illud obtinere, quod reipsa Simoniacum est.

*Quæres Svo: Quando munus, datumque temporale occasione rei spiritualis alteri exhibitum, à Simonia immune censi potest?*

*Resp:* Aliquando datum. ac munus temporale occasione rei spiritualis, immune est à Simonia. Et quidem *xmo:* Cum occasione rei spiritualis, aliquid temporale datur pure gratuito, atque liberaliter. Quia quod omnino gratis, ac liberaliter datur, nullo interveniente tacito aut expreso pacto, non datur per modum pretii pro re spiritali.



rituali, neque ea intentione ut is cui fit donum, ad refusionem alterius doni spiritualis accendatur. Verum sub hoc gratuitæ donationis titulo, sæpius latet Simonia, dum id, quod gratis dari dicitur, vix alia, quam obtinendæ rei spiritualis, exg. Beneficii vacantis intentione datur, aut datur ex pacto. Pactum vero ex natura sua obligationem fidelitatis, & justitiæ importat, ac proinde gratuitæ donationis naturam evertit. Neque ad Simoniam requiritur pactum expressum, sed sufficit tacitum, quod semper præsumitur, cum dans Beneficium, & sperans datum, munusque aliquod exigit, vel etiam verbis, aut nutibus alterum hortatur, monetque, ut suo tempore memor sit, gratumque se præbeat.

2do: Cum aliquid accipitur titulo stipendii, & congruæ sustentationis veluti occasione functionum Ecclesiasticarum, quæ à Ministris Ecclesiæ perfici solent, ut enim inquit Paulus Apostolus 1. Corinth: Cap: 9. *Quis militat suis stipendiis unquam?* Hinc culpa carent fideles, qui Ecclesiæ Ministris temporalia bona largiuntur, sive ipsi sacri Ministri, qui pias oblationes, vel alia stipendia consuetudine, aut Ecclesiæ legibus permessa accipiunt. Sæpe tamen sub stipendii pretexto latet Simonia, vel aliquid instar simoniæ prohibitum, unde juxta multos Theologos, qui plus exigit stipendii, quam sibi vere debitum sit, non solum violatæ justitiæ, sed & Simonix reus est, quia quod stipendii locum non habet, non alio excipi videtur titulo, quam in pretium spiritualis Ministerii. Idem dicendum de iis, qui de novo stipendio paciscuntur pro functionibus spiritualibus, ad quas, jam ex officio, vel fundatione tenentur.

3tio: Cum aliquid datur ad redimendam injustam vexam, dum illam quis pecunia, muneribus, arcere satagit, cum ad Superiorem pro juris remediis ad se liberandum recurrere non valet, & à consecutione boni spiritualis in quo jus habet, impeditur. Quia tunc non datur temporale pro spirituali, quod jam ipsius est, & in quo jus certum habet, sed datur pro liberatione ab injuria, pro celsatione injustæ vexationis quæ temporalia sunt, & de quibus pacisci licitum est.

Hic tamen observanda sunt nonnulla. 1mo: Ne res, quæ ad iniquæ vexationis redemptionem traditur, sit spiritualis. Si quis enim in pingui Beneficio vexetur, & tenue vexatori tradat, aut promittat, ut eum vexare desistat, simoniacus est, quia spirituale dat pro temporali.

ut



ut scilicet à vexatione liber sit. 2do: Ut vexatio, quæ redimitur, vere injusta, & iniqua sit, si enim justa sit, aut saltem probabile sit ipsam justam esse, tunc redimi nequit, nam tunc temporale non daretur pro cessatione vexationis, non enim vexare censetur, qui jus suum prosequitur, sed pro're ipsa spirituali, ad quam pervenire, aut in qua possidenda se stabilire vult, dat temporale. Certe non licet ope pecuniæ, aut muneribus, jus adhuc infirmum ac debile, quod quis in Beneficio habet, stabilire, ac firmare. 3tio: Ne ista redemptio fiat ab iis, qui non habent *jus in re*, sed solum *jus ad rem*, quod graviter est ponderandum, inde enim sequitur eum qui à Patrono nominatus est ad Beneficium, cujus institutio sibi inique denegatur Simoniacum esse, si vexationem hanc redimat, quia sola institutio canonice facta, tribuit *jus in re*, firmatque Beneficium. Idem dicendum, qui, ut Collatoris consanguineum, & infenso sibi amicum reddat, eidem munera offert, ne diutius ipsius institutio differatur. 4to: Cavendum summopere ne redemptio, & amotio vexationis, sit reipsa collatio, atque acquisitio rei spiritualis, quia sicut res ipsa spiritualis emi nequit, sic neque tunc vexatio redimi potest. Hinc electus ad aliquam Prælaturam, cujus confirmatio ab Episcopo dependet, si illam ipse etiam injuste deneget, hanc vexationem electus redimere nequit, quia in hoc casu removendo vexationem, acquiritur confirmatio electionis, quæ cum sit quid spirituale, emeretur spirituale pro temporali, quod Simoniacum est.

## ARTICULUS 2dus

*In quibus Simonia committitur, & quæ sint Simoniacorum pœnæ.*

*Quæres 1mo: In quibus præcipue Simonia committi solet?*

*Resp:* Simonia præcipue committi solet in Beneficiis, Sacramentorum administratione, Ordinum sacrorum collatione, Ecclesiasticarum functionum exercitio, Religionis ingressu, & aliis quam plurimis rebus spiritualibus.

*Quæres 2do: Quando in administratione Sacramentorum committitur Simonia?*

*Resp:* Pro confectione, & administratione Sacramentorum exg. Baptismi, Pœnitentiæ, Matrimonii, aliquid tem-



temporale exigere, accipere, Simoniacum est. Sacramenta siquidem sunt Sacratissima, eorum confectio, administratio, actiones sunt sanctissimæ, neque ergo pretio temporali æstimari, neque vendi possunt. Porro cum aliquid pro iis exigitur, atque exactione extortum accipitur, veluti pretium, solutioque pro iis debita accipitur, quod Simoniacum est. Quare istiusmodi exactiones graviter prohibita sunt tum à Conciliis generalibus Lateranensi 3tio: & 4to: tum à multis Nostrarum regionum Provincialibus & Diæcesanis Synodis, & merito: ut enim habet S. Thomas Doctor. 2. 2dæ quæst: 100. *Hoc habet quandam venditionis speciem.* Cum tamen invaluerit usus, ut aliqua penes administrationem Baptismi, Matrimonii offerantur, hæc licite recipi possunt, quia ex liberalitate, & devotione populi offeruntur, & dantur aut in sustentationem Ministrorum Ecclesiæ, aut quatenus in pios usus expendantur.

Pariter pro functionibus Ecclesiasticis, atque officiis spiritualibus, veluti Benedictionibus, Exequiis, Exorcismis, Concionibus, aliquid temporale exigere, & accipere, simoniacum est, quia hæc sacra, ac spiritualia sunt, ac proinde nihil temporale pro iis exigi, aut accipi potest. Neque in his peragendis labor intrinsecus pretio æstimari potest, quia ipsam spiritualem functionem actionemque sacram constituit. Pro labore autem extrinseco, defatigatione accidentali, pro factis expensis exg. in perficiendo itinere, in adornanda pro Sepultura Ecclesia, aliquid exigere, & accipere licitum est, quod tamen moderatum esse debet, ut vitetur omnis species turpis mercimonii. Sed præterea quæ occasione Sacrarum functionum à Fidelibus sponte offeruntur, accipi possunt, quia rationem habent eleemosynæ, & pro sustentatione, necessitatibusque temporalibus Ecclesiæ Ministris offeruntur. Pastori tamen ceterique Ministri, qui ex officio tenentur Sacramenta populis ministrare, mortuorum Cadavera sepelire, funeralia celebrare, & alia istiusmodi præstare, aliunde ex Ecclesiæ redditibus congruam habent sustentationem, peccant, si hæc populis præstare omittunt, quia nova eis stipendia non porriguntur.

*Quæres 3tio: Quot modis in collatione, & exercitio sacrarum Ordinum Simonia committitur?*

*Resp:* Simonia committitur. 1mo: Quando Ordines conferuntur, recipiuntur, mediante quovis munere temporali, scilicet propter pecuniam, sive propter alia dona temporalia



ralia. Quia per Ordinationem confertur gratia Spiritus Sancti, potestasque sublimis, atque supernaturalis, cuius Ministri sunt Episcopi, non venditores. Rarum quidem est, ut pro Ordinatione accipiatur pecunia, aut aliud munus, quod à manu dicitur, sed summo opere cavendum est, ne hic irrepat *munus à lingua*, *munus ab obsequio*, dum sæpe ad Ordines admittuntur seu propter amicorum preces, seu intuitu servitii præstiti, vel præstandi ab Ordinato.

2do: Simoniaci sunt, tum is qui præsentat, tum is qui ordinat aliquem, juramentum, vel promissionem ab illo recipiens, quod super alimentis, quæ Episcopus debet ei, quem sine titulo ordinat, non inquietet eum, & nihil postulet ab illo, tuncque Ordinator à collatione, præsentator vero ab executione Ordinum, & ordinatus ab Ordine sic suscepto donec dispensationem super hoc per sedem Apostolicam obtinere meruerint suspensi sunt. Sic statutum est Cap: 45. de Simonia.

3tio: Episcopi, & eorum Ministri gravis culpæ rei sunt, si munera quamvis exigua, etiam sponte oblata, non solum ante, sed & post Ordinationem recipiunt. Notarii vero, pro litteris dimissoriis, aut testimonialibus collationis Ordinis decimam tantum unius aurei partem accipere possunt, quando nullum eis solarium est constitutum pro suo officio exercendo, nec Episcopus ex Notarii commodis ullum emolumentum ex eisdem Ordinum collationibus directe, vel indirecte percipit. Qui secus fecerint, tam dantes, quam accipientes, ultra divinam ultionem pænas à jure inflictas ipso facto incurrunt. Sic statuit Concil: Trident: Sess: 21. Cap: 1: de Reform: Notarius ergo cui aliquid solarium, quantumvis modici ab Episcopo constitutum est, nihil recipere potest pro istiusmodi sive Dimissoriis, sive testimonialibus litteris. Quia Synodus Trident: iis tantum Notariis aliquid accipere permittit, quibus nullum solarium est constitutum, de illis vero qui modicum etiam solarium accipiunt, non potest dici quod nullum accipiant. Nihil ergo illi à Dimissoriis, atque literis testimonialibus recipere valent. Examinatores quoque Ordinandorum, atque ad Beneficia promovendorum, serio cavere debent, quemadmodum idem Concilium præcipit Sess: 24. Cap: 28. de Reform: ne quidquam prorsus occasione hujus examinis, nec ante, nec post accipiant, alioquin Simonix vitium tam ipsi, quam dantes



dantes incurrunt. Si ergo pro collatione Ordinum, etiam primæ tonsuræ accipiat, Simoniacum erit.

Quod vero attinet Ordinum exercitium, certum est, functiones quaslibet Ordinum etiam Minorum exercere propter solum temporale lucrum, & pro illis quidpiam exigere, accipere, Simoniacum est. Omnium siquidem Ordinum functiones sacræ sunt, vendi ergo & pretio temporali æstimari non possunt. Imo etiam exercere officia Ordinum, ac quascunque Ecclesiasticas perficere functiones principaliter propter temporalem retributionem, etiam sponte oblatam, Simoniacum est, quia tunc per spirituale, tamquam per medium intenditur obtineri temporale, & illud spectatur veluti pretium rei spiritualis, atque pro illa expetitur, quod Simoniacum est. Hinc S. Thomas Doctor. Quodlib. 8. quæst. 6. art. 1. sic inquit: *Si retributiones temporales, quis respicit, ac recipit, quasi finem operis sui principaliter intentum, simoniam committit, & peccat mortaliter. Si autem habeat principalem finem Deum in tali actu, ad retributiones autem huiusmodi temporales respicit secundario, non quasi in finem, sed sicut in id quod est necessarium ad suam sustentationem, non vendit actum spirituales, & ita simoniam non committit neque peccat.*

*Quæres 4to: Quando committitur Simonia in Beneficiis?*

*Resp. amo:* Dare vel accipere aliquid temporale pro Beneficio Ecclesiastico, etiam ratione temporalis emolumenti ex eo provenientis, Simonia est. Quia emolumenta temporalia ex Beneficio promanantia, redditus nempe illius, sunt Beneficio, prout Spirituale est, habetque sua spiritualia officia, ac munera, annexa & ipsius accessorium. Accessorium autem, & Spirituali annexum, sine suo principali vendi nequit. Vendere autem Spirituale pro temporali Simonia aperta est. Beneficium ergo Ecclesiasticum, etiam ratione temporalium emolumentorum spectatum sine Simonia vendi nequit, nec proinde pro eo adipiscendo aliquid dari, vel accipi potest.

Hinc dare, vel accipere aliquid temporale pro præsentatione, electione ad Beneficium, pro Confirmatione, institutione & pro quavis actione, qua jus etiam inchoatum ad Beneficium acquiritur, Simonia est. Illæ enim omnes actiones spirituales sunt, ob respectum quem habent ad Beneficium quod spirituale est, & procedunt à potestate spirituali. Imo Simonia est, aliquid dare vel accipere pro  
impmis-



immisſione, traditione, introductione in poſſeſſionem Beneficii. Nam per hæc acquiritur jus ſpirituale, adminiſtratioque Beneficii.

Pariter emere, aut vendere Præbendas Canonicales, Præſtimonia, Penſiones, pro aliquo officio ſpirituali aſſignatas, Simonia eſt, quia hæc fundantur in Miniſterio ſpirituali, neque quis ad ea jus habere poteſt, niſi ratione talis Miniſterii. Præbendæ quoque ſunt vera Beneficia, & Præſtimonia dant jus ad percipiendos fructus ex bonis Eccleſiaſticis. Quare etiam Simonia eſt, emere, vendere quamcumque Penſionem quæ ſoli Clerico conceditur, ſive in ſuſtentionem ipſius, ſive ad abſolvenda ſtudia, quia ſunt annexæ officio ſpirituali, recitandi ſcilicet officium parvum B. V. Mariæ ex Conſtitutione Pii 5. Papæ, atque ratione hujus officii, qui Clericalem penſionem habet, jus poſſidet ad percipiendos fructus Eccleſiaſticos. Sunt itaque iſtiusmodi Penſiones quid ſpirituale, vendi ergo neque eni poſſunt pretio aliquo temporali.

2do: Simoniaca eſt permutatio Beneficiorum & cujuslibet juris Beneficia ſpectantis, atque omnis in Beneficiis pactio, conventio, vel appoſita conditio, quæ obligat ad id, quod non eſt jure debitum, ſi hæc fiant privata authoritate. Reſignatio etiam Beneficii ſub conditione, & pacto, vel onere, quod de jure non ineſt Beneficio, facta ſine authoritate ſummi Pontificis ſimoniaca eſt. Hinc ſimoniaca eſt ceſſio Beneficii, ſive juris etiam dubii ad illud habitum in manus Episcopii ſi ſit oneroſa, & non omnino gratuita. Item pactio ad impediendam, vel dirimendam litem ſuper Beneficio exortam, ſi ita fiat, ut unus litigantium cedat juri ſuo pro aliquo temporali dato, & alteri Beneficium pacificum relinquat, vel ut unus à lite deſiſtat, & alter certam pecuniæ ſummam ſolvat, ſive expenſas factas compenſet.

Licite tamen fit compositio inter litigantes per ſententiam Judicis, vel Arbitrorum Eccleſiaſticorum ab Episcopo pro ineunda concordia deputatorum, ſi accedente partium conſenſu, & compromiſſo, adjudicetur Beneficium illi, cujus jus probabilius eſt, eique imponant pendendam certam alteri pecuniæ ſummam, non ob compenſationem juris, ſed ob bonum temporale pacis, & ut à lite recedat. Poſteſt etiam in hoc caſu ei, cui adjudicatur Beneficium, imponi penſio annua perſolvenda, impoſita non Beneficio, ſed Beneficiato, & ad hujus vitæ tempora. Talis tamen compositio privata authoritate facta, etiam ſub  
condi-



conditione ut ab Episcopo approbetur, Simoniaca est, nec potest ab Episcopo approbari. Ita statutum est. Cap: 2. de Arbitris.

3tio: Permutatione autem Beneficiorum committitur Simonia non solum quando Beneficia propria autoritate permutantur, sed etiam si permutantes compensent sibi mutua facta inter se pactione, inæqualitatem reddituum suorum Beneficiorum, pecunia, aut pensione constituta, aut si unus alteri imponat onus aliquod, quod est Beneficio extraneum, exg. ut omnes facti sumptus solvantur. Item si permutentur jura quælibet ad Beneficia, vel actiones ad illa pertinentes, ut si unus cedat suæ præsentationi, ut alter sibi aliam conferat. Vel denique si permutantes sic secum paciscantur: Tu elige, vel præsentabo hunc ad hoc Beneficium, & ego eligam, vel præsentabo te, aut hunc ad illud, Do tibi meum suffragium in hac electione, & tu dabis mihi tuum in alia. Te eligam, præsentabo, ad hoc Beneficium, si meo Nepoti resignes tuum. Tales itaque conventiones Simoniacæ sunt, siquidem electio, præsentatio, resignatio, sunt via quæ ad Beneficia pervenitur, omnia ergo circa illa pacta, fœdera, graviter prohibita sunt.

Hæc vero mox dicta ad omnia Spiritualia extendi debent, quæ temporalia sibi habent annexa, etiamsi proprie & in rigore non sint Beneficia, qualis est Vicariatus amovibilis. Omnia siquidem circa spiritualia, & spiritualibus annexa, pacta, conventiones, jure Ecclesiastico prohibita sunt.

Hinc sequitur simoniacam esse omnem transactionem qua remittitur, vel retinetur spirituale pro temporali, quia tunc permutatur, vel venditur spirituale pro temporali. Unde Simoniam committunt, qui accepta, vel tradita re pretio æstimabili, transigunt circa litem præsentandi ad Beneficium, vel circa possessionem Beneficii, ad quod duo, vel tres nominati fuerunt.

Quodsi in transactione detur spirituale, pro spirituali, non erit Simonia. Unde qui altercantur circa Reliquias cujus sint, convenire possunt, vel ut Reliquiæ dividantur, vel si id fieri nequeat, ut unus eas servet, sed alias similes alteri donet. Non tamen pacisci possunt, ut unus habeat Reliquias, alter mediam partem oblationum accipiat. Elset enim tunc quædam Reliquiarum venditio, quæ sine Simonia fieri nequit. Quamquam vero spirituale pro spirituali transigendo, dare licitum sit, id tamen in materia Beneficio-



beneficiorum jure Ecclesiastico prohibitum est. Unde qui litigat de pingui Beneficio, non potest cum adversario pacisci, ut ipse servet pingue Beneficium, & tenue tradat colliganti, sic enim permutaret tenue Beneficium cum jure quod alter habet ad pinguius, Id autem privata auctoritate fieri nequit.

4to: Tandem in Beneficiis conventio de remuneratione qualibet etiam gratuita, seu de obligatione dandi aliquid ex gratitudine, sive temporale illud sit, sive spirituale, vere simoniaca est. Quia talis conventio ex se parit novam obligationem fidelitatis, & justitiæ, quæ pretio aestimabilis est, & obligationi gratitudinis superadditur, Talis ergo datio cum ex obligatione fidelitatis, & justitiæ fieri debeat, non est gratuita sed onerosa, ac proinde simoniaca.

*Quæres 5to: Quot modis in resignatione Beneficiorum Simonia committatur?*

*Resp:* Multis modis in Beneficiorum resignatione committitur Simonia. Et quidem 1mo: simoniaca est omnis resignatio in favorem tertii, aut etiam cum reservatione pensionis facta sine auctoritate & consensu Romani Pontificis.

2do: si fiat resignatio ex pacto tacito, vel expresso, quia omne pactum, & quævis conventio in Spiritualibus ac maxime in Beneficiis, prohibita sunt. Hinc Simoniaci sunt, qui faciunt resignationem reciprocam exg. Petrus resignat Beneficium suum fratri Pauli, ut Paulus suum ipsi vel Nepoti resignet. Pariter qui resignationem faciunt triangularem, Simoniaci rei sunt, ut si Joannes Beneficium suum resignet Jacobo, ut Jacobus suum resignet Petro, & Petrus suum resignet Joanni. Simoniaci quoque sunt, qui Beneficium litigiosum, non sine pluribus expensis acquisitum, & tandem pacifice possetum, resignat cum pacto, ut Resignatarius solvat expensas. Istæ enim expensæ exigere non possunt ab alio, quæ in ipsius gratiam non sunt factæ.

*Quæres 6to: Quando in Religionis ingressu committitur Simonia?*

*Resp:* Aliquid temporale exigere pro admissione ad Ordinem Religiosum, aut pro facienda in eo Professione, Simonia est, quia status Religiosus, professio in eo emitti solita, sunt spiritualia, pro iis ergo nihil temporale, exigere aut accipi potest. Imo etiam ratione vestitus, & alimentorum ab ingredientibus Ordinem Religiosum nihil exigere

nes



nec accipi potest. Quia ingrediens Monasterium jus habet vivendi de bonis Monasterii. Hinc Urbanus 4. Papa Extravag: 5. de Simonia auctoritate Apostolica omnibus quaruncumque Communitatum Superioribus severe prohibet, *ne ante, aut post receptionem, quoscumque pastus, prandia seu cœnas, pecunias, jocalia, aut res alias etiam ad usum Ecclesiasticum, seu quemvis alium pium usum deputata, vel deputanda, directe, vel indirecte petere, vel exigere aliquando præsumant, illa dumtaxat quæ personæ ipsæ ingredientibus, pure, & sponte, ac plena liberalitate, omnique pactione cessante, dare, vel offerre Ecclesiis, Monasteriis, domibus & locis hujusmodi voluerint, cum gratiarum actione licite recepturi.* Idem statutum est in Concilio Lateranensi 4to: Licet tamen in ingressu Religionis, aut penes Professionem aliquid exigere ratione sustentationis si Monasterium sit vere egenum, neque sufficiat ad eum alendum qui admittitur, & non plus exigitur quam ad competentem Religiosi sustentationem opus est. Hinc Benedictus 14. de Synodo Diœces: lib. 7. Cap: 58. docet subsidium dotale quod exigitur à Puellis in Canoniis sese Deo devotentibus, non illico pronunciandum esse Simoniacum, quia receptus ubique usus illud approbat. Singula ergo Monialium Cœnobita ad normam Decreti Concilii Tridentini Sess: 25. Cap: 3. tot moniales recipere debent, quot Episcopi judicio ex communibus redditibus, aut consuetis elemosynis sustentari possunt, & à Monialibus intra præfixitum numerum comprehensis, seu in demortuam locum subrogandis, nihil est Monasterio pendendum, nisi interim Monasterii redditus fuerint imminuti, nec amplius pares sint consueto Monialium numero sustentando, illæ vero quæ ultra præfixitum numerum in Monasterium recipi volunt, dotem offerre debent, cujus fructibus ali. & sustentari queant.

*Quæres 2mo: Quæ sunt pænæ contra Simoniacos constitutæ?*

*Resp:* Triplex est genus pænarum quas Simoniacis imponunt Canones Ecclesiastici. Prima est pæna Censuræ, secunda invaliditas actus simoniace facti, tertia est restituendi obligatio: & hæc quidem pænæ multum inter se discrepant: censuræ enim non incurruntur nisi vel in jure expressæ sint, vel à Judice, seu Episcopo decernantur, actus vero simoniace facti ex natura sua invalidi esse possunt, & reipsa tales sunt, ubi jus sic disponit.

Certum autem est 1mo: nullam Simoniam quantum-

vis



vis completam, & realem inducere ipso facto pœnas in jure contentas, & contra Simoniacos statutas, præter illam quæ est in Ordine, in Beneficiis, & in Religionis ingressu. Unde graviter quidem peccat, qui committit Simoniam in aliis præter Ordinem Sacramentis conferendis, vel recipiendis, in Consecrationibus, Dispensationibus, Benedictionibus, Vicaria temporali, & similibus, non tamen subiacet pœnis ab Ecclesia contra Simoniacos latis.

2do: Certum est, nullas ipso facto incurri juris Ecclesiastici pœnas ob Simoniam mentalem, aut pure conventionalem, imo probabilius videtur esse eas non incurri ob Simoniam solum semirealem. Quia in materia pœnali benignior interpretatio fieri debet, & pœnæ juris graves impositæ pro aliquo criminoso actu, intelliguntur de actu perfecte completo, & ex omni parte consummato, nisi lex aliud diserte exprimat. Ergo Canones Ecclesiastici qui contra Simoniam pœnas statuunt, intelligi debent de Simonia reali, utrinque completa, traditione scilicet rei spiritualis, simul & solutione pretii, sive partis illius, cum clare & distincte non loquantur de semireali. Et id in praxi servat Curia Romana, ex Rota, ut testatur Navarrus, quare ibi Beneficium simoniace acceptum ipso jure non censetur vacare, nec ita provisorius pro excommunicato reputatur, aut si in sacris celebraverit pro irregulari habetur, nisi pretium, aut saltem pars pretii pro accepto Beneficio acordati soluta fuerit, atque hunc Sacra Pœnitentiariæ esse sensum, testatur Fillucius, qui multis annis Romæ docuit, & scripsit. Hinc si quis pro accepto Beneficio serio promiserit centum aureos, & pœnitentia ductus non solvat, pœnarum juris reus non erit, si vero post mensem, duos, aut tres aureos solvat, ex tunc & non ante tamquam Simoniacus realis, in omnes juris pœnas incidet. Imo quantumcumque exiguum sit, id quod solverit, non effugiet censuram, quia jam verum erit, eundem Simonizæ realis, semperque mortalis reum esse. Simonizæ tamen confidentialis conscii severius ab Ecclesia plectuntur.

*Quæres 8vo: Quales pœnas incurrunt, qui Simoniam committunt in collatione Ordinum, & Religionis ingressu?*

*Resp: amo:* Qui simoniace conferunt, aut recipiunt Ordines, ipsam etiam Tonsuram, seu qui quomodolibet dando, vel recipiendo Simoniam in quibusvis Ordinibus commiserint, aut quod illa fiat, mediatores extiterint, seu procuraverint, sententiam excommunicationis incurrunt

Papæ



Papæ reservatam. Sic decrevit Paulus 2. Papa in Extravag: Cap: 2. *Cum detestabile*. 2do: Ordinans, à Collatione quorumcumque Ordinum, atque adeo ipsius primæ tonsuræ, & ab exercitio omnium munerum Pontificalium veluti à consecratione Altarium suspensus est, & ab ingressu Ecclesiæ interdictus. Ita Sixtus 5. Papa constituit in Bulla, quæ incipit; *Sanctum*. 3tio: Simoniacæ Ordinatus, est ipso jure suspensus non solum ab executione Ordinis quem simoniace suscepit, sed ab eorum etiam exercitio quos antea sine Simonia suscepit. Unde si alicujus Ordinis functiones exerceat, fiet irregularis. Qui tamen Simoniam ignoravit, & sic Ordines suscepit, ab illorum executione non est suspensus, quia suspensio pænalis, qualis ista est, non potest incurri sine culpa. Porro non est in culpa qui nesciens simoniace ordinatus est. Censent etiam plerique Theologi ab istiusmodi pænis immunes esse illos, qui in iis quæ solum ad Ordines spectant Simoniam committunt, exg. qui aliquid dant, exigunt, pro literis seu dimissorialibus, seu testimonialibus, de recepto aliquo Ordine attestantibus. Si quis tamen aliquid tribuat pro dimissoriis, aut aliis ad Ordines spectantibus ante consecutionem Ordinum, vel etiam post, sed ex pacto, Excommunicationem incurrit, quia tale datum cum ad Ordines referatur, simoniacum est.

Quod vero attinet ingressum Religionis, tam dantes, quam accipientes aliquid pro Religionis ingressu, si sint singulares personæ, excommunicationem, si vero sit Capitulum, aut Conventus, suspensionem eo ipso incurrit summo Pontifici reservatas. Ita Urbanus 5. Papa. Concedit autem prædictus Pontifex ut persona Monasterium pretio ingressa, in eodem permaneat, & quod ab ea exactum fuerat, à Monasterio retineatur, modo impendatur in communem Monasterii usum, non vero in particularem.

*Quæres 9no: Quæ pænæ constitutæ sunt contra Simoniam in Beneficiis committentes?*

*Resp: amo:* Qui simoniace ad Beneficium eligunt, præsentant, instituunt, tum etiam qui sic eliguntur, præsentantur, instituuntur, item mediatores, procuratores simoniacæ Beneficii subsecutæ collationis, exg. Parentes, amici, & omnes qui suam hac in re interponunt operam, incurrunt ipso facto Excommunicationem Papæ reservatam. Ita habetur Extravag. Cap: 2. de Simonia. Aliud est de pensione, unde qui eam dant, accipiunt simoniace,



etsi graviter peccent, quia Simoniam reipsa committunt, non incurrunt tamen istam Censuram, quia pensio hic in materia tam pœnali, pro Beneficio accipi nequit, pœnæ igitur contra simoniace Beneficia obtinentes lata ad pensionarios extendi non debent. Idem dicendum est de Vicariatu temporali, quia non est Beneficium proprie dictum.

2do: Omnis simoniaca electio, præsentatio, atque ad Beneficium facta institutio irrita est, nullumque jus tribuit, ita ut sic de Beneficio provisorius teneatur ante omnem sententiam Judicis Beneficium dimittere, & omnes fructus, Ecclesiæ restituere, cum nullum jus in Beneficium habeat. Ita sancitum est Extravag: Cap: 2. de Simonia. Nomine autem fructuum probabilis est, quod comprehendantur distributiones quotidianæ, quæ propter assistentiam in Choro recipiuntur, quia illæ recipiuntur ratione tituli spiritualis, qui propter Simoniam corrumpitur, & nullus est. Aliud est de iis distributionibus, quæ proveniunt tantum occasione tituli spiritualis, sed non ex titulo, veluti stipendia pro Missarum celebratione, pro Concionibus, aliisque functionibus, ad quas Simonia reus non tenebatur ratione tituli spiritualis.

3tio: Simoniace de Beneficio provisorius, inhabilis est ad idem Beneficium obtinendum, nec potest illud ex Episcopi dispensatione iterum obtinere. Quod constat ex Cap: 27. de Simonia, & Cap: penult: de Election: ubi excipitur si sit Beneficium simplex & ipso proviso ignorante, nec ratum habente Simonia commissa sit, tunc enim post puram resignationem, potest Episcopus dispensare, ut idem valeat Beneficium obtinere.

Istiusmodi autem pœnæ, scilicet Excommunicatio, nullitas actus, & obligatio dimittendi munus, atque obtentum officium extenduntur ad Prælaturas Regularium, quia istiusmodi Prælaturæ non immerito inter Ecclesiastica Beneficia numerantur, & in Extravag: Paulus 2. Papa Cap: 2. de Simonia hosce Superioratus, & Prælaturas, perspicue recenset inter ea, quæ si simoniace obtineantur, Simonia pœnas inducunt.

Est quidem in Jure sequens regula: *Si qui quæcunque Beneficia; qualiacunque sint, absque simoniaco ingressu, per triennium pacifice possiderint, super iisdem Beneficiis sic possessis molestari nequeunt.* Sed hæc regula Simoniacis non prodest, qui scilicet simoniace obtinent Beneficia, ut ex terminis Regulæ patet, quæ eos excipit



excipit, & excludit ab istiusmodi triennalis possessionis privilegio, qui simoniaco ingressu Beneficia possident. Aliud elset de illo, qui bona fide Beneficii possessionem ingressus est, & toto triennio Simoniae in sui gratiam factae, nullam prorsus cognitionem habuit. Is enim cum non sit simoniace Beneficium ingressus, ei triennalis pacifica possessio, multum servit. Sed & is, si Simoniae in sui gratiam factae, ante elapsum triennium rescierit, tenetur statim Beneficium pure resignare, & omnes fructus extantes restituere, non tamen eos, quos bona fide consumpsit. Sed praeterea duo sunt casus, in quibus simoniaca Beneficii provisio valida est. *Primus* est, cum versutus aliquis Beneficiarii hostis, aliquid Collatori dedit, ut collationem irritam faceret, faciendo illam simoniacam. Ita habetur Cap: 27. de Simonia. *Secundus* est, cum providendus de Beneficio Simoniam suspiciens expresse contradixit, & quantum in se erat, prohibuit, ne pro sua nominatione, praesentatione, aliquid tribueretur. Id constat ex Cap: 33. de Simonia. Quod tamen post factam istiusmodi contradictionem, resciverit ante suam ad Beneficium institutionem, provisionem simoniacam esse, illam acceptare non poterit, quia Simoniae cooperaretur, si vero nonnisi post suam institutionem id compererit, Beneficium quod bona fide occupaverat, retinere valet. Pariter si provisor de Beneficio promissam pro sua nominatione, institutione pecuniam solvit iis quibus promissa fuit, tunc complendo Simoniam, simoniacus efficitur, adeoque subiacet omnibus Simoniacorum pœnis. Si vero solum refundit pecuniam hanc iis, qui eam in sui gratiam persolverant, scelus eorum non approbando, sed execrando, tantummodo ne aliquid damni ipsi, propter se patiantur, neque Simoniacus est, neque peccat, & facit id, quod facit bonus Pater qui debita à filio per scelus contracta solvit, ne filius infamis habeatur. Quodsi eorum nundinationem ratam habeat, & approbet, atque pacto consenserit, refundendo quod solutum est, Simoniacus efficitur, & Simoniae pœnis subiacet.

*Quæres xomo: Utrum Simonia privet etiam alios Beneficiis rite obtentis, atque incapacem reddat ad alia in futurum obtinenda?*

*Resp:* Beneficia legitime prius obtenta, propter Simoniam subsequentem non amittuntur, neque vacare censentur, quia pœna privationis huiusmodi Beneficiorum nullibi in jure statuta est, & satis est, ut in quo quis peccat in eo puniatur. Omnia tamen Beneficia quæ quis admis-



so Simonia scelerè consecutus est, necdum obtenta absolutione ab Excommunicatione, quam propter Simoniam contraxit, invalide acquisita sunt, quia propter excommunicationem quam per Simoniam contraxit, incapax est ad obtinenda quævis Beneficia. Sed præter istiusmodi Excommunicationem, per Simoniam in acquisitione Beneficii admissam, contrahitur quædam inhabilitas ad alia etiam in posterum obtinenda Beneficia. Et id patet ex Bulla Pii 5. Papæ, quæ incipit: *Cum primum*. in qua sic statutum est: *Qui Dignitates Ecclesiasticas simoniace acquisierit, illis sit ipso jure privatus, & in futurum inhabilis ad eas, & quascunque alias obtinendas. Qui Beneficium, aut officium Ecclesiasticum simoniace adeptus fuerit, perpetuo sit inhabilis ad ea, & quæcunque alia Beneficia obtinenda.*

Quemadmodum vero subsequens Simonia non privat Beneficiis antea rite obtentis, neque illorum acquisitionem irritat, sic neque per illam irriti fiunt actus ad Beneficium ordinati, prius legitime facti, veluti præsentatio, electio, adeoque satis erit si actus posterior, qui invalidus fuit, reparetur, si reparari possit. Quodsi actus primus propter Simoniam invalidus sit, ceteri subsequentes, etiam sine simonia facti, invalidi erunt.

*Quæres xamo: Quæ sunt pænæ Simonice confidentialis?*

*Resp:* Pænæ contra Simoniam confidentialem graviores constitutæ sunt, quam contra ceteras Simonia species. Igitur ex Bulla Pii 4. & ex Bulla Pii 5. Romanorum Pontificum pænæ simoniae confidentialis sunt xmo: excommunicatio Papæ reservata, quam incurrunt uterque contrahens, si sint Episcopo inferiores, Episcopi vero solum incurrunt interdictum ab ingressu Ecclesiæ. 2do: Privatio Beneficii per simoniam confidentialem obtenti, & quidem ante omnem sententiam Judicis, quia illius collatio nulla est. 3tio: Inhabilitas ad idem Beneficium, & alia quæcunque acquirenda. 4to: Privatio Beneficiorum antea legitime posseßorum, & Pensionum prius obtentarum. 5to: Beneficia per simoniam confidentialem collata, & accepta, sunt Papæ reservata, unde resignari non possunt in manus Episcopi, neque ab eo conferri.

Verum ut istiusmodi pænæ contrahantur, requiritur ut datum sit, & acceptum Beneficium, id patet ex his verbis Bullæ Pii 4ti. *Omnes & singulos, qui Beneficia, vel pensiones hoc intercedente vitio acceperunt. Non tamen necesse est ut pacifice Beneficii posseßio capiatur;*  
qui



qui accepto Beneficio completur simoniæ confidentialis scelus. Cum autem Constitutiones Pii 4ti. & 5ti. novas pœnas non superaddant ratione simoniæ confidentialis, nisi contra illum, qui per simoniam Confidentialem recipit Beneficium, vel pensionem, soli ergo recipientes privantur Beneficiis, & pensionibus, antea legitime obtentis, & acquisitis, non autem Resignantes sub pactione confidentiali, aut ad id cooperantes, ii tamen quia vere sunt simoniaci incurrunt excommunicationem Papæ reservatam, si confidentialis pactio fuerit ex utraque parte completa.

Sed hic caute notanda sunt sequentia. 1mo: Excommunicationem memoratam, aliasque pœnas incurri etiam per simoniam confidentialem, quæ ex una solum parte executioni mandata est. Quare non est necesse, ut qui Beneficium per simoniam confidentialem accepit, promissionem suam impleverit, hoc est, vel pretium promissum solverit, vel suum Beneficium alteri resignaverit, vel impositam pensionem solverit, aut fructus Beneficii ab alio percipi permiserit. Atque per hoc simonia confidentialis gravius punitur, quam alia quævis simonia in Beneficiis eveniens. 2do: Iisdem pœnis subijci eum, qui ex Beneficio confidentialiæ dato pensionem exigit, aut sibi solvi consentit, quibus subjacet ille, qui Beneficium per Simoniam confidentialem recipit prout id aperte constat ex Bulla Pii 4ti. Privatio tamen Beneficiorum, ac Pensionum legitime prius obtentorum, quæ statuta est contra Simoniam confidentialem in asecutione posterioris Beneficii committentes statuta juxta multos Theologos, effectum non sortitur ante sententiam Judicis declarationem, quia justo titulo possidentur.

*Quæres 2mo: Utrum simoniace acceptum, & acquisitum restituendum sit?*

*Resp: 1mo:* Qui pretium pro re spiritali jam data accepit, illud restituere tenetur, quia illud retineretur, ac possideretur sine justo titulo, res enim spiritalis pretio æstimari nequit, ac proinde vendi non potest, nihil ergo pro illa exigi, nihil accipi potest, quod itaque pro ipsa exactum, prævia pactione acceptum est, injustum, ac iniquum est, restitui proinde debet. Porro præteritum simoniace acceptum, semper est ei, qui dedit, restituendum, præterquam in Beneficiis. Quia jure naturali unicuique quod suum est reddi debet, nisi obstaret lex, aut justa sententia Judicis. Nulla autem lex prohibet



bet ne Simoniaco reddatur, quod ille sacrilege dedit, nisi Simonia realis fuerit in materia beneficii, tunc enim simoniace accepta restituenda sunt Ecclesiæ, in qua est Beneficium, neque talis Simoniacus potest recipere id, quod illicite dedit. Quodsi quis pro Beneficio, bona fide, & ex ignorantia probabili aliquid dederit, tenetur quidem Beneficium dimittere, sed sua pecunia privandus non esset. Hæc enim privatio est pœna supponens culpam, nulla autem est culpa, ubi est bona fides.

2do: Res spirituales simoniace acceptæ, quæ ad Beneficia non ordinantur, exg. Reliquiæ sacræ, aliæque spiritualia, simoniace accepta non subjacent restitutioni, quia licet modus acquisitionis eorum illicitus sit, quia Simoniacus, attamen ex parte acquirentis valida est acquisitio, juste ergo istiusmodi res spirituales retineri possunt. Si tamen repetantur restitui debent, cum datum pretium restituitur, quia facta conventio qua mediante res spiritualis accepta, & acquisita fuit, non ex utraque parte subsistit, qui enim pro re spirituali pretium accepit, cum illud pro re, quæ pretio æstimari nequit acceperit, nulliter illud accepit, ac proinde si restituatur, res spiritualis hoc modo accepta, reddi debet.

Hic unum addendum est, nimirum qui dant, vel accipiunt, aut promittunt aliquid pro aliqua justitia, aut gratia apud Sedem Apostolicam obtinenda incurrunt ipso facto in excommunicationem Papæ reservatam, & justitia, sive gratia sic obtenta nulla est, quamvis nondum impleta sit promissio. Ita statutum est in Extravag: de Sentent: excom: in 6to: Quod etiam innovavit Gregorius 15. Papa in sua Bulla 24.

3tio: Beneficia, Dignitates, officia, resque Ecclesiasticæ simoniace accepta, & acquisita, non possunt in conscientia retineri, sed cum omnibus fructibus ante omnem sententiam Judicis dimitti debent. Et id constat ex quam plurimis juris Ecclesiastici statutis, atque ex sensu, & usu totius Ecclesiæ. Et vero quæ sine justo titulo possidentur, retineri non possunt. Porro omnis collatio, provisio Beneficii Simoniaca, nulla, ac irrita est, caret omni robore ac effectu, nullumque jus tribuit quemadmodum declaraverunt: Martinus 5. in Concilio Constantiensi Ses: 43. & Paulus 2. in Extravag: *cum detestabile*: de Simonia, à Pio 5. confirmata. Ergo Beneficia, Dignitates, Officia & alia ejusmodi simoniace adepta in conscientia retineri nequeunt, sed cum omnibus fructibus ante omnem sententiam Judi-



eis dimitti debent. Restitui autem debent fructus, quos Beneficiarius accepit, aut sua culpa non percepit. Potest tamen recurrere ad Papam, ut ab eo fructuum condonationem obtineat. Jam vero, non solum Beneficia simoniace acquisita dimitti debent, sed & Pensiones per Simoniam adeptæ. Et id constat ex Can: 5. quæst: 3 ubi Urbanus 2. Papa sic statuit: *Quidquid vel in sacris Ordinibus, vel in Ecclesiasticis rebus, vel data, vel promissa pecunia acquisitum est, nos irritum esse, & nullas unquam vires habere censemus.* Pensiones autem res sunt Ecclesiasticæ ac spirituales, illius ergo simoniaca acquisitio irrita est, ac nullas habet vires, retineri itaque in Conscientia nequit, & inde percepti fructus ante sententiam Iudicis restitui debent. Idem sentiendum est de Præstimoniiis, & istæ enim Ecclesiasticæ sunt.

Hæc vero restitutio fructuum ex Beneficio, aut Pensione simoniacis, nulliter perceptorum, fieri debet Ecclesiæ in qua est Beneficium, aut Pensio, sive etiam in pios usus converti, qui saltem indirecte illi Ecclesiæ prosint.

Predictæ autem restitutioni obnoxii sunt etiam cooperatorum Simonæ in acquirendo Beneficio admixtæ, quare ipsi in defectu Beneficarii tenentur restituere omnes Beneficii fructus, si ipse Beneficiarius impar sit huic oneri.

4to: Occasione, & ex ratione Beneficii simoniace acceptæ restitui debent Ecclesiæ in qua est Beneficium, aut pauperibus loci erogandum, quare restituenda sunt quæ pro electione, præsentatione, institutione accepta sunt. Hæc enim sine gravi salutis periculo retineri nequeunt. Et hoc verum est etiamsi intuitu emolumentorum temporalium ex Beneficio provenientium aliquid datum vel acceptum fuerit, quia cum temporalia spiritualibus inseparabiliter annexa sunt, atque unum quidpiam constituunt, quod datur pro temporali, datur & pro Spirituali. Unde Alexander 7. Papa damnavit sequentem propositionem. *Non est contra iustitiam beneficia Ecclesiastica non conferre gratis, hinc collator conferens illa beneficia pecunia interveniente non exigit illam pro collatione beneficii, sed veluti pro emolumento temporali, quod conferre non tenebatur.*

Quæres 3tio: *Utrum ad restituendum & ad acquisita dimittenda teneantur, qui solam in iis mentalem commiserunt Simoniam, id est qui temporale pro spirituali acceperunt, aut spirituale pro temporali dederunt, sed sine ullo explicito, vel implicito pacto?*

Resp:



*Resp: amo:* Certum est illa, quæ simoniace, simul & injuste comparata sunt, restituenda esse, quia justitiæ violatio onus restituendi inducit. Unde ad restituendum tenentur. *amo:* qui pretium acceperunt ut desisterent ab injusta vexatione in causa spiritali, quia acceptum est ab invito, & injuria extortum. *2do:* qui ex justitia obligati ad functiones spirituales gratis exhibendas, veluti Parochus ad Sacramenta administranda, Episcopus ad dispensationes concedendas, gratis hæc præstare nolunt.

*2do:* Probabilis, & bene fundata est opinio, quæ docet eos, qui per Simoniam mentalem sine ulla alia injustitia asecuti sunt rem spirituales v.g. Beneficium, non teneri ad restituendum. Et id evincitur ex Cap: ultimo de Simonia, ubi sic loquitur Gregorius 9. Papa. *Dicimus resignationes spiritualium & temporalium, quæ nullo pacto, sed affectu animi præcedente, utrinque taliter acquiruntur, (in quo casu delinquentibus sufficit per solam pœnitentiam suo satisfacere Creatori) eos pro Simonia hujusmodi non teneri.* Hi ergo de quibus hic summus Pontifex loquitur, rei sunt Simonie mentalis, attamen non tenentur ad rem sic acquisitam restituendam vel dimittendam cum iis sufficiat ut pœnitentiam agant, quam, & quidem solam agendo satisfaciunt suo Creatori. Ergo ut inquit Glossa ibi appositæ, hæc Simonie species, *sola pœnitentia purgatur sine renuntiatione.* Id ipsum docet S. Thomas Doctor hanc rem pertractans art: 6. ad 6tam ubi sic habet: *Quoad Deum sola voluntas facit simoniacum, sed quoad pœnam Ecclesiasticam exteriorem non punitur ut simoniacus, ut abrenuntiare teneatur, sed debet de mala intentione pœnitere.* Et certe Ecclesia non indicat de internis, neque punit pure interna, cum itaque Simonia mentalis, sit pure interna, illa pœnis Ecclesiasticis non subiacet.

*Quæres 14to: Quis pœnas contra Simoniacos latas tollere, & in iis dispensare possit?*

*Resp:* Quintuplex est pœna, quam Simoniaci incurrunt, scilicet excommunicatio Papæ reservata, suspensio ab Ordinum simoniace receptorum exercitio, nullitas juris simoniace adepti Beneficii, obligatio illud dimittendi cum perceptis ex eo fructibus, atque restituendi simoniace accepta, maxime autem inhabilitas, tum ad Beneficium simoniace obtentum, tum ad alia Beneficia possidenda. Certum autem est *amo:* omnes istiusmodi pœnas si notoriæ sint, etiam sola notorietate facti, ab Episcopis relaxari non posse, sed à solo Romano Pontifice. *2do:*

Nul,



Nullitas juris simoniace accepti Beneficii, obligatioque illud dimittendi, restitutio fructuum ex Beneficio simoniace obtento perceptorum, ac ipsa inhabilitas ad Beneficia, etiamsi occultæ sint, ab Episcopo tolli, & relaxari nequeunt, sed à solo Romano Pontifice, tum condonatio fructuum male perceptorum, tum rehabilitatio ad obtinenda, & possidenda Beneficia, obtineri debet, hæc enim ipsi reservata sunt. 3tio: Excommunicatio quoque, ac suspensio, Papæ sunt reservatæ, aliquando tamen cum occultæ sunt, raris in casibus ab Episcopo relaxari possunt, per hoc tamen simoniacus ad Beneficia possidenda non rehabilitatur. Ita decisum est à Sacra Congregatione Concilii Tridentini Interprete, his verbis: *Episcopus etsi à Simonia occulta absolvere possit, non potest tamen Simoniacum rehabilitare ad Beneficia, quæ per Simoniam occultam retinet.*

Si crimen Simonie sit occultum pro Dispensatione Romanam ad Sacram Pœnitentiarum recurrendum est, quæ, facta, ut fieri solet, casus expositi repetitione in Brevis dispensationis sic pergit, Confessarium alloquens cui dispensationis executio committitur: *Discretionis tuæ committimus, quatenus si ita est, dictum latorem, audita prius ejus Sacramentali Confessione, dummodo cum effectu prædictum Beneficium simoniace obtentum dimiserit, & non aliter, à quibusvis sententiis, Censuris, & pœnis Ecclesiasticis, quas propter præmissa, quomodolibet incurrit, simoniæ labe, & excessibus hujusmodi absolvas, injuncta ei pro modo culpæ pœnitentia salutari, quodque culpabiles in præfata Simonie labe, quantum potest moneat, ad impetrandam à Sede Apostolica absolutionem, nec non fructus à se ex præfato Beneficio perceptos, prout de jure restituat, & aliis quæ de jure fuerint injungenda. Demum dummodo præmissa occulta sint, cum eodem latore suffragantibus sibi dignis pœnitentiæ fructibus, & meritis, alioque ei Canonico non obstante impedimento, super irregularitate per eum ex præmissis quomodolibet contracta, quodque, & aliis præmissis non obstantibus, in suis Ordinibus ministrare, ac Beneficia Ecclesiastica, non tamen illud super quo commissa fuit Simonia, quatenus ei altæ conferantur, recipere, & retinere licite valeat, misericorditer dispenses, in foro conscientie.* Ex tenore autem talis Brevis ad dispensandum concessi, manifestum est, ad illius executionem requiri 1mo: Ut vera sit causa finalis Pœnitentiariæ ad obtinendam dispensationem exposita,



sita, propter quam petens non modo vult à Censuris absolvi, sed & ad Beneficia deinceps Canonice obtinenda rehabilitari. 2do: Petens dispensationem debet actu Beneficium dimittere super quo commissa est Simonia, si enim necdum illud dimiserit, nec licite, nec valide Breve dispensationis exequi poterit. Aliquando tamen, si id gravissimæ expostulent causæ, videlicet vitandi scandali, gravisque suspicionis necessitas, permittitur à Pænitentiaria, ut quis Beneficium Simoniace comparatum, servet, ac possideat, præsertim si eo nesciente ab alio in ejus gratiam commissa fuerit Simonia. Hæc ergo in petitione Dispensationis exponenda sunt, alias istud Beneficium retineri non poterit. 3tio: Potest petens vigore istiusmodi Brevis absolvi à quibusvis Censuris, & pænis Ecclesiasticis, qui enim non obstante Simonia Ordinis sacri functiones exercet, præter excommunicationem quam incurrit, irregularis efficitur. 4to: Debet petens dispensationem, fructus Beneficii Simoniace acquisiti restituere, Ecclesiæ scilicet in qua est illud Beneficium, nisi in istiusmodi Brevi prædicti fructus condonentur, quod in petitione Pænitentiariæ porrigenda expresse est expostulandum, allegata, si vera est, paupertate petentis, aut facta cum Pænitentiaria compositione de certa parte fructuum restituenda, aliis sibi retentis. 5to: attendi quoque debet in istiusmodi Brevi ad quæ Beneficiaabilitas petenti conceditur: Si generatim & indistincte ad Beneficiaabilitas conceditur, de solis simplicibus Beneficiis id intelligi, & accipi debet, & Beneficia curam animarum annexam habentia obtineri non poterunt, nisi expresse ista rehabilitatio ad illa etiam extendatur. 6to: Semper tamen excipitur Beneficium in quo commissa est Simonia, quod Simoniacus retinere nequit, nisi ad illud etiam possidendum, quia non haberet unde vivere possit, vel quia nullatenus dimittere valet, expresse habilitatur. Hoc igitur ut obtineatur, in petitione dispensationis exprimendum est, & ratio postulati apponenda.



# TRACTATUS

DE

CENSURIS

Censuræ, maxime Ecclesiasticos respiciunt, & tangunt, eorum proinde scientia apprime Ecclesiæ Ministris est necessaria ut & suæ conscientiæ bene consulere, & concredita sibi officia sine Dei offensa & absque Ecclesiasticarum legum infractione persolvere valeant.

## CAPUT PRIMUM

*De Censuris in Genere*

### ARTICULUS I<sup>mus</sup>

*De natura, causisque Censurarum.*

*Quæres 1<sup>mo</sup>: Quid sit Censura, & quotuplex.*

*Resp:* Censura est pæna spiritualis, qua homini baptisato, delinquenti, ac contumaci, quorundam bonorum spiritualium usus ab Ecclesia aufertur, donec à contumacia respiscat. Censura igitur est pæna spiritualis quia hominem privat bonis spiritualibus, publicis videlicet suffragiis, atque Sacramentorum usu. 2<sup>do</sup>: Infligitur autem homini delinquenti, & contumaci, donec à contumacia recesserit, quia id unum Ecclesia in infligendis Censuris spectat, ut per eas tangat contumaciam delinquentium, eosque ad obsequium debitum cogat. Unde Censura dicitur *medicinalis*, quia delinquens contumax statim ac resipuit absolvi debet.

Censura dividitur 1<sup>mo</sup>: velut genus in suas species, & tres sunt excommunicatio, suspensio, & interdictum. Et id constat ex Innocentio 3<sup>tio</sup>: Cap: 20. *de Verborum signifi*: ubi sic inquit. *Quærenti quid per censuram Ec-*  
cle-



clesiasticam debeat intelligi, respondemus quod per eam non solum interdicti, sed suspensionis, & excommunicationis sententia valeat intelligi. Unde depositio, degradatio, irregularitas, cessatio à divinis, non sunt Censuræ, quare etiam ex stylo Curiae Romanae, is, cui conceditur facultas absolvendi à Censuris, ei non censetur concessa esse facultas dispensandi in irregularitatibus.

2do: Censura dividitur in eam quæ est *ab homine*; & illam quæ est *à jure*. Censura *à jure* ea est, quæ per legem, vel statutum generaliter in omnes fertur, qui legem fuerint transgressi, talis est, quæ decernitur Canonis utriusque sexus: adversus eos qui Paschali defuerint communioni. Censura *ab homine* illa est, quæ fertur, ex causa, & facto particulari in certam, & determinatam personam, sive hæc Judici nota sit, sive non. Differunt autem istiusmodi Censuræ inter se 2mo: Quod Censura *à jure* semper ligat transgressores legis donec lex ipsam decernens abrogetur, censura vero *ab homine* eos quos necdum ligavit, ligare iam non posset, statim ac Superior, qui ipsam tulit potestate sua volens, vel nolens spoliatus fuerit, unde si quis excommunicatus sit sub conditione nisi intra sex dies reum criminis revelaverit, & Iudex ante elapsum terminum moriatur, non incurrit censuram etsi non revelaverit, quia Superior censuram fert, non ut legislator, sed ut Iudex, porro Iudicis authoritas eodem mortuo, amoto, cessat. 2do: Censura *ab homine* semper est reservata, non autem ea, quæ est *à jure*, nisi reservatio exprimatur. 3tio: Censura *à jure* eos etiam ligare potest, qui legislatori subiecti non erant tunc, quo tempore primum censura lata fuit, censura vero *ab homine* eos solum afficit, qui ei subiecti erant tunc, quando censuram tulit, quia istiusmodi censura fertur per modum imperij, imperium autem ad præsentem solum dirigitur.

3tio: Dividitur censura in eam quæ est *lata sententia*, & illam quæ est *ferenda sententia*. Prior ea est, quæ contrahitur ipso facto, seu sola criminis admissione absque Iudicis sententia. Posterior ea est, quam Superior comminatur infligendam, unde etiam *comminatoria dicitur*; & quæ non incurritur nisi nova accedat Iudicis sententia. Reputantur autem censuræ esse *Latæ sententiæ* quando his oppositæ sunt istæ particulæ, vel ipsis similes, *ipso jure, eo ipso, statim, mox, illico*, aut si expresse dicatur Censuram incurri *Latæ sententiæ*. Verba etiam præsentis,



tis, aut præteriti temporis, vg: *excommunicatur, suspendimus, suspensus est, noverit se excommunicatum*, censuram denotant latæ sententiæ. Pariter verba imperativi temporis, veluti, *excommunicationi subiaceat*, censuram latæ sententiæ continent, nisi mandatum dirigatur ad inferiorem Judicem, cui committatur aliquem censura punire. In dubio an verbum sit imperativi an vero optativi modi, habendum est pro imperativo, quia lex imperat, & mandat non optat, unde hæc forma, *anathema: sit* videtur esse latæ sententiæ. Censura *ferendæ sententiæ* est, cum exprimitur verbis futurum indicantis vg: *excommunicabitur*, aut cum dicitur: *sub interminatione anathematis*, vel etiam cum alicui præcipitur ut censuram ferat, & hæc, vel similia usurpantur verba, *jubemus, volumus suspendi*, excommunicari. In dubio judicandum est Censuram non esse nisi ferendæ sententiæ, quia ex Regula juris 49. in 6to. in pœnis benignior interpretatio facienda est.

4to: Dividitur censura in justam, & injustam, in validam, & invalidam, seu nullam. Sed hæc divisio respicit Censuras quæ ab homine vocitantur, quia omnis Censura, quæ à jure constituta est, semper justa est. Censura itaque ab homine lata, ea justa est, quæ undequaque legitime lata est, ita ut nihil ei, qui ipsam tulit, reprobari possit. Et talis est quæ fertur ab habente potestatem, in hominem subditum, ex causa sufficienter probata, denum lata est servato juris ordine. Hæc vero Censura semper valida est in foro exteriori, sed aliquando potest esse invalida coram Deo, ut si feratur contra eum qui quidem & falsis allegatis, & probatis iuridice convictus fuit de crimine quod reipsa non admisit.

Censura injusta ea est, cui aliquid deest ex memoratis conditionibus prærequisitis, ut Censura justa sit, & hæc iterum duplex est, injusta sed valida, injusta simul & invalida. Censura *injusta valida* ea est, cui deest aliquid accidentale, nihil vero eorum, quæ essentialiter ad Censuram requiruntur, talis est Censura quæ fertur non servato juris ordine accidentali, licet substantialis & essentialis servatus sit. *Injusta & invalida* ea est, cui deest aliquid essentialis, sive ex parte Judicis, cum caret jurisdictione, sive ex parte illius, contra quem fertur Censura, quia culpa ejus vel evidentur nulla est, vel non sufficienter probata, sive denique ex parte juris, quia ordo substantialis prætermisus fuit.

Circa hæc sequentia in praxi tenenda sunt 1mo:  
Cen-



Censura injusta, sed valida, ut si vg. Judex ex odio, ira, excommunicat, aut formalitates in ferenda Censura accidentales omittet, habet suum effectum, & vere in conscientia etiam ligat, unde qui sic Censura innodatus, celebrat, fit irregularis, quia cum sit valida, vim totam habet, & effectum suum habere debet. Et id expresse docuerunt S. Gregorius M. Homil: 26. in Evangelia, ubi sic ait. *Is, qui sub manu Pastoris est, ligari timeat, vel injuste.* Et Urbanus I. inquit. *Valde timenda est sententia Episcopi, licet injuste liget aliquem.* Si etiam dubium sit an Censura justa sit, an valida, servari illa debet etiam in foro conscientiae, quia id tutius est.

2do: Si Censura sit injusta simul & invalida, tunc vel est evidenter invalida, vel licet à parte rei nulla sit, non est tamen evidenter nulla. Si *anum*: Tunc istiusmodi Censura nec coram Deo ligat, neque coram hominibus, quia nullitas, & injustitia illius à nemine in dubium revocari potest, utpote vel jam demonstrata vel aliunde notoria. Si *2dum*: Tunc is in quem lata est Censura, humiliter parere debet, & juris remedia quærere ad Superiorem recurrendo. Quodsi remedia juris invenire non possit, quia juridice probatus est nocens, cum reipsa sit innocens, debet humiliter sustinere Censuram, ac proinde in foro exteriori debet abstinere ab iis omnibus, quæ hujusmodi Censura innodatis prohibita sunt. Attamen ille, privatim, & coram illis, qui innocentiam ipsius perspectam habent, & secluso scandalo potest sacras suas functiones obire, Missam celebrare & alia munera sacra obire, quia talis ex falsis allegatis condemnatus, vere coram Deo innocens est, secluso ergo scandalo, non debet à sacris functionibus removeri, unde etiam sic injuste excommunicatus, non privatur communibus Ecclesiae suffragiis.

*Quæres 2do: Quis potest ferre Censuras?*

*Resp:* Censuras ferre possunt. *1mo*: Romanus Pontifex. *2do*: Episcopus etiamsi non sit consecratus, dummodo sit à Papa confirmatus. *3tio*: Vicarius Episcopi generalis, & Sede vacante Vicarius Capituli. *4to*: Concilia generalia pro tota Ecclesia, Provincialia pro tota provincia. Quia hi omnes potestatem jurisdictionis habent, quæ ad ferendas Censuras necessaria est, ligare ergo, ac solvere sibi subditos possunt. Et hæc eorum potestas ferendi Censuras est ordinaria, quia ipsis competit vi officiorum quibus in Ecclesia perfunguntur, unde etiam proprio nomine illas ferre consueverunt. Ut tamen quis Censuras  
ferre



ferre possit, necesse est ut sit Clericus, quia ferre Censuras est actus jurisdictionis spiritualis, & quidem fori exterioris, hæc autem ut legitime exerceri possit, necesse est, ut sit Clericus, qui eam exerceat, & quilibet ac solus Clericus capax est jurisdictionis Ecclesiasticæ.

Delegata etiam potestate possunt ferri Censuræ, si ab habente ad id potestatem ordinariam, ipsa alicui concessa fuerit. Non valet autem Censura ab eo lata, si jam tunc revocationis suæ notitiam habuerit, quia jam caret jurisdictione, quodsi Censuram tulerit antequam revocationis suæ notitiam habuerit valet Censura, nisi delegans contrarium expresse statuerit. Porro potestas delegata ad ferendas Censuras, finitur morte delegantis, aut ipsius ab officio amotione, nisi causa ad quam quis fuerat delegatus, cæpta jam ac inchoata fuerit.

*Quæres 3tio: An quis possit ferre Censuram extra proprium territorium, in quo jurisdictionem habet?*

*Resp.* Inter eos, qui Censuras ferre possunt, quidam sunt qui limitatum territorium non habent, veluti Romanus Pontifex, qui cum sit supremus & universalis Pastor, in omnes fideles totius Orbis potestatem habet, in omnes igitur ubique Censuras ferre potest. Episcopi limitata & definita territoria habent, quare isti extra proprium territorium Censuras ferre nequeunt, quia in alieno territorio jurisdictionem exercere, & tribunal erigere nequeunt. Quando tamen causæ cognitio in proprio territorio jam præcessit, vel quando delinquentis contumacia adeo manifesta est, ut causæ discussione non egeat, & monitio facta est; valide Censuræ ferri possunt ab Episcopo etiam in aliena Diœcesi existente. Censuras quoque in alieno territorio ferre Episcopus potest per modum præcepti ad evitanda delicta quæ timentur, quia tunc nulla requiritur causæ discussio ac cognitio. Absolute etiam in sibi subditum Censuras ferre potest Episcopus in aliena Diœcesi, si id ei ordinarius illius loci permiserit. Probabilior quoque sententia est, posse Episcopum Censuras proprio subdito infligere, qui in suo territorio deliquit, etiamsi ille in alienum aufugisset. Hinc potest Episcopus ad Synodum Diœcesanam sub excommunicationis pœna omnes Clericos sibi subditos vocare, & excommunicationem incurrerent, qui in aliena Diœcesi degentes proprii Episcopi mandato non obtemperarent. Qui etiam in alieno territorio peccavit, si reversus ad suam Diœcesim de Crimine convinctus, Censura à suo Episcopo plecti potest. Tandem alie-



lienum subditum, in sua Diœcesi peccantem potest Episcopus loci Censuris punire, quia delictum sortitur forum loci in quo commissum est, si tamen ab eo territorio disceserit, antequam causa illius cognoscatur, jam ab Episcopo hujus loci Censuris feriri nequit.

*Quæres 4to: Quæ requiruntur ad ferendam & incurrendam Censuram?*

*Resp:* Ad ferendam, & incurrendam Censuram videlicet excommunicationem majorem, suspensionem aut interdictum, requiritur *amo:* Peccatum mortale. Quia istiusmodi Censuræ, sunt pænæ gravissimæ, infligi ergo nequeunt, nisi ob graves culpas, ad illas ergo ferendas, & incurrendas requiritur peccatum mortaliter grave. Excommunicatio tamen minor quæ non nisi propter civilem cum excommunicato vitando conversationem incurritur, & à qua omnis confessorius absolvere potest, censetur levis esse pæna, adeoque propter levem etiam contrahitur culpam. Idem decendum est, de suspensione ad breve tempus duratura, & interdicto particularis personæ ad breve intervallum lato, hæc inquam inter minores Censuras computari solent, ac proinde ob levem culpam infligi possunt. Verum hic sermo est de Censuris prout communiter accipiuntur videlicet de excommunicatione majore, suspensione, & interdicto, & istæ ergo cum pænæ gravissimæ sint, imponi nequeunt, nisi ob gravem culpam. Quæ ergo excusant à culpa mortali, excusant quoque ab incurrenda Censura. Unde non possunt Episcopi rem, quæ tum in se spectatis omnibus circumstantiis levis est, præcipere, aut prohibere sub gravi Censura, secus si res ea, licet in se levis, gravis fiat ex circumstantiis, v.g: ratione scandali, aut periculi, ne culpa levis, viam æternat ad culpam graviolem. Sic popinarum ingressus sub gravi Censura prohiberi Clericis potest, quia illarum fuga multum conducit ad sanctiorem Cleri disciplinam.

Ex his sequitur, quoties aliquid à lege vel ab homine prohibetur, aut præcipitur sub pæna gravioris allicijus censuræ, obligationem esse sub mortali, etiamsi res illa ex se non sit mortaliter mala, quia dum aliquid sub gravi censura prohibetur, aut præcipitur, semper id reputatur multum ad bonum commune conducere ac inservire, ac proinde juste, ac legitime potuisse sub gravi Censura præcipi, aut prohiberi.

*2do:* Debet esse peccatum externum, peccatum pur-



re internum Censuræ non subiacet. Quia illa solum peccata Censuris subiacent, de quibus Ecclesia iudicare potest. Porro de pure internis Ecclesia nec iudicat, nec potest iudicare, unde Innocentius 3. Papa sic ait. *Nobis datum est de manifestis tantummodo iudicare*, de internis vero iudicat, *qui scrutator est cordium*. Certa pæna fori exterioris pro culpa solum exteriori decerni potest. Censura vero est pæna fori exterioris. Ergo non nisi pro culpa exteriori infligi potest. Hinc illa fluxerunt Juris axiomata: *Non habent latentia peccata vindictam. Cogitationis pœnam nemo patitur*. Quamquam enim Ecclesiæ potestas spiritualis sit, sed quia ipsa per homines exercetur, & homines actus pure internos discernere nequeunt, ideo Ecclesia nec iudicat, nec plectit actus pure internos. Hinc propter hæresim pure internam, & nullo signo exteriori manifestatam, non incurritur excommunicatio.

Neque etiam Censuras incurrit, qui ponit quidem actum malum, sed qui exterius ea caret malitia, quæ ad contrahendam Censuram prærequiritur; quare Censuram non contrahit qui actum ex affectu & intentione mortaliter mala perficit, qui tamen exterius spectatus, & precise prava illa voluntate non nisi peccatum est veniale, quia cum ad incurrendam Censuram requiratur peccatum & mortale, & externum, illud exterius spectatum mortale esse debet. Pariter qui actum exterius ponit, sed cui actus internus non adjungitur, exg. hæresim non nisi verbis profert, quam corde non tenet, à Censura contra Hæreticos lata immunis est, quia actus exterior bonitatem, ac malitiam suam ab actu interno desumit, & ab eo specificatur. Ad contrahendas tamen Censuras non est necesse ut actus sint notorii, aut publici, sufficit quod sint exteriores, quamvis occulti, unde qui in occulto libros Hæreticorum legit, aut internam suam hæresim clam prodit, ac exterius manifestat, incurrit excommunicatorem contra Hæreticos, & eorum libros legentes latam.

3tio: Actus, qui Censuræ subiacet, ut ipsa per eum contrahatur, debet esse exterius consummatus, atque perfectus. Unde si stuprum sit sub excommunicatione prohibitum, intelligitur copula carnalis consummata, si Censura lata sit contra homicidas, qui homicidium attentavit, sed propter quodcunque impedimentum obveniens non perfecit, Censuræ istiusmodi non est reus. Pariter quando Censura sub conditione lata est vg: contra eos, qui Do-



mum deprædati sunt, nisi restituant intra mensem, nonnisi finito termino Censura hæc incurritur: Ratio horum est, quia in meris pœnalibus odia sunt restringenda, & lex, aut statutum non ligat, nec operatur ultra intentionem Legislatoris, ac Superioris Censuram constituentis, de qua ex verbis constare solet. Si tamen per legem, aut statutum non solum ipsa actio, sed & conatus ejus sub Censura prohibeatur, Censura incurreretur etiamsi actio non fuerit consummata, neque perfecta, sic qui ad Duellum provocat, illudque acceptat, sunt ipso facto excommunicati, quia Duellum etiam provocatione, acceptatione attentatum sub excommunicationis pœna prohibitum est.

4to: Ut Censuræ incurrantur requiritur peccatum proprium illius, qui Censuræ subjiciendus est, nam Censuris nemo plecti potest propter aliena peccata, cum ipse innocens est. Et præterea necesse est, ut in peccato quod ipse commiserat contumax sit, scilicet voluntarie, & malitiose perseverans, unde Censura ab homine ferri nequit nisi delinquens moneatur, quia Censuræ nonnisi in contumaces ferri possunt, quare qui paschali defuit communioni, Censura plecti nequit, nisi monitus, se emendare, vel condignam satisfactionem præstare recuset. Qui tamen legem cujus transgressionem annexa est Censura, sciens & volens transgreditur, contumax esse censetur & Censuram contrahit. Quia per ipsam legem jam monitus est, & contumaciter ei resistit. Verum tamen ad contrahendas illas Censuras, quæ latæ sunt contra *temere quidpiam facientes, qui istud facere ausi fuerint, qui scienter vel ex contemptu hoc egerint*, non quodlibet voluntarium etiam ad mortale sufficiens satis est, sed plus quidpiam requiritur quam ad alias contrahendas Censuras, quia ut illæ incurrantur opus est ut lex transgrediatur ausu temerario, scienter, aut ex contemptu, quæ non in omni voluntario reperinuntur.

Quæres 4to: Censuris qui ligari possunt?

Resp: Illi solum Censuris ligari possunt, qui subjecti sunt illi, qui tulit Censuras, quia ubi non est subjectio, ibi neque est jurisdictio, Censuræ autem sine jurisditione ferri non possunt. Unde Religiosi qui quoquomodo à jurisditione Episcopi exempti sunt, Censuris ab eo latis ligari nequeunt, sed in iis tantummodo casibus, in quibus exempti sunt, in quibus autem jurisditioni Episcopi sunt subjecti, veluti in prædicatione verbi divini, in administrandis Sacramentis, in illis, Censuris ab Episcopo



scopo latis stringuntur; hinc qui in proprio Episcopi sui territorio deliquit, Censuris ab eo latis ligatur etiamsi in alienum territorium aufugerit: quare si in aliqua Diœcesi lata sit excommunicatio contra homicidas, & in illa existens Petrus lethaliter vulneravit Paulum, ac in aliam mox aufugit Diœcesim, eo instanti ipse prædictam incurrit excommunicationem, quo Paulus ex accepto vulnere moritur. Et hoc verum est, licetsi Paulus quoque extra illam Diœcesim moriatur, quia semper verum est, istum homicidij crimen perpetratum fuisse & in loco ubi excommunicationis pœna contra ipsum lata est, & ab eo admisum, qui legi siue statuto prædictam excommunicationem decernenti subjectus est. Eadem de causa qui Andream lethaliter vulneravit in Ecclesia existentem, incurrit Censuram latam contra eos, qui occidunt in Ecclesia, etiamsi Andreas in domo sua moreretur, quia reipsa Crimen homicidij in Ecclesia perpetratur, licet effectus ejus extra Ecclesiam sequatur. A contrario vero, qui in Ecclesia positus hominem extra ipsam existentem occidit, non incurrit Censuram contra eos latam qui in Ecclesia occidunt, quam incurreret si extra Ecclesiam positus eum interimeret, qui in Ecclesia erat. Ratio est, quia prioris delictum consummatur extra Ecclesiam, posterioris vero intra Ecclesiam.

II vero, qui licet Episcopo Censuras statuendi subditi sunt, sed extra ipsius territorium, & Diœcesim delinquant, Censuris ab eo statutis non subjacent. Et id constat ex Cap: 2. de Constat: in 6to: ubi sic habetur. *Statuto Episcopi quo in omnes qui furtum commiserint, excommunicationis sententia promulgatur, subditi ejus furtum extra ipsius Diœcesim committentes minime ligari noscuntur, cum extra territorium jus dicenti non pareatur.* Nihilominus qui in suis Beneficiis non resident, & extra propriam Diœcesim morantur, incurrunt Censuras contra non residentes latis, quia præsumptione Juris in propria sua Diœcesi esse censentur, atque ibi reputantur peccare, ubi non præstant id quod præstare tenentur.

*Quæres 5to: An extranei, qui in alieno territorio delinquant, ibidem statutas incurrant Censuras?*

*Resp: amo:* Extranæus in alieno territorio delinquens, potest Censura plecti nisi satisfaciatur, quia ex Cap: ult: de foro competenti, sortitur forum ratione delicti in eo loco commissi. Ergo quamdiu in illa Diœcesi remanet, legitime citari potest, & ab Episcopo loci compelli ad sa-



tisfaciendum parti læsæ, & si contumax fuerit, etiam excommunicari.

2do: Extranei, vagi etiam & errantes, subjacent Censuris per statutum loci latis. Ratio est, quia extranei tenentur legibus locorum in quibus vivunt, qui vero tenentur legibus locorum, subjacent etiam Censuris quæ harum legum violationi annexæ sunt.

3tio: Si Censura feratur per modum sententiæ exg: *excommunicatus sit ipso facto, qui notitiam habet talis furti, nisi revelet*, non ligat eos qui territorium nondum ingressi erant eo tempore, quo lata fuit Censura. Quia talis sententia fertur per modum præcepti transeuntis, præceptum autem transiens non cadit nisi in eos, qui actu præsentibus sunt. Qui vero licet extranei sint, actu tamen in territorio illo præsentibus sunt, cum talis fertur sententia, illi, si sat diu ibidem morentur, ut commode istiusmodi præcepto satisfacere possint, ad id tenentur, aliud est de his, qui quasi cursim transeunt, illi enim ex communi opinione istiusmodi præcepto non tenentur.

Quæres 6to: *An qui mandant, aut consulunt crimen, subiaceant Censuræ contra criminis executores latæ?*

Resp: amo: Mandantes, & consulentes crimen cui annexa est Censura, ei non subjacent, nisi explicite, vel implicite in lege contineantur. Quia in pœnalibus, ut sunt Censuræ, stricta fieri debet interpretatio, nec ab uno valet illatio ad aliud. Ergo cum is, qui aliquid fieri mandat, aut consulit, non dicatur stricte, & proprie illud exequi, pœnâ in unum lata, non statim ad alium est extendenda. Quodsi lex Censuram statuens, his aut similibus feratur verbis. *Quicumque fuerit causa talis delicti, qui mediate, vel immediate, qui per se, vel per alium fecerit, sit excommunicatus*, tunc satis exprimuntur mandans, & consulens, ut Censuram contraxisse censeantur.

2do: Etiam si in lege vel statuto, mandantes aut consulentes expressi sint, non incurrunt Censuram, cum in effectum non influunt, nisi Censura statuatur adversus mandantes, aut consulentes independentem ab effectu. Quia mandans, consulens qui in effectum non influit, non est causa operis prohibiti sub Censura. Ergo non incurrit Censuram, nisi hæc lata sit primario contra consulentes, aut mandantes, ita ut ex solo mandato aut consilio obnoxii sint sicut Cap: x. de homicidio in 6to: excommunicatur ipso facto, qui quempiam Christianorum per as-

falsi-



causinos non solum interfici fecerit, sed etiam mandaverit, quamquam mors ex hoc forsitan non sequatur.

Hinc liber est à Censura *amo*: qui mandatum à se datum revocavit, modo sufficienter illud revocaverit, & revocatio innotuerit ei, cui datum est mandatum. Si enim non innotuit, communior opinio tenet, mandantem tunc Censura ligari. *2do*: Qui bono animo consuluit aliquod minus mali, ut retraheret ab inferendo majori malo, *exg*: qui volenti Clericum occidere, svasit ut solum percuteret, talis immunis est à Censura, non enim influit culpabiliter in opus sub Censura prohibitum. Contra vero Censuræ obnoxius erit consulens, qui malo consilio in opus malum cui annexa est Censura influxit, & ad hoc sufficit, ut homini jam ad crimen determinato, voluntatem auxerit, eumque impulerit, ut citius, ardentius, & immobilius crimen exqueretur. Istud autem cognosci potest, tam ex confesso illius cui datum est consilium, si tamen dignus sit fide, tum ex conjecturis, ut si criminis patrator jam omnia ad delictum perpetrandum necessaria præparasset, nec ejus esset indolis, ut verbis mandantis moveretur.

*Quæres 7mo: An idem homo possit pluribus Censuris ligari?*

*Resp: amo*: Idem homo potest pluribus subiacere Censuris, sive ejusdem, sive diversæ speciei. Quia qui jam Censura irretitus est, potest vel eandem, vel diversam transgredi legem, cujus violationi alia annexa sit Censura. Potest ergo plures incurrere Censuras. Unde statuitur Cap: 27. de Sent Excom: Titium, si constet ob duplicem causam excommunicatum fuisse, & expressisse tantum unam in literis quas super absolutione sua impetravit, semper habendum esse pro excommunicato, donec secundam ab altera Censura obtinuerit absolutionem.

*2do*: Multiplicantur ergo Censuræ prout moraliter multiplicantur numerice, aut specificè transgressiones, quibus annexæ sunt Censuræ, quia unicuique transgressioni completæ, sua alligata est Censura. Hinc *amo*: Qui Clericum sæpius percutit sine morali interruptione, unicam incurrit Censuram quia percussio cum certam, & definitam extensionem non habeat, non censetur perfici uno aut altero ictu, sed eadem numero reputatur, donec moraliter finita, & consummata fuerit. Contra vero qui sæpius, etiam sine interruptione cum eadem fornicariam copulam haberet, plures Censuras, si forte ei annexæ sint, contraheret, quia copula fornicaria terminum habet definitum.



nitum, & uno actu consummatur, & qui proinde pluries poni nequit, quin plura numero ponantur peccata, ac per illa plures Censuræ contrahantur. 2do: Qui uno actu tres occidit Clericos, tres incurrit Censuras, duas vero qui furatur in Ecclesia, si Censura in fures, & in sacrilegos constituta esset, quia in occisione trium Clericorum, triplex numero scelus, in furto autem rei sacræ duplex specie distinctum occurrit crimen.

3tio: Qui facit actum ab eodem, vel pluribus Superioribus, eandem habentibus potestatem pluries prohibitum, non incurrit plures Censuras. Quia Censuræ non multiplicentur, nisi multiplicentur leges, statuta, Censuras constituenta. Porro idem Superior, aut plures ejusdem ordinis, unum idemque prohibentes, aut præcipientes novas leges, nova statuta non constituunt, sed unam eandemque legem constituere censentur, qui ergo illam transgreditur, unam, non plures contrahit Censuras.

*Quæres 8vo: Qua forma ferri debeat Censura?*

*Resp:* In jure communi nonnullæ præscribuntur formalitates, quæ servari debent, dum Censuræ in aliquem vibrantur. Quales sunt, ut in scriptis Censura statuatur, ut monitio præcedat, & aliæ quam plurimæ. Porro ex his aliæ sunt essentielles, quæ si non servantur, invalide fertur Censura, aliæ sunt accidentales, quas si Judex Ecclesiasticus non observaverit, peccat quidem, sed Censura valet. Verum hæc cum magis respiciant forum externum à Juris Canonici explanatoribus recensentur.

## ARTICULUS 2dus

*De iis quæ ab incurrenda censura excusant, à quo, & quomodo ab iis absolutio obtineri possit.*

*Quæres 1mo: Quæ ab incurrenda censura excusare possunt?*

*Resp:* Ab incurrenda censura eximere, & exonsare possunt, ignorantia, metus, necessitas, impotentia, dubium quoque sive juris, sive facti, & alia nonnulla.

*Quæres 2do: Qualis ignorantia excusat ab incurrenda censura?*

*Resp:* Ignorantia invincibilis, sive juris, sive facti communis, aut particularis excusat à censura. Unde si quis invincibiliter ignoraret abstinentioniam à Carnibus sub  
pæna



pœna Excommunicationis esse tali die prohibitam, immunis est ab istiusmodi censura etiamsi carnes comederit. Idem est si cognoscens legem prohibitam, inculpabiliter ignoret, id quod sibi ministratur carnem, aut ex carne esse. Quia jus commune non vult ignorantes Censuris ligari, nisi eorum ignorantia crassa, aut lupina fuerit. Præterea ad censuram & peccatum mortale requiritur, & contumacia. Porro ubi est ignorantia invincibilis, ibi nec peccatum est mortale, nec contumacia reperitur.

Hinc imo: qui laborant ignorantia venialiter solum culpabili, uti illis contingere potest, qui non parum adhibent diligentiam, ut eorum quæ scire tenentur, notitiam assequantur, nonnihil tamen hac in re negligentiam rei sunt, ii inquam Censuras quas ignorant, non incurrunt, quia censura gravis non incurritur sine peccato mortali, ubi vero negligentia solum venialis est, ibi deest peccatum mortale, neque ergo tunc Censura contrahitur. 2do: Qui sciunt aliquid esse quidem malum, ac lege etiam divina prohibitum exg. percussionem Clerici, qui & ipse proximus est, ac propterea eum percutere, verberare, ex se illicitum est, sed invincibiliter ignorant idem quoque specialiter ab Ecclesia gravissime vetitum esse, immunes sunt à censura, quia censura quæ pœna Ecclesiastica est, non incurritur nisi per contemptum, & contumacem resistantiam legi Ecclesiasticæ. Quando autem invincibiliter ignoratur lex Ecclesiæ, ibi nec est contemptus ejusdem legis, neque contumax est resistantia. 3tio: Imo qui scit rem aliquam jure Ecclesiastico prohibitam esse exg. ingressum in Monialium Claustra, sed invincibiliter ignorat Censuram quæ contra hoc in puncto delinquentes lata est, ab eadem Censura immunis manet: Quia ad contrahendam censuram requiritur contumacia, quam præcedere debet monitio ab homine, vel à lege facta. Porro qui invincibiliter ignorat Censuram pro tali excessu lege Ecclesiastica statutam esse, non est monitus, non est proinde contumax, ac propterea non incurrit Censuram. Atque in hoc Censuræ, ab aliis pœnis Ecclesiasticis exg. irregularitatibus, quæ ex delicto contrahuntur, differunt, quia illæ etiamsi ignorantur contrahuntur, non item Censuræ. Ignorantia itaque invincibilis solius etiam Censuræ ab illa incurrenda immunem facit. Verum cum non ita frequenter occurrit ignorantia invincibilis Censuræ lege universali latæ, ideo non facile ab ea exempti reputandi sunt, qui ejusmodi legem fuerint transgressi. Nemo igitur eum à Censura exime-

re



re poterit, qui exg. duellum committeret, sciens ab Ecclesia illud severe prohiberi, quia Censuram huic prohibitioni annexam esse nesciebat. Quia ergo difficile est dari ignorantiam vere invincibilem, Censura quæ lege Ecclesiæ universali constituta est, ideo etiamsi quis ignorantiam illius allegaret, absolutionem ab ea petere teneretur. Aliud est de Censuris legibus, ac statutis particularibus constitutis, quia istiusmodi leges, ac statuta ignorari possunt, facilius etiam propter ignorantiam à Censuris per ea constitutis eximi delinquentes possunt.

2do: Ignorantia vincibilis, quæ à peccato mortali non excusat, non excusat etiam à Censura, quia istiusmodi ignorantia & ipsa peccatum est, & causa peccati, quemadmodum ergo non excusat à peccato, ita etiam non eximit à Censura. Quando tamen in lege dicitur: *Qui scienter hoc fecerit, qui facere præsumperit, qui temerarie id fecerit*: ab istiusmodi Censuris excusatur etiam ignorantia simpliciter vincibilis, quia leges cum talibus clausulis censuras statuentes maiorem requirunt notitiam, quam quæ in aliis, quæ his clausulis carent exigi solet. Affectata tamen ignorantia in his casibus ab incurrenda Censura non eximit, quia talis ignorantia pro scientia habetur, eque moraliter æquivalet. Idem dicendum est de iis qui agunt ex ignorantia non quidem affectata, sed ita crassa ut affectatæ æquivalet. Qui vero agunt ex ignorantia simpliciter crassa ab huiusmodi Censuris excusari solent, quia leges tales Censuras contra temerarios violatores, decernentes, quemdam contumaciæ requirunt gradum, qui iis deesse videtur, qui legem licet non sine gravi sua culpa penitus ignorant, & ideo ipsam transgrediuntur.

3tio: Ignorantia quoque concomitans, si vere invincibilis sit, excusat à Censura. Quia actus externus ex ignorantia concomitante, & invincibili factus, ex pravo quidem procedit affectu, sed exterius non continet eam malitiam mortalem quæ ad contrahendam censuram prærequiritur. Hinc à Censura liber est, qui eum, quem invincibiliter credit esse feram, vel Laicum, cum sit Clericus infensus, occidit, attamen si eum cognovisset, nihilominus occidisset, actus siquidem pravi licet, sed pure interni Censuris non subiacent.

Quæres 3tio: *An qui agit quidpiam dubitando an non ei annexa sit Censura, eam reipsa incurrat?*

Resp: Qui dubitat an actioni quam faciendam meditatur annexa sit Censura, eam certo incurrit, si, reipsa hæc



hæc illi annexa sit, quia talis & vere peccat, & satis contra legem contumax esse censetur, cum voluntarie faciat id, quod advertit forte sub Censura prohibitum esse. Si vero dubium versetur circa actionem jam peractam, an exg. ei annexa sit excommunicatio, aliaque Censura, talis debet se gerere pro excommunicato, suspenso.

*Quæres 4to: An metus excusat à Censura?*

*Resp: amo:* Metus levis ab incurrenda Censura non excusat, quia à peccato non eximit, neque ergo à Censura eximere valet.

*2do:* Si res quæ ex metu gravi agitur, prohibita sit tantum jure Ecclesiastico, qui eam facit, non incurrit Censuram. Quia qui legem mere humanam adimplere prætermittit ex metu gravi, puta vitam amittendi, famam, aut fortunas, non peccat, quoniam leges pure humanæ cum tanto damno, ac incommodo non obligant. Cum itaque metus gravis in iis quæ sunt pure juris Ecclesiastici à peccato excusat, à Censura etiam eximit; aliud si metus etiam gravis incutiatur in contemptum Ecclesiæ, ut si quis ab Hæretico metu gravi ad manducandas Carnes die Veneris adigeretur, quia qui legem Ecclesiæ in ejus contemptum etiam ex metu gravi sibi inculso transgreditur, non ideo à gravi peccato immunis est, ergo neque liber est à Censura contra istiusmodi peccatum lata.

*3tio:* Quod si res, quæ sit ex metu gravi, non Ecclesiastico solum, sed divino etiam ac naturali jure vetita sit, probabilius est tunc incurri censuram, quia in tali casu metus gravis à peccato non excusat, ergo neque à Censura eximere valet. Et vero scopus ac finis Ecclesiæ Censuras decernentis est, ut homines potentius, ac efficacius retrahat ab iis quæ jam divino, aut naturali jure prohibita sunt, igitur tam late extenditur Ecclesiæ censura, quam Dei, aut naturæ lex extenditur, unde cum divina, aut naturalis lex etiam in casu gravis metus obliget, in eo pariter ligat Ecclesiæ Censura.

*Quæres 5to: Utrum impotentia faciendi id quod præcipitur sub Censura. ab ea excuset?*

*Resp: Excusat,* quia quod excusat à peccato, excusat etiam à Censura. Porro impotentia excusat à peccato, ergo excusat etiam à Censura. Hinc non subiacet Censuræ contra rerum alienarum detentores latæ, qui vel absolute restituere nequit, vel id non potest sine damno longe majori. Pariter qui die festo Missam audire non potuit, si ipsius omissioni annexa elset Censura, ab



ea immunis foret. Verum qui mane Missam audire potuit & tunc non audivit, prævicens futurum quod deinceps audire non possit, quemadmodum peccati reus est, ita etiam Censura ligatus manet.

*Quæres 6to: Quis à Censuris absolvere possit?*

*Resp:* Censuræ vel reservatæ sunt vel non. Præterea vel relaxantur pro foro interiori, vel in foro exteriori. Igitur *in articulo mortis* omnes Sacerdotes, quoslibet pœnitentes, à quibusvis peccatis & Censuris reservatis etiam absolvere possunt, ne scilicet quis pereat. Ita Concilium Tridentinum constituit Sess: 14. Cap: 7. quia in eo casu omnes Sacerdotes jurisdictionem habent ab Ecclesia sibi communicatam. Et hæc potestas competit etiam Sacerdoti præciso, & denunciato, prout nunc communiter docent Theologi. Non potest tamen Sacerdos non approbatus in articulo mortis absolvere cum præsens est Sacerdos approbatus, vel cum absolutio à Censuris per literas à Superiore obtineri potest. Quodsi Confessio Sacerdoti non approbato cepta fuerit, & superveniat approbatus, poterit prior continuare, & absolutionem impertiri. Ceterum Sacerdos qui aliquem in articulo mortis à Censuris absolvit, à quibus alios absolvere non poterat, curare debet ut pœnitens sublato infirmitatis impedimento, quam primum fieri poterit, præsentet se Superiori qui de jure extra mortis periculum absolvere poterat. Ita disponit Rituale Rom: de Sacram: Pœnit: titulo 3. Cap: 1. Et id magis adhuc fieri debet, si Censura, qua moribundus ligatur, fuerit publice denunciata, ut scilicet à suo Superiore à Censura pro foro etiam exteriori absolvatur. Porro hic articulus & periculum mortis idem sunt, ac promiscue sumuntur. Quamquam vero in articulo, sive periculo mortis omnis Sacerdos ab omnibus peccatis, & Censuris absolvere posse dicatur, id tamen intelligendum est de iis Censuris, quæ consecutionem gratiæ impediunt, ne scilicet, ut loquitur Concilium Trident: occasione illarum quis pereat: qualis est excommunicatio, interdictum personale, unde non est necesse ut moribundus absolvatur à suspensionibus, aut irregularitatibus contractis, quia hæc consecutionem gratiæ non impediunt.

*2do:* A Censuris etiam non reservatis in foro exteriori nemo absolvere potest, nisi is, qui eam tulit, ejus successor, ab ipso delegatus, & illius Superior. Quia si soli in foro exteriori ordinariam, aut delegatam exercent jurisdictionem, in foro autem interiori Excommunicatio



catio à jure vel statuto lata, quæ non est reservata, ab omni Sacerdote ad audiendas Confessiones approbato, relaxari potest, quia conditor legis, ac statuti, eo ipso quo Censuræ hujus absolutionem sibi specialiter non retinuit, concessisse videtur facultatem aliis eam relaxandi. Sic inquit Innocentius 3. Cap: 29. de Sentent: Excom: Hæc tamen regula locum non habet *amo:* cum Episcopus censuras quæ jure communi reservatæ non sunt, sibi specialiter reservavit. *2do:* Cum censuræ etiam non reservatæ ad forum contentiosum tractatæ sunt. Si reus se purgavit falsis etiam probationibus, jam Censura quam incurrerat, non magis reservata erit, quam ante intentatam ipsi litem, quia crimen quod non est in Judicio probatum, manet occultum. *3tio:* Cum censura fertur ab homine per specialem sententiam, hæc enim semper reservata est ei, qui ipsam tulit.

Suspensio autem & Interdictum saltem locale, & generale personale, ex communi sententia censetur reservata esse Superiori qui eam tulit, ita ut nullus Sacerdos possit ab eis absolvere sine potestate ad id à Superiore accepta. Sunt tamen Theologi qui dicunt Confessarium ordinarium ex concessione Ecclesiæ posse absolvere à Suspensione & Interdicto particulari, cujus pœnitens non est sibi conscius, & ad hoc valere formulam usitatam, quæ in audiendis Confessionibus adhibetur.

*Quæres 7mo: Episcopi possuntne absolvere à Censuris Papæ reservatis?*

*Resp:* A Censuris Papæ reservatis Episcopi absolvere possunt. *amo:* quando istiusmodi Censuræ contractæ sunt ex delicto occulto. De his sic habet Concilium Trident: Sess: 24. Cap: 6, de Reform: *Licet Episcopis in irregularitatibus omnibus, & suspensionibus ex delicto provenientibus, excepta ea quæ oritur ex homicidio voluntario, & exceptis aliis deductis ad forum contentiosum, dispensare, & in quibuscunque casibus occultis etiam Sedi Apostolicæ reservatis, delinquentes quoscunque sibi subditos in diocesi sua per seipsos aut Vicarium ad id specialiter deputandum in foro conscientie gratis absolvere.* Et hanc potestatem Episcopi exercere possunt extra Sacramentum Pœnitentiæ, quia forum Conscientiæ pro quo ista potestas Episcopis concessa est, non solum est intra, sed & extra Sacramentum Pœnitentiæ, dummodo res occulte, & sine strepitu juris fiat. Nomine autem delicti occulti communiter illud delictum intelligitur, quod aut non est dedu-



deductum ad forum contentiosum, aut non ita notum est ut non possit aliqua tergiversatione celari. Quare licet per testes probari possit, tamen si non est famosum, & ad forum contentiosum deductum, adhuc occultum manet, quia non omne quod à pluribus cognitum est, notorium censeri potest. Tunc vero ad forum contentiosum deductum esse censetur, quando delatum ad Iudicem est, & licetsi per unum solum testem probatum. Si vero reus accusatus in foro exteriori, se purgaverit, etiam per falsos testes & via iniqua, atque absolutus sit, tunc potest hunc, si reipsa reus sit, Episcopus in foro conscientiae absolvere, quia istiusmodi delictum perinde se habet, ac si non fuisset ad forum contentiosum deductum, ac propterea occultum reputandum est. Hæc autem facultas Episcopis à Concilio Tridentino super casibus, ac censuris occultis Papæ reservatis concessa, per Bullam Cænæ Domini, fuit revocata quantum ad casus in ipsa contentos.

2do: A censuris etiam non occultis Papæ reservatis possunt Episcopi absolvere, quando urget gravis necessitas, & valde difficilis est accessus ad Romanum Pontificem. Et in hoc eventu Episcopi valent absolvere ab omnibus Censuris & Casibus Sedi Apostolicæ reservatis, etiam illis, qui sunt in Bulla Cænæ Dni contenti, sive hæc delicta publica sint, sive occulta. Tunc autem reputatur impossibilis, aut valde difficilis accessus ad Romanum Pontificem, quando est periculum mortis in via, gravis quoque infirmitas, ætas senilis, ac juvenilis, obligatio obediendi Parentibus, alendi familiam, obtemperandi alterius potestati. Hæc sunt, quæ juxta communem Theologorum sententiam difficilem reddunt ad Romanum Pontificem accessum, ac propterea in his casibus à Censuris etiam publicis Papæ reservatis Episcopi absolvere possunt, atque istud expresse statutum habemus Cap: 26. & 58. de Sentent: Excom: ubi dicitur: posse Episcopos à Casibus Papæ reservatis, etiam non occultis & quancunque censuram habentibus absolvere eos, *qui imminente mortis articulo, vel paupertate, aut infirmitate, puerili, vel senili ætate, fragilitate sexus, vel alio canonico impedimento obstante Romam recurrere non possunt.* Et isti legitime sic impediti neque per Epistolam, neque per Procuratorem obstringuntur se summo Pontifici præsentare pro obtinenda ab eo absolutione, quia id jura non requirunt.

Nisi



Nisi id locorum usu stabilitum sit, quod & observari debet.

*3tio:* Tempore Jubilæi possunt omnes Sacerdotes, modo ab Episcopo ad audiendas Christi fidelium confessiones approbati sint, absolvere in foro Pœnitentiæ à Censuris Papæ reservatis. Circa hæc sequentia notanda sunt. *1mo:* eum, qui Jubilæi gratiam lucrari studuit, si post transactum Jubilæi tempus recordetur peccati cum censura reservati, cujus oblitus fuerat in sua Jubilæi tempore facta confessione, posse deinceps à quovis Sacerdote absolutionem recipere, quia per priorem generalem peccatorum, & censurarum absolutionem omnis reservatio ablata est. Quod etiam locum habet quoties quis Sacerdoti pro reservatis approbato, quædam reservata peccata confiteri oblitus elset, tunc enim prima absolutio reservationem tollit, unde peccata illa deinceps à quovis Sacerdote relaxari possunt. Sed qui Jubilæi tempore Confessionem sua culpa nullam fecit, is non est à reservatis absolutus, unde post Jubilæum ad Sacerdotem pro reservatis approbatum recurrere debet. *2do:* quando in Jubilæo conceditur generalis facultas absolvendi à Casibus Papæ reservatis non ideo datur potestas absolvendi à Censuris contentis in Bulla Cænæ Dni: nisi specialiter exprimatur, quia istiusmodi Censuræ sunt specialiter Romano Pontifici reservatæ, specialia autem non continentur in concessione generali, nisi exprimantur.

*Quæres 8vo: A Censuris Episcopo reservatis quis absolvere potest?*

*Resp:* A Censuris Episcopo reservatis, quæ per ejus statuta latæ sunt, absolvere potest ipse Episcopus, qui illam tulit, ejus successor, qui ipso est major, ac superior, denique ipsius delegatus, quia illi quemadmodum habent potestatem ligandi sive ordinariam, sive delegatam, ita quoque parem habent potestatem & absolvendi. A censuris etiam quæ feruntur per sententiam particularem, & in certam ac determinatam personam, licet confuse expressam, & quæ stricte dicuntur Censuræ *ab homine*, licet expresse non reserventur, reservatæ tamen sunt illi, qui ipsas tulit, & nemo ab iis absolvere potest, nisi ad id specialiter ab illo deputatus fuerit, quia alioqui pessum iret Ecclesiastica disciplina, corrueret jurisdictio, & judiciorum subverteretur ordo. Quare etiam in Concilio Later: sub Leone 10. habito, stricte prohibitum est Regularibus *ne Laicos, vel Clericos à sententiis ab homine latis ulla-  
tenus*



*tenus absolvere possint.* Hinc qui Varsaviæ exg. nominatim excommunicatus est, neque ab Episcopo Diœcesis alterius, in qua domicilium fixit absolvi potest. Rursus qui in aliena Diœcesi ob aliquod delictum ibi commissum speciali Censura ligatus fuit, ad sua reversus, à proprio etiam Episcopo absolvi nequit. Quia ex trito axiomate: *Præventus à Judice, forum ipsius in ea causa declinare non potest.* Unde ad illum recurrendum est, qui sententiam tulit. Denique qui censura particulari ad instantiam alterius, qui ab ipso læsus fuit, percussus est, non potest etiam post præstitam satisfactionem, & de ejus consensu, ab alio absolvi, quam ab eo qui censuram tulit.

Hic unum annotandum est, videlicet eum, qui à Papa delegatam habet potestatem absolvendi à Casibus ipsi reservatis, habere quoque potestatem absolvendi à Censuris eidem reservatis, quia casus non sunt Papæ reservati nisi ob annexam illis Censuram. Qui autem potestatem obtinuit absolvendi à Casibus Episcopo reservatis, non potest idcirco à Censuris Episcopo reservatis absolvere, quia cum Episcopi soleant aliquos sibi reservare Casus quibus nulla est Censura annexa, inde fit, ut casus reservati, & Censuræ Episcopales sint duæ res distinctæ, nec unum in alio includatur.

*Quæres quo: A quo absolvi possit Titius qui in sua Diœcesi degens censuram reservatam incurrerat, & alibi perveniens, sua confitetur peccata?*

*Resp:* Si in loco quo Titius pervenit Censura hæc viget, & reservata est, non poterit ille ab ea absolvi nisi per Sacerdotem, qui pro reservatis Casibus, Censurisque approbatus est. Si vero in illo loco ubi Titius commoratur, Censura hæc vel non sit constituta, vel non est reservata, poterit à quocunque Sacerdote simpliciter ad excipiendas Confessiones approbato absolvi. Quia etsi Censura directe in pœnitentem cadit, eumque ligat, reservatio tamen in Confessarium cadit, eumque afficit, ac potestatem illius stringit, ubi ergo Censura reservata non est, ibi à quocunque Confessario tolli, ac relaxari potest. Nisi Titius ad declinandam Censuram ejusque reservationem, ac proinde ut facilius Criminis à se admisi absolutionem obtineret ex propria Diœcesi abierit, ac in aliam eo fine se transtulerit, quia fraus, & dolus nulli patrocinari debet.

*Quæres xomo: Cum quis pluribus ligatus est Censuris, potestne ab una absolvi remanente altera?*

*Resp:* Potest, quia nulla est inter Censuras conne-



xio, quemadmodum ergo seorsive, & singillatim possunt contrahi, ita etiam seorsive una potest tolli altera remanente. Hinc qui absolutionem à Censuris extra Confessionem vg. ab Episcopo petendo, unam expressit Censuram, & alteram reticuit, non debet judicari ab hac altera esse absolutus, nisi merito coniici possit Episcopum sine restrictione ab omnibus Censuris absolvere voluisse, quod nunquam præsumi debet, quando petens absolutionem ex dolo & fraudulentè aliquas Censuras in pètionem expressit, alias celavit. In Sacramento vero Pœnitentiæ Sacerdos intendit absolvere suum pœnitentem, quantum licite ipse potest, & pœnitens indiget, unde tollit etiam illas Censuras, quæ à pœnitentis memoria exciderunt. Quapropter si Confessarius à Censuris reservatis absolvere potuit, omnes saltem indirecte sublatae sunt, tenebitur quidem pœnitens peccata oblita confiteri, non autem denuo à Censuris absolvi debet, unde ab illis peccatis à quocunque Confessario absolvi poterit, quia reservatio sublata est.

*Quæres xmo: An absolutio à Censuris dari possit extra Pœnitentiæ Sacramentum?*

*Resp:* Triplex est forum, videlicet *contentiosum* seu forum fori, in quo res exterius discusæ djudicantur secundum juris ordinem, *Conscientiæ*, in quo res expediuntur absque judiciali strepitu. *Pœnitentiæ*, est ipsum Sacramenti Pœnitentiæ tribunal audita pœnitentis Confessione. Itaque xmo: qui habent ordinariam potestatem absolvendi à Censuris, ab iis absolvere possunt non audita Sacramentali Confessione, sive in foro contentioso, sive in foro conscientiæ. 2do: qui habet potestatem delegatam ad absolvendum à Censuris in foro conscientiæ, potest etiam ab ipsis absolvere non audita Sacramentali Confessione, id tamen secreto & in occulto fieri debet. 3tio: qui delegatam habet potestatem absolvendi à Censuris pro foro Pœnitentiæ, hanc exequi non potest nisi in tribunali Sacramenti pœnitentiæ, audita prius pœnitentis confessione.

*Quæres xmo: Qua forma danda est absolutio à Censuris?*

*Resp:* Absolutio à Censuris non requirit certa verba, cum non sit Sacramentalis, sed potest valide à Censuris absolvi per quælibet verba sufficienter id exprimentia. Verum cum quis à Censuris absolvendus est, servari debet forma ad id præscripta in Rituali Romano de Sacramento Pœnitentiæ titulo 3tio Cap: 3tio 4to, & 5to.

Igitur



Igitur juxta ibi præscriptas formas absolutio à Censuris impertienda est.

Datur etiam aliquando absolutio à Censuris ad cautelam, quando scilicet dubium est an aliquis Censuram excommunicationis, suspensionis, aut interdicti personalis incurrerit, atque tunc sequens adhiberi potest formula. *Absolvo te à Censura Excommunicationis, aut suspensionis, si eam incurristi ob tale factum.* Imo omnibus Confitentibus in Sacramento Pœnitentiæ, antequam à peccatis absolvantur, juxta præscriptum Ritualis Romani datur generalis, & absoluta absolutio à Censuris ad cautelam nimirum, ut tollatur impedimentum recipiendi prædictum Pœnitentiæ Sacramentum, si quod forte subest.

Quamquam vero cessante contumacia delinquentis, & reo converso debeat ille à Censura per Superiorem, si-ve alium ab eo delegatum absolvi, tamen Censura reipsa non cessat, neque tollitur nisi per absolutionem, quapropter damnata est ab Alexandro 7. sequens propositio: *Quoad forum conscientie reo correcto, ejusque contumacia cessante, cessant Censuræ.* Quia etsi contumacia sit causa Censuræ, non est tamen causa ipsius durationis, & quemadmodum licet culpa sit causa pœnæ, hæc tamen manet licet illa tollatur, ita pariter licet contumacia sit causa Censuræ, illa sublata, hæc tamen manet, donec per absolutionem tollatur. Hinc quilibet Censuris innodatus, curare debet ut quam primum ab iis absolvatur, & cum id negligit, ac differt, peccat, & quidem graviter, si diu in Censuris fordescat.

## CAPUT SECUNDUM

### *De Censuris in Specie.*

Tres sunt species Censurarum videlicet: Excommunicatio, suspensio & Interdictum, his adjunguntur Depositio, atque Degradatio.

## ARTICULUS PRIMUS

### *De Excommunicatione, ejusque effectibus.*

*Quæres 1<sup>mo</sup>: Quid sit, & quod duplex Excommunicatio?*

*Resp: Excommunicatio est Censura privans hominem bapti-*



baptisatum communione bonorum Spiritualium vel extoto, vel ex parte, quia scilicet excommunicatio alia est *maior* quæ extoto privat communibus Spiritualibus Ecclesiæ bonis, alia *minor*, dicitur, quæ aliquibus nonnisi spiritualibus privat bonis; nempe Sacramentorum receptione. Hodie Excommunicationis nomen solitarie & sine addito acceptum, de maiori solum excommunicatione intelligendum est.

Duplicis etiam ordinis Excommunicati sunt, alii videlicet non *tolerati* & *vitandi*, alii *tolerati*. Excommunicati non *tolerati*, & *vitandi* illi sunt, quibus cum ceteris fidelibus prohibita est communicatio tam in divinis, quam in civilibus. Et tales sunt illi, qui per sententiam Iudicis nominatim excommunicati sunt, & ut tales in facie Ecclesiæ denuntiati, atque publicati, sive affixa sit valvis Ecclesiæ sententia, quæ in eos lata est, sive coram populo in Ecclesiam congregato promulgata, unde ne ipsi quidem Hæretici, Calvinistæ, Lutherani sunt vitandi, quia licet sint generaliter, & in cumulo excommunicati, non sunt tamen nominatim declarati uti tales, neque nominatim denuntiati. Ut ergo quis excommunicatus sit vitandus, & non toleratus, debet sententia excommunicationis in eum ferri nominatim, ipsius personam, & nomen exprimendo; atque etiam publice debet pro excommunicato declarari, nisi sit publicus, ac notorius Clerici percussor. Excommunicati tolerati, & non vitandi ii sunt, quibus nec in Civilibus, nec in divinis cum ceteris fidelibus denegatur communicatio. Tales sunt illi, qui violatâ lege cui annexa erat excommunicatio, eam reipsa incurrerunt, sed publice pro excommunicationis non sunt denuntiati, etsi forte per Iudicis sententiam crimen illud incurrisse declarati sint, quia criminis declaratio, non est excommunicationis annuntiatio. Et id patet ex celebri Decreto Concilii Constantiensis, à Martino 5. Papa confirmato, quod ita sonat: *Ad evitanda scandala & multa pericula, quæ conscientis timoratis contingere possint, Christi fidelibus misericorditer indulgemus, quod nemo deinceps à communione alicujus, Sacramentorum administratione, vel receptione, aut aliis quibuscunque divinis, intus, & extra, prætextu cujuscunque sententiæ, aut censure Ecclesiasticæ, à jure, vel ab homine generaliter promulgatæ, teneatur abstinere, vel aliquem vitare, aut interdictum Ecclesiasticum observare, nisi sententia, aut censura hujusmodi lata fuerit, contra Personam, Collegium, Universitatem.*

T. II. M.

Da

sitatem



*sitatem, Ecclesiam, Communitatem, vel locum certum, à Judice publicata, vel denunciata specialiter, & expresse. Per hoc tamen non intendimus sic excommunicatos, suspensos & interdictos, aut prohibitos in aliquo relevare, aut quomodolibet suffragari.*

*Quæres 2do: Contra quos Excommunicatio ferri potest?*

*Resp:* Porro excommunicatio ferri potest non solum contra privatas, ac singulares personas, sed etiam aliquando contra totam Communitatem, exg. Collegium, Universitatem, si nimirum constaret de Crimine & contumacia omnium & singulorum Communitatis membrorum, quia tunc nulla esset ratio timendi ne innocentes eadem, qua noxii, pœna obruantur. Verum excommunicatio lata in omnia Communitatis membra, quorum quædam noxia sunt, alia innoxia, valida est pro noxiis, pro innoxiiis valere nequit. Talem attamen ferre Excommunicationem, quæ omnia Communitatis indiscriminatim comprehendat membra, illicitum est, & à Jure prohibitum.

Hic advertendum, atque annotandum, quod Episcopi, quamvis juxta statutum Innocentii 4ti Cap: 4. de Santent: Excom: in 6to. non incurrant Suspensionis, ac Interdicti Censuras, nisi de ipsis expressa mentio habeatur, non tamen eximuntur ab excommunicatione contra omnes lata, tametsi expresse non nominentur, unde illam incurrunt, sicut & ceteri, cum aliquid faciunt sub excommunicationis pœna prohibitum.

*Quæres 3tio: Qui sunt effectus excommunicationis majoris?*

*Resp:* Effectus excommunicationis majoris sunt sequentes. 1mo: Privatio suffragiorum Ecclesiæ. 2do: Privatio activa & passiva Sacramentorum, atque aliarum rerum sacrarum. 3tio: inhabilitas ad ordines suscipiendos, illosque exercendos 4to: Privatio jurisdictionis Ecclesiasticæ, ac communionis cum ceteris fidelibus. 5to: Denique inhabilitas ad obtinenda Beneficia Ecclesiastica, eorumque percipiendos ac retinendos fructus.

*Quæres 4to: Quid, & quotuplicia sunt illa suffragia quibus excommunicatio privat?*

*Resp:* Suffragium est quodlibet opus bonum proximo applicatum ad impendendum animæ ejus salutare auxilium, talia sunt Missæ sacrificia, indulgentiæ, orationes, jejunia. Hæc autem suffragia vel communia sunt, vel privata. Communia sunt spiritualia auxilia, atque subsidia, quibus Ecclesia suffragatur fidelibus, qui sunt membra ejus.

sive



sive ad satisfaciendum divinæ justitiæ pro peccatis eorum, sive ad impetranda aliqua bona spiritualia, & quæ ad illa conducunt, atque inserviunt, Talia sunt Sacrificia, orationes, quæ nomine Ecclesiæ à Ministris ejus peraguntur. Superabundantes quoque Christi ac Sanctorum satisfactiones, quæ ex thesauro Ecclesiæ fidelibus, per Indulgentias applicantur. *Privata* suffragia sunt quælibet bona opera privata, veluti orationes privatae, jejunia, elemosinæ, quæ à Christianis, pro aliis offeruntur. Suffragia igitur communia nomine Ecclesiæ, fidelibus applicantur, & ab illius publicis Ministris dispensantur, privata vero à quolibet Christiano, tanquam à privata, & particulari persona alteri applicantur, & appropriantur.

Privata autem & communia suffragia in eo differunt, quod privata valorem suum perdunt, ex indignitate operantis, & applicantis, non autem communia, quæ semper eam servant valorem, quem habent ex se ipsis, & ab Ecclesia, cujus nomine perficiuntur, & fidelibus applicantur.

*Quæres 5to: Quibusnam suffragiis privat Excommunicatio?*

*Resp:* Excommunicatio privat communibus Ecclesiæ suffragiis. Quia bonorum Spiritualium dispensatio Ecclesiæ à Christo est concedita, istiusmodi autem potestate Ecclesia Excommunicatis, & putridis à se præcis membris, sua denegat suffragia, quod ex toto Jure canonico manifestissimum est, quare Cap: 28. & 38. de Sentent: Excomm: vetitum etiam est, ne pro Excommunicatis oretur, illosque ab omni Spiritualium bonorum participatione removet. Hinc peccaret, si quis Preces, quæ nomine Ecclesiæ fiunt, pro excommunicatis funderet, quia Ecclesiæ prohibitionem transgrederetur. Imo non solum illicita est communium suffragiorum applicatio Excommunicato facta, sed invalida illa foret, quia Ecclesia communium suffragiorum dispensatrix, istiusmodi applicationem annulat, & irritam facit. Atque hæc suffragiorum communium privatio afficit non solum Excommunicatos vitandos, sed etiam illos, qui tollerati, atque pariter in illos istiusmodi cadit pœna. Imo qui nomine Ecclesiæ veluti ejus Minister oraret pro Excommunicato vitando, incurreret excommunicationem minorem, quia in divinis cum eo participaret, quod sub excommunicatione prohibitum est. Omnes ergo excommunicati, sive tolerati sint, sive vitandi, communibus Eccle-



sia suffragiis privantur, quia non sunt membra Ecclesiae & extra unitatem ipsius existunt. cum sint ab ea praecisi. A privatis autem suffragiis Excommunicati non excluduntur. Unde licitum est cuivis privato nomine proprio pro excommunicato privatim orare. Licet quoque Sacerdoti, tamquam personae privatae tempore Missae in memento pro excommunicato mentaliter orare, dummodo eum exterius non nomet, quia id Ecclesia non prohibuit, unde S. Bernardus ait: *Absit, ut etiam pro talibus, etsi palam non praesumimus, vel in cordibus nostris orare cessemus.* Orat quoque Ecclesia publice pro omnibus Excommunicatis in die Parasceves, ut imitetur Christum, qui pro inimicis suis in Cruce pendens oravit.

*Quæres 6to: An, & quomodo Sacramentis priventur Excommunicati?*

*Resp:* Excommunicati omnes, etiam tolerati mortaliis sacrilegii rei sunt, qui antequam ab Excommunicatione absolvantur, Sacramenta recipiunt, quia hæc eis graviter ab Ecclesia prohibita sunt, unde mortaliter peccant eum hanc Ecclesiae prohibitionem scienter transgrediuntur. Excusari tamen quis potest ab istiusmodi peccato, si hoc faceret ex inculpabili, juris vel facti ignorantia. Si autem excommunicatus sciens & volens Sacramenta recipiat, illicite quidem illa recipit, ac proinde nullam per ea assequitur gratiam, sed tamen illa quoad ceteros effectus, exg. characterem, valide recipit, præter Pœnitentiæ Sacramentum, quando ab excommunicatione absolvi negligit. Ratio est, quia ad valorem Sacramenti Pœnitentiæ requiritur sincerus de peccatis dolor, quo caret, qui in excommunicatione sordescit, nec ab ea absolvi satagit. Qui vero ad tribunal Pœnitentiæ accedit invincibiliter ignorans, se excommunicatione esse ligatum, aut ad illud accedit eo animo, ut à peccatis & contracta per ea Excommunicatione absolvatur ab eo, qui ad id potestatem habet, valide, & licite percipiet Sacramentum.

Peccat quoque graviter qui Excommunicato vitando, & non tolerato Sacramenta ministrat. Quia in re gravi, gravem Ecclesiae violat prohibitionem, sæpius namque Ecclesia stricte vetuit, Excommunicatis, maxime autem vitandis, & non toleratis Sacramenta ministrare, nisi periculum mortis immineat. Similiter peccat, qui Sacramenta ministrat excommunicato tolerato, quia indi-



quo Sacramenta dari nequeunt, nisi petens sit occulte, excommunicatus, & publica Sacramenta petat.

Excommunicati tamen qui Sacramenta suscipiunt, antequam ab Excommunicatione absoluti fuerint, præter peccatum grave, cujus rei efficiuntur, nullas alias Ecclesiasticas incurrunt pœnas, quia nullæ constitutæ sunt, sed qui excommunicatione ligati Ordines suscipiunt, ab iis suspensi sunt. Qui vero Sacramenta excommunicatis administrant, si illi tolerati sunt nullas etiam Ecclesiasticas incurrunt pœnas, nisi quod peccent indignis Sacramenta dando, si vero sint vitandi, incurrunt excommunicationem minorem, & interdictum ab ingressu Ecclesiæ. Sic statuitur Cap: 8. de Privil: in 6to. Clericus vero, aut Sacerdos, qui scienter, & sponte cum excommunicatis à Papa, & denunciatis participat, eosdem ad divina officia recipiendo, incurrunt Excommunicationem maiorem, eamque Papæ reservatam. Ita habetur Cap: 18. de Sentent: Excom:

*Quæres 7mo: An Excommunicati Sacramenta administrare possint?*

*Resp: 1.* Excommunicati tolerati valide omnia conficiunt Sacramenta, etiam Pœnitentiæ, neque enim Excommunicatis toleratis aufertur jurisdictio quæ in Sacramento Pœnitentiæ omnino necessaria est. Aliud est de Excommunicatis vitandis, ii enim cum priventur jurisdictione, Pœnitentiæ Sacramentum valide conficere nequeunt. Sacramenta tamen alia, quæ jurisdictionem non requirunt valide conficiunt, quia ad illa sufficit materia, forma, ac intentio Ministri. Unde qui Sacerdoti non tolerato, ac vitando peccata sua confessus est, debet illam Confessionem repetere, nisi coram eo confessus sit in periculo, sive articulo mortis existens, vel in eo loco confessionem coram ipso peregerit, ubi Sacerdos ille ex errore communi, & titulo colorato reputatur pro legitimo Confessario, atque Excommunicatio ipsius nescitur.

*2do:* Excommunicatus sive toleratus, sive vitandus, mortaliter peccat conficiendo, aut administrando Sacramenta, quia id ei gravissime ab Ecclesia prohibitum est; quam prohibitionem, cum sit gravis, & in re gravissima, si transgrederetur, gravissime peccaret. In casibus tamen gravissimæ necessitatis excommunicatus etiam vitandus potest conficere, & administrare Sacramenta, quæ ad salutem necessaria homini sunt exg. Pœnitentiæ, Baptismi, id enim tunc eum facere permittit Ecclesia. Quare in periculo



culo mortis potest baptizare, confessionem sacramentalem excipere, & moribundum absolvere, si videlicet alius desit Sacerdos, qui id præstare possit. Reliqua vero, præter Baptismum, & Pænitentiam, Sacramenta, Excommunicati neque conficere, neque administrare unquam possunt, quia hæc non sunt homini necessaria necessitate salutis.

*3tio:* Neque etiam licitum est ab Excommunicatis, sive toleratis, sive vitandis, Sacramenta petere, vel recipere, nisi in casu necessitatis. Cum enim illa ipsi licite & sine gravi peccato administrare nequeant, ea ab illis petere, ac recipere pariter illicitum est. Et ab excommunicatis toleratis non aliter licite possunt peti, ac recipi Sacramenta, quam ab improbis Ministris. Ab excommunicatis vero vitandis non nisi in gravissima necessitate peti ac recipi possunt.

Porro Excommunicati sive tolerati, sive vitandi, qui extra casum necessitatis, ac proinde illicite Sacramenta conficiunt, administrant, irregularitatem incurrunt. Et qui ab Excommunicatis vitandis pariter extra casum necessitatis recipit, incurrit excommunicationem minorem.

*Quæres 8vo: Quæ præterea Excommunicatis prohibita, & interdicta sunt?*

*Resp:* Excommunicatis sive toleratis sive vitandis prohibitum est. *1mo:* Divinis interesse Officiis, quia omnis in divinis communicatio cum ipsis, severe ab Ecclesia fidelibus prohibita est, non possunt ergo divinis interesse officiis. Unde Excommunicatus sub gravi tenetur, quam primum potest absolutionem ab Excommunicatione sibi procurare, & interim si non intersit die festo Missæ Sacrificio non peccat, si vero absolutionem procurare neglexerit, divina omittens peccat, quia per suam socordiam neglexit amovere impedimentum, quo ab auditione Sacri removetur. Excommunicatus tamen, qui ad Horas Canonicas recitandas tenetur, ab iis propter excommunicationem non est liber, quia nemo ex sua iniquitate & contumacia fructum reportare debet, ergo illas seorsim, ac privatim tenetur sine socio recitare. Excommunicatus qui præter Ecclesiæ prohibitionem divinis interest officiis, peccat quidem mortaliter, quia in re gravi Ecclesiæ prohibitionem transgreditur, nullam tamen aliam ab Ecclesia constitutam obid incurrit pœnam, nisi in duobus tantummodo casibus. *1mo:* Si Sacerdos excommunicatus, autoritate sua procuraverit, ut Missa, vel alia Ecclesiæ officia coram se celebrentur, quia is moraliter tunc se gerit, ac si per se ipsum



se ipsum celebraret, ideo ex communi Theologorum sententia irregularitatem incurrit, eandem tamen non incurreret excommunicatus, si vel Sacerdos non esset, vel quamvis Sacerdos esset, non coram se, sed coram aliis excommunicatis faceret divina officia celebrare, quia jura, quæ istiusmodi pœnam decernunt, loquuntur de Sacerdote excommunicato, qui causa est cur alius coram eo celebret.

2do. Si excommunicatus præsens Missæ, monitusque à Sacerdote, ut ab Ecclesia exeat, parere nolit, tunc enim incurrit excommunicationem aliam Papæ reservatam, cui etiam subiacet, tum interdictus denuntiatus, si in pari casu inobediens fuerit, tum ii omnes, qui impediunt ne excommunicatus, vel interdictus ab Ecclesia recedat.

*Quæres 9no: Quid faciendum si excommunicatus vitandus divinis officiis interesse velit?*

*Resp:* Certum est eos qui coram excommunicatis non toleratis Missam, aut alia divina Officia celebrant, graviter peccare, quia contra gravem Ecclesiæ prohibitionem faciunt, ac præterea minorem incurrant excommunicationem, atque interdictum ab ingressu Ecclesiæ, & si ante receptam ab interdicto absolutionem celebrent, fiunt irregulares. Ceteri vero divinis officiis præsentibus, qui ab iis non recedunt, peccant, & minorem incurrunt excommunicationem, quia cum Excommunicato vitando communicant. Quare Sacerdos, ac ceteri Clerici potius Officia divina abrumpere debent, quam ea prosecui coram tali excommunicato, antea tamen ille monendus est ut ab Ecclesia exeat, si vero foras abigi nequeat, ipsa etiam Missa dimitti debet, nisi jam perventum sit ad hæc in Canone verba: *Qui pridie quam pateretur*: tunc enim, populus quidem ab Ecclesia exire, & recedere debet, Sacerdos vero, uno ministro secum remanente, reliqua prosecui debet usque ad Sanguinis sacri sumptionem atque Calicis purificationem, quia Sacrificii integritas, jure divino præcepta, legi Ecclesiasticæ prævalet. Sed post Calicis purificationem, Sacerdos relictis aliis, nimirum Orationibus, ab Altari recedere debet in Sacristiam, ibique reliqua perficere, ac complere. Quodsi excommunicatus toleratus in Ecclesia præsens, divinis intersit officiis, propterea illa non debent iotermitti, quia non est evitandus.

*Quæres 10mo: Quibus præterea Excommunicatus privatur?*

*Resp:* Excommunicati vitandi privantur post mortem sepul-



sepultura Ecclesiastica, in loco scilicet sacro, qualia sunt Templum, Cæmeteria, Claustra, & alia loca ad divina officia celebranda deputata, quia æquum non est, ut ille post mortem cum fidelibus communicet, quem illi vivum fugere & evitare tenebantur. Et ita habetur Cap: 12. de Sepult: ubi sic dicitur; *Sacris est Canonibus institutum. ut quibus non communicavimus vivis, non communicemus defunctis, & ut careant Ecclesiastica sepultura, qui prius erant ab Ecclesiastica unitate præcisi, nec in articulo mortis Ecclesiæ reconciliati fuerant.* Atque istud extenditur etiam ad eos excommunicatos, qui ante mortem pænitentia signa dederunt, nec absoluti fuerunt, quia deerat qui absolvere possit, debet autem excommunicatus, qui ante mortem pænitentia dat signa absolvi à quocunque etiam Sacerdote, & si tempus suppetat ad Superiorem recurrendum est, ut ab eo pro foro etiam exteriori absolvatur, si tamen interim moriatur quam publice absolutus fuerit, non debent ei Cæmeterium & alia Ecclesiæ suffragia denegari, quia ad hoc sufficit absolutio Sacramentalis, debet ergo cum aliis fidelibus sepeliri. Hic tamen excipiuntur Duellantes, qui si in ipso conflictus loco, aut extra eum, sed paulo post, eadem v.g. die decesserint, non possunt in loco sacro sepeliri, etiamsi pænitentes, & à Censuris absoluti decesserint. Si autem excommunicatus, qui ante mortem pænitentia signa dederat, & sine quacunque absolutione demortuus, in loco sacro sepultus fuerit, non debet exhumari, sed absolvi, habita ad id facultate ab iis, qui eam concedere valent. Qui vero nulla doloris signa ante mortem exhibuerunt, & sic sine pænitentia, & absque absolutione mortui, in loco sacro sepulti fuerunt, exhumari debent, & foras projici, si cadavera etiam ab aliis corporibus secerni possint, postea autem Ecclesia, sive Cæmeterium solemnem aquæ benedictæ aspersione reconciliari debet, quia polluta sunt.

Ceterum qui excommunicatum vitandum, cum aliis Fidelibus sepeliunt, aut funus ejus comitantur honoris causa, ad minus incurrunt excommunicationem minorem, huic enim æque subiacet qui mortuis, quam qui viventibus excommunicatis communicat. Qui vero eundem in loco sacro ipsi sepeliunt, vel sepeliri procurant, subiacent excommunicationis sententiæ, à qua nullatenus absolvi debent, nisi prius ad arbitrium Episcopi satisfactionem exhibuerint. Ita statutum est. Clement: 2. de Sepultura. Quia tamen sepultura, ac aliorum Ecclesiæ suffragiorum de-

negatio



negatio multas turbas excitare aliquando potest, in casibus istiusmodi consuli debet Episcopus, ipsius enim est perpendere an excommunicatus omnino impænitens decesse-  
serit.

Quod attinet Excommunicatos toleratos, & illos, antequam absolvantur, in loco sacro sepelire non licet, attamen si tales sepeliantur, neque a sepelientibus eos Excommunicatio incurritur, neque Ecclesia, aut Cæmeterium polluitur. Quia ex Decreto Concilii Constantiensis, Excommunicati tantum ac nominatim denunciati, vitandi sunt, & Ecclesia, sive Cæmeterium non polluitur, nisi per sepulturam, vel excommunicati nominatim denunciati, vel cuiuslibet hominis propter infidelitatem non baptisati, Clerici quoque qui nec specialiter interdicti erant, nec interdicto causam dederunt, poterunt in loco sacro sepeliri, sed cum silentio sine precibus publicis.

*Quæres 2mo: Quam inhabilitatem contrahunt Excommunicati?*

*Resp: 2mo: Excommunicatus etiam toleratus & occultus ad Beneficium obtinendum, & illud possidendum inhabilis est. Unde collatio Beneficii facta excommunicato etiam tolerato, & occulto nulla, ac invalida est. Ita definit Innocentius 3. Papa Cap: 7. de Clerico Excom: Minist: quia Beneficium datur propter officium, ad quod Excommunicatus admitti non debet, nec potest. Neque hæc collatio, aut quæ ad eum prævia sunt, veluti electio, præsentatio, aut resignatio, per absolutionem ab Excommunicatione obtentam, convalescunt, quia non firmatur tractu temporis, quod de jure ab initio non subsistit, unde renovari debent obtenta, post absolutionem, dispensatione. Excipiuntur ab hac lege Beneficia à Romano Pontifice concessa, etiamsi ipse Censuram ignoret, qua ligatus est, cui Beneficium confert, quia in talibus provisionibus apponitur clausula absolutionis à Censuris ad effectum gratiæ consequendum. Sed hæc Pontificis absolutio neque prodest irregulari, neque propter hæresin excommunicatis.*

*Quodsi collatio Beneficii facta sit ei, qui tempore collationis excommunicatus est, non autem ipso præsentationis tempore, valida erit præsentatio, quam Censura nondum existens irritare non potuit, invalida vero institutio, quam jam contracta censura nullam facit. Si quis autem tempore præsentationis excommunicatione irretitus fuit, & ab ea ante institutionem absolutus, invalida erit*  
tum



tum præsentatio, tum etiam institutio præsentationi huic innixa, nisi censura innodatus sese curaverit rehabilitari. Et hæc vera sunt, etiamsi collatio Beneficii facta fuerit ei, qui invincibiliter ignorabat se esse Censura ligatum, quia ignorantia non tollit inhabilitatem, sed solum excusat à culpa.

*ado:* Verum per excommunicationem nemo privatur Beneficio, ante eam, legitime adepto, quia nullum est jus, quod id statuatur, nisi Crimen, propter quod quis Censura percussus est, ex his sit, quæ Beneficii vacationem per se inducunt. Sed quamvis excommunicatus Beneficio ante legitime obtento ipso facto non privetur, potest tamen per Sententiam Judicis illo privari, imo non facit ex illo Beneficio fructus suos, durante illa Excommunicatione, perceptos, quia excommunicatus, est ipso facto ab officio suspensus. Cum igitur fructus Beneficii dentur propter officium non secus ac merces propter opus. Ergo qui suspensus est ipso facto ab officio Beneficio annexo, à perceptione etiam fructuum ejus suspensus esse censetur. Et id habetur Cap: 52. de Appelat: ubi sic dicitur: *Illi proventus Ecclesiastici merito subtrahuntur, cui Ecclesie communicatio denegatur.* Debet ergo istius fructus ipse restituere. Sed utrum id facere teneatur ante Sententiam Judicis, an vero nonnisi post eam latam, disputant inter se Theologi. Quæstio ad decidendum difficillima, tutius est, pro Condonatione horum fructuum recurrere ad Papam.

*Quæres 22mo: An Excommunicatio privet etiam Jurisdictione Ecclesiastica?*

*Resp:* Excommunicati omnes illicite faciunt illa, quæ sunt jurisdictionis Ecclesiasticæ. Quia omnibus Excommunicatis graviter ab Ecclesia prohibita est cum fidelibus communicatio in divinis. Porro Excommunicati, qui Ministeria Ecclesiastica, aut officia obtinent, vix quando jurisdictionem Ecclesiasticam in alios exercere valent, nisi in divinis cum ipsis communicent. Cum igitur prædicta communicatio sit omnibus Excommunicatis ab Ecclesia interdicta, est quoque ipsis inhibitus usus Ecclesiasticæ jurisdictionis. Excommunicato igitur, sive toleratus sit, sive vitandus, omnis Ecclesiasticæ jurisdictionis usus prohibitus est. Unde peccant graviter qui jurisdictionis actus exercent, cum sint excommunicatione ligati, nisi necessitas à peccato exouset. Acta tamen, ac gesta jurisdictionis Ecclesiasticæ, si fiant ab Excommunicato tolerato, quamvis illicite sint, quia in iis exercendis, ac perficiendis pec-



peccat, attamen valida sunt. Et id constat excommuni Theologorum sensu, ex Bulla Martini 5. Papæ *Ad evitanda*, per eam siquidem omnes actus jurisdictionis spiritualis ab Excommunicatis toleratis exerciti validi, ac rati declarati fuerunt, alioqui magna esset in Ecclesia confusio, nec satis animarum saluti provisum, aut discrimini earum cautum fuisset, si exg. Episcopus excommunicatus toleratus invalide dispensaret sive in votis, sive in juramentis, si nulliter approbaret ad excipiendas Fidelium confessiones.

Quodsi Excommunicatus esset vitandus, non solum illicita, sed & invalida sunt ea, quæ ipse Ecclesiasticæ jurisdictionis exercuerit. Quia excommunicato vitando omnis ab Ecclesia aufertur jurisdictio, ipsiusque exercitio ipse privatur. Quare excommunicatus vitandus etiam ea, quæ nonnisi sunt jurisdictionis improprie dictæ, valide exercere nequit; & talia sunt Beneficii collatio, electio, præsentatio, institutio, ii enim actus cum ab Excommunicato vitando exercentur omnino invalidi sunt. Etsi vero præsentatio ad Beneficium facta à Patrono Clerico excommunicato vitando, qui in hoc Ecclesiastica fungitur jurisdictione, nulla sit, si tamen ab eodem præsentatio fiat, non titulo dignitatis Ecclesiasticæ, sed titulo sui Patrimonii Laicalis, valida erit præsentatio. Idem & magis dicendum est de Laico Patrono excommunicato vitando, & ejus siquidem præsentatio valida est: Quia neuter in his usibus Ecclesiasticam exercet potestatem. Jam vero quod attinet resignationem Beneficii factam ab excommunicato vitando. Si quidem resignatio fuerit simplex, tunc illa valida est, quia nihil est aliud quam cessio Beneficii, quæ fieri potuit, imo ex quadam necessitate fieri debuit ab eo, qui Beneficii munia adimplere nequit. Si vero eadem resignatio sit in favorem tertii, invalida erit, quia excommunicatus vitandus usu & fructibus Beneficii privatur, resignare vero Beneficium in favorem tertii, est Beneficii usu, & fructibus illius quid præstantius. Si ergo his privatur, privatur & illo.

*Quæres 17tio: Utrum civili etiam cum fidelibus communicatione priventur Excommunicati?*

*Resp: amo:* Excommunicati vitandi privantur civili etiam, ac forensi cum aliis fidelibus communicatione. Si quidem Cap. 29. de Sentent: Excomm: prohibetur, ne quis cum excommunicato communicet, non solum in oratione, sed etiam in mensa, salutatione, colloquio. Et hoc ideo



ideo statutum est, ut excommunicati vitandi civili etiam commertione privati pudore suffusi, citius ad penitentiam redeant, atque resipiscant, neve etiam aliis offendiculo sint. Qui ergo in civilibus etiam communicat cum Excommunicato vitando peccat, & minorem incurrit Excommunicationem, nisi necessitas excuset. Neque tamen istiusmodi peccatum erit mortale, sed veniale tantummodo propter materię parvitatem. Si tamen frequens, ac discontinuata fuerit, poterit esse mortaliter culpabilis, tum propter periculum perversionis, tum propter scandalum quod aliis præberetur, tum denique quia per hoc Ecclesię potestas, ejusque prohibitio contemneretur. Gravius autem ab Ecclesia prohibetur fidelibus communicatio cum Excommunicato vitando in divinis, unde qui cum eo in sacris scienter communicat, ordinarie mortaliter peccat, & minorem incurrit excommunicationem. Porro quę universim Excommunicatis vitandis negari debent, sequenti exprimuntur versu: *Os, orare, vale, communicio, mensa negatur* scilicet *imo: denegari debent. Os* id est colloquia, allocutiones, aut scripta, & quęvis amicitię signa, veluti oscula, amplexus. *2do: Orare* cum eo, etiam privata oratio, *3tio: Communio*, sive societas omnis, quę habetur in communi habitatione, in contractibus & negotiis, aliisque actionibus, ita ut non liceat cum eo contrahere, laborare, iter agere, aut quodvis opus præstare. *4to: Mensam*: omnem convictum, simultaneitatemque cibi ac potus. Hęc tamen licite excommunicatis vitandis etiam exhiberi possunt, quando id exigat, ac permittit, utilitas, necessitas, aliaque, quę sequenti exprimuntur versu: *Utile, lex, humilis, res ignorata, neceffe*. Et quidem *1mo: utilitas* sive ipsius excommunicati, sive cum eo agentis, sive alterius tertii, unde licet Medicum excommunicatum consulere, eum invisere, remedia sanitatis ab eo requirere. *2do: Lex* matrimonii videlicet, quare licitum est uxori cum Marito excommunicato simul habitare, atque convivere, in domus, familię gubernatione consulere, adjuvare. *3tio: Humile* videlicet dependentia militum à Ducibus, famulorum à suis Dominis, filiarum à suis Parentibus. *4to: Res ignorata* si nimirum excommunicato quędam præstantur ex ignorantia, quę ipsi præstari non debent, modo hęc ignorantia invincibilis sit, alias nec à culpa, nec à censura excusabit. *5to: Neceffitas* gravis cujuscunque, cui succurrere neceffe est, non enim lex Ecclesię naturali charitatis obligationi impedimento esse potest.



His ergo exigentibus causis licita est civilis, ac for-  
pensis cum Excommunicato ac vitando communicatio,  
extra prædictos casus prohibita est, & qui tunc quid-  
piam Excommunicato vitando præstaret ex iis, quæ ipsi  
deneganda sunt, peccaret, & excommunicationem mino-  
rem incurreret.

2do: Excommunicati vero tolerati non privantur ci-  
vili communicatione cum fidelibus, quia ex Bulla Martini  
5. Papæ non sunt vitandi, ac proinde fideles qui cum ipsis  
communicant, nullam admittunt culpam. Attamen ipsi ex-  
communicati etiam tolerati, & occulti ex sua parte, quan-  
tum possunt tenentur vitare ceterorum fidelium commu-  
nicationem tam in divinis, quam in civilibus, quia hæc  
communicatio semper illis ab Ecclesia prohibita fuit, &  
hucusque interdicta est. Licet enim Martinus 5. Papa  
per Bullam suam, ad evitanda scandala, fideles  
exemerit, & absolverit ab obligatione vitandi Excom-  
municatos, quando ipsi non sunt nominatim denuntiati;  
quia tamen per hæc non intenderat ipsis Excommuni-  
catis favere, aut in aliquo suffragari, ideo ipsi semper  
ea tenentur obligatione, ut ex parte sua quantum possunt  
fidelium declinent communicationem, quatenus hoc pacto  
magis excitentur ad resipiscendum, & citius cum  
Ecclesia reconciliandum, procurando sibi de illius benigni-  
tate absolutionem ab excommunicatione qua ligati sunt.

Quæres 14to: *Qualem excommunicationem incurrunt  
Clericorum percussores?*

Resp: Incurrunt excommunicationem maiorem, &  
Papæ reservatam. Sic habetur in Concilio Lateran: Can:  
15. *Si quis suadente Diabolo hujus sacrilegii reatum in-  
currat quod in Clericum, vel Monachum violentas ma-  
nus injecerit, anathematis vinculo subiaceat, & nullus  
Episcoporum eum absolvere præsumat, (nisi mortis urgente  
periculo) donec Apostolico conspectui præsentetur, & ejus  
mandatum suscipiat.* Porro hanc excommunicationem con-  
trahunt 1mo: Cujuscunque status, sexus, & conditionis ho-  
mines, sive viri sint, sive mulieres, sive puberes, sive  
impuberes, dummodo rationis sint compotes, Laici, sive  
Clerici, ac Religiosi. Neque excipitur qui Clericum vo-  
lentem percusserit, quia licet ei, utpote qui juri suo cedit,  
personaliter injuriam non faciat, facit tamen injuriam  
Ordini Clericali, cum ille Concilii Lateranensis Canon  
non in favorem Clerici particularis, sed in favorem Ordinis  
Clericalis constitutus sit. 2do: Ipse etiam Clericus qui  
seipsum



seipsum ex ira & indignatione percutit, mutilat, occidit, aut aliam sibi met injuriam irrogat, quia sic verum est quod violentas in Clericum inferat manus cum injuria Ordinis Clericalis. *3tio*: Ii quoque huic excommunicationi subiacent, qui Clerici percussione mandant, consulunt, qui eam nomine suo factam approbant, atque ratam habent. Id colligitur ex variis Canonibus. Illa vero percussio dicitur fieri *suadente Diabolo*, quæ non fit sine peccato mortali. Ut autem hæc magis intelligantur, & omnia huc pertinentia percipiantur, sequentia annotari, & animadverti debent. *amo*: Clerici nomine intelligi eos etiam qui prima tonsura initiati sunt, modo tamen habitum portent Clericalem. Ab hoc vero Canonis privilegio excidunt, qui cum habitum clericalem non portent, probabiliter ignorantur esse Clerici. Per *Monachum* vero intelliguntur non solum Religiosi professi, sed etiam Novitii, ac ipsi fratres Coadjutores. Moniales quoque sive professæ, sive Novitiæ sint. *2do*: Per *manus violentas* intelligitur quævis percussio, pugnis etiam & pedibus, baculo, fustibus, actio denique quælibet injuriosa, sive in personam Clerici, sive in res ei aliquo modo adhærentes, ita ut vis ei inferri censeatur. Unde qui Clericum conspueret, aut vestes, quas indutas habet laceraret, à manibus ejus quidpiam per vim raperet, excommunicationem incurreret. Pariter qui Clericum in custodia publica, aut etiam in domo privata detinet, custodesque apponit, ut eum apprehendant si de domo exierit, adeo: ut sine strepitu & confusione ex ea exire nequeat, excommunicatus est.

Haud tamen ad incurrendam istam excommunicationem sufficit gravis contra honorem Clerici injuria, qualis est in verbis, vel aliqua actione exteriore, fustis v.g. exhibitione comminatoria, sed requiritur vis apprehensione manuum, tactuque exteriori, ac gravaminoso consummata, quia alia quævis injuria violentam manuum injectionem non denotabit. Unde liber est ab istiusmodi excommunicatione qui subdole Clerico aufert marsupium, cingulumve quo erat præcinctus, pariter qui metu per sola verba, non autem per injurias quaspiam actiones, incusso, cogit Clericum ut de certo quodam loco exeat, quia in his casibus manus violentæ in Clericum non iniiciuntur.

*Quæres 3to*: Quinam ab hac excommunicatione eximuntur?

*Resp*: Ab hac excommunicatione, eximuntur *amot* qui



qui Clericum percutiunt in justam defensionem vitæ, honoris, aliarumque rerum suarum, quia vim vi in continenti repellere, omnes leges, omniaque jura permittunt. Sed hic servandum est inculpatæ tutelæ moderamen, intra quod sistere censetur, qui id solum facit, sine quo aliter se, aut res suas servare non potest. Qui tamen justæ defensionis modum nonnisi aliquantulum excederet, ex ea videlicet commotione, quæ in tali casu invitis etiam nunquam irrepit, non incurreret excommunicationem.

2do: Eximitur qui Clericum cum uxore, matre, sorore, vel propria filia turpiter inventum percutit. Secus si Clericus deprehendatur in stupro vel adulterio cum persona, quæ nunc percussorem non tam proxime consanguinitate attingit. Porro censetur Clericus turpiter esse inventus, qui in oculis, amplexibus, imo qui solus cum sola in loco suspecto reperitur, & ipse, ac ipsa rationaliter pro suspectis habentur. Qui sic inventum Clericum cædit, tunc solum ab hac excommunicatione immunis est, quando eum percutit in continenti, quia tunc magnus doloris sensus, quo quis agitur, aliquid meretur indulgentiæ.

3tio: Excusatur Pater, Magister, qui disciplinæ & correctionis causa Clericum verberat, modo in hoc notabiliter non excedat. Item qui justa de causa vim infert Clerico, ut exg. ex Superioris Mandato eum trahat ad judicium. Pariter ab ista excommunicatione immunis est, si quis leviter Clericum cædendo nonnisi venialiter in hoc peccet, quemadmodum in rixis, & jocos fieri solet. Quia tamen quandoque difficile discernitur gravitas percussio- nis, quæ ad mortale sufficiat, quoties in his verum occurreret dubium, petenda erit absolutio ad maiorem cautelam.

Quæres abto: Ad quem pertinet hujus excommunicationis absolutio?

Resp: De jure communi Papæ reservata est, potest tamen aliquando ab Episcopis, aut ab aliis Superioribus tolli. Et quidem 1mo: cum percussio Clerici levis est, & modica, quo nomine non illa percussio levis censenda est, in qua nonnisi venialiter peccatur, quia talis percussio cum non sit peccatum mortale, per illam tam gravis excommunicatio contrahi nequit, sed illa levis reputatur quæ opponitur enormi ac mediocri. Percussio *enormis ac gravis* ea est, quæ pervenit usque ad occisionem, aut mutilationem membri, ejectionem oculi, illationem vulneris magni, vel effusionem multi sanguinis aliunde quam ex naribus



naribus. *Levis* à contrario illa est, ubi nec abscinditur membrum, nec dens evellitur, nec multum sanguinis effunditur, qualis satis communiter ea esse solet quæ fit palma, pugno. *Mediocris* levem inter & enormem media ponitur. Ratendum tamen hæc omnia ad viri prudentis arbitrium dijudicanda esse ex circumstantiis personarum, loci temporis, modi ipsius percussione. Quod enim leve est respectu junioris Clerici, veluti alapa, mediocre, aut grave esse potest, respectu Sacerdotis senis, Superioris, Prælati. Pariter quod fit occulte non ejusdem est gravitatis, quam quod fit in frequenti cætu, quod fit domi, levius est, quam quod fit in Ecclesia Ministro ad Sacra jam parato. Porro in arbitranda læsionis gravitate, sufficit ad Episcopum recurrere, ex quo enim ipsi certis in casibus conceditur absolutio à prædicta excommunicatione, eidem etiam conceditur potestas ad videndum num hi, vel illi casus ad ipsum spectent, an non. Verum si Episcopus dubitet num percussio gravis, an levis sit, pro gravi reputanda est. Sed quamvis percussio Clerici gravis fuerit, si sit occulta, & ad forum contentiosum non deducta, Episcopus poterit ab ea absolvere.

2do: Regularis, qui Regularem ejusdem Monasterii verberavit, à suo Superiore absolvi potest, secus si Clericum sæcularem feriat, aut alterius ordinis Regularem; nam in primo casu ab Episcopo, in secundo tum à proprio Superiore, tum ab alterius Religionis Præposito absolvi debet, nisi sit enormis percussio.

3tio: Mulieres quæcunque per Episcopum absolvi possunt à qualicunque percussione, etiam enormi, quia Jus indistincte in his potestatem Mulieres absolvendi concedit Episcopis. Idem est de impuberibus, etiamsi nonnisi post adeptam pubertatem absolvi debeant. Pariter inopes, ægri, senes ab Episcopo absolvi possunt.

4to: Clerici qui in communi vivunt, à percussione Clerici, modo non enormi, per Episcopum absolvi possunt, facile enim communio discordiam parit, unde casus iste merito in jure Episcopo commissus est. Idem est de Janitore, qui in exercitio sui officii Clericum leviter, etiam injuriandi animo percutit.

*Quæres 5mo: Utrum Clericorum percussores vitandi sunt?*

*Resp:* Publici, ac notorii Clericorum percussores vitandi sunt. Porro notorii censentur Clericorum percussores, quorum percussio vel ad forum contentiosum deducta



ota est, vel ita est publica, ut nulla possit tergiversatione tegi, nec ulli juris suffragio celari. Tales ergo Clericorum percussores, notorii scilicet, facti vel juris notorietate, licetsi nominatim non fuerint denunciati, vitandi sunt. Verum in uno loco notorius Clerici percussor, si ad alium se transferat locum, ubi crimen ejus secretum est, non est vitandus.

*Quæres 18vo: Quid sit excommunicatio minor, & qui ipsius effectus?*

*Resp:* Excommunicatio minor est censura Ecclesiastica, quæ privat hominem nonnullis tantummodo bonis Spiritualibus. Hæc modo non contrahitur nisi tunc, quando quis cum Excommunicato vitando communicat in rebus prohibitis, sive divinis, sive civilibus, ea ipsi præstando, exhibendo, quæ jure vetita sunt.

Effectus hujus Excommunicationis sunt sequentes. *1mo:* Privat Sacramentorum receptione; quare mortaliter peccat, qui hac excommunicatione irretitus, aliquod suscipit Sacramentum. Pariter & ille graviter peccat, qui sic excommunicato Sacramenta tribuit, nisi gravis excuset necessitas. Qui etiam innodatus excommunicatione, quamquam minore solum, Missam celebrat, graviter peccat, quia tunc quoque Sacramentum suscipit, quod ei ab Ecclesia graviter prohibitum est. Si vero alia conficiat Sacramenta, videtur saltem venialiter peccare, quia qui à Sacramentorum participatione repellitur, indecens est, ut ea conficiat, & aliis administret.

*2do:* Privat electione passiva ad Beneficia, & Dignitates Ecclesiasticas, unde hac irretitus excommunicatione, ad Beneficia, & Ecclesiasticas Dignitates licite nequit eligi, præsentari. Si tamen nihilominus eligatur, præsentetur, instituatur, validi sunt istiusmodi actus.

Hic nonnulla notanda sunt. *1mo:* Excommunicatione minori ligati nullam incurrunt irregularitatem pœnamve canonicam sive conferendo, sive recipiendo Sacramenta, & ipsi possunt divinis interesse Officiis, Ecclesiæ frui suffragiis, actusque jurisdictionis exercere. *2do:* Ab hac minore excommunicatione absolvere potest omnis Sacerdos simpliciter ad audiendas Christi fidelium Confessiones approbatus.

*Quæres 19no: Quomodo se gerere debet qui dubitat num aliquam excommunicationem incurrerat?*

*Resp:* Qui dubitat num ipse aliquam excommunicationem incurrerat, debet se gerere pro excommunicato,



sive dubium sit *juris*, ut cum quis tale commisit delictum, & dubitat an ei annexa sit excommunicatio, sive sit *facti* ut cum quis scit huic delicto annexam esse censuram, sed dubitat an tale delictum commiserit, vg. an is Clericus fuerit, quem percussit. Ratio est, quia sic expresse Jus statuit, sic enim habetur Cap: 5. de Clerico excom: ministrante. *Quia in dubiis via est tutior eligenda, etsi de lata in eum sententia dubitaret, debuerat tamen potius se abstinere, quam Sacramenta Ecclesiastica pertractare.* Hinc qui non facit id, quod in se est ad excommuniandum istiusmodi dubium quo laborat, regulariter loquendo temere se Sacris ingerit, ob periculum, ne excommunicatus, vel alia ligatus Censura celebret, vel aliud quid simile faciat, quare imprudentissime agit, qui stante tali dubio, non curat saltem ad cautelam absolvi prius, antequam Sacramenta conficere, aut ministrare attentet.

## ARTICULUS 2dus

### De Suspensione, & Interdicto.

*Quæres 1mo: Quid, & quotuplex sit Suspendio?*

*Resp:* Suspendio est *censura*, qua Clerico prohibetur exercitium alicujus Ministerii sacri. Suspendio itaque in solos cadit Clericos, & tantummodo prohibet exercitium eorum Ministeriorum, quæ sacra sunt, atque solis competunt Clericis, unde Suspendio non prohibet illa, quæ in divinis officiis à Laicis quoque perfici possunt.

Porro suspendio alia est *medicinalis*, quæ fertur ut quis resipiscat à malo, alia *pœnalis* quæ fertur in vindictam criminis perpetrati, atque præteriti. Pœnalis alia est *temporalis*, quæ fertur cum præfixione temporis, ad quod durare illa debet, exg. ad biennium, alia *indefinita* cui nullum præfigitur tempus, & tunc intelligitur duratura, donec aliter visum fuerit ei, qui illam tulit. Medicinalis vero vel est *totalis*, quæ simul privat iis omnibus, quibus privare potest, Ordine scilicet, Officio, & Beneficio, vel est *partialis*, quæ non privat simul his omnibus, sed tantum aliquibus, exg. ab Ordine solum non vero Beneficio.

*Quæres 2do: Qui sunt effectus Suspensionis?*

*Resp. 1mo:* Suspendio simpliciter, & absolute lata, suspendit ab Ordine, Officio & Beneficio. Quia nulla est ratio cur sic lata Suspendio ad Beneficium tantummodo,

aut



aut nonnisi ad Ordinem, vel Officium coarctetur, cum enim simpliciter, generaliter, & absolute lata sit, omnia comprehendit, quæ comprehendere potest, scilicet Ordinem, Beneficium, & Officium, & ad illa omnia extenditur.

2do: Suspendio ab Officio simpliciter & absolute lata, privat usu Ordinis, jurisdictionis, & omnis Ecclesiastici Ministerii, quod nonnisi à Clerico exerceri potest. Unde sic suspensus nec Celebrare, nec Sacramenta administrare potest, quia hæc sunt actus Ordinis, Item non potest Censuras ferre, Indulgentias concedere, ad audiendas fidelium Confessiones approbare, quia hæc pertinent ad jurisdictionem, & nomine Officii Ecclesiastici in Jure intelligitur usus Ordinis, jurisdictionis, & ea, quæ utrique annexa sunt, qui ergo ab Officio suspenditur, ab his omnibus suspensus manet.

Hic tamen notanda sunt. 1mo: Per suspensionem cessare jurisdictionem in iis, qui nominatim denunciati sunt, incapacitatem vero ad obtinenda Beneficia induci ante omnem denuntiationem. 2do: Suspendio ab officio, etsi late extendatur, non privat tamen suspensum iis Ministeriis quæ Clericorum propria non sunt, unde suspensus potest Sacramenta alia præter Ordinem recipere, Indulgentias lucrari, celebranti Missam inservire, cum aliis in Choro divina Officia canere, non tamen Orationes vel Capitula, quia hæc functio ex usu Solis Sacerdotibus competit.

Potest etiam suspensus ab Officio, in Missæ sollemni celebratione Epistolam canere, cum alba etiam & Tunica, sed sine manipulo, 3tio: Qui suspensus est ab una solum parte officii, non ideo suspenditur ab altera parte, quæ ei non est necessario connexa, suspenditur tamen ab audiendis confessionibus qui suspensus est ab Ordine, quia potestas Confessiones fidelium excipiendi fundatur in potestate Ordinis, à quo ille suspensus est. 4to: Qui ab officio suspensus est, non ideo censeri debet suspensus à Beneficio & fructibus ejus. Beneficium siquidem & officium diversa sunt, quapropter alia est Suspendio à Beneficio, alia ab Officio, alia denique ab utroque. Ergo qui suspensus est ab Officio, non ideo suspenditur à Beneficio, vel fructibus illius percipiendis. Et hoc verum est, etiamsi suspensio sit *ab homine*, aut quæ contracta sit propter gravem culpam, modo talis non sit, quæ ex se privationem Beneficii inducat.

3tio: Suspendus simpliciter ab Ordine, suspensus est



ab omni Ordine, quia nulla est ratio cur ille ab uno pe-  
tius, quam ab alio suspensus esse reputetur. Suspensus  
vero ab Ordine Superiori, non ideo suspensus est ab Or-  
dine inferiori. At qui suspensus est ab Ordine inferiori,  
regulariter est etiam suspensus ab Ordine superiori, quia  
cui non licet quod minus est, nec ei licere debet, quod  
majus est. Hic tamen excipitur *1mo*: si quis suspendatur à fun-  
ctione inferiori propter culpam in ejus exercitio commissam,  
quia in eo quisque punitur in quo peccavit, sic suspenditur à  
collatione Clericalis tonsuræ Episcopus, qui homini alterius  
Diæcesis eam dare præsumpserit. *2do*: si ordo inferior,  
à quo quis suspensus est, non includatur in superiore, un-  
de si Episcopus suspensus sit à Pontificalibus, non poterit  
quidem ea præstare, quæ spectant ad usum Ordinis Epi-  
scopalis, qualia sunt Ordinum collatio, Ecclesiarum con-  
secratio, at illa exequi poterit, quæ sunt Ordinis Mera  
Sacerdotalis, ut Missam celebrare instar simplicis Sacer-  
dotis, hoc enim non pertinet ad Pontificalia.

*Quæres 3tio: Quid efficit Suspendio à Beneficio?*

*Resp. 1mo*: Suspendio, à Beneficio simpliciter lata,  
suspendit ab omnibus Beneficiis. Quemadmodum enim  
suspendit ab Ordine generaliter lata, ab omnibus Ordini-  
bus suspendit, ita pariter Suspendio à Beneficio simplici-  
ter lata, ab omnibus suspendit Beneficiis. Unde qui plura  
in variis Diæcesibus possidet Beneficia, ab omnibus suspen-  
di potest, per censuram ab uno, tantum latam, Episcopo.  
Quia licet hæc omnia Beneficia non subiaceant uni Epi-  
scopo, ei tamen subjacet ille, qui ea omnia possidet, ac  
proinde ab omnibus per eum suspendi potest, si id me-  
reatur. Si tamen Episcopus quempiam suspendat à Bene-  
ficiis, nec exprimat se ab omnibus suspendere, credi po-  
test eum non ab omnibus, sed ab iis solum, quæ jurisdic-  
tioni suæ subsunt suspendere voluisse, unde suspendio quæ  
ex Statuti alicujus violatione incurritur, ab iis solum su-  
spendit Beneficiis, quæ sita sunt in loco, in quo obligat  
illud statutum: contra vero ea, quæ per sententiam fertur,  
nunc à quibusdam, nunc ab omnibus suspendit, prout  
Episcopus vel quædam solum, vel omnia adimere vult: in  
dubio satius est Episcopum interrogare.

*2do*: qui à Beneficio simpliciter suspensus est, non  
privatur ipso Beneficii titulo, privatur tamen ipsius fru-  
ctibus. Quia suspendio ipsam rei substantiam non destruit,  
ergo ipso Beneficii titulo non privat, sed nonnisi fructus  
illius adimit, alias nihil ipsa efficeret. Hinc qui etiam  
occul-



occulte à Beneficio suspensus percepit ejusdem fructus, tenetur in conscientia ad illos restituendos Ecclesiæ, in qua Beneficium possidet. Potest tamen si indiget, eam sibi fructuum partem retinere, quæ ad moderatam sui sustentationem necessaria est, potest etiam, si officium suum implevit, ea detrahere, quæ sub titulo donanda forent, qui loco ipsius Ecclesiæ inserviret. Excipitur tamen, si in suspensione ob animi obstinationem perseveraverit. Tunc tamen officium divinum recitare, & alias muneris sui partes implere tenetur, quod enim fructus Beneficii non percipiat, ejus est culpa, nemini autem sua culpa patrocinari debet.

3tio: qui suspensus est ab iis solum Beneficiis, quæ actu possidet, valide & licite aliud Beneficium acceptare potest, quia id prohibitum ei non est, qui vero ab omni prorsus Beneficio suspensus est, & aliquod Beneficium ex post accepit, necesse est ut vel ei renuntiet, vel absolutionem, dispensationem, novamque collationem obtineat. Hæc obligatio quia ad minus dubia est, & nulla satis firma juris autoritate elidi potest, adimpleri debet, & id tutius est, atque securius. Si quis tamen à Suspensione in foro pænitiendi absolutus fuerit, jam licite & valide Beneficia recipiet. Nisi tamen Suspendio denunciata fuerit, & qui ea ligatus est, nondum in exteriori foro absolutus est, tunc enim provisiones Beneficii eidem collati, invalidæ censebantur, donec publicam absolutionem receperit.

Quæres 4to: Quid efficit suspensio à jurisdictione lata?

Resp: Suspendio à jurisdictione absolute lata, privat omni usu spiritualis jurisdictionis, consequenter omni actu Ordinis, qui exerceri absque jurisdictione non potest, veluti collatio Ordinum, absolutio sacramentalis. Potest vero sic suspensus Missam celebrare, Sacramenta alia præter Pænitentiam ministrare, nisi tamen ea ex officio administret, ut Parochus, quia tunc actum jurisdictionis exerceret, quæ privatus est. Si suspensio sit à determinata parte jurisdictionis, non privat altera, ut si Parochus sit suspensus ab excipiendis confessionibus, potest Missas celebrare, & alia Sacramenta ministrare, quia limitata causa, limitatum producit effectum, & exceptio unius firmat regulam in contrarium.

Quæres 5to: Utrum actus per suspensum exerciti validi sint?

Resp: Actus per suspensum exerciti, si sint actus Ordinis, & non jurisdictionis, quamvis illiciti sint, validi.







omittitur vox à vinculo Suspensionis nisi pœnitens ad minus sit Subdiaconus.

Hinc sequitur 1<sup>mo</sup>: suspensum ab Ordine, nec peccare, nec irregularem fieri, si communem Mensam benedicat, aut cum aliis in Choro decantet, secus si juxta Ecclesiæ solemnitatem die Dominico benedicat aquam, aut in festo Purificationis Cereos, Mulierem post partum; quia hæc omnia sunt totidem sacri Ordinis munia.

2<sup>do</sup>: Sequitur Episcopum à Pontificalibus suspensum irregularem fieri, si exerceat actus, qui necessario supponunt Episcopalem consecrationem, puta si conficiat Chrisma, Altaria, Calices consecret, Ordines conferat.

3<sup>tio</sup>: Sequitur suspensum à jurisdictione, aut Beneficio non fieri irregularem, si vel ea, quæ jurisdictionis sunt, exerceat, ferendo exg. Censuras, ab eis in foro exteriori absolvendo, vel si Beneficiarius Missam celebret, aut alia perficiat munia; quia non violant suspensionem ab Ordine. Solius autem suspensionis ab Ordine violatio, inducit irregularitatem, transgressio suspensionis à Beneficio, jurisdictione, eam non inducit.

Quæres 2<sup>mo</sup>: Quæ sunt præcipuæ Suspensiones in Jure communi statuta?

Resp: Suspensiones in Jure communi statuta, aliæ sunt Papæ, aliæ Episcopo reservata.

Suspensiones Papæ reservatae sunt sequentes 1<sup>mo</sup>: qui cum titulum non habeant, promittunt, aut etiam jurant seu Episcopo à quo ordinandi sunt, seu cuilibet Beneficiario, à quo ad Ordines præsentantur, se nihil unquam ab iis ad victum petituros. Episcopus, & alii qui talem promissionem exigunt, manent per triennium suspensi, ille à collatione, hi vero ab executione Ordinum, quos receperunt, ipse vero sic ordinatus, ab ordine suscepto manet suspensus, donec dispensationem super hoc ab Apostolica Sede obtinuerit. Pariter suspensionem incurrunt, tum ii, qui sine Episcopi licentia ordinantur absque titulo, tum ii, qui sub fraudulento Beneficii, vel patrimonii titulo Ordines suscipiunt. Qui ab hac suspensionem absolutus fuit, non potest sine dispensatione ad superiorem Ordinem ascendere, nisi cum eo in titulo dispensatum fuerit. Unde etiam qui cum vero titulo ad Subdiaconatum promotus fuit, & prædicto titulo dimisso, sic ad Diaconatum, aut Presbyteratum ascendit, prædictam incurrit Suspensionem, quia reipsa sine titulo ordinatur.

2<sup>do</sup>: Suspensionem Papæ reservatam contrahunt, qui



qui excommunicatione ligati Ordines recipiunt. Hic tamen ignorantia invincibilis excusat.

3tio: Qui eodem die, duobusve diebus continuis duos sacros Ordines recipit. Is enim qui sic ordinatus est, ab executione Ordinis ultimo recepti, suspensus manet. Pariter qui Ordines per Simoniam recipiunt, suspensi sunt.

4to: Qui Ordines furtive suscipiunt, hoc est absque eo, quod ab Episcopo examinati, aut admisi fuerint, si Episcopus furtivam hanc Ordinum receptionem sub excommunicationis pœna prohibuit, alioqui ab Episcopo relaxari poterit.

5to: Qui ante legitimam ætatem ordinantur. Hæc autem suspensio ubi semel contracta fuit, superveniente ætate non tollitur, sed non contrahitur ab iis, qui bona fide rati se ætatem competentem habere, sacris Ordinibus initiati sunt. Unde si postea re comperta abstinerint ab Ordinum usu, poterunt absque ulla absolutione, aut dispensatione celebrare statim ac ætatem præscriptam attigerunt.

Suspensiones vero Episcopo reservatæ sunt.

1mo: Cum per saltum Ordines recipiuntur, hoc est cum Ordo superior suscipitur omisso inferiori, cum talibus ergo, modo tamen non ministraverint in Ordine sic suscepto, Episcopus ex legitima causa poterit dispensare.

2do: Cum aliquis sine litteris dimissoriis proprii Episcopi, aut iisdem suppositis, ab alio Episcopo ordinatur.

3tio: Cum Parochus vel alius Sacerdos, sive Regularis, sive sæcularis, alterius Parochiæ Sponsos, sine licentia illorum Parochi, Matrimonio conjungere ac benedicere præsumit, talis enim suspensus manet, quamdiu ab Episcopo illius Parochi, qui matrimonio interfesse debuit, absolvatur.

4to: Suspensionem Episcopo reservatam incurrunt, qui scienter celebrant, vel celebrare faciunt divina officia in locis interdictis, aut qui excommunicatos publice, atque nominatim denuntiatis, vel interdictos ad divina Officia, seu Ecclesiastica Sacramenta, vel Ecclesiasticam sepulturam admittunt.

*Quæres 2vo: Quibus modis tollitur suspensio?*

*Resp:* Suspensio semel ob commissum crimen contracta, non tollitur nisi per absolutionem. Verum suspensio aliquando imponitur ad tempus, exg. ad triennium, vel in perpetuum, vel sub conditione, donec sic suspensus satisfecerit. Quæ ad tempus lata est, aut sub conditione



tione præstandæ exg. satisfactionis, elapso tempore, aut præstita satisfactione, ipsa cessat per seipsam, sine absolute, non tamen ante ab alio potest relaxari, quam à quo imposita fuit. Si perpetua sit, tamdiu durat quousque revocata sive relaxata fuerit ab eo, qui vel eam tulit, vel ab illius successore, sive superiore ipsius.

Absolvere autem à Suspensione si sit lata ab homine contra aliquem nominatim, ille solus potest, quieam tulit. Si sit lata à jure & nulli reservata, Episcopus absolvere potest, pariter & ab iis quæ ipsi reservatæ injure sunt. Imo etiam à Suspensionibus Papæ reservatis potest Episcopus absolvere subditos suos, quando ipse proveniant ex delicto occulto, & quod non est ad forum contentiosum deductum.

*Quæres gno: Quid sit, & quotuplex Interdictum?*

*Resp:* Interdictum est Censura Ecclesiastica, qua prohibetur divinorum Officiorum celebratio, atque auditio, & alia nonnulla, quibus fideles uti, & frui consueverunt.

Interdictum duplex est, *Personale*: quod immediate personas afficit, easque ubicunque sint arcet à divinis officiis, & *Locale*: quod immediate respicit locum, prohibetque ne Missa in eo celebretur, vel audiatur etiam ab extraneis, ne quis in eo Sacramenta recipiat, aut sepultura donetur. Est etiam Interdictum *mixtum* quod complectitur personale, & locale, unde si speciale sit, cadit & in loca quoad omnes personas etiam extraneas, quæ hic divina facere non possunt, & in personas quoad omnia loca, quia personæ illæ nullibi divinis frui possunt, ut cum Incolæ alicujus loci, & locus ipse interdiciuntur, aut etiam interdicitur persona, & omnis locus ad quem illa se contulerit.

Interdictum autem tum locale, tum personale iterum duplex est, generale scilicet, & particulare. Interdictum *locale generale*, illud est, quo interdicitur locus universalis, sub quo alia continentur loca exg. Regnum, Diæcesis, Civitas. Siquidem ad interdictum generale sufficit, & requiritur, ut locus ille, in quem cadit, duo locorum genera contineat, scilicet locum sacrum & locum profanum, tunc enim prohibetur celebratio divinorum officiorum non solum intra Ecclesiam, ubi fieri consueverunt, sed & extra Ecclesiam, extra quam in casu necessitatis fieri possent, si non extaret Interdictum. Interdictum *locale speciale* est illud, quo interdicitur locus aliquis particularis, non autem ea quæ licet ad eum pertineant, non ita



ita tamen ut partes illius sint, aut ei accessoria. Hinc particulare est interdictum, quod fertur in solam Ecclesiam. Licet enim ipsa Ecclesia interdicta, interdicantur etiam Capellæ, quæ intra eam sunt, & Cæmeterium ei contiguum, quod ut accessorium sequitur naturam principalis, haud tamen interdicta sunt alia loca profana ad ipsam aliquo modo pertinentia, in quibus proinde divina officia celebrari possent, si id necessitas exigeret. Unde interdictum latum in omnes alicujus Districtus Ecclesias, adhuc speciale esset, multitudo enim Ecclesiarum interdictarum, non constituit interdictum locale generale, nisi etiam loca quæcunque ejusdem Districtus interdicto subijciantur, quia adhuc tunc extra Ecclesias divina officia peragi possent, sive in Oratoriis constructis, sive alibi. Hæc stricte ponderanda sunt, quia illi, quibus ex privilegio competit, ut tempore interdicti generalis possint audire, percipere, vel celebrare divina, id non possunt tempore interdicti particularis atque specialis.

Hic annotanda sunt sequentia *amo*: quando Civitas, castrum, aut villa subijciuntur Ecclesiastico interdicto, subijciuntur, illorum etiam suburbia, & continentia, seu vicina ædificia eo ipso sunt interdicta. Pariter si Ecclesia sit interdicto supposita, nec in capella ejus celebrari poterit, nec in Cæmeterio ipsius eidem Ecclesiæ contiguus, secus si ei contigua non fuerint. Ea porro censentur ædificia esse Civitati, Castro continentia, ac vicina, quæ ita parum ab Urbe, sive Castro distant, ut à Civibus commode adiri possint, adeoque si in illis celebrentur divina Officia, parvi ponderaretur interdictum in Urbem, Castrumque latum. Cæmeteria vero illa dicuntur esse Ecclesiæ contigua, quorum extrema Ecclesiam immediate tangunt, ita ut nullus inter ea mediet locus planus, aut vacuus, & unum censeatur moraliter esse pars alterius, aut accessorium illius.

Ceterum interdicto Cæmeterio non ideo interdicitur Ecclesia eidem contigua, quia interdictum totius cadit quidem in partes ipsius, sed interdictum unius partis non cadit in totum.

*2do*: Interdictum quodcunque locale complectitur ac continet interdictum personale eorum, qui eidem causam dederunt. Unde hi, ubicunque fuerint, iis omnibus privantur, quibus privantur illi, qui personaliter sunt interdicti, secus de iis sentiendam est, qui criminis, propter quod latum est interdictum conscii, & participes non fuerunt, si enim extra locum interdictum, possunt licite interesse



teresse divinis officiis. Interdictum vero personale, si particulare sit, nullum complectitur, neque in se continet interdictum locale. Sed neque interdictum generale totius populi in civitate aliqua existentis, loci ipsius interdictum involvit, quia hæc interdicta omnino distincta sunt, unde tum extranei in Ecclesiis ejusdem loci officia divina facere possent, modo tamen abessent ii qui in illo loco interdicti sunt.

*Quæres xomo: Quid sit personale interdictum tum generale, tum particulare?*

*Resp:* Interdictum personale aliud est generale, aliud particulare. *Generale* illud est, quod directe fertur in aliquam Communitatem, prout certum aliquod corpus constituit, vg: in aliquam Universitatem, & hoc interdicto comprehenduntur omnes, qui sunt de illa Universitate. Interdictum vero personale *particulare*, illud est, quod in unam, vel plures personas particulares, etiamsi plures sint, sive aliqui nominatim interdicantur sive generaliter tantum. Interdictum siquidem personale, semper particulare est, nisi cadat in Communitatem.

Eæ vero duæ personalis interdicti species in hoc conveniunt, quod sicut specialiter interdicti nullibi possunt divinis interesse officiis, aut Sacramenta suscipere, sic & qui generaliter interdicti sunt, etiamsi innocentes sint, vel absentes dum fertur interdictum, quamdiu manent, & sunt pars Communitatis interdictæ, ubicunque sint, à divinis abstinere tenentur. Differunt vero in eo, quod specialiter interdicti, non nisi per absolutionem ab hac Censura eximi possunt, contra vero qui generaliter interdicti sunt, modo causam interdicto non dederint, statim ac desinunt esse pars Communitatis, quæ immediate interdicta est, ab interdicto relevantur, unde a contrario non interdicti, hoc ipsi, quod communitatis alicuius interdictæ pars fiunt, statim incipiunt subiacere interdicto.

*Quæres ximo: Quos interdictum comprehendere solet?*

*Resp:* Si sententia interdicti proferatur in clerum, non intelligitur interdictus populus, tunc ergo ille potest alios advocare Sacerdotes, qui sibi divina celebrent. Pariter interdicto populo, non interdicitur Clerus, aut Religiosi. Neque etiam interdicto Clero, interdicuntur Religiosi. Si tamen Regularis pastorum in Civitate, aut simile officium gerat, interdicto Clero, & is interdicatur. Interdicta etiam certa familia, interdicuntur etiam Clerici ejusdem familiæ, quia familiæ nomen tam Clericis quam



quam laicis commune est. Pariter interdicta Universitate, quæ laicis constat, Clericis, & Regularibus, omnes interdicti manent.

Interdicto etiam quantumvis generali, non ligantur. *1mo*: Episcopi, nisi expressa eorum mentio fiat. *2do*: Pueri, & quicunque doli capaces non sunt, ii tamen sepulturæ Ecclesiasticæ tradi non possunt, quia sepeliri non possunt absque ministerio Sacerdotum, quo ipsi per interdictum prohibentur, *3tio*: Peregrini atque exteri, alique, qui per longum etiam tempus interdicti commorantur. Et si enim hujusmodi homines locorum legibus teneantur, non tamen tenentur iis, quæ afficiunt personas singulares, prout sunt, pars hujus populi, qualiter afficit interdictum generale personale.

*Quæres 2do: Qui sunt effectus interdicti?*

*Resp*: Effectus interdicti triplex est, privatio scilicet divinarum officiorum, nonnullorum Sacramentorum, atque sepulturæ Ecclesiasticæ. Sunt etiam alii effectus per accidens ex interdicto profluentes, pænæ nimirum quas contrahunt illi, qui interdictum violant. Et quidem, *1mo*: Eucharistia nec interdicti tempore, nec interdictis etiam infirmis conferri potest: nisi sint in mortis periculo. Specialiter autem interdicti Sacramentum hoc ministrare tunc nequeunt, si adsit alius qui illud vallet ministrare. Cum vero ad infirmos interdicti, tempore viaticum defertur, solitæ Cæremoniæ usurpari possunt. Pro morientibus etiam consecrari, & renovari Eucharistia potest, quare interdicti tempore, januis Ecclesiæ occultis, & ejectis interdictis, licet semel in Hebdomada Missam celebrare.

Neque etiam Unctio-extrema, etiam Clericis, aut Religiosis, nec ordo conferri possunt interdicti tempore. Incertum autem est, an interdicti tempore Matrimonium contrahi, & benedici possit, unde tunc ad Episcopum recurrendum est.

Sed tempore interdicti conferri potest, & recipi sive ab infantibus sive ab adultis Baptisma, idque etiam in Ecclesia specialiter interdicta, & cum consuetis solemnitatibus. Non debet tamen Baptisma conferri ab eo, qui est specialiter interdictus, nisi in casu necessitatis, tumque sine solemnitatibus Sacramentum hoc ministrari debet. Sacramentum quoque Confirmationis interdicti tempore conferri potest; quia pro quodam Baptismi complemento



mento habetur. Haud tamen confirmari potest, qui specialiter interdictus fuit.

Denique tempore interdicti ab homine, vel à jure lati, tam sani, quam infirmi ad pœnitentiam licite admittuntur, iis tamen exceptis, qui interdicto causam dederunt, eisque consilium, vel favorem præbuerunt, isti enim ad pœnitentiam admitti non debent, nisi prius satisfecerint, vel de satisfaciendo idoneam dederint cautionem. Verum Sacramentum Pœnitentiæ à personaliter, simul & specialiter interdictis licite conferri non potest, valide tamen confertur, quia licet excommunicatus denunciatus sua spoliatur jurisdictione, non tamen interdictus denunciatus.

2do: Interdictum tam locale, quam personale privât divinis Officiis, & ab iis prohibet. Nomine autem divini Officii ea omnia munia intelliguntur, quæ à solis Clericis fieri debent, ut celebratio Missæ, benedictio solemnium Nuptiarum, fontis baptismalis, aquæ, olei, chrismatis. Item recitatio officiorum ecclesiasticorum, prout etiam à Monialibus fieri solet. Clerici tamen ac Religiosi privatum Horæ Canonicas recitare tenentur. Imo concessum est amo: Ut singulis diebus in Ecclesiis, & Monasteriis Missæ celebrentur, & alia dicentur officia submissa voce, & clausis januis, interdictis, & excommunicatis exclusis, & campanis non pulsatis. 2do: In solemnitatibus Natalis Domini, Paschæ, ac Pentecostes, & assumptionis Mariæ Virginis, nec non in festivitatibus Corporis Christi, ac Conceptionis Mariæ Virginis, & utriusque octava, permîsum est ut Campanæ pulsentur, & januis apertis, alta voce divina officia solemniter celebrentur, excommunicatis prorsus exclusis, sed interdictis admîssis, sic tamen, quod illi, propter quorum excessum interdictum hujusmodi est prolatum, altari nullatenus appropinquent. Sed hæc concessio non extenditur ad interdictum locale speciale, sed ad generale tantum, & licentia, singulis diebus celebrandi divina officia, non suffragatur Laicis sed Clericis solum, sub quorum nomine veniunt omnes, qui gaudent privilegio fori Ecclesiastici, & Canonis. Hinc Missæ in privatis Oratoriis interdicti tempore celebrari nequeunt, quia privata Oratoria nec sunt Ecclesiæ, nec Monasteria pro quibus istiusmodi licentia concessa est.

3tio: Ecclesiastica sepultura tempore interdicti generalis, omnes prorsus privantur, exceptis solum iis Laicis, qui privilegio gaudent, & Clericis, qui nec specialiter interdicti sunt, nec causam interdicto dederunt, illudque



que observarunt, hos enim, in loco ad Fidelium sepulturam destinato etiam si specialiter fuerit interdictus, si alius desit, sine Campanarum pulsatione, cessantibus solemnitatibus, cum silentio sepelire permilsum est. Hæc tamen permissio non extenditur neque ad Infantes, neque, ad eos etiam quibus Sacramentorum percepto specialiter indulta fuit. Stante interdicto locali speciali, qui nec specialiter interdicti sunt, nec causam interdicto dederunt, sepeliri possunt in alio loco sacro non interdicto, qui vero personaliter interdicti sunt, & denunciati, in loco sacro sepeliri non debent. Denique in generali loci interdicto mortui sepeliendi sunt in aliquo loco non benedicto, unde cessante interdicto exhumari, & in locum sacrum deferri possunt, si nec specialiter interdicti fuerint, nec interdicto causam dederint, qui vero rei sunt, non modo in locum sacrum post interdicti celsationem deferri non debent, sed etiam si in loco sacro sepulti fuerint, exhumandi sunt, & in loco profano tumulandi.

*Quæres 2tio: Quibus incasibus Interdictum contrahitur?*

*Resp:* Jure communi interdictum contrahitur 1mo: Quando Civitas quemvis Pontificem injuriose, vel temere perculserit, aut cæperit, seu banniverit. 2do: Interdicto subjacent Ecclesiæ, & Cæmetaria Religiosorum, & Sæcularium, qui ibidem sepelierunt eos, quos induxerunt ad promittendum, vel vovendum, ut apud eorum Ecclesias sepulturam eligant, vel jam electam ulterius non mutant. 3tio: Interdictum contrahunt loca, in quibus Hæretici sepeliuntur 4to: Et Ecclesiæ in quibus ad officia admittuntur nominatim interdicti. Porro locale interdictum nullum est, nisi denuntietur, quia quemadmodum nullus est Censura ligatus, qui vitari debeat, nisi sit denunciatus, ita nec locus interdictus vitari debet, nisi interdictus esse denuntietur. Neque etiam negatur Sepultura Ecclesiastica, nisi nominatim interdictis, aut saltem nisi consulto prius Episcopo.

Interdictum quoque ab ingressu Ecclesiæ ipso facto incurrunt 1mo: Qui celebrant in loco interdicto. 2do: Qui ad officia, Sacramentave aut Ecclesiasticam Sepulturam admittunt nominatim excommunicatos vel interdictos, donec satisfaciant ei, cujus sententiam violarunt. 3tio: Episcopi, & alii Prælati qui Beneficiorum & Ecclesiarum vacantium bona, & hæreditatem usurpant. 4to: Episco-



pi qui in visitationis decursu aliquid recipiunt, ultra id quod Sibi debitum est, nisi intra Mensem duplum restituant.

Porro per interdictum ab ingressu Ecclesiæ intelligitur privatio exercitii Ordinis sacri, & Sepulturæ in ipsa Ecclesiæ ejusque Cæmeterio, ac tandem prohibitio audiendi divina Officia in Ecclesia, atque Sacramenta in ea recipiendi. Celebre quoque est interdictum, secundum quod omnis utriusque sexus fidelis, qui Paschali non fungitur officio, vivens ab ingressu Ecclesiæ arceri debet, & moriens Christiana sepultura privari. Sed istud interdictum non est latæ sententiæ sed ferendæ.

*Quæres 14to: Cui obnoxii Sunt pœnæ qui Interdictum violant?*

*Resp:* Clericus qui scienter celebrat in loco interdicto denunciato, irregularitatem contrahit, et fit pæssive & active irreligibilis, ac inportulabilis ad Dignitates Ecclesiasticas. Qui vero personaliter interdictus, aut suspensus, vel ab ingressu Ecclesiæ, vel à divinis, Ordinis sacri functionem exercet, eisdem quoque subiacet pænis.

*2do:* Celebrans in loco interdicto suspenditur insuper ab ingressu Ecclesiæ, donec ei satisfecerit cujus sententiam violavit. Idem dicendum tum de eo qui coram excommunicatis, aut interdictis non toleratis celebrat, vel celebrari facit, tum de iis, qui eosdem excommunicatos, vel interdictos ad divina Officia, seu Ecclesiastica Sacramenta vel Sepulturam admittunt, imo qui sepeliunt excommunicatum, vel interdictum in loco sacro, vel non interdictos, in loco interdicto, contra juris permissionem, excommunicantur.

Eidem quoque excommunicationi subjacent *1mo:* Religiosi, etiam exempti qui non servant interdictum, quod Ecclesia Matrix, aut Parochialis servat. *2do:* Domini temporales, qui cogunt aliquos in locis interdictis divina celebrare, vel Campanæ pulsu, sive alio modo plebem etiam non interdictam convocant ad audienda iis in locis Officia, vel impediunt ne nominatim excommunicati, aut interdicti, jussu & templo egrediantur, aut demum qui cum sint nominatim excommunicati, moniti, ut ab Ecclesia exeant, exire nolunt, & hæc iterum excommunicatio Papæ reservata est.

Ceterum omnes sive Clerici, sive Laici qui Interdictum violant, illudque transgrediuntur, mortaliter peccant



eant, quia in re gravi justam ac gravem Ecclesiæ prohibitionem transgrediuntur.

*Quæres 15to: A quo interdictum tolli potest?*

*Resp:* Imprimis per facultatem, ac privilegium absolventi ab omnibus Censuris alicui concessum, non intelligitur potestas tollendi interdictum locale, aut personale generale, & neutrum potest tolli, nisi ab eo, qui habet jurisdictionem fori exterioris in locum, vel communitatem interdictam.

Interdictum latum ad tempus, aut sub conditione, celsat elapso tempore, vel conditione adimpleta, sine absolute, secus si interdictum absolute latum sit. Quando interdictum à jure latum est, potest summus Pontifex suspendere effectus interdicti, quin illud tollat. Interdictum ad tempus latum, potest auferre qui illud tulit. Quando interdictum est locale, etiamsi locus, puta Ecclesia dispensetur, non propterea celsat interdictum, ideo in tali loco non possunt cadavera mortuorum sepeliri. Latum vero interdictum contra Communitatem, si hæc dissolvatur, interdictum celsat respectu eorum, qui innocentes erant. Ab interdicto locali, aut generali personali à jure lato, & non reservato, Episcopus absolvere potest, quia hoc ipso quod non sit reservatum, relinquatur illius potestati. Si interdictum latum sit ab homine, ille qui tulit, potest ab eo absolvere, non vero aliquis inferior. Unde Episcopus nequit absolvere ab interdicto lato à summo Pontifice, quia illo inferior ipse est. Plures autem Theologi docent, ab interdicto personali particulari non reservato, posse absolvere quemlibet Confessarium approbatum.

*Quæres 16to: Quid sit celsatio à divinis?*

*Resp:* Interdicto proxima est celsatio à divinis, illa vero recte definitur: *Prohibitio à legitima potestate facta Clericis, ne in certo loco Sacramenta ministrent, aut divina celebrent officia.* Hæc vel ab homine per sententiam magis, vel minus generaliter decernitur, vel à jure statuitur, ut cum Ecclesia polluitur, & ideo in ea à divinis celsatur.

Conveniunt omnes Theologi. 1mo: illicitum tunc temporis esse ulla officia celebrare, præter unum in hebdomada Missæ Sacrificium. 2do: posse tamen tunc temporis Baptismum, Pœnitentiam, & Eucharistiam in mortis periculo administrari, prout interdicti tempore. Potest etiam juxta non paucos Matrimonium celebrari, & Pœnitentiæ

Sacra-



Sacramentum administrari, etiam iis, qui infirmi non sunt.

Ex his sequitur celsationem à divinis, & interdictum, in quibusdam convenire, in aliis disconvenire. Et quidem in eo conveniunt, quod per utrumque Fideles iisdem spiritualibus bonis priventur. Differunt vero. *1mo*: Quod Interdictum sit Censura, celsatio vera à divinis simplex prohibitio in signum doloris ac mæroris ab Ecclesia concepti ob gravem injuriam, Deo in se, vel in Ministrorum suorum persona, illatam. *2do*: Quia interdictum etiam locale semper aliquas afficit personas, illas nempe quæ interdicto causam dederunt, cessatio vero à divinis non item. *3tio*: Quia violatio celsationis à divinis, irregularitatem non inducit, quemadmodum interdicti violatio illam parit. Religiosi tamen, qui prædictam celsationem violant, excommunicationis sententiæ ipso facto subjacent.

*Quæres 2mo: Quando violatur, & polluitur Ecclesia, ut propterea in ea divina officia cessare debeant?*

*Resp: 1mo*: Violatur & polluitur Ecclesia per homicidium in ea voluntarie, & injuriose perpetratum. Nihil autem interest sive homicidium sit Christiani, sive infidelis, Judæi, Gentilis, sive cum effusione, vel sine effusione sanguinis contigerit. Unde polluitur locus sacer, si quis in eo suffocetur, suspendatur. Sed istud homicidium debet *2mo*: in Ecclesia esse factum, sive in quacunque illius parte, quæ vere sit locus sacer. Locus vero sacer dicitur illud spatium, quod spectat ad interiorius Ecclesiæ corpus, à tecto interiori usque ad pavimentum. Unde si homicidium fiat in Sacristia, Campanili, supra fornitem Ecclesiæ, vel in specu subterraneo, modo non sit ad sepulturam mortuorum destinatum, vel in Cameris Ecclesiæ adhærentibus, non violatur, neque polluitur Ecclesia, quia hæc non veniunt nomine loci sacri, cum non ad officia divina, sed in alios usus deputentur. Violatur tamen Ecclesia, si quis in ea recipiat læthalem ictum, etiam sine effusione sanguinis, unde extra Ecclesiam moriatur. Si quis vero ab homine intra Ecclesiam existente, letaliter extra eam vulneretur, non inde polluitur locus sacer, etiamsi vulneratus Ecclesiam ingrediatur, ibique sanguinem effundat, aut moriatur. Polluitur autem si quis foris existens jaculum mittat, eumque, qui in Ecclesia est, occidat. *2do*: Istud homicidium debet esse voluntarie perpetratum, neque enim polluitur Ecclesia si quis fortuito casu, puta trabe corruente oppressus moriatur. Item si quis mentis impos se occidat, secus si ille, qui se occi-



dit, sit sanæ mentis. Ea autem sola occisione polluitur Ecclesia, quæ ita voluntaria est, ut ad peccatum mortale sufficiat. *3tio*: Debet esse injuriose perpetratum, unde non polluitur Ecclesia, si quis ad sui defensionem, & cum justo moderamine alium occidat, pollueretur vero si mors reo in Ecclesia inferatur, etiam per sententiam Judicis.

*2do*: Polluitur Ecclesia per humani sanguinis effusionem injuriosam, etiamsi mors non sequatur. Si modicus sanguis ex injuriosa etiam percussione effusus sit, non polluitur Ecclesia, imo nec pollueretur ob effusionem copiosam sanguinis à naribus in rixa puerorum elicitæ, præsertim si rixa hæc vacet, à peccato mortali. Non polluitur etiam Ecclesia ob percussione[m] casu factam, vel ab amente, vel quæ fiat ex joco, ad debitam sui defensionem, quia non est injuriosa. Si vulnus in Ecclesia infligatur, sanguis vero extra Ecclesiam defluat, polluitur Ecclesia, quia per accidens est, quod sanguis in ipsa Ecclesia non fluxerit.

Ad violationem ergo Ecclesiæ non sufficit vulnus grave v.g. carniū contusio, fractio ossium absque effusione sanguinis. Canones enim loquuntur vel de illata morte, vel de vulneratione cum effusione sanguinis, in pœnalibus autem non est facienda extensio. In dubio an ex vulnere citra sanguinis effusionem illato, mors secutura sit, nec reconcilianda est Ecclesia, quæ nonnisi in mortis instanti polluta evadit, nec tamen ibidem continuanda sunt divina Officia ob imminētis mortis periculum.

*3tio*: Violatur Ecclesia per quamcumque humani seminis effusionem in ea voluntarie factam, sive in carnali copula, sive extra illam. Et id præstat copula carnalis etiam Conjugatorum in Ecclesia habita. Non polluitur tamen Ecclesia per humani seminis effusionem, quæ vel in somno vel in vigilia contingeret, sed involuntarie, & renitente humana voluntate.

*4to*: Polluitur Ecclesia cum in ea etiam ignoranter sepelitur excommunicatus denunciatus. In hoc vero casu Ecclesia nonnisi exhumato cadavere, si ab aliis discerni queat, aut collata à Censuris absolutione, si excommunicatus pœnitentiæ signa dederit, reconciliari potest. Ubi autem obtinet usus, ut Hæretici cum Catholicis sepeliantur, ut in Germania, & alicubi in Prussia, Ecclesia vel Cæmeterium inde non polluetur. Licet autem excommunicati, & interdicti in jure æquiparantur, non viola-

violat  
sepeliHac  
qui ehui p  
duoscti n  
Undecom  
sa,Eccle  
adeosepel  
terio.Episc  
gular  
bratio

recon

recon  
mittiaqua  
erata

pote

in p  
Offic  
feupriv  
omnund  
demdegr  
tione



violatur tamen Ecclesia, si interdicti denunciati in ea sepeliantur, quia id nullibi statutum est.

5to: Polluitur Ecclesia si infidelis in ea sepeliatur. Hac de causa violatur Ecclesia, si infans non baptisatus, qui extra Matris uterum mortuus est, in ea sepeliatur.

Hic notanda sunt sequentia. 1mo: Ecclesiam non pollui per facta occulta, qualia ea etiam dicuntur, quæ per duos aut tres testes probari possunt. 2do: Sola tamen facti notorietas sufficit, ut Ecclesia censeatur esse violata. Unde si Sacerdote coram pluribus Missam celebrante, committatur in Ecclesia homicidium, dimittenda est Missa, nisi jam Canon inchoatus sit. 3tio: Cæmeterium Ecclesiæ contiguum polluitur, cum polluitur Ecclesia, adeoque illud ante reconciliandum est, quam in eo quis sepeliatur. Haud tamen polluitur Ecclesia, polluto cæmeterio. 4to: Mortalis peccati reus est, qui sine consensu Episcopi in Ecclesia polluta celebraret, haud tamen irregularis efficitur, neque etiam per istiusmodi Missæ celebrationem Ecclesia reconciliatur.

*Quæres 2amo: Quomodo fieri debet Ecclesiæ pollutæ reconciliatio?*

*Resp:* Vel Ecclesia illa fuit solum benedicta, & tunc reconciliatio ejus ab Episcopo sive Vicario generali committi potest simplici Presbytero, qui ad id uti poterit aqua simpliciter benedicta. Vel illa Ecclesia fuit consecrata, & tunc ipsa nonnisi per Episcopum reconciliari potest.

*Quæres 2do: Quid sit Depositio, Degradatio?*

*Resp:* Depositio est pæna Ecclesiastica, qua Clericus in perpetuum, & sine spe restitutionis privatur omni Officio & Beneficio, retento tamen privilegio Clericali, seu fori, & Canonis.

Degradatio, est pæna Ecclesiastica, qua Clericus privatur in perpetuum & sine spe restitutionis non solum omni Officio & Beneficio, sed etiam privilegio Clericali, unde si quis talem Clericum percuteret, peccaret quidem, sed excommunicationem non incurreret. Taliter autem degradatus Clericus, nec à castitatis voto, nec à recitatione horarum Canoniarum immunis foret.



# TRACTATUS

DE

## IRREGULARITATIBUS

Irregularitates eos, qui iis onusti sunt, & à suscipiendis Ecclesiasticis Ordinibus arcent, & ab illorum exercitio prohibent, quare Irregularitatum notitia necessaria est tum iis, qui ad Ecclesiasticum aspirant statum, tum iis qui in eo jam positi sunt.

### CAPUT PRIMUM

*De Irregularitatibus in genere.*

#### ARTICULUS PRIMUS

*De natura, divisione, & effectibus Irregularitatis.*

*Quæres amo: Quid sit irregularitas?*

*Resp:* Irregularitas est *Impedimentum Canonicum*, quo impeditur *Ordinum susceptio*, & *susceptorum usus*. Irregularitas itaque est quædam inhabilitas ex quadam indentia proveniens. Ista vero inhabilitas, seu impedimentum, per Ecclesiæ Canones constituta sunt; nulla itaque irregularitas est juris divini, & nemo irregularitati subiacet, nisi per Baptismum Ecclesiæ sit subjectus. Duo autem efficit irregularitas, scilicet primario impedit Ordinum susceptionem, secundario vero Ordinum susceptorum usu atque exercitio privat. Multipliciter autem irregularitas dividitur. Et quidem amo: in perpetuam, & temporalem. Irregularitas *perpetua* ea est, quæ semper durare debet, & sola dispensatione tolli potest. Irregularitas *temporalis* est ea, quæ ad certum solum tempus durat, & lapsu temporis celsat, talis est irregularitas ex defectu ætatis, quæ adveniente ætate tollitur.

2do: dividitur in *totalem*, quæ absolute, & totaliter



ter excludit ab omni Ordine, & Ordinis usu, ac Beneficio etiam, & *partialem*, quæ non omnes istos effectus parit, sed aliquos solum ex ipsis. Porro certum est *mmo*: dari irregularitates partiales quoad usum Ordinum, quæ scilicet ita excludunt ab exercitio unius Ordinis, ut non excludant ab omni aliorum Ordinum usu. Sic cap: 12. de homic: permittitur, ut Sacerdos dubitans an homicidium commiserit in minoribus Ordinibus, non tamen in sacris ministret. *2do*: dantur etiam irregularitates partiales respectu Beneficiorum, quæ nimirum ita excludunt ab uno, ut non excludant ab alio Beneficio. Sic Cap: 11. de Filiis Presbyt: Filius etiam legitimus Beneficia à Patre possessa immediate post eum tenere nequit, adeoque ad hæc, licet non ad alia, irregularis est. Jam vero ut sciatur quando Irregularitas totalis est, quando solum partialis, sequentes regulæ præscribuntur.

*mmo*: Irregularitas, quam incurrunt Laici ex defectu, vel ex delicto, semper totalis est, excepta tamen ea, quæ oritur ex defectu ætatis, vel scientiæ, qui enim junior est, aut imperitus, ut ad Subdiaconatum promoveatur, non ideo inhabilis est ad Ordines minores.

*2do*: Irregularitas, quam incurrunt Clerici, semper totalis est respectu promotionis ad Ordines, at non semper totalis est respectu functionum Ordinis jam suscepti. Qui tamen suscipiunt Ordinem, ad quem irregulares sunt, in eo ministrare non possunt.

*3tio*: irregularitas, quam incurrunt Clerici, toties debet censi totalis, quoad Ordines, & Ordinum usum, quoties eadem irregularitas pure, simpliciter, & absolute annexa est facto, cujus iidem Clerici participes & rei efficiuntur.

*Quæres 2do*: Quotuplex præterea est irregularitas?

*Resp*: Duplex adhuc est irregularitas, scilicet alia ex defectu, alia ex delicto. Hæc propria culpa contrahitur, illa sine propria culpa innodari quis poterit. Differunt autem istæ duæ irregularitatis species *mmo*: in eo, quod irregularitas ex delicto, sine peccato mortali exterius consummato nunquam contrahatur, quæ vero est ex defectu, sine quacunque culpa contrahitur. *2do*: irregularitas ex delicto, si facti infamia excipiat, sola dispensatione tollitur, quæ vero est ex defectu, non raro ipsa cessat, cessante defectu.

Ad irregularitatem igitur ex defectu, non requiritur peccatum, sed sufficit defectus inculpabilis etiam, qua-



lis est defectus natalium, at vero ad contrahendam irregularitatem ex delicto requiritur peccatum *1mo*: mortale, quia pœna gravis pro levi culpa infligi nequit. Porro irregularitas, quæ ob commissum delictum incurritur, est pœna gravissima, cum privet rebus maximi momenti, & difficiliter relaxetur. Ergo nonnisi propter grave peccatum incurri potest. Hinc irregularitas ex delicto non incurritur, si actus, qui eam inducere consuevit, propter aliquam circumstantiam à mortali excusetur. Id autem, quod sub irregularitatis pœna vetitum est, semper censetur esse vetitum sub peccato mortali. *2do*: hoc peccatum debet esse externum, quia Ecclesia, vel non potest, vel non vult peccata mere interna pœnis suis plectere. *3tio*: debet esse in genere suo consummatum, quia is, qui irregularitatem in pœnam facinoris instituit, non vult illa plectere, nisi post plenam sceleris executionem, quare irregularitas propter homicidium constituta, non incurritur, si mors solum attentata fuerit, vulnus læthale inflictum, & mors de facto non fuit secuta. Si tamen lex irregularitatem statuens, actum nonnisi inchoatum & attentatum innuat, ut talis irregularitas incuratur, non requiritur peccatum consummatum, sed sufficiet attentatum.

Attamen ad incurrendam irregularitatem, non requiritur, ut peccatum sit publicum, quia irregularitas etiam propter occultum scelus contrahi potest, & reipsa per secreta scelera irregularitates, quæ ex delicto sunt, contrahuntur.

*Quæres 3tio: Quis irregularitates statuere potest?*

*Resp*: Sola Ecclesia, vel Romanus Pontifex irregularitatem statuere potest, unde omnes irregularitates, vel à Conciliis generalibus, vel à Romanis Pontificibus constitutæ sunt, quare statutis Diæcesanis irregularitates constitui nequeunt, neque etiam consuetudine aliqua irregularitas invehi potest, quapropter communi Theologorum consensu, illæ solum admittuntur irregularitates, quæ in jure communi expressæ sunt. Si tamen controversia esset de aliqua irregularitate, quæ non ita clare in jure communi esset expressa, si eam extare testetur consuetudo communi Theologorum sensu agnita, admitti illa debet, quia satis in jure communi expressum est, quod in illo contineri usus, & consuetudo unanimi Theologorum consensu firmata testatur. Neque igitur in irregularitatibus valet argumentum à simili vel à fortiori, sed juris expressio, ac sonantia attendi debet, similis namque aut major insti-



instituendæ irregularitatis ratio non efficit, ut hæc de facto instituta fuerit, unde male quis argumentaretur, hoc modo discurrens. Irregularis est, qui duas uxores duxit, ergo & qui cum duabus fornicatus est, primum enim jus commune habet, non secundum. Hinc etiam colligitur eum, qui irregularitate aliqua, etiam ex delicto innodatus, Ordines recipit, aut eos exerceat, novam non incurere irregularitatem, quia id nullibi in jure statutum est.

*Quæres 4to: Quos effectus parit irregularitas?*

*Resp:* Certum est, nullam esse irregularitatem, qua homo privetur iis actionibus, quæ Clericis, & Laicis ex æquo conveniunt, unde irregularis potest Sacramenta quæcunque præter Ordinem recipere, cum aliis fidelibus communicare, in loco sacro sepeliri, Ordinum Minorum officia exercere, quia hæc nunc passim à Laicis peraguntur, poterit etiam officia divina publice cum aliis decantare, modo tamen absteineat ab iis, quæ ex Ecclesiæ usu, sacro sunt Ordini annexa, potest demum absolvi à quolibet peccato, atque ab eo etiam, propter quod irregularitatem contraxit. Neque ideo, quia irregularitas reservata est, reservatum idcirco erit peccatum, propter quod illa contracta fuit, quia absolutio à peccato non habet necessariam connexionem cum dispensatione ab irregularitate. Itaque irregularitatis effectus sunt sequentes.

*1mo:* Irregularitas si totalis sit, impedit omnium Ordinum susceptionem, & illorum executionem. Imo irregularitas ab ipsa etiam prima tonsura arcet, quia primarius irregularitatis finis est, ut à statu Clericali arceantur illi, quos ad eum admittere nec convenit, nec decet. Jam vero per primam tonsuram, status Clericalis suscipitur. Ergo irregulares etiam à prima tonsura suscipienda prohibentur. Hinc mortaliter peccat, irregularis primam tonsuram recipiens, eamque illi scienter conferens, quia uterque Ecclesiæ prohibitionem in materia gravi transgreditur. Valide tamen tum omnes Ordines ab irregulari recipiuntur atque exercentur, tum ipsa etiam prima tonsura, neque illa repeti debet, aut iterari. Aliquando tamen irregularitas omnes parit effectus, quos parere abolet, aliquando non omnes, sed quosdam solum; omnes quidem parit si sit totalis, unde Sacerdos, qui simpliciter irregularis factus est, nec communicare sub duplici specie, nec ex præsanctificatis seipsum communicare potest, quia hujusmodi actus, Ordinis sacri executionem continent. Contra vero: qui partialiter solum irre-

gu-



gularis est, arcetur ab exercitio hoc vel illo sacri cujusdem Ordinis, sed non ab omni illius usu, sic Sacerdos, qui duos digittos cum medietate palmæ amisit, non permittitur Missam celebrare, potest tamen ceteris officiis Sacerdotalibus fungi, ac proinde potest solemniter baptizare, aliaque Sacramenta ministrare.

Porro irregularitas, quæ solum partialis est in eo, qui jam Ordinem aliquem recepit, est totalis in eo, qui necdum illo Ordine initiatus est, ac proinde ille qui ex pollicis defectu inhabilis est, ad suscipiendum Sacerdotium, non potest ad inferiores promoveri Ordines, si iis necdum initiatus est. Tutius ergo & probabilius est, illos, qui etiam sine sua culpa ad Sacerdotium irregulares sunt, neque ad primam tonsuram sine dispensatione admittere posse.

2do: Beneficii collatio irregulari facta, non solum illicita, sed & invalida est, si nimirum irregularitas sit totalis, & ipse non possit omnia Beneficii munia obire. Hoc constat ex variis Juris statutis. Et vero irregularitas à toto statu Clericali removel. Ergo & à Beneficiis remove debet, non prohibendo solum, sed & illorum collationem irritando. Irregularitas ergo inhabilem facit ad quodlibet beneficium obtinendum, si sit totalis, quia Beneficium datur propter officium, & ad hoc ex se ordinatur. Cum ergo irregularis sit inhabilis ad officia exercenda, est etiam inhabilis ad Beneficia recipienda. Quod si vero irregularitas tantummodo sit partialis, plures Theologi contendunt, per eam non impediri receptionem Beneficii, cujus munia irregularis ille licite obire potest. Nominem autem Beneficii veniunt hic etiam Dignitates Ecclesiasticæ.

Hinc sequitur irregularem non facere suos fructus, quos a Beneficio in irregularitate nulliter acquisito percepit, quia hujus Beneficii acquisitio, atque possessio, cum propter irregularitatem, irrita sit, ad illius fructus jus nullum habet, quapropter illos restituere debet; neque potest illos penes se retinere. Debet itaque talis Beneficium dimittere, nisi irregularitatis, qua constrictus est, dispensationem, & insuper novam Beneficii collationem obtineat.

3tio: Pariter irregularitas inhabilem facit ad recipiendam de novo jurisdictionem ordinariam, sive in foro interiori, sive in exteriori. Jurisdictio enim ordinaria non convenit neque competit nisi ratione Beneficii, aut Eccle-

sia-



siasticæ alicujus Dignitatis. Igitur dum collatio Beneficii, si-  
ve Dignitatis irregulari facta nulla, atque irrita est, nul-  
la etiam esse debet jurisdictio, quæ in his fundatur; hinc  
non potest Beneficiarius irregularis administrare Sacra-  
mentum Pœnitentiæ, nisi interveniat, prout frequenter  
intervenire solet, error communis. Aliud est de juris-  
dictione delegata, & de illa omni, quæ non ex intrinse-  
co titulo, sed ex commissione procedit, hæc enim licite,  
& valide ab irregulari recipi potest. Jurisdictio siquidem  
delegata, non pendet à Beneficio, sed à sola delegantis vo-  
luntate, quæ nulla lege quoad irregulares irritatur. Va-  
lide ergo illis conferri potest. Irregulares ergo jurisdic-  
tionem delegatam, in iis, quæ usum Ordinis sacri non  
requirunt, etiam licite exercere possunt.

4to: Irregularitas tamen superveniens, non privat  
Beneficiis antea rite obtentis. Id enim nullo jure consti-  
tutum est, nisi Crimen, cui annexa est irregularitas tale  
sit, quod ipso facto privet Beneficio. Pariter irregula-  
ritas, superveniens jurisdictioni ordinariæ legitime obten-  
tæ, illius usum, exercitiumque non invalidat, neque ipsam  
irritat. Quia irregularitas talis, sicut non privat Benefi-  
cio prius legitime obtento, sic etiam non privat jurisdic-  
tione, quæ eidem annexa est. Porro qui post obtentum  
Beneficium evadit irregularis, aut irregularitatis dispen-  
sationem obtinere debet, aut Beneficium dimittere tenetur.

## ARTICULUS 2dus

*De iis, quæ ab incurrenda irregularitate excusant.*

*Quæres 1mo: Quæ excusant ab incurrenda irregu-  
laritate?*

*Resp: 1mo:* Certum est, ab incurrenda irregularitate,  
quæ est ex delicto, hominem excusari per ea omnia, quibus  
à peccato mortali excusatur, unde ignorantia juris, & facti,  
oblivio, inadvertentia, bona fides, materiæ levitas, quia  
à gravi culpa excusant, impediunt etiam ne incuratur  
irregularitas ex delicto, quia hæc utpote gravis pœna,  
pro culpa quæ vel levis, vel nulla est, incurri non po-  
test. Aliud est de irregularitate ex defectu, hæc enim  
posito etiam inculpabiliter defectu, cui annexa ipsa est,  
semper contrahitur, nisi forte talis sit defectus ille, ut  
irregularitatem non pariat nisi oriatur ex actu voluntario.

Hinc



Hinc irregularis est Judex, qui latronem promeritæ morti addicit, secus si eum vel nolens, vel amens occidat.

2do: Est quoque indubitatum, ignorantiam, oblivionem, inadvertentiam vere hic, & nunc vincibilem, atque culpabilem ab incurrenda irregularitate non excusare, quia cum istiusmodi ignorantia, oblivio, inadvertentia non excuset à gravi peccato, in facto, cui annexa est irregularitas, neque etiam ab ipsa excusat irregularitate contrahenda. Unde sequitur ignorantiam sive legis Ecclesiasticæ quidpiam prohibenti, quod jam divino, aut naturali jure vetitum esse dignoscitur, sive solius irregularitatis facto vetito annexæ, ab incurrenda irregularitate non eximere, neque excusare. Quare qui scit quidpiam exg: homicidium, jure divino esse vetitum, sed ignorat illud etiam jure Ecclesiastico esse prohibitum, vel solum nescit ei irregularitatem esse annexam, per istiusmodi ignorantiam ab incurrenda irregularitate non eximitur, quia per illam à peccato non excusatur, quoties autem quis mortaliter peccat in facto, cui annexa est irregularitas, toties illa contrahitur. Et vero irregularitas etiam ex delicto proveniens, non est pure pœna pœnalis, neque est medicinalis, quæ contumaciam requirat, sed magis est macula quædam, quæ propter reverentiam rebus sacris debitam, ab iis arceat. Porro ignorantia pœnæ, ab ea subeunda non excusat, ubi contumacia non requiritur, ibi scientia legis prohibentis non omnino est necessaria, & macula turpi facto voluntarie perpetrato semper contrahitur. Igitur, quamvis invincibiliter sive lex Ecclesiæ factum prohibens ignoretur, sive annexa eidem irregularitas, semper illa contrahitur, quoties in eo grave admittitur peccatum.

*Quæres 2do: An in dubio incurratur irregularitas?*

*Resp:* Dubium hic duplex est, juris scilicet, & facti. Dubium *juris* est, quando lex canonica ita obscura est, ut peritiores Theologi ambigant, an irregularitas per eam sit constituta, annon? vel etiam quando ambigitur, an hic, vel ille casus contineatur sub lege irregularitatem decernente. Dubium *facti* est, cum aliquis ambigit, an illum perpetraverit actum, cui lex irregularitatem expresse annexa est. Et hoc dubium facti vel respicit homicidium, ut si quis dubitet an ex inflicto ab ipso vulnere mortuus sit homo, vel aliud quidpiam concernit, ut si dubitet aliquis, an rebaptisaverit quempiam, qui jam baptisatus erat.

Ita-



Itaque *1mo*: Qui dubitat an irregularitatem contraxerit, debet istud dubium perpendere, priusquam Sacra operetur, quia alias exponeret se periculo violandæ irregularitatis, quam forte pleniore instituto examine à se contractam esse detegat. Et id servandum est, quoties occurrit dubium probabile, utrinque scilicet solidis rationibus innixum, si enim dubium leve sit, veluti merns scrupulus contemni debet.

*2do*: In dubio juris, nemo censetur esse irregularis. Quia non subsistit irregularitas nisi in jure expressam esse certo, vel saltem probabiliter constet. Porro quando prudentiores, peritioresque Theologi dubitant, utrum hac, vel illa lege constituta sit irregularitas, jam illa neque certo, neque probabiliter in jure expressa est. Ergo illa non subsistit. Neque in tali dubietatis casu, tenetur quisquam se pro irregulari reputare. Igitur in dubio juris nulla incurritur irregularitas.

Quodsi quæstio irregularitatem concernens, non sit simpliciter dubia, sed cadat sub opinionem, quæ à dubio longe discrepat, tunc sequendum est id, quod circa opiniones probabiles statuitur, adeo ut, quis pro irregulari habendus sit, si opinio, quæ irregularitatem statuit, atque pro ea decertat, longe sit probabilior opposita, secus si utraque sit æque probabilis. Tunc enim occurrit ipse dubii juris casus, in quo nemo irregularitate ligatur. Unde etiam qui non discusso juris dubio, in quo versabatur, Ordines recepit, peccavit quidem, quia se exposuit periculo illicite Ordines suscipiendi, si forte irregularitate ligatus esset, verum si adhibita deinceps diligentia, atque serio examine, idem dubium juris perseveret, recepti Ordinis functiones exercere potest.

*3tio*: in dubio facti homicidium concernentis, quisque debet se pro irregulari gerere. Sic Innocentius 3. & Clemens 3. Romani Pontifices statuerant, atque consulti quid agendum esset in dubio homicidium concernente, responderunt tutius esse à divinis cessare, quam temere divina celebrare. Unde qui abortus causa fuit, & dubitat an fœtus animatus esset, aut qui dato patrandi homicidii consilio, dubitat an suum consilium in mortem alterius efficaciter influxerit, non potest sine dispensatione aut Ordines suscipere, aut susceptum exequi.

*4to*: pariter in quolibet alio facti dubio, cum nempe quis dubitat utrum posuerit actionem, cui irregularitas certo annexa est, tenetur se gerere pro irregulari. Ideo  
nam-



namque in dubio perpetrati homicidii ex decisione Innocentii 3. & Clementis 3. tenetur quisque pro irregulari se habere, quia *in dubiis semitam debemus eligere tutiorem, & in hoc casu à divinis cessare tutius ac consultius sit, quam temere celebrare, cum in altero nullum, in reliquo vero magnum periculum timeatur.* Porro istiusmodi rationes universales sunt, & æque valent pro dubio facti in qualibet materia sive homicidii, sive alterius cujusvis. Igitur quemadmodum in dubio facti, quod homicidium respicit, quilibet pro irregulari se gerere debet, ita pariter in quolibet alio facti dubio, quod actionem concernit, cui certo jure communi annexa est irregularitas immunem se ab ea reputare nequit.

*Quæres 2tio: Quando cessat irregularitas, & quis ab ea dispensare potest?*

*Resp: amo:* Omnis irregularitas ex defectu proveniens, quæ causam habet transitoriam, cessante causa ipsa etiam irregularitas cessat, absque ulla dispensatione. Hinc qui sunt irregulares ex defectu ætatis, scientiæ, irregulares esse desinunt. adeptæ ætate, scientia. Et hoc extenditur etiam ad infamiam facti, quæ licet sit ex delicto, potest aliquando per solam contrariam agendi rationem tolli. At istud non extenditur ad irregularitates, quæ causam habent permanentem, unde irregularitas bigamiæ, aut illa, quæ oritur ex defectu lenitatis, quæ licet non sint ex delicto, semper perseverant, nisi dispensatione relaxentur. Idem quoque contingit in irregularitatibus ex delicto, quæ, infamiam, & hæresim excipiendo, non auferuntur, posita delicti emendatione, & læsæ partis satisfactione.

*2do:* nulla est irregularitas in qua Papa dispensare non possit. Porro qui ab Apostolica Sede irregularitatis dispensationem obtinere volunt, ad Datariam, ubi petentis nomen, & Diæcesis exprimenda sunt, recurrere debent, si crimen sit publicum, si vero occultum fuerit, satis est ut ad Pœnitentiarium recurratur, ubi nihil horum exprimendum est.

*3tio:* Episcopis juxta dispositionem Concilii Trident: Sess: 24. Cap: 6. licitum est, *in irregularitatibus omnibus ex delicto occulto provenientibus, excepta ea, quæ oritur ex homicidio voluntario, & exceptis aliis ad forum contentiosum deductis, dispensare.* Illud porro delictum in præsentem occultum dicitur, quod licet probari possit per testes, quia à duobus, aut tribus personis cognoscitur, hactenus tamen notorium non evasit, neque per sententiam aut



aut decretum Judicis, vel ipsius rei confessionem in Judicio factam, neque per tantam ipsius facti divulgationem, ut jam nulla possit tergiversatione celari in tota vicinia, aut majori ejus parte.

Sed hic notanda sunt sequentia. *1mo*: semper occultum id censetur, quod certo, & indubie non est cognitum, unde quod solo rumore publico nititur, non est vere publicum, cum fama veris falsa addere soleat. *2do*: crimen quod publicum est, in ratione criminis, non semper parere irregularitatem publicam. Sic si notorium sit Sacerdotem ex atroci alterius Sacerdotis percussione incurrisse excommunicationem, certum vero non sit eum absolutionem non recepisse antequam sacra celebraret, irregularitas hæc non erit publica; unde etiam qui publice excommunicatus, non publice, sed clam celebraret, publice irregularis non esset. Sic quoque si Sacerdos Censura notoria percussus, publice etiam celebret coram populo, qui sciat id quid malum esse, sed per hoc irregularitatem contrahi ignorat, non erit habendus pro publice irregulari. Ita docent duo insignes Sacrae Pœnitentiariæ Ministri, Navarrus, & M. P. Leo: 3. Non omne etiam delictum, quod ad forum contentiosum deducitur, parere irregularitatem Papæ reservatam. Nam *1mo*: necesse est ut reus saltem citatus fuerit, à citatione enim Judicium inchoatur. *2do*: si Reus innocentiam suam etiam ex falsis allegatis probaverit & propterea in Judicio absolutus fuerit, verum crimen ejus manet occultum, quia accusatio sine effectu nihil efficit. Pariter si reus in judicio neque absolutus, neque condemnatus fuerit, sed rem composuerit cum delatore, delictum ipsius ita manet occultum ut ab Episcopo absolvi possit.

*4to*: Irregularitates ex defectu, tum irregularitates ex delicto publico provenientes, omnes Romano Pontifici sunt jure communi reservatæ. Verum irregularitates alias Papæ reservatas potest Episcopus sive ad tempus, sive in perpetuum relaxare, cum irregularis vel nunquam ad Apostolicam Sedem recurrere potest, vel saltem hic & nunc recurrere nequit, tunc enim ob imminens exg. scandalum, ab Episcopo dispensari potest, quia aliqui reservatio esset in destructionem. Non potest autem Episcopus dispensare in irregularitate, si sit publica, quam quis incurrerat, latam ab eo violando censuram, quia licet hæc Censura sit ab Episcopo, irregularitas tamen jure communi annexa est violationi cujuscunque Censuræ. Cum  
ergo




ergo in Jure communi dispensare Episcopi nequeant, talem irregularitatem relaxare nequeunt.

*Quæres 4to: Quibus præterea modis irregularitas tollitur?*

*Resp:* Irregularitas quolibet ex proprio delicto proveniens, per Baptismum tollitur, seu potius nulla irregularitas ante Baptismum ratione proprii delicti incurritur. Aliud est de irregularitate ex defectu proveniente, nisi defectus sit lenitatis, unde bigami, illegitimi, laborantes aliquo corporis defectu, quo quis ad Ordines inhabilis efficitur, accepto etiam Baptismo ad Clericatum sine dispensatione assumi nequit. Professio etiam Religiosa id efficit, ut illegitimi ad sacros Ordines promoveri possint.

*Quæres 5to: Quomodo se gerere debet, qui habet facultatem dispensandi in irregularitate?*

*Resp:* Qui facultatem habet dispensandi in irregularitate, post datam absolutionem à peccatis, debet uti forma consueta in Rituali Romano ad id præscripta. Porro potest quis pluribus irregularitatibus, ejusdem, sive diversæ speciei detineri, propter idem etiam facinus pluries commissum. Quare obtinens dispensationem ab irregularitate cum expressione causæ ex qua illa promanarat, non censetur dispensatus esse in aliis irregularitatibus contractis ex alia causa, quæ in dispensationis instrumento non est expressa, nisi dispensans exprimat se velle ab omnibus dispensare, quia una irregularitas sine altera auferri potest. Cui autem datur facultas absolvendi à Censuris reservatis etiam, non censetur dari facultas dispensandi in irregularitatibus, difficilior enim est irregularitatum, quam Censurarum relaxatio. Omnis tamen Sacerdos ad audiendas Confessiones approbatus potest absolvere à peccatis, modo non reservatis, si pro illis non sit approbatus, irregularitatem annexam habentibus, quamvis ab irregularitate non dispenset, quia per absolutionem sacramentalem tolli potest peccatum, manente irregularitate.





## CAPUT SECUNDUM

*De irregularitatibus in Specie.*

Duæ sunt species irregularitatum, aliæ siquidem sunt ex defectu, & octo numerantur, scilicet ex defectu natalium, animi, corporis, ætatis, libertatis, famæ, bigamiæ, atque lenitatis; aliæ ex delicto & quinque recensentur, quæ proveniunt ex homicidio, iteratione baptismi, mala Ordinum susceptione, pravo eorundem usu, ac demum ex hæresi.

ARTICULUS I<sup>mus</sup>

*De irregularitatibus ex defectu natalium, animi, corporis, ætatis atque libertatis.*

*Quæres amo: Qui sunt irregulares ex defectu natalium?*

*Resp:* Ex defectu natalium sunt irregulares omnes illegitimi, sive sint canonice, sive naturaliter illegitimi. Naturaliter illegitimi sunt illi, qui ex Parentibus vero matrimonio non conjunctis procreati sunt, ac proinde ex illicito concubitu progeniti sunt. Illegitimi canonice illi dicuntur, qui progeniti sunt ex vero, & legitimo Matrimonio, sed ejus usus evasit illicitus propter solemne castitatis votum, seu in Ordinis sacri susceptione, sive in Religiosa professione legitime emisum. Omnes isti sive naturaliter, sive canonice illegitimi sint, sive illegitimitas eorum occulta sit, sive publica, irregulares sunt. Et id constat ex variis Juris Canonici statutis. Ratio vero cur hanc irregularitatem Ecclesia constituerit, triplex est. *1<sup>a</sup>:* periculum incontinentiæ ex paterna imitatione, nam sæpe solet filius similis esse patri, & vitia parentum etiam ad posterum transferuntur. *2<sup>a</sup>:* est justa ratio timendi, ne hoc vitio laborantes, populorum ludibrio, & dictariis exponantur. *3<sup>a</sup>:* est, ut, paternæ incontinentiæ memoria à locis Deo consecratis longissime arceatur. Porro illegitimitas etiam occulta irregularitatem inducit; hinc si Titius solus se illegitimum esse noverit, quamvis alii id ignorent,



rent, necesse est, ut prius dispensationem petat, antequam Ordines, aut Beneficium recipiat. Potest tamen Mater, quæ sola filium suum Titium novit esse illegitimum, svadere ei, ut Clericatum suscipiat, si legitimæ vocationis signa ille præferat, quia nec Mater turpitudinem suam filio revelare tenetur, & id, quod ipsa svadet, in se bonum, ac licitum est, illudque filius, propter bonam suam fidem, illæsa conscientia exequi potest. Quare etiam si quis inculpabiliter propter ignorantiam ad Ordines promotus, certo postea comperiat se illegitimum esse, necesse est, ut statim ab Ordinum usu abstineat, donec dispensationem obtinuerit. Verum qui pro legitimo habetur, non tenetur Matri vel Patri fidem adhibere, qui declararunt illum esse illegitimum, nisi rationibus invictis id probarent, atque solide evincerent. Infantes autem expositi, pro illegitimis reputari debent, quia communiter illi solum exponuntur, qui ex illegitimo concubitu nati sunt, rarissime ii, qui de legitimo Matrimonio procreati fuerunt.

*Quæres 2do: Qui ergo pro legitimis reputantur, relative ad Ordines, & Beneficia recipienda?*

*Resp:* Relative ad Ordines, & Beneficia suscipienda legitimi sunt. *1mo:* qui nati sunt de Matrimonio vero, etiam si in ratione solum Contractus civilis validum fuerit, quæle est Matrimonium Infidelium, quod rationem Sacramenti non habet. Et hoc verum est, quamvis Matrimonium Infidelis, in gradibus consanguinitatis, vel affinitatis, qui ab Ecclesia solum prohibiti sunt, contractum esset, quia tale Matrimonium in infidelitate contractum, legitimum est, ac proinde etiam filii ex eo progeniti legitimi sunt. *2do:* qui nati sunt de Matrimonio, nullo quidem, & invalido, propter aliquod impedimentum dirimens, sed quod invincibiliter saltem ab uno contrahentium ignoratum fuit; idque verum est, etiam si impedimentum istud postea innotuerit, & partes per Judicis sententiam à se invicem separatæ fuerint. Si tamen Matrimonium clandestine contractum fuisset, aut Bannorum promulgationes omisæ, partes quæ illud contraxerunt, non censerentur impedimentum, quo ligati erant, bona fide ignorasse, unde filii eorum reputarentur illegitimi, & irregulares. *3tio:* qui licet ex fornicatione nati sint, per Matrimonium deinceps contractum legitimati sunt. Et hoc extenditur ad illos filios, quorum Parentes nonnisi post intermedias nuptias, Matrimonium secum contraxerunt. Quare si Petrus

ex Lu  
riam  
perit.  
ut le  
rum,  
se els  
tuerin  
vente  
scep  
hilom  
guine  
dibus  
inde  
incep  
propt  
lide  
etiam  
legiti  
invali  
dispe  
sam;  
& su

fectu

partia  
plicia  
ligios  
dinibu  
recep

per se  
sive l  
servit  
Ordin  
pa co  
tum  
Ordin  
valet

dispe  
Papa  
anima  
solum  
T. I



ex Lucia concubina filium habuerit Andream, deinde Mariam in Uxorem duxerit, eaque defuncta, Luciam acceperit, Andreas legitimus fiet. Hic tamen notandum est, ut legitimatio, quæ fit per subsequens Matrimonium, illorum, qui ex illicita copula concepti sunt, subsistat, necesse esse, ut, coitus carnalis tempore, Parentes illorum potuerint Matrimonium valide contrahere. Unde si vir vivente uxore sua, aliam cognoverit, & ex ea prolem susceperit, licet post mortem uxoris suæ eam duxerit, nihilominus spurius erit filius. Eadem de causa, si consanguineus cum consanguinea, vel affinis cum affine in gradibus ab Ecclesia prohibitis, rem carnalem habuerit, filii inde concepti non legitimabuntur per Matrimonium deinceps contractum; quia conceptionis tempore Parentes, propter consanguinitatis, aut affinitatis impedimentum, valide secum contrahere non poterant. Et hoc subsistit, etiamsi ante prolis nativitatem Parentes ex dispensatione legitimum Matrimonium contraxissent, aut etiamsi post, invalide contractum Matrimonium revalidatum esset, per dispensationem simpliciter ad illud revalidandum concessam; aliud esset: si in tali dispensatione proles concepta, & suscepta legitimaretur.

*Quæres 3tio: Quot modis tollitur irregularitas ex defectu natalium proveniens?*

*Resp:* Quatuor modis *amo:* professione Religiosa, sed partialiter solum, hoc est non nisi quoad Ordines & simplicia Beneficia. Sed Religiosus illegitimus, qui vota sua Religiosa casari curat, nequidem receptis in Monasterio Ordinibus uti potest, multo minus ad alios, quos nondum recepit promoveri.

*2do:* tollitur per legitimationem. Hæc autem vel fit per sequens Matrimonium, vel ex concessione sive Papæ sive Principis sæcularis. Quæ fit à Principe sæculari non servit nisi ad effectus civiles, unde vi ipsius nemo ad Ordines aut Beneficia idoneus efficitur. Quæ vero à Papâ conceditur, non inservit ad effectus Civiles, sed tantum ad Ecclesiasticos, unde sic legitimatus & ad omnes Ordines evehi potest, & ad quælibet Beneficia promoveri valet.

*3tio:* irregularitas ex defectu natalium orta, tollitur dispensatione, circa quam hæc notanda sunt. *amo:* solus Papa dispensat ad Ordines majores, vel Beneficia curam animarum habentia. Episcopi proinde possunt dispensare solum ad primam tonsuram, & minores Ordines, eaque



Beneficia recipienda, quibus animarum cura non incumbit, modo Beneficia hæc Ordinem sacrum hic & nunc non exigant, neque etiam sint dignitates, Personatus, vel Canonicatus. 2do: pro dispensatione ab istiusmodi irregularitate ad Beneficia duplicia suscipienda, & Ordines sacros recipiendos, recurrere necesse est ad Papam, etiamsi isthæc irregularitas occulta sit, quia facultas dispensandi in irregularitatibus ex delicto occulto provenientius à Concilio Tridentino Episcopis concessa, ad illas tantum se extendit irregularitates, quæ ex proprio delicto proveniunt. Ubi tamen irregularitas prorsus occulta est, non ad Datariam, sed ad Pænitentiariam scribendum est. 3tio: dum petitur à Papa dispensatio exprimendum omnino est, an illegitimus sit ex soluto, & soluta, ex soluta & conjugato, ex Sacerdote an ex Laico, quia qui ex graviore crimine nati sunt, difficilius dispensantur, & aliquando duplici egent dispensatione. Sic illegitimus, qui in eadem Ecclesia, in qua Pater suus Sacerdos Beneficium habuit, habere idem vult Beneficiuin, indiget dispensatione gemina, qua & ad Beneficium absolute, & ad Beneficium in tali Ecclesia possidendum habilis efficiatur.

Porro dispensatio in irregularitate ex defectu natalium proveniente, stricte debet interpretari. Unde qui simpliciter dispensatus est ad Ordines, non intelligitur dispensatus esse ad Ordines sacros, qui dispensatus est ad Diaconatum, potest quidem suscipere Subdiaconatum, sed non Presbyteratum. Dispensatus ad unum Beneficium, non est dispensatus ad plura, dispensatus ad Beneficium simplex, non est dispensatus ad Beneficium Curatum, neque dispensatus esse censetur ad Episcopatum, qui dispensatus est ad Dignitates. Quia quo magis in dispensatione receditur à jure communi, eo dispensatio utpote odiosa juri, strictius est interpretanda.

*Quæres 4to: Qui animi defectus irregularitatem pariunt?*

*Resp:* Tres sunt animi defectus qui irregularitatem pariunt, scilicet defectus rationis, scientiæ, & fidei confirmatæ. Et quidem 1mo: defectus rationis, quare irregulares sunt, qui totaliter usu rationis carent, quales sunt perpetuo amentes, isti enim nec ad Ordines promoveri, nec in Ordinibus, quos forte susceperant ministrare possunt. Pariter ii irregulares sunt, qui variis temporum intervallis à rationis usu excidunt, quales sunt. Lunatici qui lucida nonnunquam habent rationis intervalla, sed & quas-



quasdam ejusdem patiuntur eclipses. *Furiosi* qui irruente furoris excessu, non sunt liberæ mentis. *Epileptici* qui morbo caduco tenentur, atque ita corripuntur, ut quasi exanimis cadant.

Circa hæc sequentia notanda sunt. *1mo*: amentes, lunatici, & alii facilius ab Ordinibus arcentur, antequam eos susceperint, quam ab eorundem jam susceptorum exercitio removentur, unde qui vere amentes fuerunt, licet omnino sani videantur, vix unquam ad Ordines admitti possunt, quia semper timendum est, ne idem malum redeat, quod prius fuit. *2do*: Licet epileptici vere sint irregulares, usu tamen receptum est, ut irregularis esse non reputetur, qui affectiones Epilepticas experti sunt ante pubertatem, quia Epilepsis sæpe curatur, & omnino recedit in iis, qui pubertatem attingunt. Expectandum igitur est, donec annum 25. ætatis attigerint, qui enim post ætatem hanc morbo illo affligi pergunt, vix unquam ab eo liberantur, ac proinde nec Ordines suscipere, nec in susceptis ministrare debet.

De iis vero, qui solum post acceptos Ordines morbis modo recensitis obnoxii esse incipiunt, hæc statuuntur. *1mo*: Qui frequenter his morbis corripuntur, ab Ordinum exercitio removeri debent. *2do*: Si convaluerint, Ordinum functiones exercere possunt, postquam competenti tempore probati fuerint. *3tio*. Qui raro & leviter impetuntur, non prohibentur ab officio Misa, dummodo tamen juxta se habeant alium Sacerdotem, ut si illi cadant, vel deficiant, isti supleant. Hoc tamen maxime difficile est, ob periculum ne morbus ingruat, dum calix elevatur.

Etsi illi, qui vertigine laborant non sint irregulares, si tamen vertigines ita graviter Sacerdotem afficiant, ut sine indecentiæ, & irreverentiæ periculo Sacra facere non possit, tunc igitur à celebranda Misa abstinere debet, si vero nullum subsit irreverentiæ periculum, poterit quidem celebrare, sed omnia præcaveri debent, ne quid suboriat malum, scilicet celebrando in loco humili, cum altaria excelsa vertiginem pariant.

*Quæres 5to: Qualis scientiæ defectus irregularitatem parere potest?*

*Resp:* Defectus scientiæ competentis, atque ad debite Sacrorum Ordinum functiones exercendos requisitæ & necessariæ, irregularitatem inducit. Unde qui scientia competente ac necessaria carent, sine gravi peccato nec Ordines suscipere, nec susceptos exercere possunt. Et



in hac irregularitate neque Papa dispensare potest; quia ineptitudo ad Ordinum munia debite obeunda, natura sua impedit susceptionem & exercitium Ordinum. Hæc tamen irregularitas non est perpetua, quia industria, & studio auferri potest.

*Quæres 6to: Qui sunt irregulares ex defectu fidei confirmatæ?*

*Resp:* Ex defectu fidei confirmatæ irregulares sunt Neophyti, seu recens ad fidem Catholicam conversi, cujuscunque illi generis sint, sive qui recens ad Religionem Christianam ex Judaismo, aut Gentilismo conversi sunt, sive qui nunc primum ab hæresi recesserunt, & catholicam fidem amplexi sunt. Hi ergo sufficienti tempore prius probari debent, & fides eorum experiri, antequam ad Ordines admittantur.

*Quæres 7mo: Quales corporis defectus irregularitatem inducunt?*

*Resp:* Ille solum corporis defectus hominem facit irregularem, quo qui laborat, vel secure propter debilitatem, vel sine scandalo, sive notabili indecentia, quæ Ministri, adeoque & Ministerii ipsius contemptum pariat, propter deformitatem, functiones suas exercere non potest, ita statuitur Cap: 2. de Clerico ægrot. Multo igitur magis irregularis est, qui ex corporis defectu omnino impotens redditur ad exequendum officium pastorale, quia ratio ipsa dicat ab Ordinibus illum arcendum esse, qui eos vel tuto, vel sine adstantium horrore exercere nequit, & ad pastorale officium admitti non debere eum, qui illud adimplere non valet.

Hinc ob impotentiam irregulares sunt. 1mo: Qui altera manu mutilati sunt, qui carent pollice, tum etiam qui alios præter pollicem, & indicem digitos non habet, unius tamen ex iis, aut etiam duorum carentia, qui ad sacras functiones non sunt necessarii, irregularitatem non parit.

2do: Irregulares sunt non solum muti, sed etiam illi, qui tantam loquendi difficultatem habent, ut risum pene invitis pariant, aut qui ita balbutiunt, ut nullam distincte, & integre vocem pronuntient, secussu licet tarde, verba bene exprimant. Pariter irregulares sunt omnino surdi, qui vero altera tantum aure audire nequeunt, item surdastrum, & difficilem auditum habentes, modo utramque aurem habeant, ad Ordines promoveri possunt.

3tio: Qui non vident, sive oculi eruti, aut effusi sint, sive non, irregulares sunt. Monoculus, seu qui uno oculo,



1o, quisquis ille sit, orbatus est, irregularis quoque est. Sed si utrumque oculum habens, unius solum visu careat, quamvis oculi sinistri, qui canonicus dicitur, non erit irregularis, modo tamen ea sit oculi dextri vis, ut absque indecenti corporis conversione, Canon legi possit.

Jam vero propter deformitatem irregulares sunt ii omnes, qui talem habent corporis, membrorum, ac præsertim faciei conformationem, quæ populos notabiliter offendat, tum illi, qui laborant morbis, qui horrorem incutiunt. Unde irregulares esse censentur, qui habent os turpiter distortum, faciem valde fætidam, labia corrosa, aut abscissa, qui notabilem habent maculam in oculo, quamvis oculus integer sit. Pariter qui naso carent, sive auriculis, qui carent altero pede, aut absque baculi fulcimento functiones sacras exercere nequeunt. Denique gibbosi, qui vix se erigere, & recto capite stare possunt, secus si deformitas, quæ ex tali corporis situ procedit, oculos non offendat. Qui caret membro, aut corporis parte occulta, per se loquendo, non est irregularis, sed tunc solum, cum quis vel sibi aliquod membrum resecavit, vel sua culpa meruit illud ab aliis resecari. Unde qui sibi virilia amputavit, etiam ad conservandam castitatem, aut ad conservandam vocem, hæc sibi resecari, & abscindi permittunt, irregulares sunt.

Porro non eadem est ratio defectuum Corporis, qui Ordines, & Beneficia præcedunt, ac eorum, qui subsequuntur, in tribus siquidem differunt. 1mo: Defectus Corporis, qui præcedunt Ordines, ab omni Ordine excludunt qui vero Ordinum receptionem subsequuntur, ab eorum dumtaxat functionibus remouent, quos ii defectus exerceri non sinunt. 2do: Defectus, qui primam tonsuram præcedunt, ab omni Beneficio excludunt, qui vero post primam tonsuram superveniunt, ab iis solum arcent Beneficiis, quorum incapacem reddunt hominem. 3tio: Defectus corporis, qui promotionem ad Beneficia antecedunt, impediunt, ne eadem Beneficia sine dispensatione conferri possint illi, qui iisdem ut decet defungi non potest, e contra: defectus, quibus Beneficiarium affligi contingit, haud permittunt eum suo Beneficio privari, quia ut statuitur Cap: 5. de Cler: ægrot: *afflictio non est addenda afflictio, sed miseriæ miserendum.*

Quæres 8vo: Cujus est judicare an ordinandi ex defectu corporis irregulares sint?

Resp: In dubio standum est judicio Episcopi eorum, qui



qui ad Ordines promoveri exoptant, ut patet ex Cap: 3. de Corp: vitiat.

Variis autem modis cessat irregularitas ex defectu corporis proveniens. Et quidem per cessationem defectus, ut si curetur morbus, quo quis irregularis efficiebatur. 2do: Per dispensationem, & hæc à solo Papa concedi potest, cujus executio nonnisi Episcopo committi solet.

*Quæres 9no: Qui sunt irregulares ex defectu ætatis?*

*Resp* Juxta præsentem, quæ jam diu viget, Ecclesiæ disciplinam, nullus ad Subdiaconatus Ordinem ante 22. ad Diaconatus ante 23. ad Presbyteratus ante 25. ætatis suæ annum promoveripotest. Ita Concilium Trident: Sess: 23. Cap: 12. In his porro annus inceptus habetur pro completo. Jam vero ad primam tonsuram & minores ordines suscipiendos nulla certa ætas à Concilio Tridentino est constituta, sed tantummodo statutum est, Sess: 23. Cap: 4. ut nullus, prima tonsura initiatus, aut etiam in minoribus Ordinibus constitutus, ante 14 ætatis annum Beneficium possit obtinere.

Quod vero attinet Prælaturas, Dignitates, hæc in jure communi habentur. Ad Episcopatum requiritur annus ætatis trigesimus jam jam exactus, Beneficia quæcunque curam animarum annexam habentia, seu sint Parochialia, seu Dignitates, Personatus, conferri nequeunt nisi illis, qui jam 25 annum ætatis attigerunt, ad Dignitates vero sive Personatus, quibus cura animarum annexa non est, sufficit ut ii, qui ad eas assumuntur, non sint minores 22. annis, quod est intelligendum de anno 22. ætatis jam completo. Quoad alia Beneficia quæ curam animarum non habent, sed tamen de Jure requirunt Sacerdotium, Diaconatum, Subdiaconatum, illa sufficit ætas, & requiritur, ut provius in tali sit ætate constitutus, quatenus intra annum ad Ordinem requisitum promoveri possit. Si vero Beneficium aliquod ex sua fundatione aliquem Sacrum Ordinem exigat, tunc illud ei solum conferri potest, qui actu illo Ordine jam est condecoratus, ac eo insignitus. Ad Canonicatum Ecclesiarum Cathedralium requiruntur anni ætatis 14. completi, ad Canonicatum Ecclesiarum Collegiatarum anni decem item completi. Denique ad Beneficia simplicia, requiruntur anni quatuordecim.

Jam vero ætas sive ad Ordines, sive ad Beneficia requisita, computari debet, non à tempore collati Baptismi, sed à puncto nativitatis, atque in hac supputatione

nume-



numerandus etiam est dies bissextilis, & quemadmodum alii anni, sic & bissextilis numerari debet. Defectus igitur ætatis sive ad Ordines sive ad Beneficia ex Jure prærequisitæ irregularitatem inducit. Et id constat ex pluribus Decretis quæ distinct: 77. habentur. Atque defectus ætatis ad capessanda Beneficia requisitæ, ita irregularitatem inducit, ut Beneficii collatio ei facta, qui legitimam ætatem non est adeptus, in foro Ecclesiastico pro nulla reputetur. Quia vero qui ante legitimam ætatem Sacris Ordinibus initiantur, etiam ab eorum usu suspensi sunt, ideo si hanc suspensionem violaverint, Ordinibus suscepti functiones exercendo, novam irregularitatem incurrunt, à qua nisi dispensentur, etiamsi ætatem competentem attigerint, Sacra celebrare non poterunt, quia ætas nec suspensionem, nec ex ejus violatione contractam irregularitatem tollere potest. Qui vero in illa suspensione Sacra non celebraverunt, adepta ætate, & obtenta à Suspensione absolutione, possunt Sacra celebrare, quia irregularitas ex defectu ætatis proveniens cessavit. Si autem quis bona fide existimans se ætatem competentem habere Sacris Ordinibus initietur, prædictam suspensionem non incurreret, adeoque adepta ætate celebrare poterit absque dispensatione.

In ætatis autem defectu solus Romanus Pontifex dispensare potest.

*Quæres xomo: Qui sunt irregulares ex defectu libertatis?*

*Resp:* Ex defectu libertatis irregulares sunt. xmo: mancipia, nisi à Dominis suis libertate donati fuerint. 2do: qui obligati sunt ad ratiocinia reddenda, quales sunt alienorum Bonorum Administratores, Procuratores. Isti non debent ordinari, nisi post deposita onera, & reddita ratiocinia. 3tio: conjugati, qui neque ad primam tonsuram, neque ad ulla Beneficia admitti possunt. Attamen cum dispensatione possunt Conjugati ad Ordines promoveri, si in id libere ac benevole uxor consenserit, & ipsa si juvenis sit, in aliqua Religione profiteatur, vel si Senex fuerit & ab omni incontinentiæ periculo aliena, in Sæculo manens, votum castitatis perpetuæ emiseric.



## ARTICULUS 2dus

*De irregularitatibus ex defectu famæ, lenitatis, atque ex bigamia provenientibus.*

*Quæres 1mo: Quid, & quotuplex est infamia?*

*Resp:* Infamia opponitur bonæ famæ, cum igitur bona fama sit bona existimatio, quæ publice habetur de alicujus excellentia, pietate, rectitudine, atque bonis moribus, consequenter infamia est denigratio boni nominis, seu amissio publicæ ac bonæ existimationis, quam quis de se apud alios habuit. Duplex autem est infamia, scilicet juris, & facti. Infamia *juris* illa est, quæ ex jure promanat, & eam incurrit 1mo: Ii, qui aliquod crimen commiserunt, cui jure sive Canonico, sive Civili, infamia annexa est, & tali juris infamia notantur homicidæ, fures, perjuri, lenones, & alii. 2do: Illi qui per sententiam Judicis vel tamquam infames declarati sunt, vel ad pœnam infamantem damnati sunt, exg: ad exilium, ad flagella publica, quare infames sunt, qui fustibus cæsi sunt, aut stigmate notati. 3tio: Illi qui exercent artem, cui in jure annexa est infamia, sic infames sunt mimi, histriones. Infamia *facti* est ea, quam quis contrahit ex commissione, delicti, quod apud viros graves, & ex communi sensu, infame esse censetur, etsi istiusmodi crimini in jure non sit annexa infamia. Et hæc infamia *facti* iteram duplex est, alia *legalis*, quæ contrahitur ipso facto, qui in jure annexa est infamia, alia *popularis* quæ incurritur ob crimen, quod licet in jure infamia non notetur, tale tamen est, ut ex prudentum, & bonorum hominum æstimatione, dedecus inducat, & boni nominis pariat amissionem.

*Quæres 2do: Utrum ex infamia oriatur irregularitas?*

*Resp:* Infamia quæcunque parit irregularitatem, quia ex variis Juris Canonici statutis infames ad sacros gradus provehi inhibentur, & ex Regula juris 87. in 6to: *Infamibus portæ non pateant Dignitatum.* Quare infames infamia juris, vel facti legalis, vere irregulares sunt. Nullum tamen crimen quantumlibet grave, & enorme infamiam, neque irregularitatem inducit, quamdiu manet occultum, nisi illi in jure irregularitas sit annexa, quale est homicidium voluntarium, & alia delicta, ex quibus irregularitates quædam promanant.

Mul-



Multis autem modis infamia tollitur. Et quidem  
*amo*: Infamia popularis tollitur emendatione sceleris publica & crimini proportionata, quæ nimirum prioris vitæ maculas detererit, & ex virtutis operibus bona succedat existimatio. *2do*: Infamia vero per sententiam Iudicis inflicta, prout ipsa irregularitatem inducit, non tollitur per emendationem, sed per Ecclesiæ dispensationem. Pariter infamia facti legalis sola etiam dispensatione tollitur. Infamis vero in uno loco infamia facti popularis, si in alium transmigret locum, ubi infamia illius ignota est, desinit esse irregularis, sed irregularis ex infamia juris, quamvis locum mutet, non desinit esse irregularis.

*Quæres 3tio*: Quid sit irregularitas ex Bigamia proveniens?

*Resp*: Bigamia est successiva cum duabus uxoribus conjunctio. Unde Bigamus est ille, qui duas successive uxores habuit. Triplex autem est Bigamia, scilicet vera seu realis, interpretativa, & similitudinaria.

Bigamia *realis* est, cum quis plures legitimes duxit, & carnaliter cognovit uxores.

Bigamia *interpretativa* est, cum quis fictione juris censetur plures habuisse uxores, licet reipsa plures non habuerit. Id vero contingit *amo*: Cum quis ante uxoria eam mortem, bona, vel mala fide contraxit Matrimonium cum aliqua muliere, eamque carnaliter cognovit. *2do*: Cum quis duo contraxit Matrimonia sed invalida, ut si duas quis duxit uxores, cum quibus propter aliquod impedimentum dirimens, contrahere valide non poterat, & cum ipsis carnalem copulam habuit. *3tio*: Cum quis viduam à suo marito cognitam, aut puellam cum alio fornicatam, in uxorem duxit, & eam carnaliter cognovit, sive sciverit eam corruptam esse, sive nescierit. *4to*: Qui unicam uxorem & virginem duxit, sed eam post adulterium ab ipsa commissum, carnaliter cognovit.

Bigamia denique similitudinaria est, cum quis post emissum solemne castitatis votum, contrahit Matrimonium, cum quacunque muliere, eamque carnaliter cognoscit. Porro Bigamia realis contrahitur etiam ab eo, qui duas uxores habuit, unam ante Baptismum, alteram post Baptismum, aut etiam utramque ante Baptismum. Sed neque realis Bigamia, neque etiam interpretativa exurgit nisi Matrimonium contractum consummatum fuerit, & ad copulam carnalem devenit. Hinc qui legitimo Matrimonio Virginem accipit, quam non cognovit, eaque

mor-



mortua, alteram duxit, quam carnaliter cognovit, non est bigamus, sicut & ille non elset bigamus, qui duceret viduam ab altero relictam, sed intactam, neque ab alio quopiam cognitam. Idem est de eo, qui plures duceret uxores, & vel cum nulla, vel cum una tantum Matrimonium consummavit. Denique qui puellam non ab alio, sed à se defloratam, postea in Matrimonium duxit, non est Bigamus, quia in his omnibus casibus, nec Maritus nec uxor carnem suam in plures diviserunt, ex hac vero solum carnis in plures divisione, Bigamia sive realis, sive interpretativa oritur.

*Quæres 4to: Qui ergo ex Bigamia irregulares sunt?*

*Resp:* Bigami, quocunque modo tales sint, sive reali, sive interpretativa, sive denique similitudinaria Bigamia, irregulares sunt. Quod ex toto canonico jure apertissime constat. Porro in irregularitate ex Bigamia reali & interpretativa contracta solus Papa dispensare potest, quia hæc potestas nullibi in Jure concessa est Episcopis, imo expresse iisdem interdicitur Cap: 2, de Bigamis. Et hoc verum est, etiam respectu primæ tonsuræ, Episcopi siquidem, ex reali, & interpretativa Bigamia irregularem neque ad primam tonsuram, minoresque Ordines suscipiendos, neque ad illorum usum, si jam suscepti fuerint, dispensare valent. Jam vero in Bigamia similitudinaria Episcopi dispensare possunt, non solum ut qui ea involuti sunt, peracta pœnitentia suis Ordinibus utantur, sed etiam ut ad altiore gradum promoveantur, nisi cum quis post emissum solemne castitatis votum Matrimonium contrahere attentavit, cum vidua, vel deflorata muliere, vel contrahere nisus est cum virgine, sed ante Ordinum susceptionem contraxerat cum alia, post cujus mortem Ordines suscepit, tunc enim Episcopus dispensare non potest, quia Bigamiæ similitudinariæ adjungitur interpretativa, quæ Papæ est reservata. In petenda autem dispensatione ab irregularitate ex Bigamia orta, explicandum est, quot quis contraxerit Matrimonia, quia difficilius dispensatur cum trigamis, quam cum Bigamis.

*Quæres 5to: Unde & quando contrahitur irregularitas ex defectu lenitatis?*

*Resp:* Irregularitas ex defectu lenitatis contrahitur, quando homo baptisatus, voluntarie, & actu consummato, hominem occidit, vel mutilat licetsi juste, aut si ad occidendum, vel mutilandum proxime concurrit. Huic ergo irregularitati subjacent. *amq:* Soli baptisati, quia jus Canoni-



nonicum de iis solum loquitur, qui post baptismum homicidii conscii sunt. 2do: qui actu consummato occidunt, mutilant, lex enim hanc irregularitatem statuens, factum requirit. Quare ab ista irregularitate immunes sunt, qui solum conantur occidere, mutilare, sed id exequi non possunt, qui vulnerant, lacerant, sanguinem effundunt, sed nec mors, nec abscissio membri subsequuta fuit. 3tio: Qui voluntarie occidunt, vel mutilant. Unde furiosus, dormiens, ebrius, si occidat, mutilet, irregularis non est, propter rationis defectum. Excipitur tamen dormiens, qui prævidet cum interdiu iratus est, per noctem arma rapere, & sibi obvios ferire, is enim nisi arma sibi met subtrahat, irregularis fiet etiam in somnis hominem occidendo, mutilando. Idem dicendum est de ebrio. 4to: Qui occidunt, vel mutilant; quantum enim ad incurrendam istam irregularitatem, occisio & mutilatio æquiparantur. Porro mutilatio est membri humani Corporis amputatio, seu resectio. Hinc irregularis non est, qui membrum incidit, debilitat, aridum reddit, quia hoc non est membri abscissio. Per membrum vero intelligitur illa corporis humani pars, quæ proprium & ab aliis partibus distinctum exercet officium, & est quasi integrum ac proximum instrumentum alicujus humanæ actionis, tales sunt oculi, manus, pedes. Horum abscissio irregularitatem inducit. Illæ vero corporis humani partes, quæ vel ad ornatum corporis humani, ut Capilli, pertinent, vel ad ejus integritatem serviunt, sed non habent operationem ab aliis partibus distinctam, sed accessoriam tantum, & conjunctam cum aliqua corporis parte præcipua, quales sunt digiti, qui manibus, dentes, qui ori & linguæ, auriculæ, seu cartilaginee, quæ auribus & Capiti adhærent, & illis inserviunt, non sunt membra proprie dicta humani Corporis, & horum abscissio irregularitatem non inducit. 5to: ii demum huic irregularitati subjacent, qui ad occisionem vel mutilationem proxime concurrunt, sive physice ut Carnifex, sive solum moraliter, vel positive, ut mandans, consulens, vel negative, ut is, qui non obstat, cum ex officio ob stare tenetur. Atque ista irregularitas sine peccato contrahitur, quia non est ex delicto, sed ex defectu, & in hoc differt ab irregularitate quæ ex homicidii crimine profluit, quare hac irregularitate illi etiam constringuntur, qui justè, & aliquando meritorie quoque alios necant, aut mutilant, quales sunt Judices & quotquot justæ morti Reorum coope rantur.

Quæ-



*Quæres 6to: Utrum irregulares sint, qui occidunt, vel mutilant hominem ad propriam defensionem?*

*Resp: amo:* Qui ut vitam suam ab injusto invasore tueatur, eundem mutilat, vel occidit cum moderamine inculpatae tutelæ, non est irregularis. Sic decisum est. Clement: unica de Homicidio, ubi ita habetur. *Si furiosus, aut infans, seu dormiens, hominem mutilet, vel occidat, nullam ex hoc irregularitatem incurrit, Et idem de illo censemus, qui mortem aliter vitare non valens, suum occidit, vel mutilat invasorem.* Si tamen dubitetur, an invasus intra moderatæ defensionis limites steterit, an non excelsit? tunc ad majorem cautelam, tollendamque omnem scandali, propriique scrupuli occasionem, res tota Episcopo aperiri debet, an ille occisor indigeat dispensatione, prout præcipit Concilium Trident: Sess: 24. Cap: 7. Porro ille solum ab istiusmodi irregularitate immunis est, qui mutilat, aut etiam occidit, ut vitam suam servet, quia Clemens de eo solum loquitur, qui mortem aliter vitare non valens occidit, aut mutilat. Unde qui alium occidit, aut mutilat ad honoris vel bonorum defensionem, exinde fit irregularis; quia in Jure is solum ab ista irregularitate eximitur, qui hominem occidit, mutilat ad propriæ vitæ defensionem. Porro ut in defensionem propriæ vitæ alium occidendo aut mutilando ista non contrahatur irregularitas, necesse est ut servetur moderamen inculpatae tutelæ, hoc est non plus fiat ad vitæ suæ defensionem, quam necesse est ad propulsandum injustum aggressorem; quare excedit modum justæ defensionis, ac propterea irregularis est, qui occidit, cum mutilare satis esset, mutilat, occidit ut calumniam, minas propulset, ista enim non sunt proprie vis intentata; denique irregularis est, qui cum possit fugere, aut alio quovis modo injustum aggressorem declinare, eum mutilat, aut occidit, quia tunc occisio, mutilatio non est necessaria ad propriæ vitæ defensionem.

*Quæres 7mo: Qui præterea irregulares sunt ex defectu lenitatis?*

*Resp: Ex defectu lenitatis irregulares sunt amo:* qui in Iudiciis proxime ad mortem aut mutilationem Rei concurrunt, sive ad prolationem sententiæ, sive ad executionem illius cooperando. Unde irregularis est Judex ferens sententiam mortis, aut mutilationis, ejus Alseiores, & omnes Ministri justitiæ, ut notarius, ipse etiam Advocatus. Sententiam mortis vel mutilationis exequentes, Sa-  
tal-



tellites, Carnifex, quia hi omnes proxime ad mortem, sive mutilationem rei concurrunt. 2do: qui alium criminaliter accusat, hoc est qui directe, & expresse vindictam sanguinis intendit. Qui vero de malefactoribus noxiis solam petunt satisfactionem sibi fieri, & nonnisi ad boni sui recuperationem, accusant, expresse protestando se nolle vindictam sanguinis, non sunt irregulares. Atque talem accusationem facere etiam Clericis permisit Bonifacius 8. Cap: 2. de Homicid: in 6to. Possunt ergo Clerici accusare de damnis sibi, aut domesticis suis, & magis Ecclesiæ suæ illatis, etiamsi mors, aut mutilatio malefactoris sequatur, dummodo nec ipsa intendatur, & contra eam serio, ac sincere, ab accusante fiat protestatio. 3tio: Irregulares quoque sunt testes, qui in causa criminali testificantur, si inde mors, aut mutilatio sequatur. Si tamen testimonium contra malefactorem ferant, ut vitam innocentis servent, vel quia ad ferendum testimonium, justo ac legitimo præcepto adacti sunt, immunes ab irregularitate erunt.

Immunes etiam sunt ab ista irregularitate, qui nonnisi remote ac contra suam voluntatem ad mortem rei, sive ejus mutilationem concurrunt, Tales sunt, Confessarius qui Reo mandat ut veritatem patrati à se criminis Judici fateatur, ut justæ sententiæ se submittat. Pariter non est irregularis Princeps, qui legibus suis pœnam mortis, aut mutilationis pro certis criminibus constituit, quia istiusmodi leges nonnisi remote se habent ad infligendam Reis pœnam, neque illam Princeps primario intendit, sed criminum repressionem.

2do: Ex defectu lenitatis omnes irregulares sunt, qui pugnant in bello injusto, si aliqui in eo occidantur, aut mutilentur, etiamsi aliquis militum neminem propria manu necaverit, neque mutilaverit & is etiam irregularis est, quia omnes concurrunt ad necem, & mutilationem multorum. Qui vero pugnant in bello justo, publica auctoritate contra hostes indicto, si propriis manibus aliquem occiderint, aut mutilaverint irregulares fiunt, ceteri vero milites in tali bello pugnæ adstantes, qui propriis manibus neminem occiderunt, nec mutilaverunt, non fiunt irregulares. Qui dubitat an non aliquem in bello occiderit, vel mutilaverit? dispensationem petere debet. Duces, milites, & Clerici, alique in bello justo consulentes, exhortantes milites ut strenue se gerant in pugna & conflictu, non fiunt irregulares. Plures Theologi docent Militem



tem se defendentem in bello defensivo, vel etiam offensivo, sed justo, non fieri irregularem, etiamsi aliquem occidat, dummodo aervet moderamen inculpatæ tutelæ, quia hæc defensio est illi justa, sicut & bellum, & omnes qui vitam suam defendunt, cum moderamine inculpatæ tutelæ ab irregularitate immunes sunt.

*3tio:* Medici, Chirurgi qui juxta artis suæ regulas membrum alicui ægroto amputant, non fiunt irregulares, forent vero irregulares ex delicto, si contra artis suæ regulas id agerent, aut si ob illorum negligentiam, sive imperitiam ægrotus interiret. Sed quia tunc ipsi fierent irregulares ex delicto, & ex delicto nulla irregularitas contrahitur, nisi illud mortale, & grave fuerit, ideo tunc tantum Medici ac Chirurgi irregulares fiunt, quando ex eorum gravi, & mortali incuria mors ægri sequitur, verum in re tanti momenti, ubi de vita hominis agitur, minus ad culpam lathalem requiritur, quam in alia quacunque materia. Pariter imperiti Medici ac Chirurgi, qui propter suam imperitiam causa sunt mortis, aut non necessariæ mutilationis alicujus membri, irregularitatem ex delicto contrahunt, quia imperitia in iis, qui ut periti operam suam promittunt, culpa est. In dubio, utrum Medici ac Chirurgi adhibuerint necessariam diligentiam ac curam? se gerere debent ut irregulares. Neque fiunt irregulares, qui adjuvant Medicos, Chirurgos, cum resecant membra corporis. Clerici etiam Monachi exercentes artem medicam, & Chirurgicam, fiunt irregulares ex defectu lenitatis si resecant aliquod corporis humani membrum, quia ejusmodi artes cum incisione, & adustione exercere, est illis prohibitum. Si tamen Clericus in arte Medica, aut Chirurgica peritus, consulat tantum, aut imperet, opemque ferat Chirurgo ut membrum abscindat, irregularitatis expertus erit, quia etsi Clericis sacris vetitum sit, ne per se adurant, incidant, non tamen prohibitum illis est, ne id fieri consulant, aut imperent, si sat periti sint, ut id prudenter suadere possint, unde si non ex vi morbi, sed ex consilii, iulsionisque imprudentia mors ægri sequatur, ille Clericus irregularis erit. Pariter si Clericus deficientibus Chirurgis, necessitate præmente membrum ægroto amputaverit, non erit irregularis, quia necessitas excusat. In dubio an mors secuta sit ex abscissione, incisione, an ex vi morbi, vel ex culpa ægroti, qui regulam sibi præscriptam sequi noluit? tutius est, ut Clericus ea mandans, consulens pro irregulari se gerat. Non sunt  
autem



antem irregulares, qui infirmum vertendo, erigendo, in alium locum transferendo mortem ejus præter suam intentionem accelerant, si id prævidere non poterant, in hoc enim nullus est defectus lenitatis, sed est actus charitatis. Qui tamen contra Medici præscriptum aliquid tradit, aut tradi consulit infirmo, aut qui cum debet non obstat, ne id tradatur, etiamsi id faciat ne æger diutius careat optato cibo, irregularitatem incurrit, si infirmus inde pereat, aut mors ejus acceleretur.

Porro ab ista irregularitate, quæ ex defectu lenitatis provenit solus Romanus Pontifex dispensare potest. Quia Concilium Tridentinum solummodo concessit Episcopis potestatem dispensandi in irregularitatibus ex delicto provenientibus. Irregularitas autem ex solius lenitatis defectu procedens non est ex delicto. Ab illa ergo Episcopus dispensare nequit.

## ARTICULUS 3<sup>tus</sup>

*De irregularitatibus ex homicidio, & aliis delictis provenientibus,*

*Quæres 1<sup>mo</sup>: Utrum ex homicidio oriatur irregularitas?*

*Resp:* Ex homicidio oriri irregularitatem indubitatum est. Et id constat ex innumeris Juris Canonici statutis. Porro homicidium hic triplex consideratur, necessarium, voluntarium, & casuale. *Necessarium* illud est, ad quod quis quasi obligatur, seu ratione legitimæ defensionis, ut cum vitam suam aliter tueri non potest, seu ratione officii, ut cum Magistratus furem morti addicit. *Voluntarium* illud est, quod contra justitiam & æquas regulas intenditur directe vel in se, ut cum alicui Caput abscinditur, vel in causa ita cum effectu conjuncta, & ut tali cognita, ut non possit quis causam velle, quin effectum ab ea inseparabilem voluisse censeatur, ut cum quis venenum maxime mortiferum alteri propinat. *Casuale* denique illud est, quod agens nec in se, nec in causa, quæ cum effectu necessario conjuncta est, voluit, quodque ideo præter intentionem agentis accidisse dicitur. Hoc vero homicidium casuale duplex est, aliud pure casuale, quod etiam inculpatum vocatur, aliud mixtum & culpabile. Homicidium *pure casuale* est illud, quod præter intentionem



nem agentis sequitur ex actione, ex qua nec prævidetur, nec moraliter prævideri potest esse secuturum. Tale est homicidium ab eo factum, qui cum pulsaret campana, cadens tintinabulum percussit quemdam puerum, qui ex eo vulnere mortuus est. Homicidium *casuale mixtum* est illud, quod quis nec intendit, ne prævidit, sed prævidere potest, & debuit, atque ideo impedire tenebatur sive majorem adhibendo diligentiam, sive abstinendo ab opere periculoso, in quo satis peritus non erat. Unde patet in homicidio casuali mixto mortem alteri illatam partem esse voluntariam in causa, quatenus agens libere omittit diligentiam debitam, aut suscipit opus in quo satis peritus non est. Quare rursus homicidium non est voluntarium, prout voluntarium opponitur casuali mixto, quoties est contra intentionem agentis, etiamsi ex tali opere non raro, sed sæpius, modo tamen non necessario & inseparabiliter mors sequatur. Quia in Jure illud homicidium pro simpliciter voluntario exhibetur, quod directe volitum est, sive in se, sive in causa, cujus volitio cum effectus nolitio non compatitur. In jure siquidem exhibetur homicidium cui annectitur irregularitas, quod quis commisit per industriam, per insidias, voluntate sua, ex proposito, non ex casu. Porro istud homicidium necessario importat intentionem directam, voluntatem, & propositum occidendi. Tale ergo nonnisi homicidium in materia hactenus tam pænali pro simpliciter voluntario habendum est.

A contrario homicidium erit simpliciter voluntarium, etiamsi raro admodum ex actione quæ posita est sequatur, modo ab agente intentum, & præcogitatum fuerit, quia casuale, & voluntarium in intentionem agentis præsertim refundi debent, sicut ergo qui nec in se, nec in causa inseparabili homicidium voluit, non censetur directe & simpliciter illud perpetrasse, ita voluntarie homicidium patrassè judicari debet, qui illud intendens, usus est causa, quæ hoc effectu frustrari poterat. Unde si quis Campanam pulset ex intentione ut cadens malleus aliquem obruat, quem etiam de facto obrui contingit, qui Campana pulsat, ex hoc facto, licet parum communi, homicidii voluntarii reus erit.

*Quæres 2do: Ex quali homicidio oritur irregularitas?*

*Resp:* Ex homicidio voluntari. Ita Concilium Trident. Sess. 14. Cap: 7. ubi sic statuitur. *Qui sua voluntate homicidium perpetraverit etiamsi crimen id nec ordine*



*line Judiciario probatum, nec alia ratione publicum, sed occultum fuerit nullo tempore ad sacros Ordines promoveri possit, nec illi aliqua Ecclesiastica Beneficia, etiam si eorum animarum non habeant conferri liceat.* Porro voluntarii hujus homicidii illi omnes rei sunt qui actione sive physica sive morali proximi mortem directe intendunt, & procurant. Unde homicidæ voluntarii, ac per consequens irregulares sunt. *amo:* Omnes, qui in duello, in bello aperte, & clare injusto, in rixis, sive aliis quibuscumque circumstantiis, occasionibus, casibusque ex proposito alium injuste, & spontanee occidunt, sive protinus enecant, & absque mora, sive sensim & via longiori, ut si quis alteri præbeat venenum, quo paulatim extinguitur. Et id verum est quamvis ille qui talem posuit causam de suo facto sincere doleat, priusquam effectus sequatur, propterea enim non desinet ille esse irregularis.

*2do:* Homicidæ simpliciter voluntarii, atque irregulares sunt, homicidium mandantes, consulentes, & alii ad illud cooperantes, Hi enim omnes sunt veræ homicidii causæ; verum circa mandantem hæc sunt notanda *amo:* Eum directe homicidii reum esse, quamvis homicidium non expresse, sed tacite & implicite solum mandaverit, unde si injuriatus dicat filio, vel servo suo *ne redeas, donec me vindicaveris* reus erit subsequenti homicidii. Si tamen mandatum revocaverit, jam nec homicidii causa erit, quod in mandatarii nequitiam refundi debet, neque irregularis reputabitur. *2do:* Si mandatarius ab initio mandatum acceptare noluerit illudque postea mutata voluntate exequatur, etiam contra ipsius mandantis voluntatem, qui à priori proposito recessit, adhuc tamen idem mandans irregularitati subjectus erit, quia ad inducendam in hac materia irregularitatem, non requiritur mandatum quod obligationem faciendi alicui imponat, sed sufficit mandatum, quo alter veluti petitione, exhortatione ad agendum impellitur, hæc porro omnia, licet ab initio repudiata, semper idonea fuerunt ad movendum, semper mandatarii animo exhibebant eam esse mandantis voluntatem, ut hostis ejus occidatur, donec ipsemet sufficienter declaraverit se voluntatem hanc abjecisse. *3tio:* Si contingat mandatarium ab eo, cui mortem intentat occidi, mandans, quod & de consulente sentiendum est irregularis efficitur, non quidem ex homicidio voluntario, quia mandatarii mortem non intenderat, sed ex homicidio carnali, quia causa fuit cur alter propriæ mortis periculo



se exposuerit, vix enim fieri potest, ut quis sine sui periculo alteri mortem machinetur.

Jam vero circa consulentem hæc notanda sunt. *1mo*: Ille ab irregularitate immanis est, qui ad patrandum homicidium consilium quidem dedit, sed ei, qui jam ad illud patrandum adeo paratus fuerat, ut nullam ex hoc consilio determinationem acceperit. Aliter dicendum si consulens occidendi voluntatem in alio auxerit, puta si suo consilio effecerit ut alter facilius, citius, aut animo firmiter homicidium committat, tunc enim consulens irregularis est, quia jam consilium in mortem alterius influit. *2do*: Ut cognoscatur an consilium in mortem alterius influxerit? interrogandus est ille, cui datum est consilium, qui si dicat se consilio motum minime fuisse, nec voluntatem suam ullatenus ex eo, in proposito occidendi obfirmatam fuisse, consulens ab irregularitate liber erit, modo tamen is, qui interrogatur, talis sit, ut fidem mereatur. Quodsi id ab eo resciri nequeat, semper præsumendum est datum consilium in mortem alterius influxisse, ac proinde consulentem irregularem esse. *3tio*: Qui consilium occidendi alteri dedit, ut irregularitatem effugiat, debet omni modo consilium à se datum revocare, maligni quod injecit consilii motiva, aliis motivis elidendo, precibus importunis utendo, ut illum cui consilium dederat, à sententia deterreat. Quodsi hæc nihil prosint, debet occidendum secundum charitatis & prudentiæ regulas præmonere ut sibi caveat, quo peracto, liber erit ab irregularitate, morte etiam subsequuta, quæ tunc in solius occisi negligentiam, et in occidentis malitiam refundetur. Si autem occidendum monere non poterat, morte subsequuta erit irregularis. Unde Clericus qui Mulieri abortus consilium dedit, a quo postea eam amovere non poterat, est irregularis.

*Quæres 3tio*: Quid sentiendum est de iis, qui homicidio cooperantur?

*Resp*: De iis qui homicidio iniusto cooperantur, una vox omnium Theologorum est, illos irregulares esse. Et tales sunt. *1mo*: Omnes & singuli milites in bello iniusto existentes, etiam ii, qui neminem manibus trucidarunt, aut mutilarunt, tum etiam illi, qui ad istiusmodi iniquum bellum milites conducunt, necessaria subministrant. *2do*: qui iniuste damnatum ad mortem, inique accusarunt, judicarunt, contra eum false testificati sunt. *3tio*: qui homicidio, rixæ, pugnæ assistunt, parati opem



aggressor ferre, hi enim præsentia sua ad pugnam accurrunt, & sic stragi suo modo cooperantur. 4to: si plures communi consilio se se ad cædem excitent, nemo illorum effugiet irregularitatem, si vel unus tantum occidatur. Si autem absque communi consilio in rixa subito exorta, unus exg: à Titio læthali vulnere percussus fuit, ab aliis nonnisi leviter cæsus, interiit, solus Titius de homicidio tenebitur, & est irregularis. In dubio quia læthate vulnus inflixit? omnes pro irregularibus habendi sunt. Qui tamen certus esset se leviter solum percussisse, non esset irregularis. Qui homicidium voluntario consentiunt, tunc solum irregulares sunt, quando illorum consensus tantus est, ut restitutionis obligationem inducat. Unde cum rati habitio damni, quod exg. nomine Petri, ipso nesciente illatum est, eundem restitutioni obnoxium non faciat, si alias in damnum non influxerit, sic nec homicidii rati habitio, nomine & intuitu ipsius commissi, reum illum efficiet, aut irregularitati obnoxium reddet; quod verum est, etiamsi homicidium approbando, remuneraverit, quia semper verum est eum in illud nullatenus influxisse.

Quod attinet eos, qui homicidium non impediunt, cum impedire possunt & tenentur. hæc statuenda sunt. 1mo: qui solum ex charitate homicidium impedire tenentur, & non impediunt, non fiunt irregulares, quia qui solum charitatem violat, iniusti homicidii stricte obnoxii esse nequit, nec proinde est irregularis. Aliud est, si qui, homini periclitanti etiam ex sola charitate, subvenire paratus, per fraudem, vel dolum à quopiam ab eo charitatis opere abducatur; is enim qui à ferendo auxilio dolose abduxit, si inde quis pereat, irregularis efficitur. 2to: qui vero ex iustitia ad avertendam proximi cædem obligantur, si non obstant quantum possunt, irregularitati lubiacent, quia iustitiam lædendo, ex qua homicidii obsistere tenentur, stricte patrati homicidii rei sunt, ac propterea irregulares sunt. Unde etiam ferarum custos, cuius negligentia factum est, ut à fera homo occidatur, & mortis ipsius reus est, & irregularitati fit subiectus.

Quæres 4to: Quinam ex homicidio casuali irregulares fiunt?

Resp: 1mo: Qui vacat rei licitæ, & debitam adhibet diligentiam, ne quem occidat, non contrahit irregularitatem, aliasque homicidii pœnas, etiamsi ex facto ejus mors alicuius subsequatur. Quia hoc homicidium nec ulla-



tenuis voluntarium, nec culpabile est, non enim reus, aut culpabilis est, qui facit aliquid liciti, unde sequitur aliquod malum quod nec præcavere, nec prævidere, nec denique impedire potuit; & homicidium hanc irregularitatem non inducit, nisi voluntarium, & culpabile sit. Hinc irregularis non est, qui ex improvisa equi ferocitate raptus, obvium infantem opprimit, secus si cognovisset equi ferocitatem, eumque fræni impatientem esse, aut frænum nimis tenue esse ut equum coercere possit. Sed ut hic effugiat irregularitas, necesse est, ut vacando rei licitæ debita adhibeatur diligentia, si enim interveniat culpa, & in vitando periculo negligentia, tunc incurritur irregularitas, quia homicidium, quod non est evitatum, cum vitari potuerat, & debuerat, merito reputatur voluntarium, & culpabile est. Hinc irregularis est Magister, qui immoderate discipulum percutit, atque in hac percussione nimium excedit, fit irregularis, si inde mors discipuli sequatur. Ceterum ad contrahendam hanc casualis homicidii irregularitatem, requiritur culpa mortalis, ac proinde gravis in præcavendo periculo negligentia.

2do: Qui dat operam rei illicitæ, sed non periculosæ, seu rei, quæ quamvis prohibita sit, ex se tamen non tendit ad inferendam homini mortem, non nisi ex culpa lata casualis homicidii irregularitatem incurrit, quare ab ea immunis est, si ad præcavendum homicidium eandem adhibeat diligentiam, quam adhibent communiter homines, qui similem actionem exercent, debitam scilicet atque sufficientem, actionique proportionatam. Unde qui cædit ligna, aut venatur in aliena sylva, quæ sunt actiones illicitæ, sed non periculosæ, si adhibita omni diligentia nihilominus cadens arbor hominem opprimat, aut feram putando hominem occidat, non erit irregularis, quia istiusmodi homicidium prorsus involuntarium, & inculpabile est.

Qui vero vacat rei illicitæ, & non parum periculosæ, secuto homicidio, irregularis efficitur, licet sufficientem ad illud præcavendum adhibuerit diligentiam. Quia tale homicidium est voluntarium in causa, parere ergo debet irregularitatem; neque enim ulla diligentia naturam rerum mutare valet, & efficere, ut id quod valde periculosum est, à periculo liberum sit, ac proinde quisquis vacat rei periculosæ, voluntarie se exponit periculo, reus itaque est eorum, quæ periculum consequuntur.

*Quæ.*



*Quæres 5to: Utrum etiam ex mutilatione contrahatur irregularitas?*

*Resp:* Quemadmodum ex homicidio, ita pariter ex mutilatione iniusta, & iniuriosa contrahitur irregularitas, quamvis istiusmodi mutilatio foret casualis, dummodo sit vere culpabilis. Homicidium namque, & mutilatio in Jure æquiparantur ex cap: ult: de homicid: in 6to, & ex Clement: eodem titulo. Igitur sicuti ex homicidio voluntario, & casuali, ita etiam ex mutilatione voluntaria, atque casuali vere culpabili, ac iniuriosa, oritur irregularitas. Atque huic irregularitati subiacent quoque illi, qui inique cooperantur mutilationi.

Porro in irregularitate ex homicidio proveniente solus Romanus Pontifex potest dispensare, sed gravissima tantum & singularissima id exigente causa. Episcopi in hac irregularitate, etiamsi occulta sit, dispensare nequeunt, quia id eis expresse prohibitum est à Concilio Tridentino. Jam vero in irregularitate proveniente ex mutilatione Episcopi dispensare possunt; si occulta sit, quia licet mutilatio assimilatur in jure homicidio, non est tamen homicidium. Et ideo cum Concilium Tridentinum subtrahat Episcopis facultatem dispensandi in irregularitate ex homicidio voluntario proveniente, non infertur eos non posse dispensare in irregularitate ex mutilatione profluente.

Possunt etiam Episcopi dispensare in irregularitate contracta ex homicidio casuali occulto, quia homicidium casuale mixtum non est stricte, & proprie voluntarium. Concilium autem Tridentinum tantummodo homicidium voluntarium excepit, ne Episcopi in irregularitate ex eo proveniente, dispensarent. Quare si quis mulierem prægnantem percutiendo abortum procuraverit, quam gravidam esse ignorabat, aut leviter percutere intendens errante manu duriorem inflixit plagam, cum eo Episcopus dispensare potest, is enim simpliciter homicidii voluntarii reus censi nequit.

*Quæres 6to: Quis & quando ex iteratione Baptismi irregularitatem contrahit?*

*Resp:* Qui scienter rebaptizat, & rebaptisatur, ambo irregulares sunt, prout habetur in jure. Hand tamen irregularis est, qui in infantia semel & iterum baptisatus fuit, idemque dicendum est de eo, qui illum rebaptizat, quem baptisatum fuisse nescit, aut de cuius priori Baptismo legitimum est dubium. Est enim hæc irregularitas ex  
deli-



delicto. Porro nullum est delictum, in casibus modo recensitis rebaptizare. Qui ergo scienter, aut ex mera suspitione, absque maturo examine temere vel rebaptizat, vel se rebaptisari curat, irregulares sunt, atque huic irregularitati subiacent etiam rebaptisanti ministrantes. Plures autem Theologi ad hanc incurrendam irregularitatem requirunt rebaptisationem solemnem, & dicunt non sufficere privatam, aut occultam. Hæc vero irregularitas impedit quidem ascensum ad alios Ordines, non prohibet vero in susceptis ministrare. Irregulares quoque sunt, qui extra casum necessitatis ab Hæretico declarato Baptismum suscipiunt. Jam vero præter Baptismi iterationem nullius alterius Sacramenti iteratio irregularitatem inducit, quia nullibi in Jure constituta est. Unde qui bis confirmatur, graviter quidem peccat, sed non fit irregularis.

In irregularitate ex iteratione Baptismi proveniente, si est occulta, Episcopi dispensare possunt, quia est ex delicto.

*Quæres 7mo: Qui sunt irregulares ex susceptione, aut malo usu Ordinum?*

*Resp: amo.* Qui Ordines suscipiunt furtive, id est, qui examen fraudulenter effugerunt, sed per dolum, aut ignorante Episcopo immiscent se ordinandis, irregulares sunt. Ab hac irregularitate potest Episcopus dispensare si ipse hanc furtivam Ordinum receptionem, sub excommunicationis pœna non prohibuerit, sed quia modo passim juxta Pontificale Romanum Archidiaconus ante Ordinationem monet sub excommunicationis pœna, ne quis non descriptus, non examinatus, non approbatus, non nominatus ullo pacto ad Ordines audeat accedere, ideo hæc irregularitas, si publica sit, semper est Papæ reservata, nec ab Episcopo relaxari potest.

*2do:* Qui scienter ordinatur ab Episcopo excommunicato, suspensio, interdicto, deposito, peccat mortaliter, & est suspensus ab Ordinis sic suscepti executione, & aliquo modo irregularis efficitur, quia ad superiores Ordines promoveri nequit, nisi necessitas, vel utilitas aliud fuaserint, quemadmodum statuitur Can: 4. quæst: 2. Hæc autem de Ordinato ab Episcopo excommunicato, suspensio, interdicto dicta intelligi debent, de eo Episcopo, qui ut talis nominatim denunciatus est.

Præterea Joannes 22. Papa titulo 6. de voto constituit. *Qui durante Matrimonio nondum etiam consummato,*  
*ali-*



*aliquem de Sacris Ordinibus præsumit accipere, nec in susce-  
pto Ordine ministrare, nec ad superiores Ordines,  
etiam soluto Matrimonio potest promoveri.*

3tio: Ligatus majori excommunicatione, suspensio-  
ne, vel interdicto, etiamsi toleratus sit, & occultus, ir-  
regularis efficitur exercendo solemniter, seu ex officio  
actum majoris Ordinis, nisi legitima causa excuset. Ita  
habetur in variis Juris Canonici statutis. Ab hac autem ir-  
regularitate excuset ignorantia invincibilis, inadvertentia,  
oblivio inculpabilis, aut necessitas vitandi scandali. Nisi  
ergo ista excusent, irregularis erit qui excommunicatio-  
ne, aut suspensione, sive interdicto ligatus Epistolam,  
aut Evangelium cum Stola, aut Manipulo canunt, qui  
Matrimonium solemniter benedicunt, aut cum solemnita-  
te baptisant. Hæc enim propria sunt Sacri Ordinis mu-  
nia. Aliud esset, si privatim, & sine solemnitate in casu  
necessitatis baptisaret, id enim aliquando etiam Laici præ-  
stant. Porro qui duplici ligatus censura, Ordines Sacros  
exercet, duplicem quoque incurrit irregularitatem, aliud  
esset si una tantum ligatus censura pluries Missam cele-  
braſset.

4to: Denique qui serio, scienter, & quasi ex officio,  
Sacrum, quem non receperunt Ordinem, exercent, irre-  
gulares fiunt. Ad hanc autem incurrendam irregularita-  
tem, necesse est. 1mo: ut serio, & scienter Sacer exerceatur Ordo, si enim id fiat repræsentative solum ad  
cæremonias addiscendas, aut bona fide, si quis ex igno-  
rantia, sed non affectata, in Ordine Sacro, quem non  
habet, ministraverit, putansse eum habere, aut ministerium  
quod exercet esse sui Ordinis quem habet, irregularitatem  
non incurrit. 2do: ut Sacri Ordinis ministerium solemniter,  
& quasi ex officio exerceatur. Quia qui Minorum Ordi-  
num, quos non habet, officia exercet, aut Sacri Ordinis  
munus ita, qualiter aliquando etiam à Laicis peragitur,  
non est irregularis. Unde ille solum irregularis est, qui  
Sacri Ordinis talem exercet actum, & taliter, qualis, &  
qualiter peragi nequit nisi ab eo, qui hunc Ordinem ha-  
bet. Unde qui non est Sacerdos, & Confessionem excoi-  
piat, sive absolutionem proferat, sive non, irregularis  
efficitur.

Porro ab irregularitate ex violatione Censuræ in  
Ordinis exercitio contracta, solus Papa dispensat, si cri-  
men publicum sit, Episcopus vero si occultum fuerit. In  
ea vero irregularitate, quæ incurritur per exercitium  
Ordi-



Ordinis sacri, quem quis non habet, dispensat Episcopus quo ad usum Ordinis, quem quis jam habebat, post pœnitentiam triennio, vel biennio peractam. Papa vero quoad ascensum ad Superiores Ordines, si crimen publicum fuerit, si autem occultum fuerit, Episcopus etiam ad Ordines Superiores dispensat.

*Quæres 8vo: Utrum ex delicto hæresis incurratur irregularitas?*

*Resp:* Jure communi irregulares sunt hæretici, apostatæ à fide, eorumque fautores, defensores, unde nequidem post acceptam ab hæresi, sive apostasia absolutionem ordinari possunt, neque etiam ad Ecclesiastica Beneficia admitti valent.

Circa hæc sequentia notanda sunt *1mo*: Ut incurratur irregularitas ex hæresi necessum non est, ut hæresis sit notoria, notorietate facti, sed satis est, ut non sit mere interior. *2do*: Qui exterius ex metu, aut propter aliorum favorem captandum hæresi assentiuntur, non autem interius, hanc irregularitatem non incurrunt, quia reipsa hæretici non sunt. Ii tamen qui exterius solum à fide apostatant, nihilominus irregulares sunt. *3tio*: Qui à professione Religiosa apostatant, ex Jure communi ad Clericatus officium admitti non debent. Unde sequitur ipsos esse irregulares. Aliud est de Clericis, qui ab habitu, & tonsura Clericali apostatant, ii enim nullibi in Jure declarantur irregulares.

In nostris Regionibus qui in hæresi nati sunt, & postea fidem Catholicam professi fuerunt, non habentur pro irregularibus, unde cum ab errore conversi, absolutionem receperunt, possunt absque dispensatione ordinari, Beneficia possidere.

*Eremitarum Conventuum*  
*Mauris Regii*



# E R R A T A

| <i>Pag: lin: errata</i> | <i>corrige</i>    |
|-------------------------|-------------------|
| 4. 25. motus -          | - metus           |
| 5. 6. motum -           | - metum           |
| 6. 55. ant -            | - aut             |
| 7. 7. metn -            | - metu            |
| Ead: 17. initantur -    | - irritantur      |
| 8. 37. prodecentes -    | - procedentes     |
| 10. 22. bibera -        | - libera          |
| 13. 8. & ultimo -       | - & ut ultimo     |
| 16. 1. alie alij -      | - alij aliis      |
| Ead: 39. principuē -    | - praeipue        |
| 22. 31. excolentes -    | - excolantes      |
| 23. 22. cap: 2. -       | - cap: 12.        |
| 28. 22. probabili -     | - probabilis      |
| Ead: 39. Turcæ -        | - Turcæ           |
| 50. 30. uis -           | - suis            |
| 55. 9. pest -           | - peste           |
| 64. 13. impunit -       | - imponit         |
| 72. 24. petitur -       | - patitur         |
| 73. 8. illum -          | - illam           |
| 76. 4. pusillimitate -  | - pusillaminitate |
| Ead: 13. eque -         | - cæque           |
| Ead: 37. muitæ -        | - multæ           |
| 91. 35 & 36 diversit -  | - dirersis        |
| 101. 20. allicitus -    | - allicitur       |
| 141. 5. praeimus -      | - praeipimus      |
| 160. 19. se -           | - seu             |
| 175. 18. notarietas -   | - notorietas      |
| 185. 40. inhabilis -    | - inhabilis       |
| 205. 6. impræcande -    | - impræcanda      |
| 208. 23. dictum -       | - strictum        |
| 216. 21. proptera -     | - propterea       |
| ibid: 32. casu -        | - causa           |
| ibid: 34. eodem -       | - eadem           |
| 217. 12. mantis -       | - mentis          |
| ibid: 16. patest -      | - potest          |
| 220. 35. notiam -       | - notitiam        |
| 241. 1. eorum -         | - earum           |
| 257. 22. impediēti -    | - impediendi      |
| 271. 7. cagantur -      | - cogantur        |
| 274. 19. fide -         | - fidei           |




*Pag: lin: errata*

*corrige*


|       |     |              |   |   |              |
|-------|-----|--------------|---|---|--------------|
| 298.  | 10. | Hon          | - | - | Non          |
| 300.  | 41. | statuerut    | - | - | statuerunt   |
| 314.  | 33. | volunarie    | - | - | voluntarie   |
| 321.  | 31. | securrilitas | - | - | scurilitas   |
| 324.  | 28. | quævis       | - | - | quavis       |
| 527.  | 5.  | mortaliter   | - | - | moraliter    |
| 328.  | 11. | paritionem   | - | - | partitionem  |
| ibid: | 19. | fictias      | - | - | fictitias    |
| 332.  | 40. | mendaciam    | - | - | mendacium    |
| 333.  | 28. | ut           | - | - | aut          |
| 347.  | 34. | opionem      | - | - | opinionem    |
| 365.  | 40. | publicaria   | - | - | publica via  |
| 380.  | 4.  | itenerari    | - | - | itinerari    |
| 397.  | 6.  | illium       | - | - | illum        |
| ibid: | 42. | annus        | - | - | annos        |
| 401.  | 25. | reletationem | - | - | relaxationem |
| 413.  | 43. | excidit      | - | - | excedit      |
| 416.  | 41. | vera         | - | - | vero         |
| ibid: | 44. | sui          | - | - | cui          |
| 419.  | 17. | habete       | - | - | hebetate     |
| 464.  | 35. | commodataria | - | - | commodatarij |
| 465.  | 1.  | diet         | - | - | impediat     |
| 488.  | 20. | opum         | - | - | apum         |
| 481.  | 19. | consentur    | - | - | censentur    |
| 513.  | 6.  | emalument    | - | - | emolumentum  |
| 518.  | 2.  | ipse         | - | - | ipso         |
| 521.  | 5.  | moneranda    | - | - | moderanda    |
| 528.  | 38. | censentire   | - | - | consentire   |
| 544.  | 2.  | Præfeci      | - | - | Præfecti     |
| 550.  | 8.  | mutilitus    | - | - | mutilatus    |
| 554.  | 26. | emiti        | - | - | eniti        |
| 559.  | 17. | vulto        | - | - | vult         |
| 564.  | 35. | supecti      | - | - | suspecti     |

---











Biblioteka Jagiellońska



stdr0025045







C. VIII. 19